

**QUAESTIONUM
THEOLOGICAR
UM DE FIDE,
SPE, ET
CHARITATE...**

Silvestro Mauro,
Giovanni Maria Gabrielli



BIBLIOTECA
VITT. EMANUELE
14
8 H
4711



$B/B = V = 22$

QVÆSTIONVM
THEOLOGICARVM
DE FIDE, SPE, ET CHARITATE.
LIBER SEXTVS.

A V C T O R E

SYLVESTRO MAVRO
Societatis Iesu.

*Ex libris Monij S. I. lebastiani
ad Catacombas*



Romæ, Apud Angelum Bernabò, 1679.
Superiorum permissu.

Ioannes Paulus Oliua Præposi-
tus Generalis Soc. Iesu .

C*VM opus de Fide , Spe , &
Charitate à P. Syluestro
Mauro nostræ Societatis Sacerdote
compositum, aliquot eiusdem Socie-
tatis Theologi recognouerint, & in
lucem edi posse probauerint , fa-
cultatem facimus, vt typis mande-
tur, si ita ijs, ad quos spectat , vi-
debitur . In cuius fidem has litte-
ras manu nostra subscriptas, & si-
gillo nostro munitas dedimus .
Romæ 27. Septembris 1679.*

Ioannes Paulus Oliua .

Imprimatur, si videbitur Reueren-
diss. P. Mag. Sac. Pal. Apost.

I. de Ang. Archiep. Vrb. Vicesg.



Imprimatur :

Fr. Raimundus Capisuccus Sac. Ap.
Pal. Mag. Ord. Prædicat.

INDEX

Tractatum, & Quæstionum, quæ in
hoc sexto libro continentur.

QVÆSTIONES THEOLOGICAE.

De Fide, Spe, & Charitate;
Ad 2.2.S.Thomæ.p.1.

TRACTATVS PRIMVS.

*De obiecto formali, & materiali fidei, ac de
resolutione fidei in eius motiua
intrinseca? p.2:*

Q. **E**Xplicatur quot modis dicatur
fides, & proponitur ordo di-
sputandorum. p. 2.

Q.2. Vtrum virtutes theologicæ intelle-
ctus sint fides, & lumen gloriæ? p. 6.

Q.3. Vtrum assensus fidei resoluatur vlti-
mo in aliquas propositiones per se credi-
biles? p. 13.

Q.4. Vtrum assensus fidei resoluatur in
habitum fidei, vel in imperium volun-
tatis? p.25.

Q.5. Vtrum assensus fidei vltimo resoluatur
in ipsa mysteria reuelata. p.30.

Q.6. Vtrum assensus fidei vltimo resoluatur
in dominium, & præceptum Dei im-
perantis, vt credamus. p.35.

Q.7. Vtrum assensus fidei resoluatur pro-
ximè in summam Dei veritatem, & in
testimonium Dei? p.40.

§ 3

Q.8.

Index

- Q.8.** Vtrum assensus fidei ità proximè resoluatur in reuelationem Dei, vt vltimo resoluatur in auctoritatem Ecclesiæ, vel in motiua credibilitatis? p.44.
- Q.9.** Vtrum ad credendum sufficiat reuelatio externa, an requiratur interna, illuminatio Spiritus Sancti, quæ sit partialis locutio Dei? p.58.
- Q.10.** Vtrum assensus fidei tbeologicæ vltimo resoluatur in diuinam reuelationem sufficienter propositam? p.72.
- Q.11.** Vtrum cum assensu fidei diuinæ infusæ semper, & necessariò coniungatur assensus fidei humanæ, & acquisitæ? p.86.
- Q.12.** Vtrum assensus fidei diuinæ vltimo resoluatur in veritatē infallibilem? p.96.
- Q.13.** Vtrum motium, in quod soluitur vltimo assensus fidei, sit prima veritas vt immediatè credita per ipsam fidem, tanquam testans se esse primam veritatem. pag.101.
- Q.14.** Vtrum obiectum materiale fidei sit veritas reuelabilis, obiectum formale sit prima veritas, & reuelatio? p.113.
- Q.15.** Vtrum Deum esse summè veracem possit credi vt conclusio, & vt obiectum materiale fidei? p.124.
- Q.16.** Vtrum assensus fidei includat discursum formalem, vel solum virtualem? p.126.

TRACTATVS SECVNDVS.

*De resolutione extrinſeca fidei in motiua
credibilitatis. p.135.*

Q.17. Vtrum ſit euidenter religionem
Chriſtianam, & Catholicam
eſſe prudenter credibilem, & creden-
dam? p. 135.

Q.18. Vtrum ex vaticinijs veteris testamen-
ti probetur euidenter Chriſtianam reli-
gionem eſſe prudenter credibilem, &
credendam? 142.

Q.19. Vtrum ex miraculis probetur eui-
denter religionem Chriſtianam eſſe pru-
denter credibilem, & credendam? p. 166.

Q.20. Vtrum euidenter probetur cæteras
Sectas præter religionem Chriſtianam,
non eſſe prudenter credibiles? p. 178.

Q.21. Vtrum probetur euidenter ſolam re-
ligionem Catholicam Romanam eſſe
prudenter credibilem, omnes alias ſe-
ctas non eſſe prudenter credibiles, &
credendas? p.187.

TRACTATVS TERTIVS.

*De certitudine, obſcuritate, libertate, &
neceſſitate fidei. p.217.*

Q.22. Quid, & quotuplex ſit certitu-
do, & euidentia, & vtrum poſ-
ſint mutuo, vel non mutuo ſeparari,?
pag.217.

Q.23.

Index

- Q.23.** Vtrum ad certitudinem fidei requiratur, vt euidenter innotescat Deum reuelasse nostram religionem? p.225.
- Q.24.** Vtrum si innotesceret euidenter Deū esse veracem, & reuelasse mysteria, innotescerent euidenter etiam ipsa mysteria reuelata? p.245.
- Q.25.** Vtrum à non vidente Deum possit euidenter cognosci Deum loqui, & de facto ab aliquibus credentibus euidenter cognoscatur? p.156.
- Q.26.** Vtrum de ratione fidei infusa sit, vt ineuidenter cognoscat diuinam reuelationem? p.269.
- Q.27.** Vtrum per fidem possit credi obiectū materiale partialiter euidens? p.282.
- Q.28.** Vtrum actus fidei obscurus possit coniungi cum actu euidenti circa idem obiectum materiale totale? p.289.
- Q.29.** Vtrum cum actu fidei possit coniungi actus opinionis circa idem obiectum materiale totale, vel partialē? p.311.
- Q.30.** Vtrum & qua libertate actus fidei sit liber? p.333.
- Q.31.** Vtrum fides diuina sit itā certā, vt per illam non possimus credere aliquid falsum? p.345.
- Q.32.** Vtrum ad credendum fide diuina requiratur, vt credenda proponantur tali credibilitate, vt æquali proponi non possit vllum falsum? p.352.
- Q.33.** vtrum assensus fidei sit certior quolibet assensu naturali? p.363.
- Q.34.** Vtrum qui discrediti vnum articulum sufficienter propositum possit eodem

Questionum.

dem tempore fide diuina credere aliam?
p.372.

Q.35. Vtrum conclusiones theologicæ possint credi per actum fidei? p.377.

Q.36. Vtrum fides supernaturalis, tum habitualis, tum actualis sit omnibus ad iustificationem, & salutem necessaria necessitate mediij? p.387.

Q.37. Vtrum fides Dei vt remuneratoris sit adultis ad iustificationem, & salutem necessaria necessitate mediij. p.406.

Q.38. Vtrum omnibus adultis in quolibet statu fuerit necessaria necessitate mediij ad salutem, & iustificationem fides implicita, vel explicita Christi, & mysterij Trinitatij. p.416.

Q.39. Vtrum, & quorum articulorum fides sit necessaria necessitate præcepti? p.450.

TRACTATVS QVARTVS.

De Spe . p. 470.

Q.40. Vtrum obiectum materiale Spei sit bonum, futurum, arduum, possibile acquiri. p.471.

Q.41. Vtrum obiectum formale spei sit bonum, vel potius possibilitas rei sperata. p.472.

Q.42. Vtrum obiectum formale spei Theologicæ sit fidelitas, & omnipotentia Dei promittentis? p.484.

Q.43. Vtrum spes sit virtus theologica firmissimè, & super omnia sperans Deum vt obiectum materiale primarium? p.493.

Q.44.

- Q. 44. Vtrum posita fide diuinarum promissionum, possimus non sperare, & etiam desperare beatitudinem? p. 499.
- Q. 45. Vtrum spes detur in Beatis, in animabus Purgatorii, & in damnatis? p. 502.
- Q. 46. Vtrum is, cui reuelata fuisset reprobatio, posset sperare, & is, cui reuelata fuisset prædestinatio, posset desperare beatitudinem? p. 504.

TRACTATVS QVINTVS.

De Charitate: p. 512.

- Q. 47. Vtrum Charitas sit virtus theologica amandi Deum super omnia amore amicitiae propter summam bonitatem, qua Deus est summè bonus, & perfectus in se? 514.
- Q. 48. Vtrum ex charitate theologica possimus, ac debeamus amare non solum Deum, sed etiam nos ipsos, & proximū amore beneuolentiae? p. 521.



QVÆSTIONES THEOLOGICAE

De Fide, Spe, & Charitate

Ad 2. 2. S. Thomæ.



DE Virtutibus, ac Vitijs, eorum-
que actibus, qui exercentur per
actiones particulares, agendum
est non solum in vniuersali, sed
sed etiam in particulari. Ideo S. Thomas
postquam 1. 2. egit de vltimo fine homi-
nis, de actibus voluntarijs, liberis, mo-
ralibus, bonis, ac malis, ac de virtutibus,
& vitijs, & de peccatis, quibus mouemur
ad vltimum finem, vel ab eo auertimur,
ac demum de legibus, per quas dirigimur,
ac de gratia, per quam adiudamur ad con-
sequendum vltimum finem, 2. 2. descendit
ad agendum magis in particulari de singu-
lis virtutibus, ac vitijs, ac de alijs, ad
virtutes, & ad vitia spectantibus. Et quia
septem sunt præcipuæ virtutes, tres Theo-
logicæ, nimirum Fides, Spes, & Charitas,
& quatuor Cardinales, hoc est Pruden-
tia, Iustitia, Temperantia, & Fortitudo,
ad quas septem cæteræ virtutes possunt re-
duci, ideo agit de septem his virtutibus,
ac de alijs, quæ ad has septem reducuntur;
nec non de vitijs oppositis, de præceptis
ad vnamquamque virtutem pertinentibus,

Lib. V.

A

&

& de septem donis Spiritus Sancti, quæ virtutibus correspondent, & sic absoluit 2.2. & vniuersam doctrinam moralem.


Nos igitur aggredientes secundam secundæ S. Thomæ, hoc sexto libro agemus de tribus virtutibus Theologicis, nimirum de Fide, Spe, & Charitate, ac diuidemus has quæstiones in quinque Tractatus quorum tres primi erunt de Fide; duo reliqui de spe, & charitate. In primo Tractatu agemus de obiecto formali, & materiali Fidei, ac de resolutione Fidei in eius motiua intrinseca. In secundo agemus de resolutione extrinseca Fidei in motiua credibilitatis. In tertio de certitudine, obscuritate, libertate, & necessitate Fidei. In quarto disputabimus de Spe. In quinto de Charitate.

TRACTATVS PRIMVS

*De obiecto formali, & materiali Fidei,
ac de resolutione Fidei in eius motiua intrinseca?*

QVÆSTIO I.

*Explicatur, quot modis dicatur fides,
& proponitur ordo disputandorum.*

1.  Ides dicitur præcipuè quatuor modis. Primo fides dicitur fiducia, hoc est spes quædam valde perfecta. In hoc sensu sumi

sumi videtur fides, dum Matth. 17. dicitur: *Si habueritis fidem ut granum sinapis, dicetis menti huic, transi hinc illuc, & transibit.*

2. Secundo fides dicitur fidelitas in obseruandis promissis, & definitur à Tullio lib. 1. de Offic. *Fides est dictorum, conuentorumque constantia, & veritas, eiusque etymologiam explicat August. ep. 19. ad Hieronym. dicens: Fides latino sermone ab eo dicitur appellata, quia fit, quod dicitur.* In hoc sensu sumitur 1. Machab. 10. cum dicitur: *Perseuerate adhuc conseruare ad nos fidem.*

3. Tertio fides sumitur pro iudicio conscientiae, quo existimamus aliquid licite fieri, vt cum ad Rom. 14. dicitur: *Omne, quod non est ex fide, peccatum est.* In eodem sensu Iuristae dicunt possessorem bonae fidei praescribere, non autem possessorem malae fidei.

4. Quarto demum fides dicitur credulitas, qua credimus vera esse quae ab aliquo dicuntur propter auctoritatem dicentis, & diuiditur in humanam, qua credimus vera esse quae dicuntur ab homine propter auctoritatem hominis, & in diuinam, qua credimus vera esse quae dicuntur, ac dicta sunt à Deo, propter auctoritatem Dei, & de fide diuina ab Apostolo ad Hebr. 11. dicitur: *sine fide impossibile est placere Deo.*

5. Fides diuina subdiuiditur in actua-lem, & habitualem. Habitualis est habitus credendi Deo propter eius summam

A 3

autho-

4 *Quot modis dicatur Fides.*

authoritatem, ac de ea dicit Apostolus 1. ad Cor. 13. *manent fides, spes, charitas*, quia nimirum sunt habitus permanentes. Actualis est actus, quo credimus Deo propter eius summam authoritatem, ac de ea dicitur ad Hebr. 11. *fide credimus aptata esse secula verbo Dei*. Aliquando etiam nomine fidei intelliguntur obiecta fide tenenda, ut cum in symbolo Athanasij dicitur: *Hac est autem fides catholica, ut Deum in Trinitate, & Unitatem in Trinitate veneremur*.

6. Hoc loco debemus agere de fide in quarto sensu, in quantum nimirum est habitus, & actus, quo credimus Deo propter infallibilem eius authoritatem. Primo igitur ut statuamus existentiam fidei, eiusque differentiam à lumine Gloriæ, examinabimus, utrum virtutes Theologicæ intellectuus sint fides, & lumen gloriæ: deinde descendemus ad agendum de ipsa fide. Et quia habitus specificantur, & cognoscuntur per actus, actus verò specificantur, & cognoscuntur per obiecta præsertim formalia, agemus de obiecto formali, & motiuo fidei, ac de resolutione fidei in sua motiua. His explicatis, disputabimus de obiecto materiali, de actu fidei, eiusque certitudine, & obscuritate, ac libertate, & de alijs ad fidem pertinentibus.

7. Libet autem advertere Tractatum de Fide esse quamdam veluti Logicam Theologiæ. Ratio est, quia sicut in Philosophia præter tres primarias scientias naturæ

turales agentes directè de rebus, quæ scientiæ sunt Physica, Mathematica, & Metaphysica, datur Logica, quæ est scientia reflexa agens de actibus intellectus, quibus scimus res, ac de modo sciendi res; sic in Theologia, quæ est scientia supernaturalis, præter Tractatus, in quibus agitur directè de rebus reuelatis, nimirum de Deo, de Trinitate, de Incarnatione, de Sacramentis &c. datur tractatus reflexus de ipsa Fide, per quam cognoscimus, & credimus res reuelatas, ac de modo credendi res per fidem. Quia actus scientiæ est cognitio certa, & euidens illata ex quibusdam præmissis, ac primis principiis per syllogismum demonstratiuum, qui idcirco 1. Post. tex. 5. definitur, *Syllogismus scientificus, seu faciens scire conclusiones illatas*, ideo Aristoteles in libris de priori, & posteriori resolutione, qui continent præcipuam partem Logicæ, agit de resolutione actus scientiæ in sua principia, & inuestigat, quales debeant esse præmissæ, & qualia prima principia per se nota, ex quibus per syllogismum demonstratiuum, infertur actus scientiæ, hoc est conclusio scientifica, & quo pacto talia principia innotescant intellectui. Proportionaliter quia actus fidei est cognitio certa, & obscura rerum reuelatarum illata ex quibusdam præmissis, & principiis per syllogismum formalem, vel virtualem, qui vocari potest syllogismus fidei, seu syllogismus faciens credere conclusiones reuelatas, præcipua pars tractatus de fide est, in

qua agitur de resolutione fidei , & inuestigatur , quales sint præmissæ , & qualia principia , ex quibus inferitur actus fidei , & quò pacto talia principia innotescant intellectui .

Q V A E S T I O II.

Utrum virtutes Theologicae intellectus sint fides , & lumen gloria ?

1. **V**identur non esse : primò , quia Apostolus 1. ad Cor. 13. enumerat tantum tres virtutes theologicas , nimirum fidem , spem , & charitatem , dicens , *nunc autem manent fides , spes , charitas , tria hæc* ; ergo lumen gloriæ non est virtus theologica : alioquin virtutes theologicæ essent quatuor , quod repugnat Apostolo , & est contra omnes .

2. Secundo ad virtutem theologicam intellectus requiritur , vt habeat pro obiecto formali Deum , & aliquid diuinum , non autem aliquid creatum ; sed fides non habet pro obiecto formali Deum , sed creaturas ; ergo fides non est virtus theologica . Probatur maior : quod enim cognoscitur per aliud est obiectum purè materiale , illud autem , per quod cognoscitur aliud , est obiectum formale ; sed fides cognoscit Deum per creaturas , tanquam per quædam specula , & ænigmata , iuxta illud Apostoli 1. ad Cor. 13. *Videmus nunc per speculum in ænigmate* ; ergo &c.

3. Ter-

3. Tertio omnis habitus cognoscens Deum per ipsum Deum est virtus theologica; sed scientia infusa, qualis communiter ponitur in Anima Christi, est habitus cognoscens Deum per ipsum Deum; ergo scientia infusa est virtus theologica; sed scientia infusa distinguitur ab habitibus fidei, & luminis gloriæ; ergo virtutes theologice intellectus sunt tres, nimirum fides, scientia infusa, & lumen gloriæ.

4. Resp. quod ex dictis in Tractatu de Gratia quæst. 14. virtutes theologice sunt habitus per se infusi, per quos homo eleuatus constituitur potens versari circa Deum, vt vltimum finem supernaturalem; sed Deus est vltimus finis naturalis intellectus creati vt cognoscibilis per creaturas, & per obiectum formale creatum; est vltimus finis supernaturalis, vt cognoscibilis per se ipsum, & per obiectum formale diuinum, atque increatum; ergo habitus, per quos homo eleuatus constituitur potens cognoscere Deum per se ipsum, & per obiectum formale diuinum, versantur circa Deum vt vltimum finem supernaturalem, adeoque sunt virtutes theologice intellectus; sed lumen gloriæ in patria est habitus per se infusus, quo intellectus constituitur potens videre Deum immediatè in se ipso, & per diuinam essentiam, tanquam per adæquatum obiectum formale; fides in via est habitus per se infusus, quo intellectus constituitur potens credere Deo reuelanti propter increatam Dei veritatem, tanquam per obiectum

8 *De virtutibus theologicis intellectus.*

Etum formale, vt explicabitur inferius; ergo fides in via, & lumen gloriæ in patria sunt duæ virtutes theologicæ intellectus. Quod autem fides, & lumen gloriæ sint habitus per se infusi, probatur: nam homo per proprias vires non potest certissimè credere Deo reuelanti præsertim obscure propter diuinam veritatem, tanquam propter obiectum formale; multo minus potest per proprias vires videre Deum per diuinam essentiam, tanquam per obiectum formale, vt dictum est lib. i. de Deo quæst. 25. ergo vt constituatur intrinsecè, & permanenter potens videre Deum, & Deo credere, debet perfici habitibus per se infusis fidei, & luminis gloriæ, iuxta dicta quæst. 13. de gratia.

5. Quæri potest 1. in quo fides, & lumen gloriæ conueniant, ac differant?

6. Resp. quod conueniunt in hoc, quod tum fides, tum lumen gloriæ est virtus theologica intellectus, cum vtraque habeat pro obiecto formali aliquid diuinum, hoc est Deum: differunt in hoc, quod fides habet Deum pro obiecto formali solum assensus, non autem intelligentiæ, sed pro obiecto formali intelligentiæ habet creaturas; at lumen gloriæ habet Deum, & diuinam essentiam pro obiecto formali non solum assensus, sed etiam intelligentiæ, ideoque lumen gloriæ est virtus theologica multo perfectior, quam fides. Explicatur. Omnis assensus includit apprehensionem, seu intelligentiam obiecti, cui assentimur; nam non possumus assentiri ob-

obiecto, quin per eundem actum obiectum illud intelligamus, & apprehendamus; ergo assensus, quo per fidem credimus E. G. Deum esse trinum, & vnum, propter hoc motum, quia Deus, qui est summe verax, reuelavit se esse trinum, & vnum, includit intelligentiam, & apprehensionem Dei vt trini, & vnius, & vt summè veracis: Hoc posito, per actum fidei assentimur Trinitati propter diuinam veracitatem, tanquam propter obiectum formale, ideoque actus fidei habet pro obiecto formali assensus aliquid diuinum, hoc est ipsam diuinam veracitatem; at idem actus fidei Deum, & Trinitatem intelligit, & apprehendit per creaturas, & per species ab ipsis abstractas, iuxta illud Apostoli 1. ad Cor. 13. *cognoscimus nunc per speculum in ænigmate*; ergo actus fidei habet creaturas pro obiecto formali intelligentiæ, seu apprehensionis. E conuerso visio, qua Beati vident Deum, intelligit Deum non per species abstractas à creaturis, sed immediatè per ipsam diuinam essentiam, ideoque habet pro obiecto formali non solum assensus, sed etiam intelligentiæ aliquid diuinum.

7. Quari potest 2. vtrum scientia per se infusa, qualis communiter ponitur in Anima Christi, sit virtus theologica distincta à fide, & lumine gloriæ.

8. Resp. probabilem mihi esse partem affirmatiuam. Probatur, & explicatur: Scientia infusa Christi est, per quam licet cognoscat Deum, & diuina per species

A 1 abstra-

abstractas à creaturis, tamen ita penetrat diuina prædicata, ut illis immediate, & euidenter assentiatur; ergo scientia infusa Christi habet pro obiecto formali assensus aliquid diuinum, ac proinde est virtus theologica, vel saltem participat perfectionem propriam virtutis theologicæ. Hinc patet discrimen talis scientiæ infusæ à fide, & à lumine gloriæ. Differt à lumine gloriæ, quia hæc scientia infusa habet aliquid diuinum pro obiecto formali solius assensus, non autem intelligentiæ. Differt à fide: nam talis scientia infusa assentitur mysterijs immediate propter ipsa mysteria, quæ euidenter penetrat, puta assentitur Trinitati propter ipsam Trinitatem euidenter penetratam; at fides assentitur mysterijs non immediate propter ipsa mysteria, quæ non penetrat euidenter, sed propter authoritatem Dei reuelantis. Debet autem aduerti, quod scientia infusa est virtus theologica, in quantum assentitur immediate veritatibus diuinis intimè penetratis: in quantum verò assentitur immediate veritatibus creatis, non est theologica, cum non habeat pro obiecto formali assensus aliquid diuinum, sed aliquid creatum, nimirum ipsas veritates creatas.

9. Addo primo ex S. Thoma 2. 2. quæst. 2. artic. 3. quod discipulus dum est in statu imperfecto, ideoque non potest videre, & euidenter cognoscere veritatem eorum, quæ docetur à magistro, debet illa credere propter authoritatem magistri

gistrum iuxta illud Arist. 1. Elen. c. 2. *oportet addiscentem credere*, ut credendo paulatim perueniat ad videndam; hoc est euidenter cognoscendam veritatem eorum, quæ docetur; sed dum sumus in hac vita, sumus in statu imperfecto, ac proinde dinorum, quæ à Deo docemur, veritatem non possumus videre, & euidenter cognoscere in ipsa prima veritate, tanquam in obiecto formali; ergo debemus illa credere propter summam authoritatem Dei reuelantis, ac docentis, ut in patria perueniamus ad illa videnda in ipsa prima veritate; ergo in statu viæ debemus habere habitum fidei, quo credamus Deo docenti propter eius authoritatem; in patria debemus intrui habitu luminis gloriæ, quo quæ docemur à Deo, videamus in ipsa prima, & increata veritate.

10. Addo secundo ex eodem S. Thoma loco citato, inductione constare naturas inferiores non solum moueri, & perfici motibus proprijs, sed etiam per conjunctionem cum naturis superioribus eleuari ad hoc, ut participant motus, & perfectiones naturarum superiorum; E. G. aqua maris non solum mouetur motu proprio ad centrum, sed etiam à Luna eleuatur ad hoc, ut moueatur motu fluxus, & refluxus circa centrum; & in calo orbis inferiores non solum mouentur motibus proprijs ab occidente in orientem, sed etiam à primo mobili mouentur motu raptus ab oriente in occidentem: sed intellectus creatus coniungitur Deo ut obiecto,

12. De virtutibus theologicis intellectus.

Et, siquidem cognoscit ipsum ens, & ipsum verum increatum, & vniuersale continens omnia entia, & omnia vera, quod ens est Deus; ergo non est mirum, quod intellectus creatus non solum moueatur intelligibiliter ad suum finem motu proprio, & naturali, per hoc, quod Deum cognoscat per creaturas, tanquam per obiectum formale, sed etiam eleuetur à Deo ad motum intelligibilem diuinum, quo cognoscat Deum per ipsum Deum, tanquam per obiectum formale; sed motus intelligibilis, quo vnus intellectus inferior eleuatur ab intellectu superiori consistit in hoc, vt ab eo discat, tanquam discipulus à magistro, præsertim ea, quæ alioquin essent supra captum ipsius; ergo intellectus creatus eleuatur à Deo per hoc, quod tanquam discipulus à magistro addiscat veritates diuinas, quæ excedunt intellectum creatum, ideoque Christus Ioannis 6. dicit: *Omnis qui audiuit à Patre, & didicit, venit ad me.*

11. Ad 1. Apostolus 1. ad Cor. 13. enumerat solum virtutes theologicas viæ, quæ dantur in omnibus iustis viatoribus; tales autem virtutes solum sunt tres, nimirum fides, spes, & charitas. Lumen gloriæ est virtus theologica patriæ, & succedit fidei. Et quia in patria sicut non remanet fides, per quam credimus ea, quæ non videmus, sic non remanet spes, quia vt dicit Apostolus ad Rom. 8. *quod videt quis quid sperat?* ideo in patria dantur duæ solum virtutes theologice, nimirum lumen glo-

gloriæ, & charitas. Scientia infusa est virtus theologica, quæ non est communis iustis viatoribus, neque omnibus Beatis, sed aliquibus infunditur ex speciali priuilegio, & per hoc patet etiam responsio ad tertium argumentum.

12. Ad 2. distinguo maiorem: ad virtutes theologicas intellectus requiritur, ut habeant pro obiecto formali saltem assensus aliquid diuinum, concedo: non solum assensus, sed etiam intelligentiæ, nego; distinguo eodem pacto minorem; & nego consequentiam. Fides licet habeat pro obiecto formali intelligentiæ aliquid creatum, habet pro obiecto formali assensus aliquid diuinum, nimirum summam Dei veritatem, ideoque est virtus theologica, ut explicatum est.

QVÆSTIO III.

Vtrum assensus fidei resoluator ultimo in aliquas propositiones per se credibiles?

1. **V**Idetur, quod non: omnis enim propositio per se credibilis, vel est euidens, vel mere probabilis; sed assensus, qui resoluitur in propositiones euidentibus, est euidens; assensus, qui resoluitur in propositiones merè probabiles, est merè probabilis; ergo si assensus fidei resolveretur in propositiones per se credibiles,

les , vel esset euidens , vel esset mere probabilis ; sed assensus fidei non est euidens , cum sit obscurus , nec est merè probabilis , cum sit certissimus , vt docent communiter theologi ; ergo &c.

2. Resp. quod sicut compositio est constitutio rei ex suis principijs , & causis præsertim intrinsecis , sic resolutio , quæ opponitur compositioni , est dissolutio rei in sua principia , & causas præsertim intrinsecas . Resolutio alia est realis , alia intentionalis . Resolutio realis est , per quam aliquid à parte rei dissolvitur in sua principia , & causas , præsertim intrinsecas . Resolutio intentionalis est , per quam res dissolvitur intentionaliter , & per intellectum , assignando principia , & causas rei . Dum agimus de resolutione fidei , agimus de resolutione intentionalis , & quarimus , ad quæ principia , & ad quas causas ultimo reducatur assensus fidei ; sed omnis assensus intellectualis creatus non solum vt pleræque res pendet à causis efficientibus , materialibus , formalibus , & finalibus , sed etiam ab aliquo obiecto mouente ad assensum , quod proinde est causa motiua , quæ ab aliquibus reducitur ad causam efficientem , ab alijs ad causam formalem , & vocatur causa formalis extrinseca ; ergo dum agimus de resolutione fidei , quarimus , ad quas causas materiales , formales , efficientes , finales , & motiuas reducatur assensus fidei . Et quidem facile est assignare causas materiales , efficientes , formales , & finales fidei . Si
enim

enim quærat, in quo subiecto, tanquam in causa materiali recipiatur actus fidei; dicendum, quod actus fidei recipitur mediâtè in Anima, immediâtè in intellectu; si quærat, à quibus causis efficientibus procedat, dicendum, quod actus fidei procedit ab intellectu diuinitus eleuato per habitum fidei, vel per aliquam qualitatem transeuntem loco habitus, concurrente etiam illuminatione supernaturali Spiritus Sancti, & imperio voluntatis. Si quærat, finis fidei, dicendum, quod finis fidei est, vt ab illa illuminati, per spem, & charitatem, aliasque virtutes supernaturales, in obscura via huius sæculi progrediamur ad Deum nostrum finem supernaturalem. Si demum quærat, quænam sit forma, siue essentia, & quidditas fidei, dicendum, quod fides actualis est assensus supernaturalis, certus, & obscurus rebus reuelatis propter summam auctoritatem Dei reuelantis; fides autem habitualis est habitus per se infusus ad eliciendum talem assensum, vt magis explicabitur inferius.

3. Superest quaestio celeberrima, & propria huius loci de causa motiua, & quæritur, vtum assensus fidei habeat pro motiuo aliquas propositiones per se credibiles, in easque vltimo resoluator, tanquam in causas motiuas: & quænam sint propositiones per se credibiles, ad quas vltimo resoluitur assensus fidei?

4. Ad vitandas æquiuationes debet aduertri primò, quod aliud est motiuum intrinsecum, aliud motiuum extrinsecum fidei.

fidei . Motium intrinsecum est , à quo immediatè mouetur ipse actus fidei . Motiua extrinseca sunt , à quibus mouentur actus præsuppositi ad fidem . Explicatur . Actus fidei , quo credimus E. G. Deum esse trinum , & vnum , cum sit assensus intellectualis , debet niti suo motiuo , quod motium est , quia Deus , qui est summa veritas , reuelauit se esse trinum , & vnum : & hoc est motium intrinsecū illius actus . Idem actus fidei est voluntarius , & liber , ideoque præsupponit imperium voluntatis , quo volumus credere . Hoc imperium cum sit actus voluntatis , habet etiam suum motium , quod est E. G. quia honestum est credere , quia obligamur ad credendum &c. & hoc est motium extrinsecum fidei , quia est motium , non quo immediatè nititur ipse assensus fidei , sed quo nititur imperium voluntatis præsuppositum ad assensum fidei . Rursus quia nihil volitum , quin præcognitum , actus voluntatis , quo volumus credere propter honestatem , & obligationem credendi , præsupponit actū intellectus , quo iudicamus honestum esse credere Deo reuelanti se esse Trinum , & vnum , & nos obligari ad id credendum : & etiam hic actus intellectus debet niti suis motiuis , quæ pariter sunt motiua extrinseca fidei . Vt explicemus integram resolutionem fidei in sua motiua , debemus assignare motiua tū intrinseca , tū extrinseca fidei .

6. Primo igitur explicabimus , quibus motiuis nitatur immediatè ipse assensus fidei .

dei . Secundo inuestigabimus , quibus
motiuis nitatur actus voluntatis , quo
volumus credere , ac profiteri fidem
Christianam Catholicam Romanam .
Et quia volumus credere propter hoc mo-
tium , quia honestum est credere , & obli-
gamur ad credendum Deum reuelasse re-
ligionem , quam profiteamur , tertio inue-
stigabimus , ex quibus motiuis intellectus
noster moveatur ad iudicandum honestum
esse credere , ac nos obligari ad firmissimè
credendum Deum reuelasse religionem
Christianam , Catholicam , ac Romanam ,
& ad reiiciendas omnes alias sectas : & per
hæc reddemus rationem nostræ fidei , &
afferemus fundamenta , propter quæ , reie-
ctis cæteris sectis , vnice , & firmissimè pro-
fitemur religionem Christianam Catholi-
cam Romanam .

7. Debet aduerti secundo, quod tū sci-
re, tum credere dicitur dupliciter, commu-
niter nimirum, seu genericè, & propriè, ac
specificè . Scire propriè est assentiri eui-
denter alicui conclusioni , inferendo illam
legitimè ex præmissis per syllogismum . Et
quia prima principia non inferuntur ex
alijs præmissis per syllogismum , ideo pri-
ma principia propriè non sciuntur, sed in-
telliguntur , & habitus principiorum ab
Arist. 6. ethic. non vocatur scientia , sed
intellectus , seu intelligentia perfectior ,
quam scientia. Scire communiter, ac gene-
ricè est assentiri alicui propositioni eui-
denter , abstrahendo ab hoc , quod assen-
tiamur illi immediatè propter se , vel me-
diatè

diatè, inferendo illam ex alijs propositionibus, ac præmissis : & in hoc sensu etiam prima principia sciuntur, & habitus principiorum potest dici scientia. Proportionaliter credere propriè est assentiri alicui propositioni propter authoritatem dicentis talem propositionem. Credere communiter est assentiri alicui propositioni quomodocunque, abstrahendo ab hoc, quod assentiamur immediatè, vel mediatè, propter authoritatem dicentis, vel propter aliud motiuum. In hoc sensu propositio per se credibilis est, quæ quomodocunque per se ipsam, & per terminos, ex quibus constat, potest mouere ad assensum, absque eo quod inferatur ex alijs propositionibus, seu præmissis. Dum quærimus, vtrum assensus fidei, & omnis assensus intellectualis resoluator in aliquas propositiones obiectiuas per se credibiles, sumimus per se credibile communiter, non autem propriè. His præmissis, vt paulatim assignemus motiua intrinseca fidei.

8. Dicendum cum omnibus Theologis: assensus fidei, & vniuersim omnis assensus intellectualis habet pro motiuo aliquas propositiones per se credibiles, in easque vltimo resoluitur, tanquam in causas motiuas.

9. Probatur: nam propositio obiectiua per se ipsam credibilis est, quæ per se ipsam, & per terminos, ex quibus constat, mouere potest ad assensum, nec indiget, vt probetur alio medio termino, vel vt inferatur ex alijs propositionibus, seu

præ-

præmissis : E. G. prima principia , puta ,
*omne totum est maius sua parte : non potest
idem simul esse , & non esse &c.* sunt propo-
sitiones credibiles per se ipsas , quia ap-
prehensio terminis , prædicato nimirum ,
& subiecto , sufficienter mouent ad assen-
sum , nec indigent , vt probentur per alium
medium terminum , & vt inferantur ex
alijs propositionibus , seu præmissis . E con-
uerso propositio non credibilis per se
ipsam est , quæ per se ipsam , & per termi-
nos , ex quibus constat , non potest moue-
re ad assensum , sed debet probari alio me-
dio termino , & inferri ex alijs propo-
sitionibus , seu præmissis . E. G. propositiones
istæ : *cuiuscunque trianguli tres anguli sunt
æquales duobus rectis ; diameter quadrati est
incommensurabilis costæ* , non sunt credibi-
les per se ipsas , quia propositis . & appre-
hensio terminis , non possunt immediatè
mouere ad assensum , sed debent probari alio
medio termino , & inferri ex alijs propo-
sitionibus : sed omnis assensus intellectualis ,
resoluitur in aliquam propositionem obie-
ctiuam , quæ per se ipsam potest mouere ad
assensum ; ergo omnis assensus intellectua-
lis resoluitur in aliquam propositionem ,
per se credibilem . Probatur minor : nam
omnis assensus intellectualis vel est imme-
diatus , hoc est assentitur propositioni obie-
ctiuæ , quæ per se ipsam mouet ad assen-
sum , vt cum assentimur primis principijs ,
puta huic , *omne totum est maius sua parte* ,
& eo ipso habet pro motiuo propositio-
nem obiectiuam per se ipsam mouentem ad
assen-

assensum , adeoque per se credibilem , & sic resolvitur in propositionem per se credibilem ; vel est mediatum , hoc est assentitur propositioni obiectivæ , quæ non movet ad assensum per se ipsam , sed debet inferri ex alijs propositionibus , vt cum assentimur huic propositioni , cuiuscunque *trianguli tres anguli sunt æquales duobus re-* *ctis* , & etiam hic assensus mediatum debet resolui in propositionem per se credibilem ; ergo &c. Probatur secunda pars antecedentis : nam cum assentimur alicui propositioni non propter se ipsam , inferimus illam ex aliqua alia propositione ; vel ergo illa alia propositio est per se credibilis , & sic assensus mediatum resolvitur in propositionem per se credibilem ; vel non est per se credibilis , & assentimur illi propter aliam propositionem , de qua , si non est per se credibilis , redit argumentum , & proceditur in infinitum ; ergo ne procedamus in infinitum , sistendum est in aliquibus propositionibus per se credilibus , quibus assentiamur ratione sui , & quæ moveant ad assentiendum propositionibus mediatis per se non credilibus , ac proinde omnis assensus intellectualis ultimo resolvitur in aliquas propositiones per se credibiles , quæ moveant ad assentiendum reliquis ; ergo etiam assensus fidei debet ultimo resolui in aliquas propositiones per se credibiles .

10. Debet adverti , quod assensus immediatus ultimò sufficienter resolvitur in unicam propositionem obiectivam per se credi-

credibilem : E. G. assensus, quo dicimus, *omne totum est maius sua parte*, vltimò resoluitur in hanc ipsam propositionem per se, & ex terminis credibilem : assensus mediatus resoluitur saltem in duas propositiones per se credibiles, siquidem propositio per se non credibilis debet inferri per syllogismum, qui constat ex duabus propositionibus, seu præmissis. Si verò neutra præmissarum sit per se credibilis, vtraque debet probari per alias duas præmissas, quæ si sint per se credibiles, assensus resoluetur in quatuor saltem propositiones per se credibiles; si verò non sint per se credibiles, resoluetur in plures quatuor propositionibus per se credibilibus, & quò assensus est magis mediatus, adeoque debet probari per plura media, pluresque syllogismos, eò debet resolui in plures propositiones per se credibiles.

II. Ad argumentum in contrarium nego maiorem. Sicut dantur tria genera propositionum; nam aliquæ propositiones sunt certæ, & euidentés, aliquæ sunt solum probabiles, ac carent tum certitudine, tum euidentia, aliquæ sunt certæ, sed ineuidentés, quales sunt propositiones fidei, vt docent communiter Theologi; sic proportionaliter dantur tria genera principiorum, seu propositionum per se credibilium. Nam aliquæ propositiones possunt per se mouere ad assensum certum, & euidentem: aliquæ ad assensum merè probabilem; aliquæ ad assensum certum, sed ineuidentem, & obscurum, quales sunt

pro-



propositiones, in quas ultimo resolvitur assensus fidei, ut explicabitur inferius. Conclusiones, quæ legitimè, hoc est per syllogismum logicum inferuntur ex omnibus principiis certis, & evidentibus, sunt certæ, & evidentes. Conclusiones, quæ inferuntur ex omnibus principiis merè probabilibus, sunt merè probabiles; immo quia conclusio sequitur debiliorem partem, conclusiones, quæ inferuntur ex vna præmissa probabili, licet alia præmissæ sint certæ, & evidentes, sunt merè probabiles. Conclusiones, quæ inferuntur ex omnibus præmissis certis, sed obscuris, sunt certæ, & obscuræ, quales sunt conclusiones fidei: imo quia conclusio sequitur debiliorem partem, conclusio, quæ inferretur ex vna præmissa certa, sed obscura, ex alijs certis, & evidentibus, est certa, sed obscura. Debet adverti, quod hæc est differentia inter propositiones per se credibiles evidentes, & propositiones per se solum probabiles, vel certas, sed inevidentes, quod propositiones per se credibiles evidentes non solum per se movent, sed etiam per se necessitant ad assensum, adeoque convincunt intellectum, ita ut non possit illis non assentiri, & ad assensum non indigeat imperio vclunratis. At propositiones per se solum probabiles, vel certæ quidem, sed inevidentes, licet per se possint movere ad assensum in genere motiui obiectivi, tamen non necessitant ad assensum, neque convincunt intellectum, qui proinde & potest non assenti-

ri, & vt assentiatur præsertim assensu certo, determinari debet per imperium voluntatis, vt explicabitur infra suis locis.

12. Addo non esse verum vniuersaliter, quod assensus, qui resoluitur in omnes præmissas euidentés, est euidentis. Probatur, & explicatur. Dupliciter potest aliqua conclusio resolui in suas præmissas. Primo per syllogismum logicum fundatum in dicto *de Omni*, ac *de Nullo*, in quo syllogismo, posita veritate præmissarum, conclusio pro omni casu est vera, pro nullo potest esse falsa: secundo per syllogismum, qui iuxta doctrinam Aristotelis I. Rhet. cap. 2. potest vocari Rhetoricus, seu moralis, & vt explicauimus in summulis cap. 57. non fundatur in dicto *de omni*, & *de nullo*, sed in dicto *fere de omni*, *fere de nullo*, in quo syllogismo, posita veritate præmissarum, conclusio plerumque est vera, sed aliquando potest esse falsa, qualis est hic: *Pleræque matres amant filios; hæc est mater; ergo hæc amat filium.* Hoc posito, licet omnes conclusiones, quæ resoluntur in omnes præmissas euidentés per syllogismum logicum fundatum in dicto *de omni*, vel *nullo*, sint euidentés, tamen plurimæ conclusiones, quæ resoluntur in omnes præmissas euidentés per syllogismum Rhetoricum, vel moralem, sunt solum probabiles. Conclusiones fidei humanæ, quæ nimirum probantur autoritate humana, testium fide dignorum, vt plurimum resoluntur in omnes præmissas euidentés, & tamen sunt solum probabiles, quia resoluntur

nuntur per syllogismum non logicum, sed Rhetoricum, seu moralem : E. G. conclusio, quæ probatur Authoritate S. Augustini, resolvitur in hunc syllogismum : *S. Augustinus, ut plurimum dicit verum, licet aliquando ut homo fallatur; sed S. Augustinus hoc dicit; ergo hoc est verum*: in quo syllogismo vtraque præmissa est evidens, & tamen conclusio est solum probabilis. Ratio, quare conclusiones fidei humanæ resoluantur solum per syllogismum Rhetoricum, est, quia de nullo homine, cuius autoritas sit purè humana, non autem diuina, eo quod non scripserit diuinas Scripturas, potest assumi, quod semper verum dicat, & nunquam fallatur, siquidem *omnis homo mendax*, ut dicitur ad Rom. 3; ergo syllogismus ex autoritate purè humana non potest fundari in dicto *de omni*, sed solum in dicto de plerisque, ac proinde non potest esse syllogismus logicus, sed solum rhetoricus, seu moralis. E conuerso quia Deus semper verum dicit, syllogismus fidei diuinæ potest fundari in dicto *de omni*, ac potest esse syllogismus perfectissimè logicus, ita ut ex autoritate Diuina infallibiliter inferatur veritas eorum, quæ dicta sunt à Deo :



QVÆ

QV AESTIO IV.

Utrum Assensus fidei resoluitur in habitum fidei, vel in imperium voluntatis.

1. **P**rimo videtur vera sententia, quam Suarius tom. de fide, disp. 3. sect. 3. num. 3. & Cardinalis de Lugo disp. 1. de fide sect. 2. num. 6. tribuunt Melchiori Cano lib. 12. de locis Theologicis cap. 13. Aragonio 2.2. quæst. 1. art. 1. Bannez ibid, dub. 1. concl. 3. & ad 3. quæ sententia docet assensum fidei ultimo resolui in ipsum lumen supernaturale, hoc est in habitum fidei. Assensus enim fidei ultimo resoluitur in id, per quod mysteria credenda ita reuelantur, ut fiant nobis certò, sed obscurè credibilia; sed per lumen supernaturale, siue per habitum infusum fidei mysteria credenda ita reuelantur, ut fiant nobis certo, sed obscurè credibilia, ideoque habitus fidei 2. Petri cap. 1. comparatur lucernæ lucenti in caliginoso loco; ergo &c. Confirmatur: nam visio corporalis ultimo resoluitur in lumen corporeum, tanquam in motuum videndi, quia lumen ita est per se visibile, ut reddat visibiles colores, & alia obiecta illuminata; ergo ex proportionali ratione assensus fidei resoluitur in lumen spirituale fidei.

2. Secundò videtur assensus fidei ultimo resolui in imperium voluntatis. As-

Lib. V.

B

sen-

sensus enim fidei resoluitur in id, per quod ultimò determinamur ad credendum ; sed positis apprehensionibus supernaturalibus , sumus indifferentes ad credendum , & non credendum , siquidem assensus fidei est liber , & meritorius , & ultimò determinamur ad credendum per imperium voluntatis , quo liberè volumus credere ; ergo assensus fidei resoluitur in imperium voluntatis

3. Resp. quod cum quæstione superiori ostenderimus assensum fidei resolui in aliquas propositiones per se credibiles , tanquam in motium intrinsecum , propter quod credimus mysteria reuelata , sequitur , vt examinemus , in quas propositiones per se credibiles ultimo resoluantur . In hac controuerfia difficillima plures sunt Theologorum sententiæ , quas per varias quæstiones paulatim proponemus , & discutiemus . Dicendum igitur contra duas opiniones relatas : assensus fidei non resoluitur in habitum fidei , neque in imperium voluntatis , tanquam in motiua obiectiua credendi , licet in hæc resoluantur , tanquam in causas efficientes , & determinantes .

4. Probatur : nam motium obiectiuum credendi est illud , quod quia credimus , mouemur ad credendum reliqua ; sed non mouemur ad credenda mysteria Trinitatis , Incarnationis &c. quia credimus , & iudicamus nos habere habitum fidei , vel qualitatem transeuntem loco habitus , neque quia credimus , & iudicamus

mus

mus nos imperare actum fidei , imò cum credimus mysteria , sæpè non cogitamus, vtrum habeamus habitum fidei , & vtrum assensum imperemus per actum voluntatis; ergo assensus fidei non resoluitur in hæc , tanquam in motium obiectuum credendi.

5. Additum est in conclusione, assensum fidei resolui in illa duo , tanquam in causas efficientes , ac determinantes . Ratio est , quia ad actum fidei concurrunt efficienter habitus infusus , vel aliqua qualitas transiens loco habitus , vt dixi Lib.5. de Gratia quaest.20.nu.1. & 6.& vt docent communiter Theologi ; ergo assensus fidei resoluitur in habitum infusum, vel in qualitatem transeuntem , tanquam in causam efficientem . Rursus cum assensus fidei sit voluntarius , & liber , non possumus credere , nisi intellectus determinetur ad credendum per imperium voluntatis, quo volumus credere ; ergo assensus fidei resoluitur in imperium voluntatis , tanquam in determinatiuum credendi .

6. Infertur duas opiniones relatas vel esse falsas , vel non respondere quaestioni in eo sensu , in quo hoc loco agitur . Si enim docent assensum fidei resolui in habitum fidei , vel in voluntatem credendi , tanquam in motiua credendi , sunt falsæ ; si docent fidem resolui in hæc , tanquam in causas efficientes , ac determinantes , sunt veræ , sed non respondent quaestioni , in qua disputamus de resolutione fidei in motium credendi.

7. Ad primum distinguo maiorem :

B 2


assen-

assensus fidei ultimo resolvitur in id , per quod tanquam per motium credendi per se credibile , manifestantur , & reuelantur mysteria , concedo ; per quod tanquam per principium credendi manifestantur , & reuelantur mysteria , nego ; distinguo eodem pacto minorem ; & nego consequentiam . Assensus fidei ultimo resolvitur in id , per quod tanquam per motium credendi per se credibile , manifestantur , & reuelantur mysteria , ita vt reddantur proximè credibilia ; sed motium credendi per se credibile non est habitus fidei , vt probatum est , sed potius est ipsa diuina reuelatio , habitus autem fidei reuelat mysteria solum vt principium credendi ; ergo &c. Et quia mysteria redduntur proximè credibilia non per habitum fidei , sed per diuinam reuelationem , quæ continetur in sermonibus prophetis , hoc est in Scripturis diuinitus reuelatis , ideo non habitus fidei , vt assumitur in argumento , sed diuina reuelatio à S. Petro comparatur lucernæ lucenti in caliginoso loco : siquidem verba S. Petri sunt : *Habemus firmiorem propheticum sermonem , cui benefacitis attendentes , tanquam lucernæ lucenti in caliginoso loco .*

8. Ad confirmationem concedo antecedens , & nego consequentiam , ac retorqueo argumentum . Visio corporea resolvitur tanquam in motium videndi , non in potentiam videndi , quæ potest vocari lumen visuum , sed in lumen obiectuum emissum à sole , vel ab alio corpore luminoso ,

noſo, quod lumen ita eſt per ſe viſibile, vt reddat proximè viſibiles colores, & alia obiecta illuminata, quæ cum non illuminantur, non ſunt proximè viſibilia; ergo aſſenſus fidei reſolvitur tanquam in motium credendi, non in lumen fidei, quod eſt ipſa potentia ſupernaturalis credendi, ſed in diuinam reuelationem, quæ eſt lumen obiectiuum emiſſum à prima veritate, tanquam à ſole intelligibili, quæ reuelatio ita eſt per ſe credibilis, vt ſit motium credendi reliqua, & reddat proximè credibilia myſteria reuelata, quæ myſteria niſi illuminentur diuina reuelatione, non ſunt proximè credibilia, vt explicabitur inferius.

9. Ad ſecundum diſtinguo maiorem: aſſenſus fidei reſolvitur in id, per quod vltimo determinamur ad credendum, tanquam per motium credendi per ſe credibile, concedo; per quod vltimo determinamur in alio genere determinatiui, nego; diſtinguo eodem pacto minorem; & nego conſequentiam. Per imperium voluntatis vltimo determinamur ad credendum, ſed non tanquam à motiuo credendi, ſed in alio genere, ideoque aſſenſus fidei non reſolvitur in imperium voluntatis, tanquam in motium credendi.



QVÆSTIO V.

*Vtrum assensus Fidei ultimo resol-
uatur in ipsa mysteria re-
uelata.*

1. **V** Idetur vera sententia Scoti, qui in 3. dist. 25. Quæst. vnica docuit assensum fidei ultimo resolui in ipsam veritatem mysteriorum reuelatorum, ita vt mysterijs reuelatis assentiamur purè propter se, & non quia sunt à Deo reuelata, vel ex aliquo alio motiuo : primo quia, si per fidem assentiremur mysterijs Trinitatis, Incarnationis &c. non propter se, sed ex alio motiuo, puta quia sunt à Deo reuelata, assentiremur mysterijs, non per se, sed purè per accidens, eo pacto, quo potentia visua quia videt substantiam, præcisè in quantum est colorata, videt substantiam solum per accidens; sed est absurdum, quod per fidem assentiamur mysterijs reuelatis solum per accidens; ergo &c.

2. Secundo si fides assentiretur mysterijs non propter se, sed quia sunt reuelata, obiectum formale fidei essent ipsa mysteria, non secundum se, sed secundum esse reuelati; sed esse reuelati non est ens reale, sed rationis; ergo obiectum formale fidei, à quo specificatur, & desumit suam essentiam, & perfectionem, non esset

esset ens reale, sed ens rationis, quod est absurdum: siquidem obiectum formale habitus realis debet esse ens reale, non autem ens rationis:

3. Tertio eatenus fides non posset assentiri huic propositioni *E. G. Deus est Trinus, & Vnus* propter se, quatenus hæc propositio præcisè ex apprehensione terminorum apparet vt neutra, hoc est, vt non potius vera, quam falsa, eo pacto, quo huic propositioni, *asra sunt paria*, non possumus assentiri ex terminis, quia apparet vt neutra; sed intellectus per habitum fidei potest diuinitus eleuari ad assentiendum immediatè propositioni, quæ ex terminis apparet vt neutra; ergo &c. Probatur minor; nam non minus ex terminis apparet vt neutra hæc propositio, *Deus reuelauit se esse Trinum, & Vnum*, quam hæc, *Deus est Trinus, & Vnus*; sed intellectus per habitum fidei diuinitus eleuatur ad assentiendum immediatè propter se, & sine alio motiuo illi propositioni, *Deus reuelauit se esse Trinum, & Vnum*; ergo potest per habitum fidei eleuari ad assentiendum immediatè, & sine alio motiuo istis propositionibus, *Deus est Trinus, & Vnus: Verbum est Incarnatum &c.*

4. Resp. fidem non assentiri mysterijs reuelatis propter se, ac proinde assensum fidei non resolui vltimo in ipsa mysteria reuelata. Probatur: nam vel propositiones reuelatæ, puta quod *Deus est Trinus, & Vnus*, quod *Verbum est Incarnatum*, &c. præcisè ex apprehensione terminorum

rum apparent vt neutræ , hoc est vt non magis connexæ cum veritate , quàm cum falsitate ; vel apparent vt connexæ cum veritate ; neutrum dici potest ; ergo &c. Probatur prima pars minoris : nam si propositiones illæ ex apprehensione terminorum apparent vt neutræ , intellectus non potest illis immediatè assentiri , eo pacto , quo non potest immediatè assentiri huic propositioni *Astra sunt paria* , quia ex apprehensione terminorum est neutra . Et ratio à priori est , quia sicut obiectum amoris est bonum apparens , ita obiectum assensus est verum apparens ; ergo sicut voluntas non potest propter se ipsam amare obiectum , quod apparet vt neutrum , hoc est neque bonum , neque malum , sic intellectus non potest immediatè propter se ipsum assentiri propositioni , quæ apparet vt neutra , hoc est non magis connexa cum veritate , quam falsitate . Sicut verò voluntas ne supernaturaliter quidem potest amare quod non apparet vt bonum , ac proinde nullus habitus supernaturalis potest supplere apprehensionem boni ; sic intellectus ne supernaturaliter quidem potest assentiri propositioni , quæ non apparet vt vera , ac proinde nullus habitus potest supplere apprehensionem veri .

5. Probatur iam secunda pars minoris . Nam si propositiones reuelatæ , puta , *Deus est Trinus , & Unus , Verbum est Incarnatum* &c. ex apprehensione terminorum non apparent vt neutræ , eo quod
Deus

Deus infundat apprehensiones supernaturales , per quas ex illuminatione spiritus sancti appareant, vt connexæ cum veritate , iam assensus, quo illis assentimur immediate propter se , non autem propter auctoritatem Dei reuelantis , non est assensus fidei diuinæ ; eo pacto , quo cum Petrus mihi dicit , quod *omne totum est maius sua parte* , si ego assentiar huic propositioni immediate propter connexionem terminorum , & non propter auctoritatem Petri , talis assensus non est assensus fidei humanæ . Ad assensum nimirum fidei requiritur , vt habeat pro motiuo auctoritatem dicentis .

6. Ad 1. nego maiorem . Ad hoc, vt assentiamur alicui obiecto per accidens , non sufficit , vt assentiamur illi vt obiecto purè materiali propter aliquod aliud motiuum , tanquam propter obiectum formale ; alioquin scientiæ assentirentur suis conclusionibus solum per accidens , siquidem assentiuntur conclusionibus vt obiectis purè materialibus propter præmissas , tanquam propter obiectum formale . Vt igitur aliquod obiectum attingatur solum per accidens , requiritur , vt non attingatur immediate , & essentialiter , sed dicatur attingi solum , quia est connexum cum obiecto , quod immediate , & essentialiter attingitur : E. G. visus immediate , & essentialiter attingit sola accidentia coloris , & lucis , substantiam verò coloratam attingit , quia est subiectum coloris , & ideo visus per se videt sola accidentia

coloris , & lucis , substantiam verò coloratam videt solum per accidens ; sed per actus fidei essentialiter assentimur ipsis mysterijs reuelatis ; ergo licet mysterijs assentiamur vt obiectis purè materialibus , tamen assentimur per se .

7. Ad 2. nego maiorem . Mysteria esse reuelata est aliquid reale , cum sit denominatio extrinseca , per quam mysteria denominantur reuelata à diuina reuelatione realiter existente , licet quia talis denominatio habetur à forma mysterijs extrinseca , vocetur ens rationis logicum . Quamuis autem ens rationis metaphysicum , hoc est fictum , & impossibile non possit esse obiectum formale specificatum habitus realis , tamen ens rationis logicum , hoc est forma extrinseca potest esse obiectum formale specificatum habitus realis . Addo , quod si , vt aliqui dicunt , denominationes reuelati , cogniti , & alia , quæ habentur à formis extrinsecis , vltra formas reales extrinsecas includunt aliquam relationem fictam , per quam illæ formæ extrinsecæ concipiuntur afficere intrinsecè subiectum , quod denominant , obiectum formale fidei non est talis relatio ficta , sed est ipsa realis reuelatio ; siquidem credimus mysteria , non quia datur hæc relatio ficta , sed quia Deus , quæ est veritas infallibilis , mysteria reuelauit , quod totum est reale .

8. Ad 3. concedo maiorem , & nego minorem . Vt enim ostensum est in probatione conclusionis , intellectus neque-

su-

supernaturaliter potest assentiri propositionibus neutris . Ad probationem nego , quod intellectui illuminato , & edocto à Spiritu Sancto interius loquente appareat ut neutra hæc propositio , quod Deus reuelauerit mysteria fidei , ac veritatem religionis catholicæ , ut explicabitur infra , cum proponetur nostra sententia .

9. Dices : ergo potest etiam asseri , quod intellectui supernaturaliter illuminato à Spiritu Sancto , non apparet ut neutra hæc propositio , *Deus est Trinus , & Unus* , adeoque assentitur illi immediatè , ut docet Scotus :

10. Resp. negando consequentiam . . Eo enim ipso , quod intellectus assentiretur immediatè huic propositioni , *Deus est Trinus , & Unus* , non assentiretur per actum fidei , de cuius essentia est , ut habeat pro motiuo authoritatem , & testimonium dicentis , ut ostensum est in probatione conclusionis . Assentiretur igitur per scientiam infusam , vel per habitum proportionalem , ut explicatum est quest. 2.

QV AESTIO VI.

*Vtrum Assensus fidei ultimo resoluat
in dominium , & praeceptum
Dei imperantis , ut
credamus ?*

I. **V**idetur vera sententia Guillelmi Parisiensis , qui tract. 1. lib. de
B 6 Fide

Fide tit. 1. docet assensum fidei ultimo resolui in dominium , & præceptum Dei præcipientis nos credere , ac proinde fideles credere myſteria Trinitatis , Incarnationis &c. purè ex hoc motiuo , quia Deus ſupremus dominus præcipit , vt credamus . Obedientia enim non ſolum conuenit voluntati , ſed etiam intellectui ; ſed perfecta obedientia voluntatis conſiſtit in hoc , vt velimus facere quæ Deus præcipit , purè ex hoc motiuo , quia Deus præcipit ; ergo perfecta obedientia intellectus conſiſtit in hoc , vt credamus quæ Deus præcipit , purè ex hoc motiuo , quia Deus præcipit : ſed fides nihil aliud eſt , quam quædam perfecta obedientia intellectus , qua captiuamus intellectum in obſequium fidei ; ergo per fidem credimus Deo purè ex hoc motiuo , quia Deus præcipit .

2. Reſp. quod quia aſſenſus fidei utpote voluntarius , & liber , eſt actus elicitus ab intellectu , ſed imperatus à voluntate , poſſumus quærere , in quod motiuum reſoluatur aſſenſus fidei , qui eſt actus elicitus ab intellectu , & in quod motiuum reſoluatur actus , quo volumus credere , qui elicitur à voluntate , & imperat aſſenſum fidei . Dicendum igitur primò : motiuum intrinſecum aſſenſus intellectualis , quo credimus myſteria reuelata , non eſt dominium , & præceptum Dei , ac proinde aſſenſus fidei non reſoluitur intrinſecè in dominium , & præceptum Dei .

3. Probatur : nam aſſenſus mediatus ,
quo

quo assentimur alicui propositioni non propter se, resoluitur in illas praemissas, ex quibus per discursum formalem, vel virtualem inferimus talem propositionem; sed vt contra Scotum dictum est quaestione prima, assensus, quo assentimur mysterijs reuelatis, puta quo credimus *Deum esse Trinum, & Vnum &c.* non est immediatus; sed mediatus; ergo resoluitur in praemissas, ex quibus per discursum formalem, vel virtualem inferimus tales propositiones: sed tales propositiones non inferimus ex eo, quod Deus sit supremus dominus, & imperet nobis, vt talia mysteria credamus, sed ex eo, quod Deus sit summe verax, & talia mysteria reuelauerit; ergo non resoluitur in supremum dominium, & praecipium Dei, sed in summam Dei veracitatem, & in diuinam reuelationem. Probatur assumptum: nam praemissae debent apparere vt infallibiliter connexae cum veritate conclusionis, ita vt non possint esse verae, quin conclusio sit vera; sed istae duae praemissae, *Deus est supremus Dominus, & praecipit, vt credamus Trinitatem, Incarnationem &c.* praescindendo ab hoc, quod Deus sit verax, non apparent vt connexae cum hoc, quod *Deus sit Trinus, & Vnus, quod Verbum sit Incarnatum &c.* ideoque si existimaremus Deum non esse veracem, ac per suum supremum dominium posse aequè praecipere, vt credamus verum, ac vt credamus falsum, non videremus vllam connexionem inter illas praemissas, & veritatem myste-

myfteriorum ; ergo veritatem myfteriorum non inferimus ex eo , quod Deus fit fupremus Dominus , & præcipiat , vt credamus , fed ex eo quod Deus fit fumme verax , & myfteria reuelauerit . Nam iſtæ duæ præmiſſæ , *Deus eſt ſumme verax* , ac *proinde quicquid dicit eſt verum* ; ſed *Deus reuelauit Myſteria, Trinitatis , Incarnationis &c.* apparent vt neceſſariò connexæ cum veritate myſteriorum reuelatorum .

4. Addo , quod etiamſi dominium , & præceptum Dei apparerent vt connexa cum veritate myſteriorum , nihilominus aſſenſus fidei non resolveretur in dominium , & præceptum Dei . Ratio eſt , quia ſicut fides , qua credimus homini , non reſolvitur in præceptum hominis , ſed in veracitatem , & testimonium hominis , ſic fides , qua credimus Deo , non reſolvitur in dominium , & præceptum Dei , ſed in ſummam veracitatem Dei , & in testimonium eiufdem .

5. Dicendum ſecundo : actus voluntatis , quo volumus credere , poteſt reſolui in motiua plurium virtutum , puta Charitatis , Religionis , Obedientiæ &c.

6. Probatur ; nam poſſumus imperare aſſenſum fidei per actum Charitatis , ſiquidem Charitas ex amore Dei poteſt imperare actus omnium virtutum , etiam fidei ; ideoque Apoſtolus 1. ad cor. 13. dicit *Charitas omnia credit* : ſed ſi imperemus aſſenſum fidei per actum Charitatis , actus voluntatis imperans aſſenſum fidei reſolvitur

uitur in motium Charitatis, quod est summa bonitas Dei; ergo &c. Possumus etiam imperare assensum fidei per actum Religionis ex hoc motiuo, quia honestum est colere Deum, credendo super omnia ijs, quæ Deus reuelauit: possumus imperare per actum obedientiæ ex hoc motiuo, quia honestum est obedire Deo præcipienti, ut credamus; ergo actus voluntatis imperans assensum fidei potest resolui in motium religionis, & obedientiæ: & quia motium obedientiæ est præceptum, vel potius honestas obediendi Deo præcipienti, ideo actus voluntatis imperans assensum fidei potest aliquo pacto resolui in dominium, & præceptum Dei, ac proinde assensus fidei cum imperatur per actum obedientiæ, resoluitur extrinsecè in motium obedientiæ; & si opinio Guillelmi exponatur in hoc sensu, est vera. Addo actum fidei non solum posse imperari ex motiuis generalibus Charitatis, Religionis, Obedientiæ &c: sed etiam ex motiuo speciali honestatis credendi super omnia Deo obscurè loquenti propter summam Dei veracitatem, & si imperetur ex hoc speciali motiuo, imperatur à virtute speciali, quæ communiter vocari solet habitus piæ affectionis ad credendum, vel habitus piæ credulitatis &c.

7. Ad argumentum in contrarium distinguo maiorem: obedientia formalis, & propriè dicta non solum conuenit voluntati, sed etiam intellectui, nego: obedientia-

Obedientia quædam analogica , proportionalis , & impropria, concedo maiorem; concedo minorem; & nego consequentiam. Obedientia formaliter , & propria est virtus amans honestatem obediendi Deo , & ex amore huius honestatis volens in omnibus obedire Deo ; sed hæc virtus conuenit soli voluntati , non intellectui , cum amor sit actus non intellectus , sed voluntatis ; ergo obedientia formalis, & propria conuenit soli voluntati , intellectui verò conuenit solum obedientia quædam analogica , & proportionalis , quæ consistit in hoc , vt sicut per obedientiam voluntatis volumus facere omnia , quæ Deus præcipit ex hoc præcisè motiui , quia Deus , qui est supremus Dominus , præcipit , sic per obedientiam intellectus , hoc est per fidem credimus omnia , quæ Deus dicit , ex hoc præcisè motiui , quia Deus , qui est summa veritas , illa dicit .

QVÆSTIO VII.

*Vtrum Assensus Fidei resoluatur proximè in summam Dei veritatem ,
& in testimonium Dei ?*

1. **P**rimo videtur assensus fidei non resolui in summam Dei veritatem. Assensus enim fidei cum sit supernaturalis , non resoluitur in propositiones naturaliter , sed supernaturaliter notas ; sed hæc propositio , *Deus est summa veritas est* na-

naturaliter nota; ergo &c.

2. Secundo ex dictis quæst. 3. assensus fidei resolui debet in propositiones immediate, & ex terminis credibiles: sed hæc propositio, *Deus est veritas infallibilis*, non est immediate, & ex terminis credibilis, sed debet demonstrari; ergo &c.

3. Tertio videtur assensus fidei multò minus posse resolui in hanc propositionem, *Deus reuelavit mysteria Trinitatis, Incarnationis &c.* Nam non potest resolui in propositionem ex terminis neutram, & non magis connexam cum veritate, quam cum falsitate; sed propositio posita ex terminis est neutra; ergo &c.

4. Resp. cum S. Thoma 2.2. quæst. 2. art. 1. quem sequuntur communiter Theologi, assensum fidei saltem proximè resolui in summam Dei veritatem, & in testimonium, seu reuelationem Dei. Probat: nam assensus fidei Diuinæ proportionali modo resoluitur, ac assensus fidei humanæ; sed assensus fidei humanæ proximè resoluitur in veritatem, & in testimonium hominis; ergo assensus fidei Diuinæ proximè resoluitur in veritatem, & in testimonium Dei: Probat minor: nam fides humana resoluitur in præmissas, propter quas credimus esse vera quæ dicuntur ab homine; sed præmissæ, propter quas credimus esse vera quæ dicuntur ab homine, sunt istæ: *Hic homo est verax, adeoque plerumque verum est quod dicit; sed dicit hoc, puta, Petrum esse mortuum;*
ergo

ergo Petrus est mortuus ; ergo fides humana proximè resolvitur in veritatem , & in testimonium hominis ; ergo proportionaliter præmissæ , propter quas credimus esse vera quæ dicuntur à Deo , sunt istæ : Deus est prima , & infallibilis veritas , ac proinde semper verum est , quod dicit ; sed Deus dixit , & revelavit mysteria fidei , puta Deum esse Trinum , & Vnum , Verbum esse Incarnatum ; ergo vera sunt mysteria fidei , puta quod Deus est Trinus , & Vnus &c. Ergo fides diuina saltem proximè resolvitur in summam veritatem , & in testimonium , seu reuelationem Dei .

5. Dicendum secundo : prima , & infallibilis veritas , in quam proximè resolvitur assensus fidei , consistit in duabus perfectionibus , altera intellectus , per quam Deus est ita sapiens , vt non possit falli , sed sit determinatus ad cognoscendas res , vt sunt in se ipsis ; altera voluntatis , per quam Deus est ita verax , vt non possit mentiri , & fallere , sed est determinatus ad dicendum res , vt sunt in mente , siue intellectu ipsius Dei .

6. Probatur : nam prima , & infallibilis veritas , in quam resolvitur assensus fidei , est per quam Deus meretur , vt summè credamus dictis ipsius , & quæ proinde mouet ad summè credendum Deo ; sed Deus meretur , vt summè credamus dictis ipsius , quia est ita sapiens , vt non possit falli , & errare in cognoscendo , & est ita verax , vt non possit mentiri , & fallere in loquendo ; ergo &c. Probatur minor :
exi-

existimamus enim homines mereri fidem suis dictis per hoc , quod per sapientiam sint determinati ad cognoscendum plerumque res vt sunt in se ipsis , & per veracitatem sint determinati ad plerumque dicendum res , vt sunt in mente ipsorum , & quo magis sunt ad hæc determinati , eò censemus illos mereri maiorem fidem . Et quia nullus homo est totaliter determinatus ad hæc duo , sed quilibet potest falli propter defectum summæ sapientiæ , & potest mentiri propter defectum summæ veracitatis , ideo existimamus nullum hominem mereri summam fidem ; ergo Deus meretur summam fidem per hoc , quod sit summè determinatus ad hæc duo .

7. Confirmatur : nam si existimaremus Deum esse summè sapientem , ac proinde non posse falli , sed esse summè mendacem , ac proinde semper mentiri , vel esse summè veracem , adeoque non posse mentiri , sed esse summè insipientem , ac proinde semper falli , & errare , eo ipso censeremus Deum nullam mereri fidem ; ergo Deus meretur summam fidem per hoc , quod sit summè sapiens , & summè verax , vt explicatum est .

8. Posito , quod assensus fidei diuinæ proximè resoluator in summam Dei veritatem , & in diuinum testimonium , quaeritur , vtum non solum proximè , sed etiam vltimò resoluator in hæc duo : & quia assensus fidei , & vniuersaliter omnis assensus intellectualis vltimò resoluitur in propositiones immediatas , quibus assenti-

mur

mur propter se, quæritur, vtrum per fidem assentiamur immediatè summæ Dei veritati, & reuelationi, an potius mediatè, & propter aliquod aliud motiuum. Hanc quæstionem vt discutiamus, primo examinabimus, vtrum per fidem immediatè assentiamur diuinæ reuelationi: secundo, vtrum immediatè assentiamur diuinæ veracitati: & tunc ex professo respondebimus tribus obiectionibus propositis in rationibus dubitandi.

QVÆSTIO VIII.

Vtrum Assensus Fidei ita proximè resoluitur in reuelationem Dei, vt ultimò resoluitur in auctoritatem Ecclesiæ, vel in motiua credibilitatis?

1. **V**idetur vera sententia, in quam teste Cardinali de Lugo disp. 1. de Fide sect. 5. num. 5. videntur inclinare Durandus in 3. dist. 24. Quæst. 1. num. 8. & 9. & dist. 25. Quæst. 3. Gabriel in 3. quæst. 2. art. 1. Occamus in 3. quæst. 8. Medina lib. 5. de Recta in Deum Fide, cap. 11. & alij, quod Fides licet proximè resoluitur in auctoritatem, & testimonium Dei, tamen vltimo resoluitur in auctoritatem, & testimonium Ecclesiæ, & in motiua, propter quæ credimus Ecclesiæ habere maximam quamdam auctoritatem in testi-

testificando, quæ dicuntur motiua credibilitatis. Primò enim hæc propositio, *Deus reuelauit Religionem Christianam, & Catholicam*, est neutra, & non est propter se credibilis; ergo vt credamus Deum reuelasse Religionem Christianam, & Catholicam, indigemus alio motiuo: sed hoc motiuum est authoritas, & testimonium Ecclesiæ, ideoque interroganti, quare credamus Deum reuelasse nostram religionem? Respondemus, quod credimus propter authoritatem, & testimonium Ecclesiæ, iuxta illud Augustini lib. contra Epist. Fundam. cap. 5. *Ego verò Euangelio non crederem, nisi me Catholica Ecclesiæ commoueret authoritas*; ergo &c.

2. Secundò cum dubitatur, vtrum Deus aliquid reuelauerit, recurrimus ad Ecclesiam, & si Ecclesia per Concilia generalia, vel per summos Pontifices definiat Deum hæc reuelasse, firma fide credimus Deum hæc reuelasse; ergo assensus, quo credimus Deum aliquid reuelasse, vltimò resoluitur in authoritatem, & testimonium Ecclesiæ.

3. Tertio videtur assensus Fidei non resolui vltimò in testimonium, & authoritatem Ecclesiæ, sed in alia motiua, propter quæ credimus Ecclesiam habere summam quamdam authoritatem. Hæc enim propositio, quod Ecclesia Catholica habeat summam quamdam authoritatem, & maiorem, quam Ecclesiæ hæreticorum, Gentilium, & Mahometanorum, ex terminis est neutra; ergo vt credamus Ecclesiam

siam Catholicam habere summam quamdam authoritatem, indigemus alijs motiuis; ergo assensus fidei ultimo resolvitur in motiua, propter quæ credimus Ecclesiam Catholicam habere summam quamdam authoritatem: & in hæc motiua videtur resoluisse fidem suam Augustinus tom. 6. lib. contra Epist. Fundam. cap. 4. dicens; *multa sunt alia, quæ in eius (hoc est Catholicæ Ecclesiæ) gremio me iustissime teneant. Tenet consensus Populorum, atque Gentium; tenet authoritas miraculis inchoata, spe nutrita, charitate aucta, vetustate firmata; tenet ab ipsa Sede Petri, cui pascebas oves suas post resurrectionem Dominus commendavit, usque ad præsentem Episcopatum successio Sacerdotum; tenet postremo ipsum Catholica nomen, quod non sine causa inter tam multas hæreses, sic ista Ecclesia sola obtinuit, ut cum omnes hæretici se Catholicos dici velint, quærenti tamen peregrino alicui, ubi ad Catholicam conveniatur? nullus hæreticus vel basilicam suam, vel domum audeat ostendere.*

4. Quarto hæc ipsa, ac præsertim, quod Ecclesia Catholica fuerit miraculis inchoata, spe nutrita, charitate aucta; quod fuerit nunquam interrupta series Romanorum Pontificum B. Petri successorum; non sunt per se credibilia, sed creduntur solum propter authoritatem humanam historicorum; ergo assensus fidei resolvitur tandem in authoritatem humanam historicorum. Imò quia plerique, puta pueri, simplices, & indocti non le-

ge-

gerunt historicos, credunt hæc propter
authoritatem, ac testimonium Parochor-
um, Concionatorum, & Magistrorum;
ergo fides plurimorum resolvitur ultimò
in authoritatem humanam parentum, Pa-
rochorum &c.

5. Respondeo assensum fidei non pos-
se ultimò resolui in authoritatem Eccle-
siæ Catholicæ, neque in alia motiua ex-
plicata in rationibus dubitandi, tanquam
in motiua intrinseca fidei.

6. Probatur: nam si fides ultimò re-
solueretur in authoritatem Ecclesiæ mate-
rialiter sumptæ, hoc est in quantum ab-
strahit ab hoc, quod habeat assistentium
Spiritus Sancti, crederemus Deum reuelasse
Catholicam Religionem ex hoc motiuo,
quia Ecclesia Catholica materialiter sum-
pta testatur Deum reuelasse Catholicam
Religionem; sed Ecclesia Catholica ma-
terialiter sumpta nihil aliud est, quam
quædam multitudo hominum certis legi-
bus congregatorum; ergo crederemus
Deum reuelasse Religionem Catholicam,
quia hæc multitudo hominum id testatur;
sed hæc multitudo hominum ex se præcisè,
abstrahendo ab hoc, quod habeat assisten-
tiam Spiritus Sancti habet authorita-
tem purè humanam, & fallibilem; ergo
fides ultimò resolveretur in authoritatem
purè humanam, & fallibilem, adeoque
non posset habere summam certitudinem,
ad quam requiritur, ut ultimò resolvatur
in authoritatem infallibilem, in eaque
funderetur, iuxta illud Apostoli ad Hebr. 6,

Abun-

Abundantius volens Deus ostendere immobilitatem consilij sui, interposuit iusiurandum, ut per duas res immobiles, quibus impossibile est mentiri Deum, firmissimum solatium habeamus.

7. Responderi potest primò fidem, resòlvi in testimonium Ecclesiæ Catholice, non purè materialiter, sed formaliter sumptæ, hoc est yt habentis auctoritatem infallibilem propter assistentiam Spiritus Sancti, per quam est *columna & firmamentum veritatis*, vt dicitur 1. ad Timoth. 3.

8. Reijcitur hæc responsio. Nam, non est per se credibile, quod Ecclesia Catholica habeat assistentiam Spiritus Sancti, ac proinde auctoritatem infallibilem in testificando; ergo ad credendum, quod Ecclesia Catholica habet auctoritatem infallibilem in testificando, indigemus aliquo alio motiuo. De hoc motiuo quæro quoddam sit? Si dicatur, quod credo Ecclesiam Catholicam habere auctoritatem infallibilem in testificando, quia Deus reuelauit Ecclesiam esse columnam, & firmamentum veritatis, adeòque esse infallibilem in testificando: contra est, nam quod Deus reuelauerit Ecclesiam habere auctoritatem infallibilem in testificando, non est per se credibile; sed reuelationes per se non credibiles iuxta sententiam, quam impugnamus, credimus propter auctoritatem Ecclesiæ; ergo in resolutione Fidei committimus circulum vitiosum, dum credimus Deum reuelasse nostram Religionem, quia Ecclesia, quæ ha-

habet infallibilem authoritatem in testificando , testatur Deum reuelasse nostram religionem ; & credimus Ecclesiam habere authoritatem infallibilem in testificando , quia Deus id reuelauit .

9. Responderi potest secundo fidem nostram resolui vltimo in authoritatem Ecclesiæ , vt confirmatam miraculis , alijsque signis supernaturalibus ex Augustino allatis in tertio argumento .

10. Reijcitur : nam non est per se credibile , quod authoritas Ecclesiæ fuerit confirmata miraculis , alijsque signis supernaturalibus ; ergo vt id credamus , indigemus alio motiuo , & quæro , quod nam sit ? Si dicatur , quod credo Ecclesiam Catholicam confirmatam esse miraculis propter reuelationes diuinas contentas in Euangeliiis , & Actibus Apostolorum , committitur circulus , dum creditur Ecclesiam confirmatam miraculis , quia Deus id reuelauit , & creditur Deum hoc reuelasse , propter auctoritatem Ecclesiæ confirmatam miraculis , & alijs signis supernaturalibus . Si vero dicatur , quod Ecclesiam fuisse confirmatam miraculis , ac signis supernaturalibus innotescit sapientibus per testimonia historicorum , indoctis , & rudibus innotescit per testimonia Parentum , Parochorum , Concionatorum , & Magistrorum ; ergo fides sapientum resolverentur in testimonium humanum historicorum , fides rudium , & indoctorum in testimonium humanum Parentum , Parochorum &c.

11. Confirmatur: nam etiam Dæmones, qui ut dicitur Iac. 2. credunt, & contremiscunt, resoluunt suam fidem, merè naturalem in miracula, & alia signa, propter quæ conuicti credunt veram esse religionem Christianam; ergo ut nostra Fides supernaturalis, & infusa resoluatur in motiuium perfectius, debet vltimo resolui non in hæc signa, sed in reuelationem diuinam, quæ sola potest fundare summam, & supernaturalem certitudinem.

12. Responderi potest tertio ex doctrina S. Augustini lib. 22. de Ciuit. c. 8. ipsam fidem, qua Ecclesia toto orbe diffusa credidit Euangelio, esse ita miraculosam, ut non potuerit Mundus credere sine miraculis, vel si credidit sine miraculis, hoc ipsum sit maximum, & euidentissimum miraculum, & signum supernaturale, atque infallibile veritatis doctrinæ, quam Ecclesia credit; sed videmus Ecclesiam toto orbe diffusam firmissimè credere Euangelio; ergo videmus maximum miraculum, & signum infallibile veritatis fidei, quam profiteamur; sed in hoc signo supernaturali, & infallibili potest fundari certitudo supernaturalis fidei; ergo habemus motiuium infallibile, & supernaturale, in quo fundemus certitudinem supernaturalem fidei.

13. Reijcitur hæc responsio. Nam licet pauci sapientes post multos discursus, & post acquisitam magnam notitiam mysteriorum nostræ Fidei, & modi, quo credidit Ecclesia toto orbe diffusa, possint
resol-

refoluere suam fidem in motium explicatum, quod est supernaturale, & infallibile, tamen plures simplices, & indocti non possunt sic resoluere suam fidem: siquidem hoc ipsū, quod Ecclesia toto orbe diffusa crediderit Euangelio, nō aliundē ipsis innotescit, quam ex testimonio Parentum, Parochorum &c. ergo rudes, & indocti resoluunt suam fidem in authoritatem humanam Parentum, Parochorum &c. ac proinde non possunt fundare suam fidem in authoritate, & motiuo infallibili.

14. Respondet quarto P. Michael de Elizalda libro de forma quærendæ, & inueniendæ veræ religionis, quæst. 62. quod ut assensus fidei ultimo resoluatur in diuinam veritatem, & in diuinum testimonium, non requiritur, ut intellectus diuinæ veritati, ac diuino testimonio assentiatur immediatē propter se, sed requiritur, & sufficit, ut per demonstrationem moralem habeat certitudinem, & euidentiā moralem de hoc, quod Deus est veritas infallibilis, & reuelauit nostram fidem. Posito enim, quod intellectus propter motiua adducta in rationibus dubitandi, argumento tertio, habeat moralem certitudinem, & euidentiā de his duobus, nimirum quod Deus est veritas infallibilis, & quod reuelauit omnia, & singula, quæ creduntur in Ecclesia Catholica Romana, possumus per fidem omnia, & singula hæc credere, ut dicta à Deo, ac proindē illis assentiri assensu firmissimo, & commensurato diuinæ veracitati, & diui-

no testimonio, atque excedente rationes, & motiua, quibus probamus infallibilem Dei veritatem, ac diuinam reuelationem. Assensus igitur fidei resoluitur vltimò in illa motiua, quibus commensurat suam certitudinem; sed assensus fidei commensurat suam certitudinem diuinæ veritati, ac diuino testimonio, non autem rationibus, quibus probatur Deum esse veracem, & reuelasse mysteria; ergo fides vltimò resoluitur in diuinam veritatem, diuinumque testimonium, non autem in rationes, & motiua, quibus probatur Deum esse summè veracem, ac reuelasse nostram Religionem.

15. Reijcitur hæc sententia, primò, quia supponit neminem posse credere mysteria reuelata, nisi prius habeat euidenciam moralem de hoc, quod Deus illa reuelauerit; sed hoc est falsum, vt probatur inferius quæst. 23. ergo &c.

16. Reijcitur secundò; nam euertit duo principia communiter admissa, & quæ apud me sunt certa. Primum principium est: eo ipso, quod habemus euidenciam de præmissis, ex quibus logicè inferatur aliqua conclusio, & de bonitate illationis, per quam inferitur, habemus etiam euidenciam de conclusione illata: sed iuxta hanc opinionem omnis credens habet euidenciam moralem de hoc, quod Deus est summè verax, & de hoc, quod mysteria Trinitatis, Incarnationis &c. reuelauit, & tamen non habet euidenciam moralem de ipsis misteriis, quorum veritas logicè infer-

infertur ex hoc, quod Deus sit summè verax, & talia mysteria reuelauerit; ergo &c. Secundum principium est: impossibile est, vt cum alicui propositioni assentimur vnice propter aliquod motiuum, maiori certitudine assentiamur, quam alijs propositionibus, quæ sunt adæquatum motiuum assentiendi, siquidem in hac materia euidentis est illud principium, propter quod vnumquodque tale, & illud magis: sed iuxta hanc sententiam propositionibus istis, *Deus est Trinus, & Vnus, Verbum est Incarnatum*, assentimur vnice, quia Deus est Veritas infallibilis, & hæc mysteria reuelauit, & tamen maiori certitudine credimus Deum esse Trinum, & vnum, & Verbum esse Incarnatum, quam credamus Deum hæc reuelasse, siquidem de hoc, quod Deus hæc reuelauit, habemus certitudinem solum moralem, & commensuratam euidentiae solum morali probationum; de hoc autem, quod Deus sit Trinus, & Vnus, habemus certitudinem maiorem qualibet certitudine naturali non solum morali, & physica, sed etiam mathematica, & metaphysica, ideoque Augustinus lib. 7. Confess. cap. 10. dicit: *facilius dubitare me viuere me, quam esse veritatem, quam audiui in corde*, & Chrysost. hom. 12. in Epist. ad Hebr. dicit: *fides dici nõ potest, nisi circa ea, quæ non videntur, amplius, quam circa ea, quæ videntur, certitudinem quis habuerit*; ergo &c.

17. Obijcies: cum audio à teste fide digno aliquem librum esse S. Augustini,

quo : credimus Euangelio propter authoritatem Ecclesiæ, tanquam propter motium extrinsecum, concedo ; tanquam propter motium intrinsecum, nego . **A**uthoritas Ecclesiæ signis, & miraculis confirmata est motium, propter quod indicamus honestum, ac prudens esse credere Deum reuelasse Euangelium, & nos obligari ad id firmissimè credendum, adeoque est motium extrinsecum credendi . **A**t motium intrinsecum, propter quod credimus Euangelio, est, quia Deus illud reuelavit ; & intellectui illuminato à Spiritu Sancto proponitur sufficienter vt immediate credibile Deum reuelasse Euangelium, vt explicabitur quæstione 9. & 10. Eodem pacto credimus alia mysteria, propter diuinam reuelationem per se credibilem, tanquam propter motium intrinsecum, propter authoritatem Ecclesiæ, propter motiua credibilitatis, propter authoritatem Parochorum, Magistrorum, Parentum &c. tanquam propter motiua extrinseca.

22. **A**d 2. Cum dubitamus, vtrum Deus aliquid reuelauerit, recurrimus ad Ecclesiam, vt ex eius authoritate habeamus motium extrinsecum credendi. Posita definitione Ecclesiæ, est prudenter credibile, & credendum Deum reuelasse propositionem definitam, & tunc illuminamur à Spiritu Sancto, ita vt per talem illuminationem reddatur nobis immediate credibile Deum reuelasse propositionem definitam, & credimus propter diuinam reue-

revelationem per se credibilem, tanquam propter motiium intrinsecum .

22. Ad 3.& 4. Motiium intrinsecum, propter quod credimus Spiritum Sanctum Ecclesiæ catholicæ assistere, ac proinde Ecclesiam catholicam habere summam quamdam auctoritatem, est, quia Deus id reuelavit, quæ reuelatio intellectui illuminato à Spiritu Sancto est per se credibilis; alia motiua credibilitatis allata ab Augustino, nec non auctoritas historicorum, Parentum, Parochorum, Magistrorum &c. sunt motiua extrinseca, propter quæ iudicamus nos prudenter posse, ac debere credere Deum reuelasse religionem catholicam. Posito hoc iudicio de prudenti credibilitate, non deest fidelibus illuminatio Spiritus Sancti reddens reuelationem per se credibilem, & sic proponens sufficienter motiium intrinsecum fidei, vt magis explicabitur quæstione 9. & 10. Quod autem S. Augustinus verbis citatis afferat motiua solum extrinseca fidei, suaderi potest, perpendendo ipsa verba. Dicit enim: *multa sunt alia, quæ in eius (hoc est Catholicæ Ecclesiæ) gremio me iussissimè teneant. Tenet consensus populorum, atque gentium: tenet auctoritas miraculis inchoata &c.* Sensus est: motiua sunt multa, propter quæ iudico iustissimum, & honestissimum esse, vt profitear fidem, quam profitetur Ecclesia Catholica, nimirum consensus populorum, auctoritas miraculis confirmata &c. & quia iudico propter hæc motiua iustissimum, &

honestissimum esse, ut, repudiatis omnibus alijs sectis, profitear fidem Ecclesiæ Catholicæ, volo illam profiteri usque ad mortem, & dependenter ab hac mea libera voluntate, firmissimè credo Deum illam reuelasse, propter ipsam reuelationem per se credibilem, tanquam propter motiuum intrinsecum credendi.

Q V A E S T I O IX.

Vtrum ad credendum sufficiat reuelatio externa, an requiratur interna illuminatio Spiritus Sancti, quæ sit partialis locutio Dei?

1. **V**idetur ad credendum sufficere reuelatio externa, primò quia ad credendum sufficiunt reuelationes communes, per quas Deus per Patriarchas, Prophetas, & Apostolos reuelauit mysteria toti Ecclesiæ, nec requiruntur reuelationes priuatæ, per quas mysteria reuelet singulis fidelibus; sed solæ reuelationes externæ, quæ continentur in Scripturis, & traditionibus, sunt communes toti Ecclesiæ; reuelationes autem internæ, si darentur, essent priuatæ vniuscuiusque: ergo &c.

2. Secundò si ad credendum præter reuelationes externas requirerentur reuelationes internæ, hæretici, & infideles, qui

qui non credunt reuelationibus externis, quando illis proponuntur per Prædicatores Euangelij, possent se excusare, dicendo se non credere, quia Deus illis interius non reuelat veritatem eorum, quæ à Prædicatoribus proponuntur, & sine interna reuelatione non possunt credere; ergo &c.

3. Tertiò licet non possit euidenter contra hæreticos, & infideles probari doctrinam nostræ religionis esse veram, tamen potest euidenter probari talem doctrinam esse prudenter credibilem; sed si doctrina nostræ religionis non constitueretur sufficienter credibilis per reuelationem externam, non posset euidenter probari talem doctrinam esse credibilem, siquidem reuelatio interna vnicuique non potest euidenter probari; ergo &c.

4. Quartò vt dicitur c. 2. Epist. Iacobi, *Dæmones credunt, & contremiscunt*; sed Dæmones carent interna reuelatione, & illuminatione Spiritus Sancti; ergo credunt solum propter reuelationem externam, ac proindè veritas nostræ religionis est sufficienter credibilis propter solam reuelationem externam.

5. Quinto eàtenus probaretur ad credendum esse necessariam reuelationem internam, quatenus probatur requiri illuminationem Spiritus Sancti; sed talis illuminatio non debet esse interna Dei reuelatio, & locutio, sed mera propositio reuelationis externæ, per quam externa reuelatio reddatur proximè credibilis;

60 *De interna illuminatione fidei.*
ergo ad credendum non requiritur reuelatio interna.

6. Sextò si fides dicitur resolui etiam in reuelationem internam, coincidimus cum hæreticis, qui fidem suam resolvunt in internum instinctum Spiritus Sancti, quo dicunt se afflari.

7. Resp. certú esse contra Semipelagianos, quod ad credendum sicut oportet, hoc est fide infusa, nō sufficit reuelatio externa proposita per Prædicatores Euangelij, sed requiritur interna illuminatio Spiritus Sancti. Definita est hæc veritas à Concilio Arausicano 2. can. 7. in quo dicitur. *Si quis per naturæ vigorem bonum aliquod, quod ad salutem pertinet vitæ æternæ, cogitare, ut expedit, aut eligere, siue salutari, idest Euangelicæ prædicationi consentire, posse confirmat, absque illuminatione, & inspiratione Spiritus Sancti, qui dat omnibus suauitatem in consentiendo, & credendo veritati, hæretico fallitur Spiritu.*

Hoc posito, dubitatur, vtrum interna illuminatio necessaria ad credendum debeat esse quædam interna saltem partialis locutio Dei, an potius sufficiat, vt sit mera propositio reuelationis externæ, consistens in apprehensionibus supernaturalibus, per quas externa reuelatio proponatur ita, vt possit mouere ad credendum fide diuina.

8. Dicendum: interna illuminatio ad credendum necessaria debet esse quædam saltem partialis locutio Dei, & non sufficit, vt sit mera propositio reuelationis externæ.

9 Pro

9. Probatur: vt enim credamus, Deus debet nos docere interius veritatem eorum, quæ exterius docent Predicatores fidei; sed docere est quoddam loqui; ergo vt credamus, requiritur interna locutio, qua Deus nobis dicat, & reuelet ea, quæ proponuntur exterius.

10. Probatur maior ex Scriptura, & Patribus. Primò Isaïæ 14. dicitur: *ponam vniuersos filios tuos doctos à Domino*; ad quem locum alludens Christus Io. 6. dicit: *est scriptum in Prophetis, & erunt omnes docibiles Dei; omnis, qui audiuit à Patre, & didicit, venit ad me*: sed hæc debent intelligi de doctrina, qua Deus fideles docet interius, vt ex S. Augustino explicat S. Thomas lect. 5. in cap. 6. Ioan. dicens. *Omnes, qui sunt in Ecclesia, sunt docti non ab Apostolis, non à Prophetis, sed ab ipso Deo, & secundum Augustinum, hoc ipsum, quod ab homine docemur, est à Deo, qui docet interius*: Matth. 19. *Vnus est est Magister vester Christus &c.* ergo vt credamus, Deus debet nos docere interius, adeoque debet interius loqui. Confirmatur: nam Christus addit, *omnis, qui audiuit à Patre, & didicit, venit ad me*; ergo vt credendo veniamus ad Christum, debemus audire Patrem interius loquentem, ac proinde illuminatio interior necessaria ad credendum debet esse quædam interna locutio Patris.

11. Secundo Io. 14. dicitur: *ille & vos docebis omnia*. Quæ verba explicans S. Th. lect. 16, in cap. 14. Io. dicit: *quæcunque*

62 De interna illuminatione fidei .

cumque homo doceat extra , nisi Spiritus Sanctus interior det intelligentiam , frustra laborat , quia nisi Spiritus Sanctus adsit cordi audientis , otiosus est sermo Doctoris . Iob. 30. Inspiratio omnipotentis dat intelligentiam ; & in tantum , ut ipse filius organo humanitatis loquens non valet , nisi ipsemet interior operetur per Spiritum Sanctum ; ergo ex S. Thoma ad credendum , ita est necessaria interna locutio Spiritus Sancti , ut ipsemet Christus per locutionem externam non possit mouere ad credendum , nisi per Spiritum Sanctum loquatur etiam interior . S. Gregorius homil. 30. in Euang. explicans hæc eadem verba , ipse docebit vos omnia , dicit : quia nisi idem Spiritus cordi adsit audientis , otiosus est sermo Doctoris ; & paulò post subdit : non ergo docenti homini tribuat , quod ex ore docentis intelligit , quia nisi interior sit qui doceat , Doctoris lingua exterius in vacuum laborat .

12. Tertiò Ioannes ep. 1. cap. 2. dicit : Et non necesse habetis , ut aliquis doceat vos , sed sicut unctio eius docet vos de omnibus , & verum est , & non est mendacium ; & sicut docui vos manete in eo . Hæc verba explicans Augustinus tract. 3. in ep. primam Io: propè finem dicit : Iam hic videte magnum Sacramentum fratres . Sonus verborum nostrorum aures percutit , Magister intus est : Nolite putare quemquam hominum aliquid discere ab homine . Admonere possurus per strepitum vocis nostræ : si non est intus qui doceat , inanis fit strepitus noster ,

ster. Et paulò post : Magisteria forinsecus adiutoria quædam sunt ; Carbedram in celo habet , qui corda docet . De Domino dico ; propterea ait & ipse in Euangelio : Nolite vobis dicere magistrum in terra : Unus est Magister vester Christus : ipse ergo interius loquatur .

13. Quarto probatur ex alijs locis Augustini. Tract. 58. in Io: dicit. *Non sic loquitur Veritas intelligentibus mentibus ; Intus loquitur , sine sono instruit , intelligibili luce perfundit . lib. 1. de pec. mer. & rem. c. 36. lumen verum , quod illuminat omnem hominem venientem in hunc mundum , idè dictum est , quia nullus hominum illuminatur , nisi ab illo primo lumine Veritatis , quod Deus est , ne quisquam putaret ab eo se illuminari , a quo aliquid audit , ut discat . Non dico quemquam magnum hominem , sed nec si Angelum contingat ei habere Doctorem . Adhibetur enim sermo veritatis extrinsecus actione corporali . Verum tamen neque qui plantat est aliquid , neque qui rigat , sed qui incrementum dat Deus . Audit quippe homo , vel hominem , vel Angelum , sed ut sentiat , & cognoscat verum esse quod dicitur , illo lumine intus mens eius aspergitur , quod in æternum manet . Et clarissimè lib. 11. Conf. cap. 3. Scripsit hæc Moyses ; scripsit , & abiit . Nec enim nunc ante me est . Nam si esset , tenerem eum , & per te obsecrarem , ut ista mihi panderet . Sed unde scirem , an vera diceret . Intus utique mihi , intus in domicilio cogitationis .*

64 De interna illuminatione fidei .

tationis veritas sine strepitu syllabarum diceret , verum dicit : & ego statim confidenter illi homini tuo dicerem : verum dicis . Plura alia loca possent afferri , sed hæc abundè sufficiunt . Sanctus enim Augustinus vbique statuit tanquam firmissimum dogma, contra Pelagianos, quod sicut ad bene agendum non sufficit lex , & instructio externa, sed requiritur interior gratia illuminationis , & inspirationis , sic ad credendum non sufficit externa reuelatio , eiusque propositio per hominem , vel Angelum, sed requiritur interna reuelatio, & locutio , per quam Deus loquatur ad cor vniuscuiusque , & testetur vera esse, quæ extrinsecus proponuntur . Et in hoc sensu potest intelligi illud Io: ep. 1. c. 5. *Qui credit in filium Dei , habet testimonium Dei in se*, hoc est habet interius in seipso locutionem Dei , qua testatur Christum esse filium Dei, & alia mysteria fidei .

14. Quintò probatur ex S. Thoma, qui 2. 2. quæst. 2. art. 9. ad 3. dicit . *Dicendum , quod ille , qui credit , habet sufficiens inductiuum ad credendum . Inducitur enim auctoritate diuinæ doctrinæ miraculis confirmatæ , & quod plus est interiore instinctu Dei inuitantis ; unde non leuiter credit ;* ergo S. Thomas docet , quod ad credendum , vltra diuinam doctrinam miraculis confirmatam , & exterius propositam, requiritur interior instinctus, vt motiuum , & inductiuum credendi , & talem interiorem instinctum , vt in Commentario Caietanus aduertit, præponit omnibus alijs

alijs motiuis , ac docet esse præcipuum motium , quia , vt inquit Caietanus : *Solius Dei est agere in cor , & ipse spiritus redait testimonium Spiritui nostro , quod Filius Dei sumus , quod nemo nouit , nisi qui accipit .*

15. Hinc potest cōclusio probari sexto ratione . Vt enim credamus fide diuina , & supernaturali ; Deus sua locutione debet tangere non solum aures forinsecus , sed ipsum cor , & intellectum intrinsecus , & illum eleuare , & mouere ad credendum : sed non potest tangere cor locutione extrinseca , sensibili , & materiali , nisi compleatur , & quodammodo continuetur locutione interna intelligibili , & spirituali ; ergo ad credendum fide diuina vltra locutionem externam , & sensibilem , requiritur locutio interna , & intelligibilis , tangens immediatè cor , siuè intellectum hominis .

16. Ad 1. distinguo maiorem : ad credendum sufficiunt reuelationes communes ex obiecto , secundum speciem , & quæ nemini negantur , concedo ; sufficiunt reuelationes communes ex subiecto , & secundum indiuiduum , nego : distinguo eodem pacto minorem ; & nego consequentiam . In eodem sensu dicitur ad credendum sufficere reuelationes communes , in quo dicitur ad bene operandum sufficere auxilia communia ; sed dum dicimus ad operandum sufficere auxilia communia , dicimus sufficere auxilia communia secundum speciem , non autem dicimus sufficere

sufficere auxilia communia ex subiecto, & in indiuiduo : nam procul dubio illud lumen, & auxilium internum diuinæ gratiæ, quod datur Petro, non datur Paulo; ergo dum dicimus ad credendum sufficere reuelationes communes, dicimus sufficere reuelationes communes secundum speciem : nam procul dubio illa numero interna locutio, quæ datur in Petro, non datur in Paulo; sed quæ sunt communia secundum speciem, licet non sint communia in indiuiduo, simpliciter, & absolute dicuntur communia, ideòque manus, pedes, oculi &c. dicuntur simpliciter, & absolute esse communes hominibus, quia sunt communes secundum speciem, licet isti numero oculi, qui sunt in Petro, non sint communes alteri homini; ergo reuelatio etiam interna simpliciter, & absolute dicenda est communis. Addo sufficere reuelationes communes ex obiecto, per quas nimirum reuelantur mysteria communiter ab omnibus credenda, & non requiri reuelationes priuatas ex obiecto, per quas reuelentur quædam extraordinaria, puta, quod aliquis sit prædestinatus, sit moriturus tali die &c. Debet aduerti, quod sicut ad bene operandum non sufficit gratia externa, sed requiritur interna, quæ diuiditur in sufficientem, quæ est necessaria necessitate antecedenti, & in efficacem, quæ est necessaria solum necessitate consequenti, vt dictum est anno superiore; sic ad credendum non sufficit reuelatio externa, sed requiritur interna, quæ diuiditur

tur

tur in sufficientem, quæ datur omnibus, dum obligantur ad credendum, & est necessaria antecedenter, & in efficacem, quæ datur solum ijs, qui de facto credunt, & est necessaria solum necessitate consequenti. Nos hoc loco, dum dicimus ad credendum necessariam esse reuelationem internam, loquimur de sufficienti, quæ proinde est communis omnibus, qui tenentur credere, & est necessaria necessitate antecedenti.

17. Ad 2. distinguo maiorem: qui non credunt, possent se excusare, dicendo, se non credere, quia non habent reuelationem internam, & dicendo hoc mentirentur, concedo; & dicendo hoc non mentirentur, nego. Sicut proposito sufficienter præcepto supernaturali, Deus dat unicuique auxilium internum sufficiens ad illud obseruandum, ideoque qui se excusat, dicens se non obseruare præcepta supernaturalia, quia non habet auxilium internum sufficiens, mentitur; sic proposita sufficienter per Prædicatores Euangelij reuelatione externa de veritate nostræ Religionis, Deus dat unicuique internam illuminationem, & reuelationem necessariam, & sufficientem ad credendum, ideoque infidelis, & hæreticus se excusans, ac dicens se non credere, quia non habet internam reuelationem, mentitur. Ideo Christus Matth. ultimo cum dixisset, *Prædicate Euangelium omni Creaturæ*, subdit: *qui crediderit, & baptizatus fuerit, saluus erit, qui verò non crediderit, condemnabitur*, quia

quia proposità fide per externam reuelationem, Deus dat unicuique internam illuminationem, reuelationem, & gratiam necessariam, & sufficientem ad credendum.

18. Ad 3. distinguo maiorem: potest euidenter probari doctrinam fidei esse credibilem fide aliqua abstrahente à diuinà, & humanà, concedo; fide diuina, nego: distinguo eodem pacto minorem; & nego consequentiam. Potest quidem euidenter probari doctrinam fidei esse credibilem fide aliqua abstrahente à diuinà, & humanà; sed non potest euidenter probari saltem communiter, doctrinam fidei esse credibilem fide diuina, de cuius essentia est, vt sit supernaturalis, & infallibilis: siquidem supernaturalitas, & infallibilitas nostræ fidei non est euidens, sed solum est certa ex fide. Iam licet ad credendum fide diuina, & infallibili, necessaria sit interna reuelatio supernaturalis, quæ non potest euidenter probari, tamen motiua externa fidei, vt ostèdetur q. 17. & seq. tanti sunt ponderis, vt per ipsa possit euidenter probari doctrinam fidei nostræ esse prudenter credibilem propter talia motiua, ac negari non posse sine summa imprudentia, abstrahendo ab hoc, vtrum fides, quæ possunt credi, sit diuina, & supernaturalis, an pure naturalis, & humana?

19. Ad 4. distinguo maiorem; Dæmones credunt fide merè naturali, fundata in externa apparentia signorum, concedo; fide supernaturali, & diuina, nego; concedo.

cedo minorem ; & distinguo consequens ; ergo ad credendum fide diuina , & supernaturali , non est necessaria interna reuelatio, nego consequentiam; ad credendum aliqua fide merè naturali , concedo consequentiam . Demones , utpote qui pollent intellectu perspicacissimo , & naturaliter penetrant externa motiua nostræ Religionis , illis conuicti , fide naturali credunt nostram religionem fuisse reuelatam à Deo , sed quia carent internâ illuminatione Spiritus Sancti non possunt id credere fide diuina; ergo ad credendum fide supernaturali , & diuina, necessaria est interna reuelatio, & illuminatio Spiritus Sancti: & sic argumentum retorquetur .

20. Ad 5. concedo maiorem , & nego minorem . Nam probatum est illuminationem necessariam ad credendum debere esse internam quamdam reuelationem , & locutionem Dei.

21. Ad 6. distinguo maiorem : coincideremus cū hæreticis in eo , in quo sunt hæretici, nego: in eo , in quo non sunt hæretici , concedo . Certum est nos Catholicos conuenire cum hæreticis modernis in pluribus , in quibus non sunt hæretici, puta in admittenda Trinitate diuinarum Personarum, Incarnatione Verbi &c. ergo similiter circa resolutionem fidei conuenimus in hoc , quod ad credendum non sufficit reuelatio externa , sed necessaria est interna illuminatio , ac reuelatio Spiritus Sancti , siquidem in his præcisè concedendis non errant , & non sunt hæretici

retici, sed hæc acceperunt à Catholicis, antequam fierent hæretici. At disconuenimus in eo, in quo sunt hæretici, & in eo, in quo recesserunt à nobis. Addo multos esse factos hæreticos, dum voluerunt disconuenire ab alijs hæreticis in eo, in quo non fuerunt hæretici; siquidem, inciderunt in hæreses contrarias, cum fides Catholica sit media inter contrarias hæreses.

22. Sed quæritur, in quo hæretici recentiores circa resolutionem fidei errent, & sint hæretici?

23. Resp. circa hoc punctum duos esse errores contrarios. Primus est Pelagianorum, vel Semipelagianorum, qui dixerunt ad credendum sufficere externam propositionem Ecclesiæ, & Prædicatorum, Euangelij, nec requiri internam illuminationem, & inspirationem Spiritus Sancti, & hic error damnatus est à Concilio Arausicano 1. Can. 7. iam citato. Secundus error est recentiorum hæreticorum, qui dicunt non dari externam regulam viam infallibilem credendi, & Ecclesiam non habere infallibilitatem in definiendis ijs, quæ spectant ad fidem, ac proinde non esse necessario acquiescendum iudicio Ecclesiæ, sed unicam regulam infallibilem credendi esse sacram Scripturam, & interiorem illuminationem Spiritus Sancti, quæ illuminatio possit esse contraria iudicio, ac definitioni Ecclesiæ. Veritas Catholica continetur quinque propositionibus. Prima est: datur regula externa viua, & infalli-

fallibilis credendi, nimirum Ecclesia, quæ
idcirco 1. ad Timotheum 3. vocatur *co-*
lumna, & *firmamentum veritatis*, & est
infallibilis in suis definitionibus, ac proin-
de acquiescendum est iudicio ac definitio-
nibus Ecclesiae, & qui non acquiescit, eo
ipso est hæreticus. Secunda propositio est:
ad credendum ultra propositionem Eccle-
siae necessaria est interna illuminatio Spi-
ritus Sancti. Tertia est: interna illumi-
natio Spiritus Sancti non potest esse dif-
formis, & contraria externo iudicio Ec-
clesiae, ideòque instinctus contrarius iudi-
cio Ecclesiae non est diuinus, sed diaboli-
cus, qualis est instinctus hæreticorum.
Quarta est: de lege ordinaria, quando
suffICIENTER alicui innotescit definitio Ec-
clesiae de aliquo Mysterio, semper Spiri-
tus Sanctus illum interius illuminat, ita ut
possit credere, si velit. Quinta est: de
lege ordinaria Spiritus Sanctus neminem
illuminat, ita ut possit credere, nisi cum
exterius illi proponitur mysterium à Præ-
dicatore legitimo missio ab Ecclesia, vel
saltem ad ipsum peruenit fama doctrinae,
quam docet Ecclesia, iuxta illud Apostoli
ad Rom. 10. *quomodo credent in quem non*
audierunt? quomodo audient sine prædicante?
quomodo predicabunt, nisi mittantur? De
fama autem dicit: & *quidem in omnem ter-*
ram exiuit sonus eorum, & *in fines orbis*
terre verba eorum;

QVÆSTIO X.

*Utrum Assensus Fidei Theologicæ
ultimò resoluitur in diuinam
revelationem sufficienter
propositam.*

1. **V**idetur quod non; primò quia
vt assensus fidei resolueretur vlti-
mò in diuinam reuelationem, hæc propo-
sitio, *Deus reuelauit nostram Religionem*,
deberet esse per se credibilis; sed non est
per se credibilis; ergo &c. Probatur mi-
nor: nam si illa propositio esset per se
credibilis, ad credendum non require-
retur, vt proponerentur motiua apta ad sua-
dendum Deum reuelasse nostram religio-
nem: sed debent proponi talia motiua,
desumpta ex consensu populorum, ex mi-
raculis, ex sanctitate doctrinæ &c. ergo
&c.

2. Secundo ad assentiendum propo-
sitioni ineuidenti indigemus aliquo moti-
uo distincto; sed hæc propositio, *Deus
reuelauit nostram religionem*, est ineuidens;
ergo ad illi assentiendum indigemus mo-
tuo distincto; ergo non est per se credi-
bilis, neque in illam vltimo resoluitur
assensus fidei.

3. Resp. assensum fidei Theologicæ
vltimo resolui in diuinam reuelationem
sufficienter propositam. Probatur: nam
assen-

assensus fidei Thologica cum debeat esse summè certus, debet vltimò resolui in motiuum firmissimum, & potens fundare summam, & supernaturalem certitudinem: sed sola diuina reuelatio potest fundare summam, & supernaturalem certitudinem, ideòque Christus diuinam reuelationem proponebat vt fundamentum summæ certitudinis, quam exigebat in fide, dicens Matth. 24. *Cælum, & terra transibunt, verba autem mea non præteribunt*; ergo assensus fidei debet vltimo resolui in diuinam reuelationem; sed vt vltimò resoluatur in diuinam reuelationem, diuina reuelatio debet esse per se credibilis, non est autem per se credibilis, nisi cum sufficienter proponitur; ergo assensus fidei debet vltimò resolui in diuinam reuelationem sufficienter propositam. Sed explicandum est, quæ conditiones requirantur, vt diuina reuelatio sufficienter proponatur. Vt hoc explicetur.

4. Dicendum secundò: de lege ordinaria ad hoc, vt diuina reuelatio, per quam Deus nostram religionem reuelauit per Patriarchas, Prophetas & Apostolos, & per ipsum Christum filium Dei, sufficienter proponatur vnicuique, requiruntur tres conditiones. Prima est, vt diuina reuelatio proponatur à Prædicatore legitimè misso, vel vt saltem ad nostram notitiam perueniat per traditionem, & famam deriuatam à Prædicatore legitimè misso. Probatur ex Apostolo ad Rom. 10. *Quomodo credent ei, quem non audierunt? quomodo*

Lib. V.

D

audient

*audient sine predicante ? quomodo predicabunt, nisi mittantur ? & paulo post: & quidem in omnem terram exiuit sonus eorum, & in fines orbis terræ verba eorum ; ergo ad credendum de lege ordinaria requiritur, vt fidem audiamus à Prædicatore legitimè misso, vel vt ad nos perueniat sonus, hoc est fama, & traditio fidei annunciata à Prædicatore legitimè misso . Secunda est, vt proponantur motiua credibilitatis, hoc est propter quæ prudenter fide humana credi possit doctrinam propositam fuisse reuelatam à Deo . Doctrina enim fidei cum non apparet vt prudenter credibilis, non sufficienter proponitur . Tertia condictio est, vt Spiritus Sanctus per internam illuminationem, & locutionem nos doceat interius veritatem eorum, quæ ab homine, vel Angelo proponuntur exterius, vt quæstione 9. probatum est pluribus authoritatibus, quibus addi potest illud Augustini lib. de Prædest. Sanct. c. 8. *Qui credunt, Prædicatore extrinsecus sonante, intus à Patre audiunt, atque discunt.**

5. Dicendū tertiò : interna illuminatio, & reuelatio est simpliciter necessaria ad credendū fide theologica : externa reuelatio, & propositio cū motiuis externis credibilitatis non est simpliciter, sed solum de lege ordinaria necessaria ad credendum . Probatur: nam vt patet ex authoritatibus allatis, & præsertim ex illa Augustini Tract. 3. in cap. 3. *Io: os homines admonere possumus per strepitum vocis nostræ: si non sit intus qui docet, inanis fit trepitus noster.*

E con;

E conuerso si Deus intus doceat, etiam si nullus doceat exterius, profecto non est inanis doctrina, & locutio Dei docentis interius; ergo interna illuminatio, & reuelatio est simpliciter necessaria ad credendum: externa propositio cum motiuis externis credibilitatis non est necessaria simpliciter, sed solum de lege ordinaria. Confirmatur: nam licet Deus regulariter etiam ipsis Patriarchis, Prophetis, & Apostolis doctrinam fidei reuelauerit per Angelos, tamen aliquando multa reuelauit reuelatione purè internà; ideòque Lyranus præfatione in Psalmos censet Dauidi mysteria contenta in psalmis reuelata fuisse reuelatione purè interna.

6. Dicendum 4. ad assensum fidei Theologicæ interna illuminatio, & locutio Spiritus Sancti requiritur vt obiectum formale, vel vt complementum obiecti formalis: at externa propositio requiritur non vt obiectum, sed vt propositio obiecti formalis: motiua credibilitatis requiruntur vt motiuium extrinsecum, & vt conditio, sine qua de lege ordinaria non datur interna illuminatio sufficiens, quæ est vltimum complementum obiecti formalis.

7. Probatur, & explicatur prima pars. Nam cum alicui reuelatur aliquid reuelatione purè internà sine reuelatione externa, sola reuelatio interna est obiectum formale, seu motiuium credendi; cum autem datur reuelatio externa communis toti Ecclesiæ, & Deus vt proximè

possimus credere addit internam illuminationem, tunc talis interna reuelatio est complementum vltimum in ratione obiecti formalis. Vnusquisque enim credit, quia Deus illum docet: sed Deus in casu posito docet per reuelationem externam vltimò completam per reuelationem internam; ergo obiectum formale, seu motiuum credendi est reuelatio externa vt vltimò completa per internam.

8. Probatur, & explicatur secunda pars: nam licet de lege ordinaria ad credendum requiratur, vt Prædicator externus proponat Deum reuelasse nostram religionem, eiusque mysteria, tamen motiuum credendi *vt quod* non est propositio, sed reuelatio, ideòque in resolutione fidei non propositio, sed reuelatio ponitur vt præmissa, dicendo, *Deus reuelauit nostram religionem; ergo nostra religio est vera.*

9. Probatur demum tertia pars: nam fide Theologica credimus non propter motiua credibilitatis, puta propter consensum populorum, propter famam miraculorum &c. tanquam propter motiua intrinseca assensus fidei, sed credimus purè propter testimonium Dei; alioquin fides, non resolveretur vltimò in solum testimonium Dei, sed etiam in motiua humana credibilitatis; ergo motiua credibilitatis non requiruntur vt motiua intrinseca fidei theologicæ, sed solum vt motiua extrinseca, & conditiones, sine quibus Deus non poneret internam illuminationem, &
locu-

locutionem, ut magis explicabitur in responsione ad primum.

10. Ad 1. concedo maiorem, & distinguo minorem: hæc propositio *Deus reuelavit nostram religionem*, cum reuelatio externa est ultimò completa per internam illuminationem, & locutionem Spiritus Sancti, non est per se credibilis, nego; cum reuelatio externa non est ultimò completa per illuminationem internam, concedo; & nego consequentiam. Externa reuelatio facta Apostolis, & Prophetis, ac nobis proposita à Prædicatoribus legitimè missis, cum non est ultimò completa per reuelationem internam, non est per se nobis credibilis; at cum est completa per reuelationem internam constituitur per se credibilis. Explicatur exemplo sensibili. Color non illuminatus non est per se visibilis, neque potest per se mouere oculum ad se videndum: at color illuminatus est per se visibilis, & tunc non solum lux, sed etiam color est obiectum formale mouens immediatè ad videndum, licet color non possit mouere seorsim à luce, sed simul cum luce. Proportionaliter reuelatio externa, quæ non cadit sub experientiam, si non illuminetur per reuelationem internam, quæ cadit sub experientiam, non est per se credibilis; sed eadem reuelatio externa illuminata per internam, quæ cadit sub experientiam, simul cum interna est per se credibilis, & est motiuum formale fidei.

11. Dices primo: quod cadit sub experientiam.

D 3

perien-

perientiam, innotescit euidenter; ergo si reuelatio interna cadit sub experientiam, innotescit euidenter, quod est falsum.

II. Resp. distinguo antecedens: quod cadit sub experientiam, innotescit euidenter sub aliqua ratione communi, concedo antecedens; sub omnibus rationibus particularibus, nego antecedens; & distinguo consequens; ergo si reuelatio interna cadit sub experientiam, innotescit euidenter sub aliqua ratione communi cuiusdam instinctus impellentis ad credendum, concedo; sub ratione particulari locutionis, & reuelationis diuinæ, nego. Multa, quæ cadunt sub experientiam, innotescunt euidenter sub aliqua ratione communi, non autem sub rationibus particularibus. E. G. sæpè cum videmus colorem, talis color cadit sub experientiam visus, & tamen de eo innotescit euidenter solum, quod est quidam color, non autem quis color sit. Similiter cum audimus sonum, sonus innotescit euidenter sub ratione soni, & non innotescit euidenter, quis sonus sit. In casu nostro cum credimus, experimur quamdam internam illuminationem, & quemdam instinctum ad credendum, qui instinctus est interna locutio, & reuelatio Spiritus Sancti; & hic instinctus innotescit euidenter sub ratione communi instinctus impellentis ad credendum, sed non innotescit euidenter, quod sit diuina locutio, & reuelatio. Patet ergo, quo pacto hæc propositio obiectiua, *Deus reuelauit nostram regilionem*, cum

cum reuelatio externa est vltimò completa per internam, sit per se credibilis, & tamen non sit euidentis.

12. Dices secundò: non potest explicari, in quo consistat hæc interna locutio Dei; ergo &c.

13. Resp: quod iuxta principia satis communiter admissa in materia de locutione Angelorum, interna, & intelligibilis Dei locutio passiuæ consistit in quibusdam apprehensionibus supernaturalibus à Deo nobis infusis, quas eò ipso, quod experimur, sit nobis sufficienter credibile, quod per eas Deus nobis loquitur, & dicit hoc, vel illud obiectum, puta se reuelasse nostram religionem &c. Huic internæ locutioni Caietan. 2. 2. qu. 2. art. 9. applicat illud Apoc. 2. *quod nemo nouit, nisi qui accipit*, & de eadem interna locutione Augustinus lib. 11. Conf. c. 3. dicit: *intus in domicilio cogitationis, nec hebraea, nec græca, nec latina, nec barbara vox, sed veritas sine oris, & lingue organis, sine strepitu syllabarum diceret, verum dicit*. Apprehensiones igitur supernaturales iam explicatæ sunt interna Dei locutio; experientia talium apprehensionum est interna, & intelligibilis auditio Dei loquentis. Dum per has apprehensiones nobis loquitur, & nos docet mysteria nostræ religionis, illisque firmissimè assentimur, discimus à Deo, & per fidem accedimus ad Christum, iuxta illud Io: 6. *Omnis, qui audiuit à Patre, & didicit, venit ad me*.

14. Dices tertio: si hæc propositio

D 4

Deus

Deus reuelauit nostram religionem, est per se credibilis, ad credendum non requiruntur motiua credibilitatis, quibus nimirum suadetur Deum reuelasse nostram Religionem; ergo &c.

15. Resp. negando sequelam . *Ut enim illa propositio, Deus reuelauit nostrā religionem*, sit per se credibilis fide theologica, reuelatio externa debet vltimo compleri per internam illuminationem, & locutionem Spiritus Sancti; sed Deus de lege ordinaria non complet reuelationem externam per internam illuminationem, Spiritus Sancti, nisi cum reuelatio externa proponitur cum motiuis credibilitatis, propter quæ sit prudenter credibilis, & propter quæ iudicemus nos prudenter credere; ergo motiua credibilitatis sunt necessaria vt motiua extrinseca, quibus nitatur iudicium de prudenti credibilitate, & vt conditiones, sine quibus Deus non complet reuelationem externam per internam illuminationem : ideòque aliqui Scholastici dicunt motiua credibilitatis requiri tamquam quædam præambula ad fidem diuinam . Ratio, quare de lege ordinaria non possimus obtinere reuelationem internam, nisi cum reuelatio externa nobis proponitur cum motiuis credibilitatis, est, quia Deus vult nostram religionem esse prudenter credibilem etiam fide humana : ergo tunc solum per internam illuminationem vltimò complentem reuelationem externam, reddit mysteria fidei prudenter credibilia fide diuina
cum

cū proponuntur motiua credibilitatis, propter quæ sint prudenter credibilia etiã fide humana. Sicut igitur & si, *neque qui plantat est aliquid, neque qui rigat, sed qui incrementum dat Deus*, vt dicitur 1. ad cor. 3. tamen Deus de lege ordinaria non dat incrementum, nisi cum homo plantat, & rigat; sic licet ad credendum fide Diuina non moueant intrinsecè motiua credibilitatis, sed sola reuelatio vltimò completa per internam reuelationem Spiritus Sancti, tamen Deus de lege ordinaria non mouet ad credendum fide diuina per internam illuminationem, nisi Prædicator externus plantet, & rigeat, proponendo motiua credibilitatis.

16. Ad 2. nego maiorem. Nam sicut dantur aliquæ propositiones per se credibiles euidenter, qualis est hæc, *omne totum est maius sua parte*; sic dantur aliquæ propositiones per se credibiles ineuidenter. Probatur, & explicatur exemplo sensibili. Aliquando cum audio vocẽ Petri, sed Petrũ nõ video, nõ innotescit mihi euidenter vocem, quam audio esse locutionem Petri, & tamen innotescit ita, vt sit per se credibile ineuidenter illam vocem esse locutionem Petri, ideòque ad hoc credendum, non indigeo alio motiuo; ergo cum in hac vita Deum non videamus, sed audiamus Deum intus obscure loquentem, licet non innotescat euidenter internam illuminationem, & instinctum, quem experimur, esse locutionem Dei, tamen potest esse per se credibile talem illuminationem esse

esse locutionem Dei .

17. Dices primò: si non innotescit euidenter illuminationem , quàm experimur , esse locutionem Dei , innotescit solum probabiliter ; ergo fides resoluitur in aliquam præmissam merè probabilem , ac non certam , & proinde fides non est certa , siquidem conclusio sequitur debiliorem præmissam .

18. Resp. nego antecedens , ac dico , quod illuminationem esse locutionem Dei , neque innotescit euidenter , neque solum probabiliter , sed innotescit credibiliter , certò nimirum , & obscurè . Deus enim pro statu vitæ præsentis regulariter loquitur locutione nobis non euidenti , neque solum probabili , sed certa , & obscurà , vt magis explicabitur inferius . Addo , quod per fidem diuinam credimus Deum reuelasse mysteria nostræ religionis , abstrahendo ab hoc , quod reuelet hoc , vel illo modo ; quod autem reuelet reuelatione consistente in hoc , vel illo , non credimus per fidem diuinam , sed solum enunciamus per discursum Theologicum , quo proponimus nostram sententiam .

19 Dices 2. quod est credibile per fidem , est credibile ex hoc motiuo , quia Deus id reuelauit ; sed Deum reuelasse nostram religionem est credibile per fidem ; ergo est credibile ex hoc motiuo , quia Deus reuelauit se reuelasse nostram religionem ; sed quod Deus reuelauerit se reuelasse nostram religionem est etiam credibile ..

dibile per fidem; ergo est credibile ex hoc motiuo, quia Deus reuelauit se reuelasse, se reuelasse nostram religionem, & sic in infinitum:

20. Resp. distinguo maiorem: quod est credibile per fidem vt conclusio est credibile ex hoc motiuo, quia Deus id reuelauit reuelatione distincta, concedo; quod est credibile per fidem vt principium fidei, nego: distinguo eodem pacto minorem; & nego consequentiam. Quod Deus reuelauerit nostram religionem est credibile per fidem vt primum principium per se credibile, in quod vltimò resoluitur fides; ergo est credibile propter se, & non propter motiuum reuelationis distinctæ: Addo, quod sicut finis eo ipso quod amatur propter se, amatur exercitè, & intransitiuè propter finem, cum ipse sit finis; sic reuelatio eo ipso, quod creditur propter se, creditur exercitè, & intransitiuè propter reuelationem, cum ipsa sit reuelatio, & sic credimus Deum reuelasse, quia reuelauit.

21. Concludo ex dictis fidem diuinam vltimo resolui in diuinam reuelationem propositam à Prædicatore legitime misso, ac miraculis, alijsque motiuis credibilitatis confirmatam, & vltimò completam internà illuminatione, & instinctu Spiritus Sancti. Motiuum credendi est reuelatio externa vltimò completa per internam. Propositio, qua talis reuelatio proponitur, non est motiuum credendi, sed est applicatio motiui. Miracula, &

alia, quæ afferuntur in confirmationem diuinæ reuelationis, non sunt motiua intrinseca fidei, sed motiua extrinseca fidei, in quantum sunt motiua iudicij de prudenti credibilitate, & sunt conditiones requisitæ ad hoc, vt Deus reuelationem exterius propositam compleat interna locutione, ideòque Prædicator proponens reuelationem, eamque confirmans, plantat, & rigat motium credendi; Deus eidem motiuo incrementum dat, complendo illud internâ illuminatione.

22. Addo primò hanc doctrinam contineri citatis verbis S. Th. 2. 2. quæst. 2. art. 9. ad. 3. quibus docet nos induci ad credendum autoritate diuinæ doctrinæ miraculis confirmatæ, & quod plus est interiori instinctu Dei inuitantis; sed diuina doctrina nihil aliud est, quam externa reuelatio à Prædicatore proposita, qua Deus nos docet; interior instinctus est interna illuminatio, qua Deus complet externam doctrinam, & reuelationem; ergo motium credendi est externa reuelatio completa per internam illuminationem, cui internæ illuminationi S. Thomas dat partes præcipuas in inducendo ad credendum. Confirmatio per miracula cōprehendit omnia motiua credibilitatis, quæ motiua requiruntur vt conditiones, & vt motiua extrinseca assensus fidei.

23. Addo secundo, quod quia licet sit per se credibile, tamen non est euidentis doctrinam nobis propositam esse locutionem, & Verbum Dei, ideo ad hoc, vt
reci-

recipiamus illam tamquam Verbum Dei ; firmissimè credendo Deum per Prædicatores , & per interiorem instinctum nobis loqui , requiritur imperium voluntatis liberè captiuantis intellectum in obsequium fidei ; ideoque Apostolus 1. ad Thessal. 2. laudans Thessalonicenses, qui crediderant, dicit ; *Cum accepissetis à nobis Verbum auditus Dei , accepistis illud non ut Verbum hominum , sed sicut est verè Verbum Dei .*

24. Addo tertio propositionem , quæ reuelatio proponitur à Prædicatore, posse considerari sub duplici conceptu . Primò potest considerari, in quantum est locutio Prædicatoris dicentis religionem nostram esse reuelatam à Deo, & sub hoc conceptu propositio non est motium credendi, sed applicatio motiui; nam credimus non quia Prædicator hoc dicit, sed immediatè propter ipsam reuelationem . Secundo potest considerari, in quantum est locutio ipsius Dei, qui per Prædicatorem dicit nobis se reuelasse nostram religionem ; & sub hoc conceptu est motium credendi, & est vnum ex constitutiuis reuelationis externalæ, quæ ultimò completur per internam. Quod propositio, seu Prædicatio nostræ religionis possit sumi tum vt locutio, & Verbum Prædicatoris, tum vt locutio, & Verbum Dei, patet ex verbis Apostoli paulò ante citatis : *cum accepissetis à nobis Verbum auditus Dei, accepistis illud non ut verbum hominum, sed sicut est vere Verbum Dei .* Proportionaliter miracula, & alia motiua credibilitatis sumi possunt, & sub
con-

conceptu miraculi, seu operationis mirabilis; & sub conceptu locutionis Dei; siquidem Deus, qui disponit omnia, & vtitur omnibus, loquitur etiam per miracula, & per famam miraculorum; & si miracula sumantur vt locutio Dei, possunt esse motiuum credendi, iuxta illud Christi Io. 14. *propter opera ipsa credite*, hoc est saltem ipsa opera, & miracula sumite vt verbum Dei, & credite, quia Deus loquitur vobis per opera, & miracula. Similiter definitio Ecclesiæ, si sumatur vt locutio Dei loquentis per Ecclesiam, potest esse motiuum credendi. Cum ergo dicimus propositionem externæ reuelationis, miracula, & alia motiua credibilitatis non esse motiua credendi, loquimur in sensu formali, & non negamus hæc eadem posse sumi vt verbum, & locutionem Dei, & sub hoc conceptu posse esse motiua intrinseca credendi.

QVÆSTIO XI.

Vtrum cum Assensu Fidei Diuina infusa semper, & necessario coniungatur assensus Fidei Humanae, & Acquisita?

1. **V**idetur vera sententia Scoti quæst. 1. Prologi sententiarum §. *contra conclusionem principalem*, & in 3. dist. 23. quæst. vnica; Gabrielis in 3. dist. 23. quæst. 2, art.

2. art. 2. Durandi in 3. dist. 25. quaest. 3. num. 4. Cani lib. 2. de Locis Theologicis, cap. 8. in resp. ad 4. Vasquez 1. 2. disp. 201. cap. 2. & aliorum, qui docent de lege ordinaria cum assensu fidei diuinæ semper, & necessariò coniungi assensum fidei humanæ, ac acquisitæ: primò quia vt dictum est quaest. 10. in resp. ad primum, obiectum numquam est credibile fide diuina propter externam reuelationem vltimò completam per internam illuminationem, quin idem obiectum sit etiam prudenter credibile fide humanâ propter motiua credibilitatis; sed frustra deberet esse credibile fide humanâ, si non deberet credi etiam fide humanâ; ergo &c.

2. Secundò motiua credibilitatis requiruntur ad hoc, vt disponant hominem ad credendum fide diuina; sed non disponunt ad credendum fide diuina, nisi per hoc, quod moueant ad credendum fide humana, quæ est dispositio ad credendum fide diuina; ergo ad credendum fide diuina, requiritur, vt simul credamus fide humana.

3. Resp. plures posse distingui quaestiones, quæ nisi distinguantur, oritur magna confusio. Prima quaestio est, vtrum de lege ordinaria potentia proxima credendi fide diuina semper coniungatur cum potentia proxima credendi fide humana. Ad hanc quaestionem respondeo affirmatiuè, ac dico, quod de lege ordinaria numquam habemus potentiam proximam credendi fide diuina, quin habeamus etiam

poten-

potentiam proximam credendi fide humana. Probatur: vt enim dictum est quæst. 10. in responsione ad 1. num. 14. de lege ordinaria numquam Deus dat internam illuminationem, per quam constituimur proximè potentes credere fide diuina, nisi dum proponuntur motiua credibilitatis, propter quæ possimus prudenter credere fide humana Deum reuelasse mysteria proposita.

3. Secunda quæstio est, vtrum de lege ordinaria potentia proxima credendi fide diuina semper coniungatur cum actu, quo credimus, & iudicamus nostram religionem esse prudenter credibilem fide etiam humana.

4. Resp. affirmatiuè: Probatur: nam vt infra ostendetur ex professo, propositis motiuis credibilitatis, euidens est, quod propter illa possumus prudenter credere etiam fide humana: sed nunquam habemus potentiam proximam credendi fide diuina, quin proponantur motiua credibilitatis; ergo nunquam habemus potentiam proximam credendi fide diuina, quin nobis sit euidens, quod propter motiua credibilitatis possumus prudenter credere fide etiam humana; sed intellectus non potest non assentiri veritati euidenti; ergo nunquam possumus credere fide diuina, quin euidenter cognoscamus posse nos prudenter credere fide etiam humana.

5: Tertia quæstio est, vtrum regulariter, antequam credamus fide diuina nostram religionem esse veram, credamus hoc

hoc idem fide humana propter motiua credibilitatis ?

6. Resp. affirmatiuè . Probatur experientià . Pueri enim , dum à Parentibus , Parochis , & Magistris proponitur illis nostram religionem fuisse reuelatam à Deo , incipiunt hoc credere fide humana propter authoritatem proponentium , & propter motiua ab illis proposita , & sic paulatim perueniunt ad hoc , vt credant fide diuina propter reuelationem Dei , sistendo in ipsa . Idem proportionaliter dic de Infidelibus , cum à Prædicatoribus Euangelij conuertuntur ad fidem . Incipiunt enim credere propter authoritatem Prædicatorum , & propter motiua credibilitatis . Ratio est , quia sicut in alijs disciplinis , sic in disciplina , qua addiscimus fidem , regulariter incipimus ab actibus facilioribus , & imperfectioribus , & sic peruenimus ad actus difficiliore , & perfectiores ; sed actus fidei humanæ , quo credamus propter motiua credibilitatis , est facillimus , & imperfectus ; actus fidei diuinæ , quo credamus immediatè propter diuinam reuelationem est perfectus , & difficillimus ; ergo &c.

7. Quarta quæstio , est , vtrum de lege ordinaria necesse sit , vt in eo instanti , in quo credimus fide diuina Deum reuelasse nostram religionem , eiusque mysteria , hoc idem credamus fide humana propter motiua credibilitatis .

8. Resp. negatiuè . Ratio est , quia cum per actum imperfectum paulatim proce-

procedimus ad perfectum, obtento actu perfecto, non est necesse, vt retineamus imperfectum, sed solemus ab actu imperfecto cessare: E. G. cum per fidem humanam, qua credimus aliquam propositionem mathematicam esse veram propter auctoritatem magistri docentis, paulatim procedimus ad scientiam, qua scimus illam propositionem esse veram propter euiden-tem demonstrationem, obtenta scientia per demonstrationem, non est necesse, vt retineamus actum fidei humanæ, quo credimus illam propositionem esse veram propter auctoritatem Magistri, imo regulariter solemus cessare à tali actu fidei humanæ: sed cum per fidem acquisitam procedimus ad infusam, ab actu imperfecto fidei humanæ procedimus ad actum perfectum fidei diuinæ; ergo obtenta fide diuinæ, non est necesse, vt retineamus actum fidei humanæ, sed solemus ab illo cessare. Confirmatur: nam illi Samaritani, qui, vt dicitur Io: 4. fide humana crediderant Christum esse Messiam, & Saluatorem mundi propter testimonium mulieris Samaritanæ, postquam audito Christo, & ab eo interius illuminati crediderunt fide diuinæ, deposuerunt fidem humanam, ac dixerunt Samaritanæ: *Iam non propter tuam loquelam credimus: ipsi enim vidimus, & scimus*, hoc est, vt explicat S. Thomas lect. 5. in cap. 4. Ioan. firmiter credimus, quia hic est verè Saluator Mundi; sed vt docet Augustinus tract. 15. in Ioan. Samaritani, qui primo crediderant propter verbum

bum mulieris, ac deinde credunt propter verbum ipsius Christi, sunt figura infidelium, qui cum conuertuntur ad fidem, primum credunt propter testimonium Ecclesiae, in quantum est cōmunitas humana, deinde propter ipsam diuinam reuelationem; ergo qui fide diuina credunt immediatè propter diuinam reuelationem, non credunt amplius fide humana propter auctoritatem Ecclesiae, & propter motiua credibilitatis, sed dicunt mulieri, hoc est Ecclesiae: *iam non propter tuam loquelam credimus; ipsi enim audiuius Christum interius loquentem, & testantem se esse Salvatorem Mundi.* Sicut autem qui eodem tempore credit aliquid per duos actus, per vnum actum propter auctoritatem Petri, per alium actum propter auctoritatem Pauli, non potest dicere Petro, *Ego non credo propter tuam auctoritatem, sed propter auctoritatem Pauli*, sic si eodem tempore per actum fidei humanae credimus propter auctoritatem Ecclesiae, & per actum Fidei Diuinæ credimus propter auctoritatem Dei, non possumus absolutè dicere, *iam non credo propter auctoritatem Ecclesiae, sed propter auctoritatem Dei.* Docet autem satis expressè S. Thomas citata lect. 5. in cap. 4. Io. quod licet per fidem humanam, qua credimus propter motiua credibilitatis, manuducamur ad fidem diuinam, qua credimus purè propter diuinam auctoritatem, tamen cum peruenimus ad credendum fide diuinam propter diuinam auctoritatem, non amplius

plius credimus propter motiua credibilitatis, dicens . *Recta quidem est fides, cum veritati non propter aliquid aliud, sed propter se ipsam obeditur, & quantum ad hoc dicit, quod mulieri dicebant, quod iam credimus veritati non propter tuam loquelam, sed propter ipsam veritatem . Inducunt autem nos ad fidem Christi tria . Primo quidem ratio naturalis . Secundo testimonia legis, & Prophetarum . Tertio predicatio Apostolorum, & aliorum . Sed quando per hac homo manuductus credit, tunc potest dicere, quod propter nullum istorum credit, nec propter rationem naturalem, nec propter testimonia legis, nec propter testimonia aliorum, sed propter ipsam veritatem tantum .* Haftenus S. Thomas .

9. Quinta quaestio est, vtrum saltem actus fidei diuinæ possit in eodem instanti coniungi cum actu fidei humanæ, quo propter motiua credibilitatis credamus Deum reuelasse nostram religionem .

10. Resp. hanc quaestionem esse infra soluendam, cum examinabimus, vtrum actus fide diuinæ possit pro eodem instanti coniungi cum actu scientiæ, vel opinionis, vel fidei humanæ circa idem obiectum materiale.

11. Ad 1. concedo maiorem, & nego minorem, ac dico, quod motiua credibilitatis pro eo instanti, pro quo credimus fide diuina, non proponuntur frustra, quia licet non moueant ad fidem humanam, qua propter talia motiua credamus religionem nostram fuisse reuelatam à Deo, tamen mouent

mouent ad iudicium euident, quo propter talia motiua iudicamus credi prudenter posse, ac debere nostram religionem fuisse reuelatam à Deo, sine quo iudicio dari non potest actus fidei diuinæ, vt dictum est num. 4. respondendo ad secundam quæstionem.

12. Ad 2. Resp. primò concedo maiorem, & nego minorem, & dico, quod motiua credibilitatis pro eo instanti, pro quo elicitur actus fidei diuinæ, disponunt ad talem actum per hoc, quod moueant, & determinent ad iudicium euident de prudenti credibilitate nostræ Religionis, eiusque mysteriorum, sine quo iudicio non potest dari actus fidei diuinæ.

13. Resp. secundò concedo maiorem, & distingo minorem: motiua credibilitatis non disponunt ad fidem diuinam, nisi per hoc, quod moueant ad credendum fide acquisita pro eo instanti, pro quo credimus fide diuina, nego; pro tempore antecedenti, transeat; & nego consequentiam. Sicut timor disponit ad actum Charitatis pro tempore antecedenti, & tamen *perfecta Charitas foras mittit timorem*, vt dicitur 1. Io. 4. sic actus fidei acquisitæ disponit ad actum fidei infusæ, & tamen pro instanti, pro quo elicimus actum fidei infusæ, cessamus ab actu fidei humanæ, & acquisitæ.

14. Opponuntur plurima testimonia Augustini tum libro de Vtilitate credendi præsertim cap. 16. & 17. tum libro contra Epistolam Fundamenti cap. 4. & 5. tum lib.

lib. 22. de Ciuit. Dei cap. 8. in quibus docet motiua credibilitatis, ac præsertim, miracula, vel famam miraculorum esse necessaria vt credamus.

15. Ad hæc testimonia resp. primò, quod, vt dictum est num. 5. in responsione ad 3. quæstionem, regulariter non credimus fide diuina, quin prius per fidem humanam credamus propter motiua credibilitatis; ergo quia regulariter fides humana præcedere debet diuinam, Augustinus docet ad credendum necessaria esse motiua credibilitatis, & fidem humanam. Ex hoc autem non sequitur necesse esse, vt in instanti, in quo credimus fide diuina, credamus fide humana.

16. Resp. secundo, quod vt dictum est quæst. 10. num. 15. in responsione ad 1. motiua credibilitatis sunt necessaria tanquam conditiones ad obtinendam internam illuminationem, sine qua non possumus credere fide diuina; ergo sunt necessaria ad credendum fide diuina.

17. Resp. tertio, quod vt dictum est, num. 4. in responsione ad secundam quæstionem, motiua credibilitatis sunt necessaria ad hoc, vt iudicemus religionem nostram esse prudenter credibilem; sed hoc iudicium est necessarium, vt deinde credamus religionem nostram esse veram, & reuelatam à Deo; ergo motiua credibilitatis etiam ex hoc capite sunt necessaria ad credendum fide diuina.

18. Infertur, in quo sensu Augustinus libro contra Epist. fund. cap. 4. relato quæ-

quæstione 8. in 3. argum. dixerit *se*
 teneri in catholicæ Ecclesiæ gremio pro-
 pter motiua credibilitatis per illa verba :
Tenet me in Catholica Ecclesiæ gremio con-
sensus populorum , & gentium ; tenet autho-
ritas miraculis inchoata &c. Dicendum ,
 quod motiua credibilitatis tenent nos in
 fide Catholica, tanquam motiua extrinseca,
 non tanquam motiua intrinseca fidei diui-
 næ. Explicatur. Credimus, quia liberè vo-
 lumus credere ; sed volumus credere, quia
 iudicamus credendum esse Catholicæ Ec-
 clesiæ , hoc autem iudicamus propter mo-
 tiua credibilitatis ; ergo licet intrinsecè
 credamus propter veracitatem Dei reue-
 lantis immediatè credibilem , tamen ex-
 trinsecè credimus propter illa motiua ,
 propter quæ iudicamus esse credendum ,
 hoc est propter motiua credibilitatis , ac
 proinde in fide Catholica tenent nos non
 solum motiua intrinseca , sed etiam moti-
 ua extrinseca credendi ; ergo rectè dicitur,
 quod tenent nos in Ecclesia Catholica ,
 non solum prima veritas reuelans , quæ est
 adæquatum motiuum intrinsecum ad cre-
 dendum fide diuina , sed etiam motiua
 extrinseca credibilitatis . In eodem sensu
 potest intelligi illud eiusdem Augustini
 cap. 5. eiusdem libri : *non crederem Euan-*
gelio , nisi Ecclesiæ me moueret autoritas .
 Quamuis enim motiuum intrinsecum cre-
 dendi fide diuina Euangelium fuisse reue-
 latum à Deo , sit ipsa diuina reuelatio per
 se credibilis , tamen motiuum extrinse-
 cum est autoritas Ecclesiæ . Nam propter
 autho-

authoritatem Ecclesiæ iudicamus esse prudenter credibile, & fide diuina credendum, quod Deus reuelauerit Euangelium.

Q V A E S T I O XII.

*Utrum assensus fidei diuina ultimo
resoluatur in veritatem
infallibilem?*

1. **V**Idetur non resolui; primò, quia assensus fidei ultimò resoluitur in propositiones, seu præmissas supernaturaliter, non autem naturaliter notas; sed hæc propositio *Deus est prima, & infallibilis veritas*, est naturaliter nota; ergo &c.

2. Secundò ex dictis quaest. 3. assensus fidei debet resolui in propositiones immediatè, & per se credibiles; sed hæc propositio, *Deus est prima, & infallibilis veritas*, debet demonstrari, & nō est immediatè, & per se credibilis; ergo &c.

3. Resp. quod cum quaest. 7. ostendimus assensum fidei proximè resolui in infallibilem authoritatem Dei, & in diuinum testimonium, quaestione autem 10. probauerimus assensum fidei diuinæ non solum proximè, sed etiam ultimò resolui in diuinum testimonium, hoc est in reuelationem per se credibilem, sequitur, ut examinemus, an, & quo pacto assensus fidei resoluator ultimò in infallibilem veritatem Dei, tanquam in alteram præmissam

sam syllogismi fidei . In hac igitur quæstione tria dubia sunt examinanda insinuatæ in rationibus dubitandi . Primum est , vtrum sit lumine naturæ certò , & euidenter notum Deum esse veritatem infallibilem . Secundū est , vtrum hoc idem sit notum ex terminis , vel per solam demonstrationem . Tertium est , vtrum assensus fidei diuinæ resoluatur in veritatem infallibilem , vt lumine naturali cognitam .

4. Dicendum primò , respondendo ad primum dubium : lumine naturæ certum , & euidenter est Deum esse veritatem infallibilem . Probatur : nam , vt cum S. Thoma 1. parte , quæst. 3. art. 2. docent omnes Theologi , lumine naturæ certum , & euidenter est Deū dari , & esse ens habens omnē perfectionem simpliciter simplicem ; sed etiam lumine naturæ certum , & euidenter est veritatem infallibilem , quæ propter infinitam sapientiam non possit falli , & errare , propter infinitam bonitatem non possit mentiri , & fallere , esse perfectionem simpliciter simplicem ; ergo lumine naturæ certum , & euidenter , est Deum habere hanc perfectionem , vt sit veritas infallibilis .

5. Dicendum secundo , respondendo ad secundum dubium : Deum esse veritatem infallibilem signatè , & in sensu conditionato , per lumen naturæ est certum , & euidenter immediatè ex terminis : Deum esse veritatem infallibilem exercitè , & in sensu absoluto , est certum , & euidenter non ex terminis , sed per demonstrationem .

Lib. V.

E

Pro-

Probatur prima pars : nam Deum esse veritatem infallibilem signatè , & in sensu conditionato , est Deum , si datur à parte rei , & non est ens purè signatum , seu cognitum , & purum figmentum intellectus , esse veritatem infallibilem : sed ex terminis est notum, Deum, si datur à parte rei, esse veritatem infallibilem; ergo &c. Probatur minor : cum enim nomine Dei intelligamus ens habens omnes perfectiones simpliciter simplices , & cum veritas infallibilis ex suo conceptu sit perfectio simpliciter simplex , hoc est non includens defectum , & in quolibet necessaria ad excludendum defectum , ex terminis constat Deum , hoc est ens habens omnem perfectionem simpliciter simplicem , si datur, habere etiam hanc perfectionem, vt sit veritas infallibilis.

6. Probatur secunda pars : nam Deum esse veritatem infallibilem exercitè , & in sensu absoluto, est, Deū non esse ens purè signatum , & purè cognitum , sed esse ens reale habens à parte rei omnem perfectionem simpliciter simplicem , ac proinde , etiam hanc , vt sit veritas infallibilis ; sed non est ex terminis , sed per demonstrationem certum , & euidens , quod Deus de facto datur , & non est ens purè signatum , & purè cognitum , ac merum figmentum intellectus , adeoque à parte rei habet hanc perfectionem , vt sit prima veritas infallibilis , vt cum S. Thoma 1. parte , quæst. 1. art. 1. docent communiter Theologi ; ergo &c.

7. Dicendum tertio, respondendo ad
 tertiū quæsitum : assensus fidei diuinæ non
 potest vltimò resolui in primam verita-
 tem infallibilem, vt lumine naturali co-
 gnitam. Probatur : nam assensus fidei est
 certior quolibet assensu naturali, vt ex
 Chrysostomo, Augustino, & alijs PP.
 dictum est supra; sed assensus certior non
 potest vltimò resolui in assensum minus
 certum; ergo assensus fidei non potest vl-
 timo resolui in assensum naturalem. Con-
 firmatur: nam in præsentī materia valet
 illud axioma Aristotelis, *propter quod*
unumquodque tale, & illud magis, ideoque
 vt docent omnes, assensus conclusionis
 non potest esse certior assensu præmissa-
 rum, ex quibus vnicè inferitur, & est im-
 possibile, vt cum assentimur alicui obiecto
 materiali propter formale, certius assen-
 tiamur obiecto materiali, quam formali;
 sed mysterijs reuelatis Trinitatis, Incar-
 nationis &c. assentimur vnicè propter hoc
 obiectum formale, quia Deus infallibilis
 veritas illa reuelauit; ergo impossibile est,
 vt certius assentiamur mysterijs reuelatis,
 quam huic propositioni, *Deus est veritas*
infallibilis; sed si huic propositioni, *Deus est*
veritas infallibilis, assentiremur assensu purè
 naturali, certius assentiremur mysterijs
 reuelatis, vt pote quibus assentimur assen-
 su supernaturali fidei, quàm huic propo-
 sitioni, *Deus est veritas infallibilis*; ergo
 &c.

8. Concluditur ex dictis fidem diui-
 nam non posse vltimo resolui, & fundare
 suam

suam certitudinem in prima veritate, vt cognita cognitione naturali, sed essentialiter vltimo resolui, & fundare suam certitudinem in prima veritate, vt cognita cognitione supernaturali, ac proinde falsam esse non solum sententiam, in quam teste Suario Tomo de Fide disp. 3. sect. 3. inclinatur Altissiodorensis in Summa lib. 3. tract. 3. cap. 2. quæst. 1. quæ sententia docet fidem infusam semper vltimò resolui, ac fundare suam certitudinem in prima veritate, vt cognita cognitione naturali, sed etiam sententiam, quæ vt docet idem Suarez sect. 6. num. 3. eiusdem disputationis, videtur esse Caietani, quæ sententia docet fidem infusam non semper, sed aliquando vltimò resolui, & fundare sufficienter suam certitudinem in prima veritate, vt cognita cognitione naturali.

9. Licet fides diuina non possit resolui in primam veritatem, vt naturaliter cognitam, tamen aliqua fides humana disponens ad fidem diuinam potest vltimò resolui, & fundare suam certitudinem in prima veritate, vt naturaliter cognita.

10. Ad 1: conc. mai: & disting. min. Hec propositio *Deus est veritas infallibilis*, est non solum naturaliter, sed etiam supernaturaliter nota, concedo minorem; est nota solum naturaliter, nego minorem; & distingo consequens; ergo fides non potest resolui in veritatem infallibilem, vt notam per solum lumen naturæ, concedo consequentiam; vt notam supernaturaliter per lumen fidei, nego consequentiam.

Licet

Licet Deum esse primam veritatem infallibilem innotescat per lumen naturæ, tamen innotescit etiam multo perfectius, & certius per lumen supernaturale fidei infusæ: fides autem diuina fundat suam certitudinem in prima veritate, non in quantum innotescit per lumen naturæ, sed in quantum certius, & perfectius innotescit per lumen fidei infusæ, vt magis explicabitur quaestione sequente XIII.

II. Ad 2. concedo maiorem, & distinguo minorem: hæc propositio, Deus est veritas infallibilis, naturaliter non est per se credibilis; transeat; supernaturaliter, & supposita reuelatione sufficienter proposita, nego. Hæc propositio, Deus est veritas infallibilis, supposita reuelatione sufficienter proposita, est per se, & immediate credibilis, vt explicabitur iam sequenti quaestione XIII.

QVÆSTIO XIII.

Vtrum motium, in quod soluitur ultimò assensus fidei, sit prima veritas vt immediate credita per ipsam fidem, tanquam testans, se esse primam veritatem.

I. **P**rimò videtur prima veritas non esse motium fidei, vt credita per ipsum habitum Fidei: Habitus enim su-

per naturales proportionaliter respondent habitibus naturalibus; sed conclusionibus, & principiis assentimur per distinctos habitus naturales, siquidē conclusionibus assentimur per habitum scientiæ, principiis assentimur per habitum intellectus, qui idcirco vocatur habitus principiorum; ergo quandoquidem mysterijs reuelaris, quæ se habent vt conclusiones, assentimur per habitum fidei, huic propositioni, *Deus est veritas infallibilis*, quæ propositio est principium, ex quo inferuntur conclusiones fidei, assentimur per alium habitum supernaturalem distinctum ab habitu fidei.

2. Secundò videtur vera sententia. **Cardinalis de Lugo disp. 1. Sect. 6. num. 82.** in Tomo de Fide docentis contra Suariū, quod licet prima veritas sit motiuum fidei, vt assensu supernaturali credita per ipsum habitum fidei, tamen non est motiuum fidei, vt credita propter reuelationem diuinam, sed debet aliundè cognosci, vt possit mouere ad credenda alia propter reuelationem diuinam. Si enim dicamus summam Dei veracitatem non aliundè per fidem innotescere, nisi quia Deus reuelauerit se esse summè veracem, incidimus in circulum vitiosum, ac penitus inexplicabilem; ergo &c. Probatur antecedens: nam dum quæritur, *cur credis Deum esse veracem?* respondemus, *quia Deus testatur se esse veracem*; dum rursus quæritur, *quare credis Deo testanti se esse veracem?* respondere debemus, *quia Deus est verax*: siquidem testimonium mendacis non

non

non meretur fidem ; ergo credimus Deum esse veracem propter testimonium , quo testatur se esse veracem , & credimus testimonio , quia Deus est verax , & sic committitur circulus . Confirmatur : nam in humanis qui credit homini testanti se esse veracem , nisi aliundè ei innotuerit veracitas testantis , stultè credit ; ergo si per fidem ita crederemus Deo testanti se esse veracem , vt non aliundè nobis innotesceret diuina veracitas , stultè crederemus .

3. Tertiò iuxta sententiam satis communem , idem obiectum non potest simul euidenter cognosci , & per fidem obscure credi ; ergo in hac sententia diuina veracitas , dum euidenter cognoscitur , non potest per fidem obscure credi propter reuelationem obscuram ; ergo si diuina veracitas esset motiuum fidei solum vt obscure cognita propter diuinam reuelationem , dum cognoscitur euidenter propter demonstrationem , non posset exercere munus obiecti formalis , ac motiui , & non posset mouere ad vllum actum fidei , ac proinde cum euidenter cognoscimus Deum esse veracem , nullum actum fidei possemus elicere , quod est absurdum .

4. Quartò etiamsi Deus non reuelasset se esse summè veracem , posset reuelare alia mysteria , quæ tunc etiam possent per fidem credi : sed in hoc casu summa veracitas Dei esset obiectum formale fidei , & cum non esset reuelata , non esset obiectum formale fidei vt credita propter reuelationem , sed vt aliunde cognita ; ergo ob-

ctum formale fidei potest esse summa veracitas Dei, non vt creditur propter reuelationem, sed vt aliunde cognita.

5. Quintò si fides vltimò resolueretur in hanc propositionem, *Deus est prima veritas testans se esse primam, & infallibilem veritatem*, hæc propositio deberet esse per se credibilis; sed non est per se credibilis; ergo &c.

6. Resp. quod quia diximus assensum, quo assentimur primæ veritati, quæ est obiectum formale fidei, esse supernaturalem; assensus autem supernaturalis debet elici ab habitu supernaturali; examinandum est primò, à quo habitu supernaturali eliciatur talis assensus, num. ab habitu fidei, an potius ab alio habitu? Secundo examinandum est, vtrum credere debeamus Deum esse primam veritatem, quia ipsemet reuelauit se esse primam veritatem, vel propter aliud motiuum.

7. Dicendum primò, respondendo primæ quæstioni: per eundem habitum, supernaturalem, & per se infusum fidei, quo credimus mysteria reuelata, quæ sunt obiecta materialia fidei, assentimur etiam primæ veritati, quæ est obiectum formale.

8. Probatur primo: nam alioquin contra sententiam communem Theologorum deberemus admittere duos habitus supernaturales per se infusos, alterum, quo credamus Deum esse primam veritatem, alterum, quo credamus mysteria reuelata.

9. Probatur secundò : nãm eadem potentia versatur circa obiectũ materiale, ac circa formale : sed habitus fidei infusæ est quædam potentia, vt dictum est lib. 5. de Gratia, tractatu 3. de Gratia habituali, quæstio 20. ergo per eundem habitum fidei infusæ credimus mysteria reuelata, quæ sunt obiecta materialia, & credimus Deum esse primam veritatem.

10. Dicendum secundò cum Suario Tomo de Fide disp. 3. sect. 3. nu. 4. & seqq. respondendo secundæ quæstioni: obiectum formale fidei est, quod Deus sit veritas infallibilis, testans se esse veritatem infallibilem, ac proindè per fidem credimus Deo, quia Deus est veritas infallibilis, testans se esse veritatem infallibilem.

11. Probatur: nam assensus fidei ideò est supernaturalis, certissimus, & certior quolibet assensu naturali, quia nititur veritate infallibili vt supernaturaliter testante, & dicente ea, quæ credimus; assensus autem naturalis non nititur veritate infallibili vt testante ea, quibus assentimur: sed si per fidem crederemus Deum esse veritatem infallibilem, non ex hoc motiuo, quia Deus est veritas infallibilis, testans se esse veritatem infallibilem, assensus, quo credimus Deum esse veritatem infallibilem, non niteretur infallibili veritate vt supernaturaliter docente, & testante se esse veritatem infallibilem; ergo assensus fidei, quo credimus Deum esse veritatem infallibilem, non esset certissimus, ac proindè non posset refundere summam

certitudinem in actus, quibus mysteria, reuelata credimus ex hoc motiuo, quia Deus est veritas infallibilis; ergo vt sit certissimus, debet credere Deum esse veritatem infallibilem ex hoc motiuo, quia Deus est veritas infallibilis, testans, & docens se esse veritatem infallibilem.

12. Dices, quod ad hoc, vt actus, quo credimus Deum esse veritatem infallibilem, sit certissimus, & nitatur Deo, vt docente, & testante se esse veritatem infallibilem, sufficit, vt procedat ex speciali illuminatione Spiritus Sancti, qua docet se esse veritatem infallibilem, licet non nitatur ea illuminatione vt obiecto formali, eo quod non reflectat Deum per illam illuminationem docere, & testari se esse veritatem infallibilem.

13. Sed contra: nam summa fidei certitudo oritur ex hoc, quod nitatur Deo vt docente, & testante, tanquam obiecto formali; ergo vt assensus, quo credimus Deum esse veritatem infallibilem, sit summè certus, debet niti Deo vt docente, & testante, tanquam obiecto formali. Confirmatur: nam qui credit quæ dicuntur à Magistro, quia ita dicuntur à Magistro, vt illi videantur vera, sed non credit, quia magister testatur illa esse vera, non nititur authoritate Magistri vt docentis, & testantis; ergo si credimus Deum esse veritatem infallibilem, Deo per internam illuminationem ita proponente hoc obiectum, vt videatur verum, sed non credimus, quia Deus testatur hoc obiectum esse verum,

rum,

rum, non nitimur auctoritate Dei ut docentis, & testantis: sed assensus fidei desumit suam certitudinem ex eo, quod nitatur auctoritate Dei ut docentis, & testantis; ergo assensus, quo credimus Deum esse veritatem infallibilem, non haberet summam certitudinem, ac proinde non posset summam certitudinem refundere in actus, quibus credimus mysteria reuelata.

14. Confirmatur primò conclusio: nam actus supernaturalis, quo per fidem credimus Deum esse veritatem infallibilem, debet differre ex obiecto formali ab actu naturali, quo, ut dictum est quaest. 11. possumus hoc idem credere; sed in opposita sententia non differret ex obiecto formali, sed solum ex principio effectiuo: siquidem actus supernaturalis procederet ab habitu fidei, & ab illuminatione supernaturali Spiritus Sancti, assensus purè naturalis procederet à principio purè naturali; ergo falsa est opposita sententia.

15. Confirmatur secundò: nam certitudo supernaturalis fidei est coniuncta cum captiuitate intellectus in obsequium Dei ut testantis ea, quae credimus; sed si crederemus Deum esse veritatem infallibilem, & non propter hoc motiuum, quia Deus testatur se esse veritatem infallibilem, certitudo illius assensus non esset coniuncta cum captiuitate intellectus in obsequium Dei, ut testantis se esse veritatem infallibilem; ergo &c.

16. Ad 1. distinguo maiorem: habitus supernaturales proportionaliter correspondent habitibus naturalibus quoad aliqua, concedo; quoad omnia nego; concedo minorem; & nego consequentiam.

17. Ex dictis lib. 5. de Gratia quæst. 21. num. 6. habitus per se infusi sunt simul potentiæ, & habitus: habitus naturales sunt solum habitus, non autem potentiæ; ergo habitus naturales, & habitus per se infusi quoad hoc non proportionantur; sed eadem potentia directè versatur tùm circa obiectum formale, tùm circa materiale; ergo non est mirum, quod licet non idem habitus naturalis versetur directè circa principia, & circa conclusiones; siquidem habitus naturalis est purus habitus, non autem potentia; nihilominus idem habitus per se infusus fidei directè assentiatur tùm veritati infallibili vt testanti, quæ est obiectum formale, & principium credendi, tùm mysterijs reuelatis, quæ sunt conclusiones, & obiecta purè materialia.

18. Ad 2. nego nos per explicatam sententiam incidere in circulum vitiosum, & inexplicabilem. Dum ad probandum circulum opponitur, quod cùm quæritur, *cur credis Deum esse veracem?* Respondemus, quia Deus testatur se esse veracem; dum rursus quæritur, *cur quæris Deo testanti se esse veracem?* respondere debemus, quia Deus est verax, seu est veritas infallibilis; nego suppositum, quod nimirum obiectum formale fidei infusæ sit hæc pro-

posi-

positio incomplexa, *Deus est veritas infallibilis*, ac dico, quod obiectum formale fidei infusæ est hæc propositio complexa, *Deus est veritas infallibilis, testans se esse veritatem infallibilem*; illa verò incomplexa, *Deus est veritas infallibilis*, est obiectum formale assensus naturalis immediati, vel mediati, vt explicatum est quaestione 11. qui assensus naturalis resoluitur vel in terminos, si est immediatus, vel in demonstrationem, eiusque præmissas, si est mediatuſ.

19. Sed vrgebis: querenti, cur Deum credis esse veritatem infallibilem testantem se esse veritatem infallibilem, non potest responderi, nisi per circulum vitiosum; ergo non vitatur circulus vitiosus.

20. Resp. nego antecedens, ac dico illam propositionem obiectiuam, vt potest quæ est primum creditum, & primum principium credendi cætera, credi propter se ipsam, tanquam propter obiectum formale, proportionaliter, ac primis principijs sciendi assentimur propter se ipsa, tanquam propter obiectum formale, vt magis explicabitur in responsione ad 5.

21. Ad confirmationem nego antecedens vniuersaliter loquendo. Potest contingere, vt aliquis, de quo antecederet ignoremus, vtrum sit verax, vel mendax, dicat se esse veracem, & dicat tali modo, vt hoc eius testimonium appareat dignum fide: sed in hoc casu prudenter possumus credere illum esse veracem, quia dicit se esse veracem, & testimonium eius apparet dignum

dignum fide; ergo à fortiori Deo testanti se esse veritatem infallibilem per testimonium ex se dignum fide, possumus credere Deum esse veritatem infallibilem, vt magis explicabitur in responsione ad 5.

22. Ad 3. distinguo maiorem: idem obiectum seorsim non potest euidenter cognosci, & simul per fidem obscure credi, transeat: idem obiectum non potest euidenter cognosci seorsim, & simul per fidem obscure credi, in quantum includitur in alio obiecto complexo, nego: & distinguo consequens: ergo Deum esse veritatem infallibilem, non potest euidenter cognosci seorsim, & per fidem obscure credi seorsim, concedo consequentiam; non potest euidenter cognosci seorsim, & per fidem obscure credi, in quantum includitur in hoc complexo obscuro, *Deus est veritas infallibilis, testis se esse veritatem infallibilem*, nego consequentiam. Licet admitamus, quod idē obiectū seorsim non potest euidenter cognosci, & simul per fidem obscure credi seorsim, vt dicetur q. 33. tamen debemus concedere, quod idem obiectum seorsim potest euidenter cognosci, & simul per fidem obscure credi, in quantum includitur in alio obiecto complexo obscuro. E. G. licet dum aliquis cognoscit euidenter Deum esse vnum, non possit fide obscure seorsim credere, Deum esse vnum, tamen potest obscure credere Deum esse Trinum, & Vnum, adeoque potest credere Deum esse vnum, non seorsim, sed in quantum includitur in hoc obiecto com-

complexo, *Deus est Trinus, & Unus*; ergo proportionaliter in casu nostro, cum aliquis cognoscit euidenter Deum esse veritatem infallibilem, non potest per fidem obscure credere seorsim Deum esse veritatem infallibilem, sed potest per fidem obscure credere hoc obiectum complexum obscure, *Deus est veritas infallibilis, testans exercitè se esse veritatem infallibilem*, in quo complexo includitur illa propositio incomplexa, *Deus est veritas infallibilis*: sed obiectum formale fidei est illa propositio complexa, *Deus est veritas infallibilis testans se esse veritatem infallibilem*: ergo potest aliquis simul cognoscere euidenter Deum esse veritatem infallibilem, & simul obscure credere obiectum formale fidei, & propter obiectum formale credere mytheria reuelata.

23. Ad 4. nego maiorem, ac dico non posse Deum reuelare mytheria, & postulare, vt illa summè credantur, quin simul exercitè reuelat se esse veritatem infallibilem. Ratio est, quia vt bene arguit Suarius tomo de Fide disp. 3. sect. 6. omnis loquens eo ipso, quod postulat, vt credatur id, quod dicit, testatur se in eo dicto esse veracem; ergo eo ipso, quod Deus reuelat mytheria, & postulat suis dictis summè credi, testatur exercitè se esse summè veracem; ergo possumus summè credere Deum esse veritatem infallibilem testantem se esse veritatem infallibilem; & ab hoc obiecto formali propter se creditum moveri ad summè credendum mytheria

ria reuelata, vt obieſta materialia.

24. Ad 5. concedo maiorem, & nego minorem, ac dico, quod cum Deus per reuelationem externam vltimò completam per internam teſtatur ſe eſſe veritatem infallibilem, experiēti, & intelligibiliter audienti talem locutionem, eſt per ſe credibile, quod illa eſt locutio veritatis infallibilis teſtantis ſe eſſe veritatem infallibilem; ſed idem eſt credere, quod hæc eſt locutio veritatis infallibilis teſtantis ſe eſſe veritatem infallibilem, ac credere, quod veritas infallibilis per hanc locutionem teſtatur ſe eſſe veritatem infallibilem; ergo cum Deus per externam reuelationem vltimò completam per internam, teſtatur ſe eſſe veritatem infallibilem, eſt immediatè credibile, quod auctor locutionis eſt veritas infallibilis, teſtans ſe eſſe veritatem infallibilem. Probatur maior, & explicatur argumentum. Nam ſicut homo ante ignotus poteſt locutione, quæ ex ſe appareat fide digna, teſtari ſe eſſe veracem, ſic à fortiori Deus poteſt locutione, quæ ex ſe appareat fide digna, teſtari ſe eſſe ſummè veracem, ac ſe eſſe veritatem infallibilem; ergo ſicut in caſu poſito mihi eſt immediatè credibile, quod illa locutio eſt fide digna, adeoque quod author illius locutionis eſt loquens fide dignus, teſtans ſe eſſe veracem, ſic ſi Deus locutione, quæ ex ſe appareat fide digna, teſtetur ſe eſſe ſummè veracem, eſt per ſe credibile authorem talis locutionis eſſe loquentem ſummè veracem, ac ſummè

summâ fide dignum, testantem se esse summè veracem.

QVÆSTIO XIV.

Vtrum obiectum materiale fidei sit veritas reuelabilis, obiectum formale sit prima veritas, & reuelatio?

1. **P**rimo videtur obiectum formale vltimum assensus fidei esse tum prima veritas, tum reuelatio. Obiectum enim formale vltimum assensus conclusionis sunt duæ præmissæ per se credibiles, propter quas assentimur conclusioni; sed conclusionibus fidei assentimur propter istas duas præmissas per se credibiles, nimirum, quia Deus est prima veritas, & quia Deus illas reuelauit; ergo vtraque præmissa, ac proinde tum prima veritas, tum reuelatio, est obiectum formale vltimum assensus fidei.

2. Secundò videtur obiectum formale vltimum assensus fidei esse sola prima veritas, non autem reuelatio. Nam eodem pacto prima veritas est obiectum formale vltimum fidei, quo prima, & infinita bonitas est obiectum formale vltimum Charitatis; sed sola prima bonitas est obiectum formale vltimum Charitatis; ergo sola prima veritas est obiectum formale vltimum fidei.

3. Ter-

3. Tertiò obiectum formale vltimum virtutis theologicæ debet esse solum aliquid increatum, & diuinum, vt patet ex allato exemplo Charitatis; sed fides est virtus theologica; ergo obiectum formale vltimum fidei debet esse sola prima veritas increata, reuelatio verò cum sit creata, non potest esse obiectum formale vltimum fidei, sed solum est conditio, *sine qua non*.

4. Quartò videtur obiectum formale vltimum fidei non esse prima veritas, sed Deitas, siue infinita perfectio Dei, vt docet Aureolus apud Capreolum in 3. dist. 24. quæst. vltimà art. 2. in fine. Quod enim creditur propter aliud, non est obiectum formale vltimum, sed potius illud aliud est obiectum formale vltimum; sed credimus Deum esse primam veritatem propter Deitatem, hoc est, quia Deus est ens habens omnem perfectionem; ergo obiectum formale vltimum fidei non est prima veritas, sed Deitas.

5. Quintò videtur sola reuelatio esse obiectum formale vltimum fidei, prima autem veritas non esse obiectum formale vltimum fidei. Obiectum enim formale vltimum est, quod creditur propter se, quod autem creditur propter aliud, non est obiectum formale vltimum; sed ex dictis quæstione XIII. Deum esse primam veritatem credimus, quia Deus testatur se esse primam veritatem, adeoque propter reuelationem; ergo obiectum formale vltimum fidei non est prima veritas, sed reuelatio.

Sextò

6. Sextò obiectum formale fidei est, per cuius assensum fidelis distinguitur primò ab infideli; sed fidelis primo distinguitur ab infideli non per hoc, quod credat Deum esse primam veritatem; nam etiam infideles, & heretici hoc credunt; sed per hoc, quod credat Deum reuelasse nostram religionem; ergo obiectum formale fidei non est prima veritas, sed reuelatio.

6. Resp. quod licet obiectum materiale, & formale dicantur multipliciter, tamen vt patet ex S. Thoma 2.2. quæst. 1. art. 1. cum agitur de actibus, & habitibus iudicatiuis, nomine obiecti materialis solet intelligi id, quod per habitum, vel actum iudicatur; nomine obiecti formalis, abstrahendo à primariò, & secundario, solet intelligi motium iudicandi, eo pacto, quo obiecta materialia Geometriæ dicuntur conclusiones Geometricæ, obiectum formale sunt prima principia, quæ mouent ad assentiendum conclusionibus Geometricis; sed fides est actus, vel habitus iudicatiuis; ergo obiectum materiale adæquatum fidei est, quod complectitur omnia & sola ea, quæ per fidem credimus, aut possumus credere, tanquam conclusiones, obiectum formale est motium credendi; sed per fidem possumus credere omnia, & sola reuelabilia à Deo; ergo obiectum materiale adæquatum fidei, quod etiam dici solet obiectum communis, est veritas à Deo reuelabilis, vt communiter conceditur.

7. Dicendum secundò: obiectum materiale

teriale attributionis in fide est sola veritas diuina, reliquæ veritates sunt obiecta attributa.

8. Probatur: nam obiectum materiale attributionis in fide est illa veritas, quæ primò, & per se reuelatur, ita vt reliquæ reuelentur in ordine ad illam; sed Deus primò, & per se reuelat veritates diuinas, in quarum cognitione consistit noster vltimus finis, & nostra beatitudo, reliquas autem veritates reuelat solum propter aliquem ordinem, quem habent ad veritates diuinas; ergo sola veritas diuina est obiectum materiale attributionis in fide, reliquæ veritates sunt obiecta attributa; & quia veritas diuina realiter est ipsa prima veritas, ideo vt docet S. Thomas eodem art. 1. dici potest, quod ipsa prima veritas est obiectum materiale fidei, intellige, *attributionis*.

9. Dicendum tertio: obiectum formale fidei, seu motiuum credendi est ipsa prima veritas reuelans. Probatur: nam obiectum formale fidei est motiuum credendi omnia, quæ credimus per fidem; sed omnia, quæ credimus per fidem, credimus ex hoc motiuo, quia Deus, qui est prima veritas, illa reuelauit: hoc autem dicimus primam veritatem reuelantem; ergo &c.

10. Dicendum quarto: tum prima veritas increata, tum reuelatio creata est obiectum formale fidei, abstrahendo à primario, & secundario. Probatur: nam obiectum formale; abstrahendo à primario,

rio, & secundario, sunt illæ præmissæ per se credibiles, per quas explicatur, quod Deus sit prima veritas reuelans; sed quod Deus sit prima veritas reuelans explicatur per has duas præmissas per se credibiles, *Deus est prima veritas infallibilis, testans se esse primam veritatem infallibilem: Deus reuelauit hoc, & hoc*; ergo tùm prima veritas increata, tùm reuelatio creata est obiectum formale fidei, abstrahendo à primario, & secundario.

II. Dicendum quinto: obiectum formale primarium fidei diuinæ est sola prima veritas increata, reuelatio creata est obiectum formale secundarium. Probatur: nam obiectum formale primarium fidei est illud, quod non solum firmissimè creditur immediatè, sed creditur vt prima, & fundamentalis ratio credendi reliqua: quod autem creditur quidem propter se, sed non vt prima, & fundamentalis ratio credendi firmissimè reliqua, sed cum respectu ad aliam rationem priorem, est obiectum formale secundarium; sed per fidem non solum firmissimè, & immediatè credimus Deum esse primam veritatem, sed etiam credimus hoc vt primam, & fundamentalem rationem firmissimè credendi reliqua, reuelationem autem credimus quidem propter se, sed non credimus illam, vt primam, & fundamentalem rationem credendi, sed propter respectum, quem habet ad primam veritatem, tanquam ad rationem priorem; ergo &c. Confirmari potest argumentum exemplo Charitatis, quod

quod afferetur in responsione ad 2. & 3.

12. Dicendum sextò : obiectum formale fidei in sensu reali est tùm Deitas, tùm prima veritas : in sensu formali, & proprio non est Deitas, sed prima veritas.

13. Probatur prima pars : nam cum realiter idem sit Deitas, ac prima veritas, in sensu reali potest dici, quod obiectum formale fidei sit tùm Deitas, tùm prima veritas. Verum hic modus loquendi est valde materialis, siquidem in hoc sensu posset etiam dici, quod immensitas, aternitas &c. sit obiectum formale fidei. Melius igitur probatur secundò eadem prima pars. Quando enim aliqua præmissa per se credibilis dicitur esse obiectum formale assensus, quo assentimur conclusioni illatæ ex tali præmissa, vterque terminus illius præmissæ dicitur obiectum formale, ideoque illa præmissa dicitur credibilis ex terminis : sed hæc præmissa, *Deus est prima veritas*, constat ex duplici termino, subiecto nimirum, quod est Deus, & prædicato, quod est prima veritas ; ergo tùm Deus, siue Deitas, tùm prima veritas potest dici obiectum formale.

14. Probatur iam secunda pars : nam in sensu formali, & stricto obiectum formale fidei est illa perfectio formalis, propter quam Deus, præscindendo ab alijs perfectionibus formalibus, intelligitur mereri summam fidem : sed Deus propter perfectionem formalem primæ, & infallibilis veritatis, præscindendo ab alijs perfectionibus aternitatis, immensitatis &c. intel-

intelligitur mereri summam fidem : at per perfectionem Deitatis , præscindendo ab hoc , quod includat perfectionem formalem primæ , & infallibilis veritatis , non intelligitur mereri summam fidem ; ergo , &c.

15. Ad 1. concedo totum ; sed dico quod argumentum probat tum primam , veritatem increatam , tum reuelationem creatam esse obiectum formale fidei , abstrahendo à primario & secundario , quod concessimus conclusione 3. sed non probat vtramque esse obiectum formale primarium , quod solum negauimus conclusione 6.

16 Ad 2. transeat maior , & distingo minorem : sola infinita bonitas est obiectum formale primarium Charitatis , & vt finis cui , concedo minorem ; est obiectum formale , abstrahendo à primario , & secundario , à fine cui , & fine qui , nego minorem ; & nego consequentiam. Est doctrina communiter recepta , quam ex Arist. 2. de Anima text. 33. & 37. tradit Vasq. 1. 2. disp. 2. cap. 3. quod cum amamus aliquem amore amicitiae , atque illi volumus bonum , is , cui volumus bonum , est finis , cui , bonum , quod volumus , est finis qui , & tum finis cui , tum finis qui per se amabilis est obiectum formale indiuisibiliter mouens ad amorem , licet finis cui cum sit finis principalior , sit obiectum formale primarium , finis qui cum sit finis minus principalis , sit obiectum formale secundarium , & aliquo pacto ametur ratione finis

cui

cui primarij, qui solus amatur, vt prima, & fundamentalis ratio amandi reliqua: sed per Charitatem amamus Deum amore amicitia, eique volumus bona etiam extrinseca, & creata, puta gloriam extrinsecam, sanctificationem nominis, adimplentionem voluntatis, perfectam obedientiam praeceptorum, iuxta illud Christi Io. 14. *si diligitis me, mandata mea seruate*: ergo Deus est finis cui Charitatis, bona autem extrinseca sunt finis qui eiusdem, ac proinde non sola bonitas increata Dei, quæ est finis cui, sed etiam bonitas creata extrinsecorum bonorum, quæ est finis qui, est obiectum formale Charitatis, licet bonitas increata sit obiectum formale primum, bonitas creata extrinsecorum bonorum sit obiectum formale secundarium, quod aliquo pacto amatur ratione bonitatis diuinæ, quæ amatur, vt finis cui, & vt ratio prima, & fundamentalis amandi reliqua; sed vt explicatum est, prima veritas increata est obiectum formale primum fidei, & est persona, cui credimus, ac prima, & fundamentalis ratio firmissimè credendi reliqua; reuelatio vero est obiectum formale solum secundarium, quod firmissimè creditur propter respectum ad primam veritatem increatam, cui credimus; ergo procedit proportio inter fidem, & Charitatem.

17 Ad 3. distinguo maiorem: obiectum formale primarium virtutis theologicæ debet esse solum aliquid increatum, & diuinum, concedo; obiectum formale, ab-
stra-

abstrahendo à primario, & secundo, nego maiorem; concedo minorem; & distinguo, eodem pacto consequens. Ex allato exemplo Charitatis patet obiectum formale Virtutis Theologicæ, abstrahendo à primario, & secundo, posse esse aliquid creatum, vt etiam docet Cardinalis de Lugo, tomo de fide, disp. 1. sect. 5. num. 72. sed nos dicimus reuelationem creatam esse solum obiectum formale secundarium fidei; ergo &c.

18. Ad 4. distinguo maiorem: quod creditur propter aliud, quod neque sit subiectum, neque prædicatum propositionis per se credibilis, sed sit tertius, & medius terminus, non est obiectum formale vltimum, concedo; quod creditur propter aliud, quod sit subiectum, vel prædicatum propositionis per se credibilis, non est obiectum formale vltimum, nego: distinguo eodem pacto minorem; & nego consequentiam. Vt colligitur ex S. Thoma 2.2. quæst. 1. art. 2. obiectum formale potest assignari dupliciter; primo per modum integræ propositionis obiectiuæ; secundo per modum termini. Si assignetur per modum integræ propositionis obiectiuæ, tota propositio immediatè credibilis est obiectum formale; sed hæc propositio, *Deus est prima veritas* &c. est immediatè credibilis, vt ostensum est quæst. 13. ergo tota hæc propositio est obiectum formale vltimum fidei. Si obiectum formale assignetur per modum termini, & propositio sit credibilis ex terminis, vterque termi-

nus est obiectum formale ; sed ista propositio , *Deus est prima veritas* , est credibilis immediatè ex terminis ab intellectu illuminato à Spiritu Sancto ; ergo vterque terminus , hoc est tùm Deus , tùm prima veritas est obiectum formale , ita tamen , vt Deus sit obiectum formale in sensu quodam materiali , prima veritas sit obiectum formale in sensu formali , & stricto , vt explicatum est conclusione 6. ideòque simpliciter , & absolutè obiectum formale fidei per modum termini debet assignari prima veritas .

19. Ad 5. distingo maiorem : quod creditur propter aliud non contentum in subiecto , vel prædicato propositionis per se credibilis , non est obiectum formale ultimum , concedo ; quod creditur propter aliud contentum in subiecto , vel prædicato propositionis per se credibilis , non est obiectum formale ultimum , nego ; distingo eodem pacto minorem ; & nego consequentiam . Dictum est quæst. 13. primum principium fidei esse hanc propositionem per se credibilem , *Deus est prima veritas per reuelationem mysterij exercitè testans se esse primam veritatem* ; sed in hac propositione testimonium , seu reuelatio est pars prædicati ; ergo dum hæc propositio creditur propter testimonium , & reuelationem , creditur propter aliquid , quod est pars prædicati , & non est terminus tertius , ac medius ; ergo creditur propter se , & propter suos terminos : siquidem ad hoc , vt propositio obiectiua non sit

sit immediata, requiritur ut credatur propter tertium, & medium terminum, ut docent omnes in Summulis, & in libris priorum, & posteriorum; ergo cum illa propositio sit per se, & immediatè credibilis intellectui illuminato a Spiritu Sancto, potest esse obiectum formale ultimum fidei.

20. Ad 6. concedo maiorem, & distinguo minorem: fidelis non distinguitur ab infideli per hoc, quod credat incomplexè Deum esse primam veritatem, concedo; per hoc, quod credat complexè Deum esse primam veritatem per reuelationem mysterij exercitè testantem se esse primam veritatem, nego; & distinguo eodem pacto consequens. Infidelis assentitur quidem isti propositioni incomplexæ seorsim propositæ, *Deus est prima veritas*: at proposita sufficienter reuelatione, per quam redditur per se, & immediatè credibilis hæc propositio complexa, *Deus est prima veritas per reuelationem nostræ religionis exercitè testans se esse primam veritatem*, non assentitur huic propositioni; sed prima veritas est obiectum formale fidei non seorsim, siquidem seorsim cognoscitur per lumen naturale, & sine reuelatione, sed solum in quantum includitur in hac propositione complexa, *Deus est prima veritas per reuelationem nostræ religionis, ac mysteriorum exercitè testans se esse primam veritatem*; ergo infidelis non assentitur primæ veritati, in quantum est obiectum formale fidei; ergo fidelis distinguitur ab

infideli per hoc, quod assentiatum primæ veritati, in quantum includitur in ea propositione complexa, ac proinde prima veritas ut inclusa in ea propositione est obiectum formale fidei, per cuius assensum fidelis distinguitur ab infideli.

QVÆSTIO XV.

*Utrum Deum esse summè veracem
possit credi ut conclusio, & ut
obiectum materiale
Fidei?*

1. **V**idetur non posse: conclusio enim saltem formaliter debet distinguere à præmissis: cuius ratio est, quia discursus est progressus intellectuualis ab una veritate in aliam: sed hæc conclusio, *Deus est summè verax*, non distinguitur formaliter à prima præmissa fidei, quæ ex dictis quæst. 13. est, *Deus est prima veritas exercitè testans per reuelationem mysterij se esse primam veritatem*; ergo &c.

2. Resp. quod Deum esse summè veracem potest credi non solum ut obiectum formale, sed etiam ut obiectum materiale, & ut conclusio fidei. Ratio est, quia quidquid à Deo est reuelatum, non solum exercitè, & indirectè, sed etiam signatè, & directè, potest credi ut obiectum materiale, & ut conclusio per discursum saltem virtuale illata ex præmissis fidei; sed
Deum

Deum esse summè veracem, reuelatum fuit directè, & signatè in pluribus locis scripturæ, & præsertim cum ad Ro. 3. dicitur, *Est autem Deus verax, & omnis autem homo mendax*: ergo.

3. Ad argumentum in contrarium distinguo maiorem: conclusio debet Saltem formaliter distingui à præmissis, & non sufficit distinctio obiecti incomplexi à complexo, nego; & sufficit hæc distinctio, concedo; distinguo eodem pacto minorem; & nego consequentiam. Ad conclusionem discursus latissimè sumpti sufficit, vt talis cōclusio distinguatur à præmissis qualibet distinctione, vel minus expliciti à magis explicito, vel obiecti incomplexi à complexo: Probatur, & explicatur exemplis. Valet enim hæc argumentatio, *Petrus, & Paulus currunt; ergo Petrus currit*, & tamen consequens, seu conclusio differt ab antecedenti solū vt obiectū incomplexū à complexo. Similiter valet: *Deus est unus: Deus est Trinus; ergo Deus est Trinus, & unus*; & tamen consequens differt ab antecedenti solū vt propositio complexa à propositione incomplexa; ergo licet hæc propositio, *Deus est prima veritas* differat ab hac propositione, *Deus est prima veritas reuelans se esse primam veritatem*, solum, vt propositio incomplexa à propositione complexa, nihilominus potest ex illa inferri per discursum latè sumptum, ac potest credi per fidem, vt obiectum materiali, ita vt ex illa alia inferatur, tanquam ex obiecto formali. Simili modo explicatur,

tur, quo pacto per fidem credi possit ut conclusio, quod Deus est, licet hæc veritas, *Deus est*, includatur in maiori fidei, qua affirmatur Deus absolutè, & non solum in sensu conditionato esse prima veritas.

4. Debet aduerti multas regulas syllogisticas valere, solum de discursu strictè, non autem latè sumpto: E. G. est regula, quod discursus, siue argumentatio debet constare ex tribus saltem terminis, & tamen vna propositio conuertitur in aliam per discursum, siue argumentationem, constantem ex duobus tantum terminis, ut cum, dicitur, *omnis homo est animal; ergo aliquod animal est homo*.

QVÆSTIO XVI.

*Utrum assensus Fidei includat discursum formalem, vel solum
virtualem?*

1. **V**Idetur non includere vllum discursum, primò quia in omni discursu formali, vel virtuali certiores sumus de præmissis, quam de conclusione, iuxta axioma Aristotelis, & commune; propter quod unumquodque tale, & illud magis; ergo per fidem certiores essemus de hoc, quod Deus reuelauerit nostram religionem, quam de veritate nostræ religionis; ergo de veritate nostræ religionis non ha-

haberemus certitudinem super omnia.

2. Secundò in omni discursu certitudo de conclusione pendet à certitudine de bonitate illationis : sed certitudo de bonitate illationis est merè naturalis; ergo certitudo de conclusionibus fidei penderet ab aliqua certitudine merè naturali, quod repugnat. Nam certitudo fidei cum sit maior omni certitudine naturali, non potest pendere ab vlla certitudine merè naturali.

3. Resp. discursum, pro vt abstrahit à formali, & virtuali esse, per quem propositioni per se non notæ, aut per se non credibili, assentimur propter connexionem, quam habet cum alijs propositionibus per se notis, vel per se credilibus, aut quæ tandem inferuntur ex propositionibus per se notis, & per se credilibus.

4. Diuiditur in formalem, & virtualem. Discursus formalis est, quo intellectus per actus distinctos ab assensu propositionum per se notarum, vel per se credibilium procedit ad assentiendum propositionibus per se non notis, vel per se non credilibus, sed connexis cum propositionibus per se notis, vel per se credilibus. Discursus virtualis est, quo intellectus eodem actu assentitur propositioni per se notæ, vel per se credibili, & propter illam propositioni obiectivæ per se non notæ, vel per se non credibili connexæ cum propositione per se nota, vel per se credibili.

5. Certum est, & ab omnibus supponitur

nitur assensum fidei includere discursum formalem, vel virtualem. Ratio est, quia per actum fidei mysterijs per se non credibilibus assentimur propter diuinam veritatem, & reuelationem per se credibilem; sed hoc sufficit ad discursum abstrahentem à formali, & virtuali; ergo &c.

6. Quæritur, vtrum actus fidei includat discursum formalem, vel solum virtualem?

7. Dicendum cum Caietano, Capreolo, & alijs, quos referunt, & sequuntur Suarius disp. 6. de Fide sect. 4. & Granado tract. 9. disp. 1. num. 8. contra Durandum, Gabrielem, & alios, quos referunt, & sequuntur Vasquez 1. p. disp. 5. num. 5. & Cardinalis de Lugo disp. 7. de Fide sect. 1. Fides includit discursum virtualem, ac non potest includere formalem.

8. Probatur: nam cum intellectus in eo signo, in quo assentitur præmissis, iam perfectè videt tales præmissas esse necessario connexas cum aliqua conclusione, eodem actu assentitur etiam tali conclusioni propter præmissas, ac proinde per discursum solum virtualem, non autem formalem; cum autem intellectus in eo signo, in quo assentitur præmissis, nondum perfectè videt tales præmissas esse connexas cum conclusione, tunc prius natura assentitur præmissis, posterius, ac per actum distinctum assentitur conclusioni propter præmissas, ac proinde per discursum formalem; sed in eo signo, in quo assentimur præmissis fidei, intellectus noster iam perfectè

fectè videt præmissas fidei esse connexas cum mysterijs reuelatis; ergo eodem actu, quo assentimur præmissis fidei, assentimur etiam mysterijs reuelatis, ac proinde per discursum solum virtualem, non autem formalem. Probatur maior: nam cum intellectus in eo signo, in quo assentitur vni, iam videt illud esse connexum cum altero, non est ratio, quare differat assensum alterius connexi ad signum posterius; ergo assentitur in eodem signo, & sine discursu formali, ad quem requiritur, vt assensus conclusionis sit posterior natura assensu præmissarum. E conuerso cum intellectus in eo signo, in quo assentitur vni, non videt perfectè illud esse connexum cum altero, propter hoc ipsum differre debet assensum alterius ad signum posterius, ac proinde debet discurrere formaliter. Probatur iam maior: nam assensu fidei, vtpote voluntarium, & liberum, præcedit prudens voluntas credendi, & iudicium de prudenti credibilitate, & de obligatione credendi; sed per iudicium de credibilitate cognoscimus præmissas fidei prudenter posse, ac debere credi propter se, & vt principia, conclusiones, seu mysteria reuelata prudenter posse, ac debere credi propter præmissas, cum quibus euidenter cognoscuntur esse connexæ; ergo in eo signo, in quo intellectus ex imperio voluntatis assentitur præmissis fidei propter se, iam perfectè videt illas esse necessario connexas cum conclusionibus, seu mysterijs reuelatis, ac proinde eodem actu assentitur etiam mys-

terijs reuelatis, sine discursu formali, ad quē requiritur, vt assensus conclusionis distinguatur realiter ab assensu præmissarum, & sit posterior natura assensu. præmissarum.

9. Nec dicas, quod ex imperio voluntatis intellectus prius natura assentitur præmissis, postèrius natura conclusionibus, seu mysterijs reuelatis . Nam voluntas non potest facere, vt intellectus assentiens vni obiecto, quod in eo signo videt esse connexum cum altero, non assentiatur alteri in eodem signo . Videri possunt quæ de discursu formali, & virtuali dixi quæst. 62. *Logicæ.*

10. Ad 1. concedo antecedens, & primam consequentiam, & nego secundam consequentiam . Dum dicimur credere super omnia, amare super omnia, dupliciter potest intelligi . Primò; quod credamus certitudine, qua non possit dari maior, amemus amore, quo non possit dari maior: & in hoc sensu nec credimus super omnia nec amamus super omnia . Patet: nam qui habet maiorem fidem, magis, & certius credit, quam qui habet minorem; qui habet maiorem charitatem, magis amat, quam qui habet minorem: Beati per visionem beatificantur multò certius assentiuntur diuinis mysterijs, quæ vident, quam viatores assentiantur iisdem mysterijs, quæ solum obscure cognoscunt; ac Deus certitudine infinitè maiori cognoscit, quam qualibet creatura, sicut infinitè magis se ipsum amat, quam vlla creatura amet, vel amare possit Deum,
 Secun-

Secundo potest intelligi, quod per fidem mysterijs reuelatis adhaereamus maiori certitudine, & firmitate, quam vllis obiectis naturaliter cognitis, & ita, vt motuum credendi praferamus omnibus alijs motiuis, quæ possunt occurrere in oppositum; & proportionaliter dicimus Deum amare super omnia, quatenus Deum amamus magis, quàm vllum obiectum creatum, ac Deum praferimus omnibus alijs amabilibus: & solum in hoc sensu per fidem credimus Deo super omnia; sed cum hoc, quod per fidem mysterijs reuelatis magis assentiamur, quam vllis obiectis naturaliter cognitis, stat, quod per fidem ipsam possimus magis assentiri principiis, quam conclusionibus, licet tùm principiis, tùm conclusionibus fidei magis assentiamur, quam vlli obiecto naturaliter cognito; ergo &c. Addo, quod illud axioma, *propter quod vnumquodque tale, & illud magis*, aliqui in praesenti materia intelligunt negatiuè, ita vt sensus sit: non possumus firmitus assentiri conclusioni, quam principiis, non autem positiuè, vt sensus sit, necesse est, vt certitudine positiuè maiori assentiamur principiis, seu praemissis, quam conclusioni.

11. Ad 2. concedo maiorem, & nego minorem. Per fidem enim habemus certitudinem supernaturalem de hoc, quod Deus reuelet mysteria reuelatione essentialiter connexa cum veritate mysteriorum; sed bonitas illationis consistit in hoc, vt veritas praemissarum sit essentialiter

connexa cum veritate conclusionis ; ergo per fidem certificamur de bonitate illationis : & quia hoc complexum, *Deus reuelat mysteria reuelatione essentialiter connexa, cum veritate mysteriorum*, est obscurum, ideo per fidem obscuram in complexo obscuro certificamur de bonitate illationis, quæ seorsim considerata est euidens. Porro non repugnat, vt dum assentimur complexo obscuro, in tali complexo assentiamur veritati, quæ seorsim sit euidens, vt patet pluribus exemplis. Nam dum assentior huic veritati complexæ obscuræ, *Deus est trinus, & vnus*, assentior huic veritati, *Deus est vnus*, quæ seorsim est euidens; dum per fidem obscuram credo me posse consequi beatitudinem supernaturalem, assentior huic veritati, *ego existo*, quæ seorsim mihi est euidētissima. Sed hæc quæst. 33. magis explicabuntur.

12. Ex hætenus dictis in hoc tractatu, explicari potest actus fidei, eiusque resolutio in sua motiua intrinseca : Vt eliciam actum fidei, quo credam E.G. Deum esse trinum, & vnum, primò debet mihi proponi Deum esse summam veritatem reuelantem se esse Trinum, & Vnum, & exigentem à me, vt id summè credam, ac proindè exercitè reuelantem se esse summam, & infallibilem veritatem. Secundò per motiua credibilitatis, & per internam illuminationē Spiritus Sancti debet mihi euidenter persuaderi, me prudenter posse, ac debere firmissimè credere Deum esse summam veritatem, reuelantem se esse

tri-

trinum, & vnum, & exercitè reuelantem se esse summè veracem, & ex hoc motiuo posse, ac debere credere Deum, esse trinum, & vnum. Tertiò ex motiuis credibilitatis sequitur iudicium euident, quo dico: ego prudenter possum, ac debeo firmissimè credere, Deum esse summam veritatem, reuelantem se esse Trinum, & Vnum, & exercitè reuelantem se esse summè veracem, & ex hoc motiuo possum, ac debeo firmissimè credere Deum esse Trinum, & Vnum. Quarto ex hoc iudicio sequitur libera voluntas credendi, qua dico: quia prudenter possum, ac debeo firmissimè credere Deum esse summam veritatem reuelantem se esse Trinum, & Vnum, & exercitè reuelantem se esse summè veracem, & ex hoc motiuo possum, ac debeo firmissimè credere, Deum esse Trinum, & Vnum, volo totum hac firmissimè credere. Quinto ex hoc actu voluntatis, concurrente Deo per auxilia gratiæ, sequitur in intellectu actus fidei imperatus, quo firmissimè dicit: Deus est summa veritas reuelans se esse Trinum, & Vnum, & exercitè reuelans se esse summè veracem: & quia hoc non potest esse verum, quin Deus sit Trinus, & Vnus, Deus est Trinus, & Vnus. Obiectum formale, ac motiuum intrinsecū huius actus est hæc veritas per se credibilis: Deus est summa veritas reuelans se esse Trinum, & Vnum, & exercitè reuelans se esse summè veracem. Obiectum materiale est hæc veritas non per se credibilis, Deus est Trinus, & Vnus. Motiuum assentiendi, & obiectum formale apparet
ita

ita connexum cum materiali, vt non possit esse verum obiectum formale, quin sit verum materiale. Hic actus indiuisibilis est syllogismus quidam virtualis, quia virtualiter continet istum syllogismum formalem, constantem ex duabus præmissis, & concludione realiter distiuctis: *Deus est summa veritas, ac proinde quidquid dicit est verum; sed Deus dicit se esse Trinum, & Vnum; ergo Deus est Trinus, & Vnus.* Actus voluntatis, quo volumus credere, & iudicium de prudenti credibilitate sunt actus necessariò præsuppositi ad fidem, vt-pote prudentem, voluntariam, & liberam, ac motiua, ex quibus mouentur tales actus, sunt motiua solum extrinseca fidei. Ideo explicata resolutione fidei in sua motiua intrinseca, debemus agere de resolutione fidei in sua motiua extrinseca, hoc est in motiua credibilitatis, per quæ probamus nos posse, ac debere prudenter firmissimè credere, Deum reuelasse nostram religionem, eiusque mysteria: quod iam præstabitur tractatu secundo.




TRA.

TRACTATVS SECVNDVS

*De resolutione extrinseca fidei in motiua
credibilitatis.*

Q V A E S T I O XVII.

*Vtrum sit evidens Religionem Christiana-
nam, & Catholicam esse pruden-
ter credibilem, & cre-
dendam ?*

I  IDETVR non esse evidens, primò quia quod est evidens, à nemine potest negari; sed omnes infideles negant Christianam religionem esse prudenter credibilem, ac credendam, ac dicunt imprudenter, ac stultè à nobis credi; ergo &c.

2. Secundò non est evidens illam religionem esse prudenter credibilem, & credendam, cuius doctrinam probabile est esse falsam; sed probabile est falsam esse doctrinam religionis Christianæ, ac Catholicæ; ergo &c. Probatur minor: nam probabile est quod probatur argumentis magni ponderis, & habentibus magnam vim trahendi, & inclinandi intellectum ad assensum; sed falsitas doctrinæ Christianæ, ac Catholicæ probatur argumentis magni ponderis, & habentibus ma-

magnam vim trahendi, & inclinandi intellectum ad assensum; ergo &c. Probatur minor: nam argumenta probantia Deum non esse trinum, & vnum; Verbum non esse incarnatum; Christum crucifixum non esse Deum; eundem Christum non esse in Eucharistia; non dari peccatum originale &c. sunt magni ponderis, & habent magnam vim trahendi, & inclinandi intellectum ad assensum; ergo &c. Confirmatur, nam talia argumenta sunt maioris ponderis, & habent maiorem vim trahendi, & inclinandi intellectum ad assensum, quàm argumenta, quibus redduntur probabiles opiniones philosophicæ, & theologicæ, quæ propter talia argumenta censentur probabiles; ergo &c.

3. Resp. ex dictis motiua extrinseca fidei, seu motiua credibilitatis esse, per quæ probatur religionem Christianam, & Catholicam esse prudenter credibilem, & credendam. Dicuntur autem motiua extrinseca fidei, quia ijs non nititur immediate actus fidei: is enim nititur solum testimonio Dei reuelantis; sed nititur iudicium prærequisitum ad fidem, quo iudicamus religionem christianam, & catholicam esse prudenter credibilem, & credendam. Ut igitur agamus de motiuis credibilitatis, primò hac quæstione examinabimus, vtrum probetur euidenter religionem christianam, & catholicam esse prudenter credibilem, & credendam: deinde quæstionibus sequentibus asseremus motiua, & argumenta, quibus hoc pro-

probatur; & simul ostendemus omnes alias sectas non posse prudenter credi, ac proinde grauissimè peccare eos, qui relictæ, vel non acceptata religione Christiana, & Catholica, sequuntur alias sectas.

4. Dicendum igitur: euidens est religionem Christianam, & Catholicam, esse prudenter credibilem, & credendam.

5. Probatur primò ex Scriptura. Nam Ps. 92. dicitur, *testimonia tua credibilia facta sunt nimis*: sed testimonia etiam humana, non sunt credibilia nimis, hoc est non habent maximam quamdam credibilitatem, cum non est euidens, quod propter talia testimonia possumus, & debemus credere ea, quæ testantur: E. G. testimonia, quibus aliqui testantur reum accusatum commisisse homicidium, non sunt nimis, hoc est maximè credibilia, cum, non est euidens, quod Iudex debet, ac potest prudenter credere reum commisisse homicidium, eumque condemnare; ergo &c. Rursus Io. 15. Christus dicit, *si non uenissem, & locutus fuisset eis, peccatum non haberent: nunc autem excusationem non habent de peccato suo*; & paulo post, *si opera non fecissem in eis, quæ nemo alius fecit, peccatum non haberent*: sed si non esset euidens, quod possumus, ac debemus credere, ipsa ineuidencia obligationis excusaret nos à credendo; possemus enim suspendere iudicium, quo iudicamus nos obligari ad credendum: suspendendo autem hoc iudicio, suspenderetur obligatio credendi, ut pote quæ si sit proxima, non potest

potest dari sine tali iudicio; ergo &c. Marci vltimò dicitur, *qui non crediderit, condemnabitur*; ergo qui non credit, peccat, & meretur condemnationem; sed si non esset euidens, quod possumus, ac debemus credere, possemus non credendo, non peccare, ac non mereri condemnationem; ergo &c. Ad Hebr. 2. Veritas nostræ religionis dicitur à Deo confirmata signis, & portentis: Marci vltimo prædicatio Euangelij dicitur facta fuisse, Domino cooperante, & sermonem confirman- te, sequentibus signis: sed testis non satis suo testimonio confirmat aliquid, cum non reddit euidens rem, quam testatur, posse ac debere prudenter credi; ergo &c.

6. Probatur secundò ex Patribus, qui dicunt Ecclesiam Catholicam Matth. 5. fuisse significatam per ciuitatem supra montem positam, quæ nequit abscondi: Danielis 2. per montem, qui impleuit vniuersam terram, ac proinde non potest in oculos non incurrere: & lib. 13. contra Faustum dicit: *clausis oculis offenditis montem*; & libro de vera religione, cap. 2. dicit: *Christianis temporibus, quamam religio sit potissimum tenenda, quæ ad veritatem, & beatitudinem viâ sit, non est dubitandum*. Idè colligitur ex alijs Patribus. Chrysostomus oratione, quod Christus sit Deus, concludit: *nullus itaque his contradixerit, nisi qui valde insanus, & totus stupidus sit, humanoque sensu priuatus*: Arnobius lib. 2.

con-

contra gentes dicit: incredulum genus humanum doctrinae Christi numquam fuisset consensurum, nisi aperta res esset, & luce ipsa, ut dicitur, clarior: Origenes hom. 30. in Matth. dicit: Ecclesia plena est fulgore ab Oriente usque in Occidentem: Sapientiae 6. dicitur: clara est sapientia, & quae numquam marcescit, ac facile videtur ab his, qui quaerunt eam: sed haec ostendunt evidens esse, quod nostra religio sit prudenter credibilis, & credenda; ergo &c. Sanctis Patribus accedunt S. Thomas 2. 2. quaest. 1. art. 4. ad 4. & omnes Theologi: ideoque Suarius disp. 4. de Fide sect. 3. dicit, rem esse, de qua nullus Catholicus potest dubitare, & Amicus probabile censet esse de fide, quod detur evidens credibilitas nostrae religionis.

7. Probatur tertio rationibus, quae afferentur quaestionibus seqq.

8. Ad 1. distinguo maiorem: quod est evidens, à nemine potest negari, dum sufficienter considerantur, & penetrantur motiua, concedo: dum non sufficienter considerantur, & penetrantur motiua, nego; distinguo eodem pacto minorem; & nego consequentiam: Multa sunt ita euidencia, ut non possimus illa negare, si consideremus, & penetremus motiua, & rationes, quibus ostenduntur; possimus negare, si non consideremus motiua: E. G. multa, quae mathematicè demonstrantur, negare non possumus, si consideremus, & penetremus demonstrationes, sed possumus nega-

negare, si nolumus audire, & considerare demonstrationes; ergo non est mirum, quod Infideles, si nolint considerare rationes, & motiua, quibus probatur religionem Christianam esse prudenter credibilem, & credendam, possint id negare, ac de facto negent. At quando considerant, & penetrât motiua nostræ religionis, non possunt interius negare, se posse prudenter credere, & obligari ad credendum, ideòque non credendo, peccant, & merentur condemnationem, iuxta illud Christi, Marci ultimò: *qui non crediderit, condemnabitur.* Adde vt plurimum Infideles, etiam cū non sufficienter penetrant motiua nostræ religionis ac proinde non tenentur proximè credere, habere euidentiâ de hoc, quod non possunt prudenter quiescere in suis sectis, sed tenentur considerare motiua aliarum sectarum, & præsertim religionis Christianæ, ac Catholicæ, & si non considerent, grauiter peccant, & merentur condemnationem.

9. Ad. 2. nego maiorem. Ad probationem distinguo maiorem: probabile est, quod probatur argumentis magni ponderis, & habentibus magnam vim trahendi, & inclinandi intellectum ad assensum, etiam cum intellectus considerat rationes contrarias, quas debet considerare, concedo; cum non considerat rationes contrarias, nego: distinguo eodem pacto minorem; & nego consequentiam. Vt aliquid sit probabile, non sufficit, vt probetur argumentis magni ponderis, & habentibus

tibus magnam vim trahendi, & inclinandi intellectum ad assensum, cum non considerantur argumenta contraria, sed requiruntur, vt habeant talem vim etiam cum considerantur motina contraria: E. G. argumenta, quibus probatur impossibile esse continuum, & motum, ex eo, quod neque possint componi ex indiuisibilibus, neque ex partibus semper in infinitum diuisibilibus, secundum se præcisè considerata, sunt magni ponderis, cum difficillimè soluantur: sed consideratis rationibus, & experientijs, quibus ostenditur, dari motum, & continuum, sunt penitus contemnenda, & nullam habent vim mouendi prudenter, & probabiliter intellectum ad negandum continuum, & motum: ideoque Arist. 8. Phys. text. 22. dicit infirmitatem intellectus esse propter tales rationes negare motum. In casu nostro argumenta, quibus probatur Christianam religionem esse falsam, consideratis rationibus, quibus probatur Deum reuelasse religionem Christianam, & Catholicam, nullius sunt momenti. Quid enim mirum, si nos, quæ non possumus penetrare, quo pacto componatur continuum, & motus, quæ oculis videmus, & manibus tractamus, non possimus satis penetrare, quo pacto Deus sit Trinus, & Vnus, quo pacto potuerit fieri homo, & vniuersum, quid Deus possit, vel non possit? ergo sicut imprudenter, & stultè propter rationes, quæ afferuntur contra continuum, & motum, negaremus, aut reuocaremus in dubium dari continuum,

num, & motum, sic imprudenter propter rationes apparentes, quæ afferuntur contra myſteria Trinitatis, Incarnationis &c. dubitaremus de veritate noſtræ religionis, cum aliundè probetur efficaciffimè credendum eſſe, illam fuiſſe reuelatam à Deo.

QVÆSTIO XVIII.

*Vtrum ex vaticinijs veteris teſtamenti
probetur euidenter Chriſtianam re-
ligionem eſſe prudenter cre-
dibilem, & creden-
dam?*

1. **V**Idetur non probari: primo quia poteſt prudenter dubitari vaticinia veteris teſtamenti verè non fuiſſe ſcripta ante Chriſtum, ſed poſt Chriſtum à Chriſtianis conficta, ad probandam religionem Chriſtianam, & ad oſtendendum Chriſtum noſtræ religionis Authorem, fuiſſe diuinitus reuelatum, & promiſſum, antequam veniret.

2. Secundo in vnaquaque re ſtandum eſt peritis in ea re; ſed peritiſſimi circa vaticinia veteris teſtamenti, & circa eorum adimpletionē ſunt Iudæi, quibus fuerunt tradita; ergo circa vaticinia veteris teſtamenti, & circa eorum adimpletionem, ſtandum eſt Iudæis: ſed Iudæi vnanimiter negant vaticinia de Meſſia impleta eſſe in Chriſto,

Christo , & in religione Christiana ; ergo &c.

3. Tertiò vt sit euidens religionem Christianam esse prudenter credibilem, & credendam, requiritur, vt non solum aliqua, sed vt omnia vaticinia de aduentu Messia impleta fuerint in Christo; sed aliqua, non autem omnia vaticinia de Messia impleta fuerunt in Christo; ergo &c.

4. Resp. argumenta, quibus probatur euidens esse Christianam religionem esse prudenter credibilem, & credendam, desumi ex duobus præsertim capitibus; ex vaticinijs nimirum Prophetarum, quibus Christiana religio prænunciata est diù, antequam oriretur; & ex miraculis, quibus propagata est, post quam est exorta.

5. Quod ex vaticinijs Prophetarum probetur euidenter Christianam Religionem esse prudenter credibilem, & credendam, insinuauit Christus Lucæ 24. dicens, *ò stulti, & tardi corde ad credendum in omnibus, quæ locuti sunt Prophetae. Nonne oportuit Christum pati, & ita intrare in gloriam suam? Quod hoc idem probetur ex miraculis, insinuauit idem Christus Io. 15. dicens: si opera non fecissem in eis, quæ nemo alius fecit, peccatum non haberent; ergo per miracula fit, vt qui non credunt, peccent, non credendo, adeòque sit euidens, quod tenentur credere; & per vaticinia Prophetarum fit, vt qui non credunt, sint stulti, hoc est imprudentes, & tardi corde, ac proinde quod euidens sit, quod tenentur credere,*

6. Ex

6. Ex vaticinijs igitur Prophetarum probatur religionem Christianam esse euidenter credibilem, & credendam. Nam euidenter est credibilis, & credenda religio, quæ diu antequam oriretur, imo fere ab initio Mundi fuit propheticè promissa, & prænunciata, ac pluribus figuris expressa, & à populo, qui solus profitebatur cultum vnus veri Dei, per plura annorum millia expectata; sed talis est Christiana, religio; ergo &c. Maior est euidens. Nam illa religio est euidenter credibilis, & credenda, quæ habet motiua, propter quæ euidens est, quod quilibet prudens potest, ac debet credere illam fuisse diuinitus reuelatam; sed euidens est, quod quilibet prudens potest, ac debet credere reuelatam fuisse à Deo religionem, quæ multis sæculis antequam oriretur, fuit propheticè promissa, & prænunciata; ergo &c. Probatur igitur minor: nam Iudæi, qui sunt Christianæ religioni inimicissimi, toto terrarum orbe ab annis mille sexcentis dispersi, ac diffusi, deferunt secum libros veteris testamenti, ac vnanimiter testantur eos esse scriptos diu, antequam Christus nasceretur, & Christianam religionem fundaret: testantur etiam in ijs libris præcipuè contineri promissiones, & vaticinia Messiae venturi, cuius legem, & doctrinam deberent homines sequi, vt ad felicitatem peruenirent: testantur demum se vsque à temporibus Abraham, hoc est duobus circiter annorum millibus ante natiuitatem Christi, expectasse Messiam; ergo

ergo est moraliter euidens libros veteris testamenti plenos promissionibus, ac praedictionibus Messiae venturi, ac religionis, quae profiteretur doctrinam, & legem Messiae, scriptos fuisse diu ante Christum, & Iudaeos, qui tunc soli inter omnes populos colebant vnum, & verum Deum, libros illo recepisse vt traditos à Deo, & per duo circiter annorum millia credidisse, & expectasse Messiam venturum, vt doctrinam, & legem eius sequendo, peruenirent ad felicitatem; qui autem de his dubitaret, posset etiam dubitare, vtrum ante Christum extiterit Respublica Romana, & Atheniensis, & scripti fuerint libri Demosthenis, Ciceronis &c. sed in Christo, & in religione Christiana impleta sunt, & quotidie implentur, quae in libris veteris testamenti promissa, & praenunciata fuerunt de Messia, ac de religione eorum, qui profiterentur doctrinam, & legem Messiae; ergo Christus, & religio Christiana fuerunt diuinitus promissa, ac praenunciata diu, antequam Christus nasceretur, & Christianam religionem fundaret. Probatur vltimum assumptum, afferendo clarissimas praedictiones de Messia, quae manifestè impletae fuerunt in Christo, & in religione Christiana.

7. Primò tempus aduentus Messiae Genes. 49. praedixit Iacob, dum moreretur, dicens: *non auferetur sceptrum de Iuda, neque Dux de femore eius, donec veniat qui mittendus est, & ipse erit expectatio Gentium*: sed ius sceptri, & principatus Iu-

Lib. V,

G

daici

daici non fuit ablatum stabiliter, & sine spe ex tribu Iuda, nisi cum Herodes, non Iudæus, sed alienigena, non ex consensu, & electione populi Iudaici, sed ex tyrannicā Romanorum potentia regnum Iudæorum occupauit : tempore autem Herodis natus est Christus, qui fuit expectatio, siue, vt alij legunt, aggregatio gentium : nam Gentiles per fidem se aggregarunt Christo, & Apostolis, alijsque Iudæis, qui crediderant in Christum, non aliter, ac si illum expectassent ; ergo &c. Circa hoc vaticinium Iacobi videri potest Suarius de Incarn. disp. 1. sect. 2. Lyranus, Cornelius, & alij interpretes Scripturæ, qui testimonio Hebræorum, Græcorum, Latinorum, & Chaldæi paraphrastici probant eo loco à Iacobo promissum fuisse Messiam, non autem Ieroboam, vt insulsè, & impiè docuit Rabbi Salomon, nec Nabuchodonosor, vt non minus impiè docuit Iulianus Apostata ; siquidem Messias, non autem illi erant futuri expectatio gentium : Videri etiam potest Petauius in Rationario temporum part. 2. lib. 3. cap. 16.

8. Secundò clariùs tempus aduentus Messiae, eiusque mortem, perfidiam Iudæorum in Messia negando, ac destructionem, & perpetuam desolationem Regni Iudaici, cum euerfione Templi prædixit Angelus Gabriel, Danielis cap. 9. dicens Danieli, cui apparuerat : *Animaduerte sermonem, & intellige visionem. Septuaginta Hebdomadæ abbreviatæ sunt super populum tuum, & super urbem sanctam tuam,*

tuam, ut consumetur prauaricatio, & finem accipiat peccatum. & deleatur iniquitas, & adducatur Iustitia sempiterna, & impleatur visio, & prophetia, & ungatur Sanctus Sanctorum. Scito ergo, & animaduerte. Ab exitu sermonis, ut iterum aedificetur Ierusalem usque ad Christum Ducem, Hebdomades septem, & hebdomades septuagintaduæ, & rursus aedificabilur platea, & muri in angustia temporum; & post hebdomades septuagintaduas occidetur Christus, & non erit eius populus, qui eum negaturus est; & ciuitatem, & Sanctuarium dissipabit populus cum Duce venturo, & finis eius vastitas, & post finem belli statuta desolatio. Confirmabit autem pactum multis hebdomada una, & in dimidio hebdomadis deficiet hostia, & sacrificium, & erit in templo abominatio desolationis, & usque ad consummationem, & finem perseuerabit desolatio. Debet aduertiri, quod cum duplex sit hebdomas, seu septenarius, dierum nimirum, & annorum, Angelus hoc loco loquitur de hebdomadibus, seu septenarijs non dierum, sed annorum, de quibus dicitur, Leuit. 15. Numerabis tibi septem hebdomadas annorum, idest septies septem, quæ simul facient annos 49. Hoc posito, Angelus prædicit primò tempus, intra quod Christus, seu Messias veniret, & impleret prophetias, abbreviatum, seu contractum, esse intra spatium 70. hebdomadarum, hoc est annorum 490. quæ hebdomadæ deberent incipere ab exitu sermonis, ut iterum aedificaretur Ierusalem, hoc est ab anno,

potest dari sine tali iudicio ; ergo &c. Marci vltimò dicitur , *qui non crediderit, condemnabitur* ; ergo qui non credit, peccat , & meretur condemnationem ; sed si non esset euidens, quod possumus , ac debemus credere , possemus non credendo, non peccare , ac non mereri condemnationem ; ergo &c. Ad Hebr. 2. Veritas nostræ religionis dicitur à Deo confirmata signis, & portentis : Marci vltimo prædicatio Euangelij dicitur facta fuisse, Domino cooperante, & sermonem confirman- te, sequentibus signis : sed testis non satis suo testimonio confirmat aliquid , cum non reddit euidens rem, quam testatur, posse ac debere prudenter credi ; ergo &c.

6. Probatur secundò ex Patribus , qui dicunt Ecclesiam Catholicam Matth. 5. fuisse significatam per ciuitatem supra montem positam, quæ nequit abscondi : Danielis 2. per montem, qui impleuit vniuersam terram, ac proinde non potest in oculos non incurrere : & lib: 13. contra Faustum dicit : *clausis oculis offenditis montem* : & libro de vera religione, cap. 2. dicit : *Christianis temporibus, quanam religio sit potissimum tenenda, quæ ad veritatem, & beatitudinem via sit, non est dubitandum* . Idè colligitur ex alijs Patribus. Chrysostomus oratione, quod Christus sit Deus, concludit : *nullus itaque his contradixerit, nisi qui valde insanus, & totus stupidus sit, humanoque sensu priuatus* : Arnobius lib. 2.

con-

contra gentes dicit: *incredulum genus humanum doctrine Christi numquam fuisset consensurum, nisi aperta res esset, & luce ipsa, ut dicitur, clarior*: Origenes hom. 30. in Matth. dicit: *Ecclesia plena est fulgore ab Oriente usque in Occidentem*: Sapientia 6. dicitur: *clara est sapientia, & quæ numquam marcescit, ac facile videtur ab his, qui quærent eam*: sed hæc ostendunt evidens esse, quod nostra religio sit prudenter credibilis, & credenda; ergo &c. Sanctis Patribus accedunt S. Thomas 2.2. quæst. 1. art. 4. ad. 4. & omnes Theologi: ideoque Suarius disp. 4. de Fide sect. 3. dicit, rem esse, de qua nullus Catholicus potest dubitare, & Amicus probabile censet esse de fide, quod detur evidens credibilitas nostræ religionis.

7. Probatur tertio rationibus, quæ afferentur quæstionibus seqq.

8. Ad 1. distinguo maiorem: quod est evidens, à nemine potest negari, dum, sufficienter considerantur, & penetrantur motiua, concedo: dum non sufficienter considerantur, & penetrantur motiua, nego; distinguo eodem pacto minorem; & nego consequentiam: Multa sunt ita euidencia, ut non possimus illa negare, si consideremus, & penetremus motiua, & rationes, quibus ostenduntur; possumus negare, si non consideremus motiua: E. G. multa, quæ mathematicè demonstrantur, negare non possumus, si consideremus, & penetremus demonstrationes, sed possumus negare.

negare, si nolumus audire, & considerare demonstrationes; ergo non est mirum, quod Infideles, si nolint considerare rationes, & motiua, quibus probatur religionem Christianam esse prudenter credibilem, & credendam, possint id negare, ac de facto negent. At quando considerant, & penetrât motiua nostræ religionis, non possunt interius negare, se posse prudenter credere, & obligari ad credendum, ideòque non credendo, peccant, & merentur condemnationem, iuxta illud Christi, Marci ultimò: *qui non crediderit, condemnabitur.* Addo vt plurimum Infideles, etiam cū non sufficienter penetrant motiua nostræ religionis ac proinde non tenentur proximè credere, habere euidentiâ de hoc, quod non possunt prudenter quiescere in suis sectis, sed tenentur considerare motiua aliarum sectarum, & præsertim religionis Christianæ, ac Catholicæ, & si non considerent, grauiter peccant, & merentur condemnationem.

9. Ad. 2. nego maiorem. Ad probationem distinguo maiorem: probabile est, quod probatur argumentis magni ponderis, & habentibus magnam vim trahendi, & inclinandi intellectum ad assensum, etiam cum intellectus considerat rationes contrarias, quas debet considerare, concedo; cum non considerat rationes contrarias, nego: distinguo eodem pacto minorem; & nego consequentiam. Vt aliquid sit probabile, non sufficit, vt probeatur argumentis magni ponderis, & habentibus

tibus magnam vim trahendi, & inclinandi intellectum ad assensum, cum non considerantur argumenta contraria, sed requiritur, ut habeant talem vim etiam cum, considerantur motiva contraria: E. G. argumenta, quibus probatur impossibile esse continuum, & motum, ex eo, quod neque possint componi ex indiuisibilibus, neque ex partibus semper in infinitum diuisibilibus, secundum se præcisè considerata, sunt magni ponderis, cum difficillimè solvantur: sed consideratis rationibus, & experientijs, quibus ostenditur, dari motum, & continuum, sunt penitus contemnenda, & nullam habent vim mouendi prudenter, & probabiliter intellectum ad negandum continuum, & motum: ideoque Arist. 8. Phys. text. 22. dicit infirmitatem intellectus esse propter tales rationes negare motum. In casu nostro argumenta, quibus probatur Christianam religionem esse falsam, consideratis rationibus, quibus probatur Deum reuelasse religionem Christianam, & Catholicam, nullius sunt momenti. Quid enim mirum, si nos, quæ non possumus penetrare, quo pacto componatur continuum, & motus, quæ oculis videmus, & manibus tractamus, non possimus satis penetrare, quo pacto Deus sit Trinus, & Vnus, quo pacto potuerit fieri homo, & vniuersum, quid Deus possit, vel non possit? ergo sicut imprudenter, & stultè propter rationes, quæ afferuntur contra continuum, & motum, negaremus, aut reuocaremus in dubium dari continuum,

num, & motum, sic imprudenter propter rationes apparentes, quæ afferuntur contra myſteria Trinitatis, Incarnationis &c. dubitarem de veritate noſtræ religionis, cum aliundè probetur efficaciffimè credendum eſſe, illam fuiſſe reuelatam à Deo.

QVÆSTIO XVIII.

Vtrum ex vaticinijs veteris teſtamenti probetur euidenter Chriſtianam religionem eſſe prudenter credibilem, & credendam?

1. **V**Idetur non probari: primo quia poteſt prudenter dubitari vaticinia veteris teſtamenti verè non fuiſſe ſcripta ante Chriſtum, ſed poſt Chriſtum à Chriſtianis conſicta, ad probandam religionem Chriſtianam, & ad oſtendendum Chriſtum noſtræ religionis Authorem fuiſſe diuinitus reuelatum, & promiſſum, antequam veniret.

2. Secundo in vnaquaque re ſtandum eſt peritis in ea re; ſed peritiſſimi circa vaticinia veteris teſtamenti, & circa eorum adimpletionem ſunt Iudæi, quibus fuerunt tradita; ergo circa vaticinia veteris teſtamenti, & circa eorum adimpletionem, ſtandum eſt Iudæis: ſed Iudæi vnanimiter negant vaticinia de Meſſia impleta eſſe in Chriſto,

Christo, & in religione Christiana; ergo &c.

3. Tertiò vt sit euident religionem Christianam esse prudenter credibilem, & credendam, requiritur, vt non solum aliqua, sed vt omnia vaticinia de aduentu Messia impleta fuerint in Christo; sed aliqua, non autem omnia vaticinia de Messia impleta fuerunt in Christo; ergo &c.

4. Resp. argumenta, quibus probatur euident esse Christianam religionem esse prudenter credibilem, & credendam, desumi ex duobus præsertim capitibus; ex vaticinijs nimirum Prophetarum, quibus Christiana religio prænunciata est diù, antequam oriretur; & ex miraculis, quibus propagata est, post quam est exorta.

5. Quod ex vaticinijs Prophetarum probetur euidenter Christianam Religionem esse prudenter credibilem, & credendam, insinuauit Christus Luca 24. dicens, *ò stulti, & tardi corde ad credendum in omnibus, quæ locuti sunt Prophetae. Nonne oportuit Christum pati, & ita intrare in gloriam suam?* Quod hoc idem probetur ex miraculis, insinuauit idem Christus Io. 15. dicens: *si opera non fecissem in eis, quæ nemo alius fecit, peccatum non haberent; ergo per miracula fit, vt qui non credunt, peccent, non credendo, adeòque sit euident, quod tenentur credere; & per vaticinia Prophetarum fit, vt qui non credunt, sint stulti, hoc est imprudentes, & tardi corde, ac proinde quod euident sit, quod tenentur credere,*

6. Ex

6. Ex vaticinijs igitur Prophetarum, probatur religionem Christianam esse euidenter credibilem, & credendam. Nam euidenter est credibilis, & credenda religio, quæ diu antequam oriretur, imo fere ab initio Mundi fuit propheticè promissa, & prænnunciata, ac pluribus figuris expressa, & à populo, qui solus profitebatur cultum vniuersi veri Dei, per plura annorum millia expectata; sed talis est Christiana religio; ergo &c. Maior est euidens. Nam illa religio est euidenter credibilis, & credenda, quæ habet motiua, propter quæ euidens est, quod quilibet prudens potest, ac debet credere illam fuisse diuinitus reuelatam; sed euidens est, quod quilibet prudens potest, ac debet credere reuelatam fuisse à Deo religionem, quæ multis sæculis antequam oriretur, fuit propheticè promissa, & prænnunciata; ergo &c. Probatur igitur minor: nam Iudæi, qui sunt Christianæ religioni inimicissimi, toto terrarum orbe ab annis mille sexcentis dispersi, ac diffusi, deferunt secum libros veteris testamenti, ac vnanimiter testantur eos esse scriptos diu, antequam Christus nasceretur, & Christianam religionem fundaret: testantur etiam in ijs libris præcipuè contineri promissiones, & vaticinia Messiae venturi, cuius legem, & doctrinam deberent homines sequi, vt ad felicitatem peruenirent: testantur demum se vsque à temporibus Abraham, hoc est duobus circiter annorum millibus antequam natiuitatem Christi, expectasse Messiam; ergo

ergo est moraliter evidens libros veteris testamenti plenos promissionibus, ac prædictionibus Messia venturi, ac religionis, quæ profiteretur doctrinam, & legem Messia, scriptos fuisse diu ante Christum, & Iudæos, qui tunc soli inter omnes populos colebant vnum, & verum Deum, libros illo recepisse vt traditos à Deo, & per duo circiter annorum millia credidisse, & expectasse Messiam venturum, vt doctrinam, & legem eius sequendo, peruenirent ad felicitatem; qui autem de his dubitaret, posset etiam dubitare, vtrum ante Christum extiterit Respublica Romana, & Atheniensis, & scripti fuerint libri Demosthenis, Ciceronis &c. sed in Christo, & in religione Christiana impleta sunt, & quotidie implentur, quæ in libris veteris testamenti promissa, & prænunciata fuerunt de Messia, ac de religione eorum, qui profiterentur doctrinam, & legem Messia; ergo Christus, & religio Christiana fuerunt diuinitus promissa, ac prænunciata diu, antequam Christus nasceretur, & Christianam religionem fundaret. Probatur vltimum assumptum, afferendo clarissimas prædictiones de Messia, quæ manifestè impletæ fuerunt in Christo, & in religione Christiana.

7. Primò tempus aduentus Messia Genes. 49. prædixit Iacob, dum moreretur, dicens: *non auferetur sceptrum de Iuda, neque Dux de femore eius, donec veniat qui mittendus est, & ipse erit expectatio Gentium: sed ius sceptri, & principatus Iudaici*

Lib. V.

G

daici

daici non fuit ablatum stabiliter, & sine spe ex tribu Iuda, nisi cum Herodes, non Iudæus, sed alienigena, non ex consensu, & electione populi Iudaici, sed ex tyrannicâ Romanorum potentia regnum Iudæorum occupauit: tempore autem Herodis natus est Christus, qui fuit expectatio, siue, vt alij legunt, aggregatio gentium: nam Gentiles per fidem se aggregarunt Christo, & Apostolis, alijsque Iudæis, qui crediderant in Christum, non aliter, ac si illum expectassent; ergo &c. Circa hoc vaticinium Iacobi videri potest Suarius de Incarn. disp. 1. sect. 2. Lyranus, Cornelius, & alij interpretes Scripturæ, qui testimonio Hebræorum, Græcorum, Latinorum, & Chaldæi paraphrastici probant eo loco à Iacobo promissum fuisse Messiam, non autem Ieroboam, vt insulsè, & impiè docuit Rabbi Salomon, nec Nabuchodonosor, vt non minus impiè docuit Iulianus Apostata; siquidem Messias, non autem illi erant futuri expectatio gentium. Videri etiam potest Petanius in Rationario temporum part. 2. lib. 3. cap. 16.

8. Secundò clarius tempus aduentus Messia, eiusque mortem, perfidiam Iudæorum in Messia negando, ac destructionem, & perpetuam desolationem Regni Iudaici, cum euersione Templi prædixit Angelus Gabriel, Danielis cap. 9. dicens Danieli, cui apparuerat: *Animaduerte sermonem, & intellige visionem. Septuaginta Hebdomadæ abbreviate sunt super populum tuum, & super urbem sanctam tuam,*

tuam, ut consumetur prauaricatio, & finem accipiat peccatum. & deleatur iniquitas, & adducatur Iustitia sempiterna, & impleatur visio, & prophetia, & ungatur Sanctus Sanctorum. Scito ergo, & animaduerte. Ab exitu sermonis, ut iterum ædificetur Ierusalem usque ad Christum Ducem, Hebdomades septem, & hebdomades septuagintaduæ, & rursus ædificabilur platea, & muri in angustia temporum; & post hebdomades septuagintaduas occidetur Christus, & non erit eius populus, qui eum negaturus est; & ciuitatem, & Sanctuarium dissipabit populus cum Duce venturo, & finis eius vastitas, & post finem belli statuta desolatio. Confirmabit autem pactum multis hebdomada una, & in dimidio hebdomadis deficiet hostia, & sacrificium, & erit in templo abominatio desolationis, & usque ad consummationem, & finem perseuerabit desolatio. Debet aduerti, quod cum duplex sit hebdomas, seu septenarius, dierum nimirum, & annorum, Angelus hoc loco loquitur de hebdomadibus, seu septenarijs non dierum, sed annorum, de quibus dicitur, Leuit. 15. Numerabis tibi septem hebdomadas annorum, idest septies septem, quæ simul facient annos 49. Hoc posito, Angelus prædicit primò tempus, intra quod Christus, seu Messias veniret, & impleret prophetias, abbreviatum, seu contractum, esse intra spatium 70. hebdomadarum, hoc est annorum 490. quæ hebdomadæ deberent incipere ab exitu sermonis, ut iterum ædificaretur Ierusalem, hoc est ab anno,

quo edictum de iterum ædificanda Hierosolyma à Chaldæis destructa, exitum, & effectum deberet habere, quod incidit in annum septimum Artaxerxis Longimani Regis Persarū, qui vt patet primo Esdræ 7. anno septimo Regni sui misit Esdram in Ierusalem cum multis Iudæis, non ex alio fine, nisi vt Hierosolymam restaurarent. Prædicat secundò, quod intra spatium septuaginta hebdomadarum ab edicto Artaxerxis ædificanda erat Ierusalem in angustia temporum, hoc est tempore valde angusto, & breui, quod impletum est: siquidem, vt legitur 2. Esdr. 6. propter hostes assiduè laceffentes Iudæos, Neemias, & Iudæi angustissimo, & breuissimo tempore 52. dierum mœnia vrbs raptim perfecerunt. Prædicat tertio ab edicto Artaxerxis vsque ad Christum Ducem, hoc est vsque ad tempus, quo Christus annorum 30. baptizatus à Ioanne constitutus est à Patre Dux Populi fidelis, vt illum in Prædicatione congregaret, dicente Patre Matthæi 4. *Hic est filius meus dilectus, in quo mihi bene complacui, ipsum audite*, futuras hebdomadas 7. & hebdomadas 62. hoc est hebdomades 69. quæ conficiunt annos 483. quot de facto inter edictum Artaxerxis, & Baptismum Christi intercessisse ostendunt plures Chronologi apud Cornelium cap. 9. Danielis. Siquidem septimus annus Artaxerxis concurret cum quarto octogesi mæ Olympiadis, & cum anno vrbs conditæ 297. Baptismus autem Christi incidit in annum 15. Tiberij Cæsaris,

faris, qui annus concurret cum anno quarto Olympiadis 201. & cum anno vrbis conditæ 781. Prædicat quartò, quod post has hebdomadas 7. & 62. hoc est hebdomada 70. occidetur Christus, quod de facto accidit, siquidem Christus occisus est tribus annis, & tribus circiter mensibus post baptismum, qui anni spectant ad septuagesimam hebdomadam. Prædicat quintò, quod post mortem Christi non erit amplius populus eius, qui eum negaturus est, quod impletum est. Nam postquam Iudæi Christum negarunt, dicentes Pilato, *Nos non habemus Regem, nisi Cæsarem*, desierunt esse Populus eius. Prædicat sextò, quod post mortem Christi ciuitatem, & Sanctuarium, hoc est templum, dissipabit populus cum Duce venturo, & finis eius vastitas, & post finem belli statuta desolatio; quod impletum est. Nam 38. annis post mortem Christi, durante adhuc generatione eorum, qui Christum interfecerant, vt ipse Christus prædixerat, populus Romanus, Tito duce, euerit Hierosolymam, ac Templum. Prædicat septimò, quod Christus confirmabit pactum, hoc est testamentum nouum, quo instituit religionem Christianam, hebdomada vna, quod impletum est, cum Christus expletis tempore Baptismi 69. hebdomadibus, hebdomada septuagesima per tres annos, ac tres circiter menses prædicationis confirmauit nouum Testamentum multis sermonibus, vaticinijs, miraculis, & morte ipsa: ideoque moriens dixit: *con-*

summatum est : siquidem testamentum perficitur morte Testatoris, vt dicit Apostolus ad Hebr. 10. Prædicit octauo, quod in dimidio hebdomadæ, nimirum septuagesimæ, deficiet hostia, & sacrificium, quod impletum est : siquidem per mortem, Christi, quæ accidit post tres annos, & menses circiter tres septuagesimæ hebdomadæ, adeoque dimidio illius hebdomadæ, defecerunt, & mortua sunt omnia sacrificia legalia per Moysem præcepta, ideoque in signum, quod omnia legalia defecissent, velum templi scissum est, vt dicitur Luc. 22. Prædicit nonò, quod post mortem Christi erit in templo abominatio desolationis, hoc est profanabitur flagitijs abominabilibus templum paulò post desolandum, quod impletum est : siquidem vt refert Iosephus, 38. circiter annis post mortem Christi, vt Christus ipse prædixerat, seditiosi quidam Iudæi, qui se vocabant Zelotas, templum occuparunt, & castrorum more munierunt, illudque cædibus, rapinis, alijsque abominandis flagitijs prophanarunt, & sic meruerunt, vt paulo post euerteretur, & desolaretur.

9. Decimò demum prædicit, quod vsque ad consummationem, & finem perseverabit desolatio, quod experientiamille, & sexcentorum annorum videmus impleri, quibus Iudæi sæpè se, ac templum erigere conati sunt, sed frustra, & irritò conatu, ita vt hinc certò liceat conijcere hanc Iudæorum desolationem duraturam vsque ad finem Mundi, vt prædi-

cis

cit Daniel, quando Antichristus Iudæorum templū reparabit, & in illo sedebit, & adorabitur, vt colligitur ex Apostolo 2. ad Thessal. 2. vbi de Antichristo dicit: *ita vt in templo Dei sedeat, ostendens se tamquam sit Deus*. Cum igitur hæc, quæ à Daniele prædicta fuerunt annis circiter quingentis quadraginta ante ortum Christi, fuerint impleta in Christo, & in Christiana religione, Christiana religio est vera, ac credi debet illam fuisse reuelatam à Deo. Addo, quod licet circa præcisum tempus, quo debet computari initium, & finis 70. hebdomadarum Danielis, plures sint opiniones, tamen iuxta omnes constat illas completas fuisse circa tempus Christi.

10. Tertiò de Messia Isaia 7. prædictum est, quod esse oriturus ex Virgine: *Ecce Virgo concipiet, & pariet filium: quod nasciturus esset in Bethleem, Michea 9. & tu Bethleem Ephrata Iuda paruulus es in minimis Iudæ, ex te mihi egredietur, qui sit dominator in Israel, & egressus eius ab initio à diebus æternitatis: quod daturus esset visum cæcis, surdis auditum, gressum claudis, loquelam mutis, Isaia 25. Deus ipse veniet, & saluabit nos. Tunc aperientur oculi cæcorum, & aures surdorum patebunt. Tunc saliet sicut ceruus claudus, & aperta erit lingua mutorum. Quod futurus esse pauper, & intraturus Hierosolymam sedens super Asinum. Malachia 9. Exulta satis filia Syon, iubila filia Ierusalem; ecce Rex tuus veniet tibi iustus, & Saluator; ipse pauper, & ascendens*

super asinam, & super pullum filium asine: sed hæc omnia in Christo legimus impleta; ergo &c.

II. Quartò quæ spectant ad Passionem, & mortem Christi pro peccatis nostris, & ad causam, & circumstantias mortis tam clarè prædicta sunt à David Ps. 22. ab authore libri Sapientiae, qui tribuitur Salomoni, cap. 2. & ab Isaia cap. 53. vt videantur scripsisse non vaticinia futurorum, sed historiam præteritorum: ideòque de cap. 53. Isaia dicit Cornelius, quod posset inscribi *passio Iesu Christi secundum Isaiam*. David enim Ps. 22. loquens in persona Christi dicit: *foderunt manus meas, & pedes meos, dinumerauerunt omnia ossa mea. Ipsi verò considerauerunt, & inspexerunt me: diuiserunt sibi vestimenta mea, & super vestem meam miserunt sortem; & Ps. 68. dicit: dederunt in escam meam fel, & in siti mea potauerunt me aceto. Sapientiae 2. in persona Iudæorum dicitur: Promittit scientiam Dei se habere, & filium Dei se nominat: & paulò post, gloriatur Patrem se habere Deum: & infra: si enim est verè filius Dei, suscipiet illum: & concluditur: morte turpissima condemnemus eum. Quibus verbis clarissimè prædicitur Christum morte turpissima condemnandum, quia prædicaturus erat se esse filium Dei. Isaia 53. præter alia multa dicitur: verè languores nostros ipse tulit, & dolores nostros ipse portauit: vulneratus est propter iniquitates nostras, attritus est propter scelera nostra. Posuit Deus in eo iniquitates omnium nostrum.*

*nostitrum. Oblatus est, quia ipse voluit. Sicut
ovis ad occisionem ducetur, & quasi agnus
coram tondente se obmutescet, & non aperiet
os suum. Abscissus est de terra viventium:
propter scelus populi mei percussus eum, tra-
didit in mortem animam suam, & cum sce-
leratis reputatus est: & ipse peccata multo-
rum tulit, & pro transgressoribus rogavit,
&c. sed hæc clarissimè impleta sunt in
Christo; ergo &c.*

12. Quintò prædictum est præcipuum
fructum aduentus, & mortis Messia: futu-
rum conuersionem, & aggregationem
Gentilium. Nam Genes. 22. promisit
Deus: *in semine tuo benedicentur omnes
gentes: Genes. 49. Iacob postquam prædi-
xit tempus aduentus Messia:, addidit: ipse
erit expectatio gentium: David Ps. 22. post-
quam prædixit mortem Christi, prædicens
eius fructum dicit: conuertentur ad domi-
nium uniuersi fines terræ, & adorabunt in
conspectu eius uniuersa familie gentium,
quoniam Domini est regnum, & ipse domi-
nabitur gentium: Isaias 53. loquens de Mes-
sia dicit: si posuerit pro peccato animam
suam, videbit semen longæuum. In scientia
sua iustificabit ipse iustus seruus meus mul-
tos, & iniquitates eorum ipse portabit. Ideo
dispertiam ei plurimos, & fortium diuidet
spolia, pro eo, quod tradidit in mortem ani-
mam suam &c. Toto deinde cap. 54. præ-
nunciat cōuersionem Gentilium ad Chris-
tum, & capite 55. dicit: ecce testem populis
dedi eum, ducem, & præceptorem gentibus.
Ecce gentem, quam nesciebas, vocabis, &*

G 5

gentes

gentes, quæ te non nouerunt, ad te current &c. sed videmus post mortem Christi conuersos ad Deum fuisse Gentiles; ergo &c.

13. Hinc concluditur argumentum. De Messia, & de religione eorum, qui recepturi essent Messiam, à Patriarchis, & Prophetis ante annos 500. 1000. & 2000. prædicta fuerunt multa, quæ videbantur prorsus incredibilia; sed hæc omnia impleta sunt in Christo, & in religione credentium in Christum; ergo euidenter credibilis, & credenda est religio credens in Christum. Probatur maior, & minor. Nam videbatur prorsus incredibile, quod Iudæi, qui duobus annorum millibus expectauerant Messiam, & per obseruantiam legis, & studium sacrarum literarum ad aduentum eius se præparauerant, postquam venisset, non solum non essent eum recepturi, sed etiam morte turpissima essent condemnaturi; quod fossuri essent eius manus, & pedes; quod sitientem potaturi essent felle, & aceto; quod diuisuri essent eius vestimenta; & in vestem eius missuri sortem; quod in crucem elatum irrisuri; quod post mortem Messiae euertendum, esset regnum Iudæorum, desolanda ciuitas, & templum desolatione duratura, vsque ad finem Mundi, ac gens Iudæorum esset dispergenda inter omnes gentes; sed hæc videmus prædicta, & impleta; ergo &c. Non videbatur minus incredibile, quod Gentiles, qui loco veri Dei colebant

bant Idola, non recipiebant Scripturas, ac non solum non expectabant Messiam, sed irridebant Iudæos, quod Messiam expectarent, recepturi essent messiam à Iudæis crucifixum, in eumque ut Deum firmissimè credituri, & pro hac fide morituri; sed hæc etiam fuerunt prænunciata, & videmus impleta in Christo, & in religione Christiana; ergo &c.

14. Confirmatur primò: nam hæc prædicta fuerunt, non utcumque, sed notando tempus, enumerando annos, ut patet ex Prophetia Danielis de 70. hebdomadibus. Rursus prænunciata fuerunt non simul ab vno, sed seorsim à pluribus, qui vixerunt diuersis temporibus. Quædam enim prædicta sunt in libris Moyſis, quædam in Psalmis Dauidicis, quædam in libro Sapientiae, quædam in Prophetijs Isaia, Danielis &c. sed erat prorsus incredibile, quod plures diuersis temporibus, & locis conuenirent in prædicendis seorsim multis, quæ collectiuè implerentur in vno, nisi per illos plures loqueretur vnus, & idem spiritus Dei, qui præscit, & disponit futura, sicut præsentia; ergo. Confirmatur secundò: nam Christus non solum, in se ipso impleuit plura planè incredibilia, quæ de eo prædicta fuerant à Prophetis, sed etiam prædixit alia multa non minus incredibilia, quæ vel iam sunt adimpleta, vel quotidie videntur impleri; ergo &c. Probatur antecedens: nam Christus prædixit euersionem Hierosolymæ, Luca, 19. dicens: *circumdabunt te inimici tui*

vallo &c. & ad terram prosternent te , & filios tuos , & non relinquent in te lapidem super lapidem , eo quod non cognoueris tempus visitationis tue: & Lucæ 21. addit tempus , in quo erant hæc implenda, dicens: nō præteribit generatio hæc, donec omnia fiant ; quod impletum est ; siquidem 38. annis post mortem Christi, durante adhuc generatione eorum , quibus Christus hæc prænuñciauerat , euersa est Hierosolyma. Prædixit Gentiles conuertendos loco Iudæorum , qui non erant credituri, dicens Matth. 31. & auferetur vobis regnum, & dabitur genti facienti fructus eius ; Matth. 8. multi ab oriente , & occidente venient , & recumbent cum Abraham, Isaac , & Iacob : filij autem regni eijcientur in tenebras exteriores . Prædixit vnā Ecclesiam congregandam ex Iudæis, & Gentilibus ad fidem conuertendis, Io: 10. dicens : alias oves habeo , & illas oportet me adducere , & fiet vnum Ouile, & vnus Pastor. Prædixit Mundum conuertendum per hoc , quod ipse crucifigeretur Io. 12. dicens : & ego cum exaltatus fuero a terra , omnia traham ad me ipsum : prædixit religionem Christianam propagandam per persecutiones, & mortes, ac futurum , vt aduersarij Apostolis alijsq; Prædicatoribus Euangelij nō possent resistere, Matth. 10. dicens: Tradent enim vos in Concilijs , & in Synagogis suis flagellabunt vos, & ante Reges, & Præsides ducemini propter me ; & Lucæ 11. Dabitur vobis os , & sapientia , cui non poterunt resistere , & contradicere omnes aduersarij vestri. Præ-
dixit

dixit Euangelium prædicandum in toto Mundo, & miraculis confirmandum, Matth. 16. dicens: *prædicabitur Euangelium regni in uniuerso orbe in testimonium omnium gentium*: & Marc. ult. *Signa autem in eis, qui crediderint hæc, sequentur. In nomine meo demonia eycient &c.* sed hæc videbantur plane incredibilia, & tamen iam sunt impleta; ergo &c. Addo quædam prædicta esse, quæ quotidie videmus magis, & magis impleri. Vt enim omittam quod spectat ad dispersionem, & incredulitatem Iudæorum duraturam vsque ad finem Mundi, B. Virgo Lucæ 1. prædixit de se ipsa: *Ex hoc Beatam me dieent omnes generationes*: quod ita ad litteram ab annis 1679. videmus impleri, vt non solum à Christianis, sed etiam à Mahometanis communiter vocari soleat Beata Virgo; & Christus Matth. 16. prædixit se ædificaturum Ecclesiam in Petro, hoc est in rudi, & paupere Piscatore, cui Ecclesiæ non posset Infernus omnibus suis viribus, & conatibus præualere, dicens: *tu es Petrus, & super hanc petram ædificabo Ecclesiam meam, & portæ Inferi non præualebunt aduersus eam*: quod annis 1600. & amplius impletum est, & quotidie impletur; siquidem Infernus omnibus suis viribus, & conatibus per Infideles, & Hæreticos, ac Schismaticos; per Imperatores, Reges, ac Tyrannos pugnavit, & pugnat contra Ecclesiam Romanam ædificatam in Petro, & in Petri successoribus Romanis Pontificibus, & tamen non potuit, nec potest præualere; ergo

ergo cum tam multa, & tam incredibilia de Christo, ac de Ecclesia Christiana à Prophetis, & à Christo ipso prædicta, videamus impleta, & impleri in Christo, & in Ecclesia, ac in religione Christiana, euidens est prudenter credi posse, ac debere religionem Christianam fuisse traditam, & reuelatam à Deo.

15. Innumera alia vaticinia possent afferri, siquidem legenti, & intelligenti sacram Scripturam euidentissimum est totum testamentum vetus, & totam Rempublicam Iudæorum nihil aliud fuisse, quam Prophetiam, & figuram, ac promissionem testamenti noui, atque Ecclesiæ Christianæ: testamentum autem nouum, & Ecclesiam Christianam nihil aliud esse, quam adimpletionem testamenti veteris; ideoque duo testamenti sibi mutuo testimonium perhibent, & se mutuo probant. Nam ex eo, quod in testamento nouo videmus impleta, & impleri, quæ fuerunt prædicta, & figurata in veteri, euidenter est credibile, & credendum testamentum vetus fuisse diuinitus reuelatum; & ex eo, quod in testamento veteri fuerint reuelata, & prædicta quæ impleta sunt, & implentur in nouo, euidenter est credibile, & credendum diuinitus reuelatum esse testamentum nouum, ac religionem Christianam. Hoc autem argumentum desumptum ex vaticinijs est præcipuum pro religione Christiana, & præferendum est etiam argumento desumpto ex miraculis, iuxta illud S. Petri, ep. 2. c. 1. *Habemus firmiorem*

pro-

propheticū sermonem: & iuxta illud Christi
Luc. 16. Si Moysen, & Prophetas non au-
diunt, neque si quis ex mortuis resurrexerit,
credent.

16. Hōc argumento ex vaticinijs
vtuntur passim PP. Tertullia. Apolog.
cap. 70. dicit: *Idoneum opinor testimonium
Diuinitatis est veritas Diuinationis. Scilicet
apud nos futurorum quoque fides tuta est,
iam probatorum; quia cum illis, quæ quotidie
scilicet probantur, prædicebantur. Et paulò
post: quid delinquimus, oro, nos futura quo-
que credentes, qui iam didicimus illis per
suos gradus credere. Aug. tom. 10. serm. 31.
de verbis Domini dicit: Ista omnia, quæ
vides, non erant. Christianus populus toto
orbe terrarum aliquando non erat. In pro-
phetia legebatur, in terra non videbatur.
Modo auditur, & legitur, & videtur. Ipsa
Ecclesia sic est completa. Non ei dictum est:
vide filia, & audi; sed audi, & vide: audi
prædicta, vide completa. Idem vrget lib. de
Cathech. rud. cap. 17. Eodem argumento
vtitur Chrysostomus, tom. 5. in orat. con-
tra Iud. præsertim orat. 2. & fusissimè Euse-
bii Cæsariensis libris de Demonstratione
Euangelica.*

16. Aduertunt Tertull. & Aug. locis
citatis, quod quia ex ijs, quæ in libris ve-
teris, & noui testamenti prædicta sunt, illa,
quæ spectant ad Christum, & eius mortem
iam sunt impleta; quæ spectant ad Eccle-
siam, ad conuersionem Gentilium, ad dis-
persionem, & incredulitatem Iudæorum,
partim sunt impleta, partim quotidie im-
plen-

plentur, certissimè credendum est etiam alia esse implenda, puta quæ spectant ad Antichristum, ad diem Iudicij, ad resurrectionem mortuorum, & ad æternas pænas impiorum, æternamque Beatitudinem Sanctorum.

17. Ad 1. Est ita manifestum libros veteris testamenti non fuisse confictos à Christianis post Christum, sed scriptos fuisse diu ante Christum, vt de hoc prudenter dubitari non possit. Iudæi enim Christianis inimicissimi vbique gentium dispersi deferunt secum libros veteris testamenti, & vnanimiter testantur illos fuisse scriptos diu ante Christum. Addit Augustinus lib. 8. de Ciuitate Dei cap. 46. Iudæos ideò fuisse dispersos per omnes gentes, & permissum, vt non crederent in Christum, vt hoc suo testimonio redderent euidenter credibilem, & credendam religionem Christianam, atque hoc ipsum fuisse prophetatū à Dauid Ps. 18. dicente: *Deus ostendit mihi super inimicos meos: ne perdas eos, ne forte obliuiscantur populi mei; disperge illos in virtute tua.* Quæ verba explicans Augustinus dicit. *Demonstrauit ergo Deus Ecclesie suæ in eius inimicis Iudæis gratiam misericordie suæ: quoniam sicut dicit Apostolus, delictum eorum salus est gentibus; & ideo non eos occidit, idest non in eis perdidit, quod sunt Iudæi, quāquā à Romanis fuerint deuicti, & oppressi, ne obliti legem Dei ad hoc, de quo agimus, testimonium, nihil valerent. Ideo parum fuit dicere: ne occidas eos, ne quando obliuiscantur legem tuam, nisi*

nisi etiam adderet: disperse illos. Quoniam si cum illo testimonio Scripturarum in sua tantummodo terra, non ubique essent, profecto Ecclesia, quæ ubique est, eos prophetiarum, quæ de Christo præmissæ sunt, testes in omnibus gentibus habere non posset. Idem docet explicans Ps. 58. Relatis enim verbis illis: disperse illos in virtute tua, subdit. *Iam factum est: per omnes gentes dispersi sunt Iudei, testes iniquitatis suæ, & veritatis nostræ. Ipsi habent codices, de quibus prophetatus est Christus; nos tenemus Christum: & si forte aliquis paganus dubitauerit, cum ei dixerimus prophetias de Christo, quarum evidentiam obstupescit, & admirans putauerit a nobis esse conscriptas, de codicibus Iudeorum probamus, quia hoc totum ante prædictum est. Videte, quomodo de inimicis nostris alios confundimus inimicos. Idem docet explicans Ps. 40. in fine, ubi addit, Iudæos servire Christianis, & fungi munere capsarij portantis codices, dicens. Modo fratres nobis seruiunt Iudæi tamquam capsarij, & studentibus nobis codices pertant. Et in Psalm. 56. explicans de Iudæis verba illa: dedit in opprobrium conculcantes me, dicit. In quali ergo opprobrio sunt Iudæi? Codicem portat Iudeus, unde discat Christianus. Librarij nostri facti sunt. Quomodo solent serui post Dominos codices ferre, ut illi portando deficiant, isti legendo proficiant. In tale opprobrium dati sunt Iudæi, & impletum est, quod tantò ante prædictum est. Quale autem opprobrium est fratres; ut hunc versum legant, & ipsi cæci attendant ad speculum suum. Sicut enim*
appa-

apparent Iudei de Scriptura Sancta, quam portant, quo modo apparet facies cæci de speculo. Ab alijs videtur, ab ipso non videtur.

Addo, quod si tempore S. Augustini probabatur euidenter religionem Christianam esse credendam ex eo, quod quæ de dispersione, & incredulitate Iudæorum prædicta fuerant, videbantur impleta annis circiter quadringentis, florente adhuc Romano Imperio, multò euidentius idem probatur temporibus nostris, quibus videmus eadem esse impleta, & impleri annis mille sexcentis, & amplius, post tantam mutationem Imperij Romani, & aliorum regnorum, & gentium.

18. Ad 2. distinguo maiorem: in vnaquaque re standum est peritis in ea re, vbi non est controuersia inter ipsos peritos, & cum iudicari non potest per principia intrinseca, transeat: cum est controuersia inter ipsos peritos, & iudicari potest per principia intrinseca, nego. Cum est controuersia inter peritos, standum est iudicio aliorum, & præsertim iudicio Mundi: E. G. si sit controuersia inter Pictores de optima ratione pingendi, inter milites de optima ratione pugnandi, standum est iudicio Mundi; sed quando venit Christus, orta est controuersia inter Iudæos, qui erant periti Diuinæ Scripturæ, vtrum Christus esset Messias ipsis promissus, & in hac controuersia plura Iudæorum millia crediderunt Christum esse Messiam, sed maior pars Iudæorum noluit credere; ergo in hac controuersia standum est iudicio Mundi

Mundi, & omnium penè gentium; sed omnes penè gentes credendo in Christum iudicarunt, & iudicant Christum esse Messiam, & irrident Iudæos incredulos, quod adhuc expectent Messiam; ergo &c.

19. Addo primò, quod non solum Gentiles, qui conuersi sunt ad Christum, iudicarunt, & iudicant Christum esse Messiam Iudæis olim promissum, sed etiam hoc iudicant omnes Mahometani, licet errent in hoc, quod dicunt post Christum, qui fuit Messias olim Iudæis promissus, missum fuisse à Deo alium Prophetam, hoc est Mahometum; sed hoc asserunt sine vlllo fundamento desumpto ex prophetijs, aut miraculis &c.

20. Addo secundò peritos Scripturarū esse eos, qui in Scripturis meditantur die, ac nocte; sed ex Christianis plurimi, abiecta cura rerum temporalium, in Scripturis meditantur die, ac nocte: Iudæi autem toti sunt in suis temporalibus lucris, & negotiationibus; ergo Christiani, non autem Iudæi sunt peritissimi Scripturarum.

21. Demum addo, quod cum in ipsis Scripturis prædictum fuerit Iudæos ex maiori parte nō credituros in Christum vsque ad finem Mundi, per hoc ipsum, quod non credant, implentur quæ prædicta sunt de Christo, adeòque fit, vt debeamus credere Christum esse Messiam Iudæis promissum, & Christianam religionem fuisse diuinitus reuelatam.

22. Ad 3. distinguo maiorem: vt sit prudenter credibilis Christiana religio, requi-

requiritur, vt omnia, quæ prædicta sunt de primo aduentu Messiae ad redimendum genus humanum, impleta sint in Christo, concedo; requiritur, vt omnia, quæ prædicta sunt de secundo aduentu Messiae ad iudicandum genus humanum, impleta sint in Christo, nego: distinguo eodem pacto minorem; & nego consequentiam. Duplex aduentus Messiae promissus est in sacris Scripturis; primus ad redimendum, in quo prædictum est Messiam venturum pauperem, & humilem, & moriturum pro peccatis nostris, vt patet ex allatis prophetijs Ps. 22. Isaiae 53. Danielis 9. Sap. 2. Secundo promissus est aduentus, quo Messias in die Iudicij veniet ad iudicandum genus humanum cum gloria, & maiestate magna. Iudæi suo vitio excæcati noluerunt, ac nolunt distinguere istos duos aduentus; & quia Christus in primo suo aduentu venit, non cum gloria, & maiestate, sed pauper, & humilis, noluerunt, & nolunt recipere Christum, vt Messiam. Quia Iudæi sumpserunt occasionem errandi ex eo, quod non distinxerunt duos aduentus Messiae, ideo Christus clarissimè illos distinxit, & apertissimè locutus est de secundo suo aduentu ad iudicandum; ac de eius signis, præsertim Matt. 25. Tempore autem passionis cum Princeps Sacerdotum in cōcilio interrogasset Christū, vtrū esset Messias, dicens: *adiuro te per Deum viuum, vt dicas, si tu es Christus filius Dei*; Christus respondit affirmatiuè, dicens: *tu dixisti.* & quia sciebat, quod Iudæi volebant illum
 reci-

recipere, quia non venerat cum maiestate, & gloria, docuit hæc esse intelligenda de secundo aduentu suo ad iudicandum, dicens: *veruntamen dico vobis: A modo videbitis filiū hominis sedentem a dextris virtutibus Dei, & venientem in nubibus Cæli.* Erant etiam Iudæi circa aduentum Messiae, quia aliqua vaticinia, quæ debent impleri spiritualiter, & mystice, putant impleri debere materialiter. E. G. Isaia cap. 2. prædictum est: *& erit in nouissimis diebus exaltabitur mons domus Domini in vertice montium, & fluent ad eum omnes gentes.* Hoc vaticinium impletum est spiritualiter in Ecclesia, quæ est mons Domus Domini, & exaltata est ita, vt sit visibilis toti Mundo, & ad eam fluxerint, & fluant omnes gentes. Iudæi existimant hoc vaticinium implendum esse materialiter, ita vt mons Moria, in quo ædificatum fuerat templum, tempore aduentus Messiae debeat materialiter eleuari, & exaltari, suppositis illis alijs montibus, & hoc miraculo excitatas ad eum venturas omnes gentes.

23. Dicunt: de aduentu Messiae citato loco Isaia, & alibi prædictum est, quod erit in nouissimis diebus, hoc est parum ante diem Iudicij; ergo Christus, qui venit multò ante diem Iudicij, non est Messias.

24. Resp. quod in Scriptura nouissimi dies dicuntur vltima ætas Mundi, quæ est ab aduentu Messiae vsque ad diem Iudicij. Non est autem mirum, quod plura annorum millia vocentur dies nouissimi, siquidem

166 *De euidencia credibilitatis .*
dem vt dicitur Psalm. 89. *mille anni ante*
oculos tuos , sicut dies externa, quæ præterijt.

QVÆSTIO XIX.

Vtrum ex miraculis probetur euidenter
religionem Christianam esse pru-
denter credibilem , & cre-
dendam ?

1. **V**idetur non probari , primò quia potest prudenter dubitari, vtrum miracula , quæ narrantur, fuerint à Christianis conficta ad astruendam fidem suæ sectæ.

2. Secundo potest etiam prudenter dubitari , vtrum facta fuerint præstigijs Dæmonum , & per magicas artes.

3. Tertiò Antichristus faciet signa, & prædigia magna in confirmationem falsi , vt dicitur Matth. 14. Apoc. 13. & 2. ad Thessal. 2: Suetonius in vita Vespasiani narrat Vespasianum cæco lumen, & claudogressum reddidisse. Socrates lib. 7. Historiarum cap. 17. refert Paulum Episcopum Nouatianum fecisse miraculum in confirmationem sui falsi dogmatis. S. Aug. tract. 13. in Io. dicit non esse credendum Donatistis , etiamsi miracula faciant ; ergo ex miraculis non probatur euidenter Christianam religionem esse prudenter credibilem, & credendam.

4. Quartò Idololatria propagata fuit pro-

prodigijs, & portentis: simulachra enim Deorum loquebantur, & reddebant responsa, ac fiebant alia multa stupenda, & miranda; ergo ex eo, quod Christiana religio propagata fuerit prodigijs, & portentis, non probatur euidenter illam credi debere, vt diuinitus reuelatam.

5. Resp. secundum argumentum ad probandum euidenter Christianam religionem esse prudenter credibilem, & credendam, desumi ex miraculis. Nam euidenter est credibilis, & credenda religio, quæ postquam est orta, fuit per miracula propagata, & obtinuit, vt innumera gētes, quæ colebant Idola, & profitebantur sectas speculatiuè, & practicè nefarias, conuerterentur ad colendum vnum verum Deum, in religione speculatiuè, & practicè sanctissima; sed talis est Christiana religio; ergo &c. Probatur minor, primo testimonio plurimorum Scriptorum, quibus si fidem negamus, poterimus negare fidem omnibus historijs. Miracula enim omnibus sæculis facta ad Christianam religionem propagandam, & confirmandam, narrant innumeri Scriptores, qui illis sæculis floruerunt, & digni sunt summa fide, cum omnes fuerint sapientissimi, & plerique etiam sanctissimi, puta Basilus, Athanasius, Gregorius Nazianzenus, & Nyssenus, Chrysostomus, Hieronymus, Augustinus, Gregorius Magnus, Tertullianus, Eusebius Cæsariensis, Beda, Bernardus, Petrus Damianus, & alij. Videri possunt Bellarminus lib. 4. de Ecclesia cap. 14. & Tho-

Thomas Bosius lib. 5. de signis Ecclesiæ.

6. Probat^{ur} secundò : nam Christiani ubique gentium ex certissima traditione narrant maiores suos ab idolis ad fidem Christianam conuersos per miracula; ergo de hoc prudenter dubitari non potest.

7. Confirmatur primò : nam etiam nationes, quæ à Fide Christi defecerunt ad Mahometum, testantur se ab initio ab Idolis ad Christum fuisse conuersas per miracula, & ipse Mahometus in Alcorano dicit Christo ad propagandam suam legem miracula, sibi gladium esse datum; ergo etiam ex confessione Mahometanorum Christiana religio propagata fuit miraculis.

8. Confirmatur secundò : nam quia Galli, Hispani, cæteræque nationes, quæ iamdudum ab imperio Romano defecerunt, testantur se olim à Romanis subactas fuisse vi armorum, prudenter dubitari non potest, quin hoc sit verum; ergo quia non solum nationis, quæ permanserunt in Christiana Religione, sed etiam quæ defecerunt ad Mahometum, testantur se olim ab Idolis ad Fidem Christianam conuersas fuisse per miracula, de hoc prudenter dubitari non potest.

9. Confirmatur tertio : nam etiam in nationibus, quæ superiori sæculo fuerunt ab Idolis ad Fidem Christianam conuersæ, constans est fama non solum apud Christianos, sed etiam apud Gentiles, quod Christiana religio fuerit miraculis confirmata : E. G. in Indijs Orientalibus constantissima est fama de miraculis à S.

Fran-

Francisco Xauerio factis in confirmatio-
nem fidei Christianæ; & proportionalis est
fama in Indijs Occidentalibus de miracu-
lis factis à Sancto Ludouico Beltrando, &
ab alijs.

10. Vt afferatur tertia probatio, sup-
ponenda sunt quædam manifesta, & indu-
bitabilia. Constat igitur primo ante Chris-
tum solos Iudæos coluisse vnum Deum
Creatorem Mundi, cæteras gentes adorasse
Idola.

11. Constat secundò Socratem, Plato-
nem, Aristotelem, ac plures alios Philo-
sophos gentium lumine naturæ cognouisse
dari vnum solum Deum, & tamen licet
essent summà sapientià, eloquentia, & au-
thoritatè præditi, non potuisse persuadere
vlli non dicam genti, sed ciuitati, vel op-
pidulo, vt relictis Idolis, colerent vnum
verum Deum Creatorem Mundi.

12. Constat tertiò cultum vnus veri
Dei non potuisse alijs nationibus persua-
deri ab ipsis Iudæis, quamuis plures ex Iu-
dæis essent sapientia celeberrimi, vt Salo-
mon; alij dono prophetiæ, & miraculo-
rum insignes, vt Moyse, Iosue, Elias, Eli-
sæus, Daniel &c.

13. Constat quartò post mortem
Christi ab Apostolis, qui erant pauperes
piscatores, ignobiles, simplices, & indocti,
persuasum fuisse non vni, aut alteri, sed
innumeris gentibus, non solum barbaris,
sed prudentissimis etiam, & sapientissimis,
puta Græcis, & Romanis, vt relictis Idolis,
ad fidem vnus veri Dei conuerterentur, &

vt crederent res creditu difficillimas , & quæ primo aspectu videntur incredibiles , puta, quod Deus est trinus , & vnus; quod Filius Dei factus est homo ; quod natus est ex Virgine , quod crucifixus , & mortuus est; quod tertia die resurrexit , & post dies quadraginta propriâ virtute in cœlos ascendit; quod in die Iudicij omnes mortui resurgent , & iuxta merita æternis pœnis , aut æternis præmijs afficientur .

14. Constat quintò eisdem Apostolos; eorumque successores gentibus pene omnibus persuasisse, vt amplecterentur, & obseruarent legem sanctissimam quidem, sed difficillimam, ac nihil carni blandientem , vtpote quæ præcipit, vt diligamus Deum super omnia, proximos autem sicut nos ipsos; vt diligamus etiam inimicos; vt abstineamus ab omni immunditia; vt nemo ducat plures vxores; vt matrimonia etiam Regum , & Principum sint penitus indissolubilia; vt omnia peccata mortalia confiteamur Sacerdotibus ; vt neque assensu interno consentiamus vlli rei illicitæ ; suadet virginitatem, & cælibatum, paupertatem, ieiunia , corporis afflictationes, contemptum omnium eorum, quæ videntur, & amorem eorum, quæ non videntur.

15. Constat sexto Religionem hanc breuissimo tempore apud innumeras nationes mirabiliter fuisse propagatam, frustra contradicentibus vbique Gentilium Sacerdotibus, Plebe, Philosophorum academijs, magistratibus, Regibus, & Imperatoribus, modis omnibus, nimirum exilijs, publi-

publicationibus bonorum, morte ipsa, & exquisitissimis supplicijs conantibus impedire subditos, ne Christianam religionem amplecterentur.

16. Constat septimò plures, & præcipuas nationes integras ad Christum fuisse conuersas, ex alijs autem nationibus, plurimos Christiana sacra suscepisse.

17. Constat octauo eos, qui Christianam religionem sunt amplexi, tam firmiter credidisse, & credere, vt docti pariter, & indocti potius negarent se viuere, quam verum esse aliquid eorum, quæ Christiana religio profitetur, & parati sint mori pro quolibet eius dogmate, ac de facto innumeri sint mortui, ita vt qui numerum computarunt, dicant numerum martyrum peruenire ad vndecim milliones, & in sola vrbe Romana martyrio affecta plus quam trecenta hominum millia.

18. Constat nonò plurimos ita perfectè Christianam legem obseruasse, & obseruare, vt omnium virtutum gloria flourerint, & floreat, ita vt vni, qui ex sectatoribus aliarum sectarum simul sumptarum in virtutibus moralibus narratur excelluisse, possit Christiana religio opponere millenos, & millenos, eo pacto, quo vni virgini vestali, quæ apud Romanos virginitatem profitebantur ad certum solùm tempus, potest Christiana religio opponere virgines millenas, & millenas.

19. Suppositis his, quæ manifestè constant, cum S. Augustino lib. 22. de Ciuit. Dei c. 2. & cum S. Thoma 1. contra gentes

cap.6. possumus sic argumentari . Vel miraculis tot nationes per Apostolos, eorumque successores ab Idolis conuersæ sunt ad vnum Deum in Christiana religione colendum , vel sine miraculis : si miraculis ; ergo euidenter credibile , & credendum est Christianam religionem fuisse reuelatam à Deo , cùm confirmata fuerit miraculis : si sine miraculis ; ergo ipsa conuersio tot nationem ab Idolis ad cultum vnius Dei in Christiana religione est maximum quoddam miraculum , quod non nisi Deo auctore, potuit fieri . Nam quo pacto fieri potuit , vt cum ante Christum à Philosophis Gentilium in persuasibilibus humanæ sapientiæ verbis , & à sapientibus Iudæorum per miracula , & vaticinia futurorum nulla gens potuerit conuerti ad vnū Deum colendum in religione speculatiuè , & practicè multò faciliori , post Christum ab Apostolis rudibus , & indoctis , & ex omni parte contemptibilibus , non vna , sed plurimæ gentes , contradicente , & minante toto orbe terrarum , ac resistentibus ipsis Iudæis , sine vllis miraculis conuersæ fuerint ad colendum Deum in Christiana religione speculatiuè , et practicè multo difficiliori , nisi Deus ipse per internas illuminationes , & inspirationes hoc opus effecerit .

19. Confirmatur primò : nam euidenter est credibile , & credendum illud , quod negari nequit , nisi affirmando aliquid incredibilius ; sed negari non potest tot nationes gentilium conuersas fuisse

mira-

miraculis , nisi affirmando illas conuersas fuisse sine ullis miraculis , quod euidenter est multo incredibilius ; ergo &c. Probat^{ur} minor: nā quod Apostoli miraculis cōfirmarint Christum Crucifixum esse Deū, ideoque gentes crediderint, non est incredibile; sed quod viri simplices , & indocti nulla fecerint miracula in confirmationem religionis Christianæ speculatiuè, & practicè difficillimæ, & tamen illā persuaferint tot nationibus gentilium , est penitus incredibile.

20. Confirmatur secundo : nam nationes Gentilium non solum conuersæ sunt ad fidem mirabili ratione , sed etiam conuersæ sunt eo pacto , quo Christus prædixit eas conuertendas ; ergo cum Christus prædixerit Gentiles conuertendos modo, qui planè videbatur incredibilis, & hoc sit impletum, euidenter est credibile , & credendum , nationes Gentilium conuersas fuisse, authore Deo.

21. Ad 1. nego maiorem . Nam est planè incredibile solos Christianos, & Catholicos omni tempore , & vbique gentium habuisse artem fingendi miracula, ita vt crederentur à doctis, & indoctis, eorumque religio persuaderetur nationibus non solum simplicioribus , sed etiam prudentioribus , sectatores autem aliarum factarum hac arte carere , & semper caruisse ; sed constat Mahometanos , Iudæos post Christum, & hæreticos, nullis temporibus, & locis habere, vel habuisse artem fingendi miracula, ita vt credantur, eorumque secta

miraculis persuadeatur ; ergo incredibile est hæc miracula à Christianis fingi , vel ficta fuisse : sed dicendum , quod ideò miracula à Christianis persuadentur , & creduntur , quia verè fiunt. Confirmatur : nam Iudæi ante Christum per duo annorum millia potuerunt persuadere miracula facta in confirmationem suæ religionis : post Christum cum maximè vellent , non possunt , nec annis mille sexcentis , & amplius , potuerunt persuadere miracula. Nationes , quæ per hæresim separatæ sunt à Catholicis , antequam separarentur , poterant suadere suam religionem miraculis , quæ innumera narrantur , & constanter creduntur facta fuisse in Græcia , in Anglia , alijsque nationibus , antequam in hæresim inciderent ; postquam à religione Catholica defecerunt , non possunt persuadere , immo nec audent fingere fieri miracula in confirmationem suarum sectarum , eo pacto , quo persuadentur , & constanter creduntur fieri apud Catholicos .

22. Ad 2. nego maiorem . Nam non est prudenter credibile , quod soli Christiani , & Catholici , semper , & ubique habuerint , & habeant hanc artem præstigijs Dæmonum faciendi miracula in confirmationem suæ religionis , cæteras sectas carere , ac semper caruisse hac arte , præsertim cum religio Catholica tradat legem sanctissimam , & Dæmonibus , eorumque præstigijs infensissimam . Confirmatur : nam Dæmonis maximè interest , ut in mundo conseruetur , & propageretur Idololatria

Iatria, per quam ipsis Dæmonibus in Idolis deferuntur honores diuini, quos Dæmones vtpotè superbissimi maximè appetunt: sed Christiani semper, & vbiq̃ habuerunt virtutem faciendi miracula, præsertim ad Gentiles à cultu Idolorum, & Dæmonum conuertendos ad cultum vnius Dei Creatoris Cæli, & Terræ; ergo Christiani miracula faciunt, non præstigiis Dæmonum, sed virtute Dei Creatoris Cæli, & Terræ; præsertim cum plurima miracula à Christianis facta, puta suscitationes mortuorum, illuminationes cæcorum &c. fieri nequeant virtute Dæmonum, sed solum virtute Diuina.


23. Ad 3. ex signis, & prodigijs, quæ faciet Antichristus, respondeo, quod vt loquitur Apostolus 2. an Thess. 2. Antichristi aduentus erit, *secundum operationem Sathanae in omni virtute, & signis, & prodigijs mendacibus*; ergo Antichristus non faciet miracula vera, & quæ excedant virtutem, & operationem Sathanae, sicut excedunt suscitationes mortuorum, illuminationes cæcorum &c. quæ à solo Deo possunt fieri, iuxta illud Ps. 125. *qui facit mirabilia magna solus*, sed Antichristus solum faciet miracula falsa, mendacia, & apparentia, ac non excedentia virtutem Dæmonum, ideoque Apoc. 13. inter maxima Antichristi prodigia prædicatur, quod faciet, vt ignis descendat de Cælo, & vt loquatur imago bestia, quæ facillimè fieri possunt à Dæmone. At in confirmationem religionis Christianæ facta sunt,

& fiunt vera miracula, & excedentia virtutem Dæmonum, puta suscitantur mortui, illuminantur cæci &c. ergo prodigia, quæ fiunt ab Antichristo contra religionem Christianam, erunt omnino contemnenda, comparatione prodigiorum, quæ facta sunt, & fiunt, & etiam in fine Mundi fiunt in confirmationem religionis Christianæ; eo pacto, quo prodigia, quæ, vt refertur Exodi 7. facta sunt à Mâgis Pharaonis, fuerunt omnino contemnenda, comparatione prodigiorum, quæ facta sunt à Moyse, & prodigia, quæ facta sunt à Simone Mago, fuerunt contemnenda, comparatione prodigiorum factorû à Petro. Proportionaliter dico Cæcum, qui fuit curatus à Vespasiano, non fuisse verè, & incurabiliter cæcum, & claudum, non fuisse incurabiliter claudum, vt patet ex Tacito, qui lib. 4. Historiarum narrat Medicos de ipsis interrogatos respondisse vtrumque posse curari; ergo Vespasianus non fecit vera miracula, & excedentia virtutem Dæmonum. Addit Tertullianus in Apologetico cap. 22: credibile esse morbos illos fuisse causatos à Dæmone, qui alterum impediabat, ne videret, alterum, ne recta ambularet, vt ablato deinde impedimento, videretur factum miraculum. Miraculum, quod à Socrate narratur, non fuit factum à Paulo Episcopo Nouatiano in confirmationem falsi dogmatis, sed à Deo in confirmationem veri baptismi. Cum enim, vt Socrates refert, Iudæus quidam, qui fuerat Catholicè baptizatus

ab

ab Attico Episcopo Constantinopolitano, fingens se non esse baptizatum, venisset ad Paulum Nouatianum, vt ab eo iterum baptizaretur, & sic irrideret Baptismum, tota aqua sacri fontis repente euauit, Deo non permittente, vt impostor Iudæus in baptismi irrisionem iterum baptizaretur ab hæretico. Augustinus dicit non esse credendum Donatistis, etiamsi miracula faciant; tum quia in confirmationem falsi dogmatis non possunt fieri miracula alia, quam falsa, & mendacia, qualia faciet Antichristus; tum quia religio Catholica ita est confirmata miraculis, ac vaticinijs Prophetarum, vt quæcunque reuelationes, & miracula afferantur in contrarium, sint omnino contemnenda, & censenda falsa miracula, & falsæ reuelationes, iuxta illud Apostoli ad Gal. 1. *Licet nos, aut Angelus de Cælo Euangelizet vobis, præterquam quod Euangelizatum est, anathema sit.*

24. Ad 4. Idololatria propagata fuit miraculis falsis, ac merè apparentibus, ac non excedentibus virtutem Dæmonum, quæ proinde comparatione miraculorum factorum in confirmationem fidei Catholicæ, fuerunt penitus contemnenda, vt patet ex eo, quod nationes Gentilium, illis contemptis, conuersæ sunt ad cultum vniuersi veri Dei.



Q V A E S T I O XX.

*Vtrum euidenter probetur ceteras sectas
præter religionem Christianam ,
non esse prudenter cre-
dibiles ?*

1. **V**Idetur non probari euidenter . Cum enim omnes sectæ habeant magnum numerum sectatorum, & afferant pro se argumenta non contemnenda, ac de nulla sit euidenter, quod sit vera, & diuinitus reuelata, apparet rationabile, ut Deus permittat vnumquemque tutâ conscientia liberè, ac licitè permanere in ea secta, in qua natus est :

2. Secundo Mahometani probant suam sectam esse prudenter credibilem, & credendam argumento simili illi, quo nos probamus religionem christianam esse prudenter credibilem, & credendam; ergo &c. Probatur antecedens, afferendo hoc argumentum. Vel enim Mahometanismus propagatus est per miracula, vel sine miraculis: si per miracula, prudenter est credendum Mahometanismum fuisse diuinitus reuelatum; si sine miraculis, hoc ipsum est magnum miraculum.

3. Resp. euidenter esse, quod sola christiana religio euidenter est credibilis, & credenda, ceteræ sectæ non possunt prudenter credi. Probatur primò: nam, ex dictis euidenter est omnes debere amplecti,

ac

ac sequi religionem, christianam, firmissimè credendo illam fuisse diuinitus reuelatam; sed religio christiana docet non esse sequendas alias sectas; ergo evidens est nos non posse prudenter sequi, & profiteri aliam sectam.

4. Probatur secundò: nam aliæ sectæ reducuntur ad Atheismum, Ethnicismum, Philosophismum, Iudæismum, & Mahometanismum; sed evidens est homines per se non posse prudenter sequi, & amplecti vllam ex dictis sectis; ergo &c. Probatur minor, discurrendo per singulas sectas. Primò Atheismus, hoc est secta negans dari Deum, vel concedens dari Deum, sed negans illum habere prouidentiam, moralem rerum humanarum, repugnat luminis naturæ, ideòque nemo poteit prudenter hanc sectam sequi:

5. Confirmatur primò; nam rationes, quibus probauimus religionē christianam diu antequam oriretur, fuisse promissam, & reuelatam, postquam est orta, fuisse miraculis propagatam, ostendunt euidenter credibile, & credendum esse dari Deum, & habere prouidentiam rerum humanarum; ergo ostendunt euidenter non posse prudenter negari dari Deum, & habere prouidentiam rerum humanarum.

6. Confirmatur secundò: nam qui negant dari Deum, & habere prouidentiam rerum humanarum, procul dubio pro sua secta non possunt asserre vlla miracula, & signa facta in confirmationem illius: siquidem eo ipso, quod asserrent, destrue-

rent suam sectam; ergo ex hoc capite non potest habere ullam credibilitatem.

Secundo Ethnicismus, hoc est secta colens plures Deos, repugnat lumini naturali, quo euidenter ostenditur dari vnum solum Deum, incorporeum, & optimum, ac proinde non potest prudenter credi dari plures Deos, præsertim tales, quales conluntur ab Ethnicis, ex quibus nimirum Dijs, alij sint Mares, & alij fæminæ, & qui talia gesserint, quæ cum homines gerunt, censentur scelestissimi.

7. Confirmatur: nam argumenta, quæ probant religionem christianam fuisse diuinitus prænunciatam, antequam oriretur, postquam est orta, fuisse diuinitus miraculis propagatam, ostendunt etiam euerfionem Idololatriæ fuisse diuinitus prænunciatam, & eandem Idololatriam fuisse per miracula à Christianis in pluribus gentibus euerfam; ergo sicut ostendunt euidenter religionem christianam prudenter credi posse, ac debere, sic ostendunt Idololatriam non posse prudenter credi.

8. Tertiò Philosophismus, seu Deismus est secta dicentium nullam religionem fuisse diuinitus reuelatam, nullam legem positiuam fuisse à Deo traditam, ac proinde illud solum de Deo credendum, quod probetur ratione naturali, puta quod Deus sit, & vnus tantum sit; quod habeat prouidentiam rerum humanarum, ac solum obseruandam esse legem naturalem; sed ex vaticinijs Prophetarum, & ex miraculis probatur euidenter esse prudenter credibile

bile, & credendum religionem, ac legem Christianam fuisse diuinitus reuelatam, & traditam; ergo euidenter est homines non posse prudenter sequi sectam Philosophorum, ac non posse prudenter negari dari aliquam religionem, ac legem diuinitus reuelatam.

9. Quartò nos Christiani conuenimus cum Iudæis quoad reliqua, ac solum discrepamus in eo, quod Iudæi negant Messiam venisse, nos Christiani dicimus Messiam iam venisse, & Christum esse verum Messiam, cuius doctrina, & lex sic sequenda: sed omnia argumenta allata probant credi debere Messiam iam venisse, & Christum esse verum Messiam, cum in Christo impleta sint, quæ de Messia prædicta fuerunt à Prophetis, & Religio credens Christum esse Messiam, per miracula fuerit propagata; ergo probant euidenter non posse prudenter negari Christum venisse, & Christum esse Messiam.

10. Confirmatur primò: nam ante aduentum Christi religio Iudæorum expectantium Messiam semper confirmata miraculis fuit, & prædictionibus futurorum, quæ suis temporibus cernebantur impleri; ergo ante Christum religio Iudæorum erat euidenter credibilis, & credenda, præsertim cum ante Christum nulla esset alia secta, quàm Ethnicorum, quæ cum repugnaret lumini naturæ, euidenter erat incredibilis; sed post Christum secta Iudæorum non fuit amplius confirmata ullis miraculis, & vaticinijs futurorum; religio

182 *De incredibilitate sectarum.*

religio christiana confirmata fuit, & semper confirmatur miraculis, & impletionibus predictionum; ergo secta Iudæorum negantium Messiam venisse non est prudenter credibilis, religio christiana est prudenter credibilis, & credenda.

11. Confirmatur secundò: nam Iudæi post Christum fuerunt à Deo penitus relictī & in suis libris Thalmudicis docuerunt innumerabiles errores absurdos, & lumini naturali repugnantes, de quibus videri possunt Sixtus Senéſis lib. 2. Bibliothecæ Sanctæ, Galatinus, & alij, & quosdam Iudæorum errores refert etiam Belarminus lib. 4. de notis Ecclesiæ cap. 11.

12. Quinto Mahometus dixit quidem se esse Prophetam missum à Deo, sed nullis signis, & miraculis potuit probare se esse Prophetam; ergo stultè, & imprudenter creditur Mahometum esse Prophetam. Probatur antecedens: nam non potuit afferre vllas prophetias, vel prædictiones, quibus antequam veniret, fuerit promissus, & expectatus, ac fuerit præceptum, vt illi crederetur, cum nos christiani afferamus innumeras prædictiones, & promissiones, quibus fuit prædictus Messias, præcipiendo vt illi crederemus; ergo &c.

13. Confirmatur primò; nam nos christiani ideò prudenter credimus Christo, quia Moyſes, & Prophætæ promiserunt Messiam venturum, & impleturum ea, quæ fuerant promissa, & præfigurata in veteri testamento, & præceperunt, vt crederemus Messiae, eiusque legem amplecteremur;

&

& hæc omnia videmus impleta in Christo, sed Christus Matth. 24. Marc. 13. & alibi, prædixit venturos multos falsos Prophetas, & monuit, ac præcepit, vt si dicerent contraria doctrinæ ab ipsomet Christo traditæ, illis nõ crederemus, sed illos detestaremur: Mahometus autem tradidit doctrinam cõtrariam doctrinæ Christi; ergo euident est non posse prudenter credi Mahometo.

14. Confirmatur secundo: nam Christus innumeris miraculis ostendit se esse Messiam à Deo missum, Mahometus nullis miraculis potuit probare se esse prophetam, & ipsemet in Alcorano dixit, Christo miracula, sibi gladium datum fuisse à Deo, & cap. 18. & 19. docet bello cogendos homines ad credendum; ergo stultè creditur Mahometum fuisse prophetam à Deo missum. Capite 68. Alcorani Mahometus insinuat se fecisse quoddam miraculum in Luna, at non explicat, quod nam fuerit; sed quodcumque illud fuerit, suo tantum testimonio id probat, & interpretes Alcorani dicunt à nemine miraculum illud visum fuisse; ergo illud miraculum leuiter, & stultè creditur.

15. Confirmatur tertio: nam Christiana religio postquam est orta, propagata fuit innumeris miraculis, & post ortum Mahometanismum nouis semper miraculis confirmatur: at Mahometanismus nullis ab initio miraculis fuit propagatus, nullis deinde miraculis confirmatus.

16. Confirmatur quarto: nam Mahometus in Alcorano docet plures errores absurdos.

bsurdissimos, & lumini naturali repugnantes. Nam cap. 5. 25. 84. & alibi passim docet beatitudinem futuræ vitæ consistere in cibo, & potu, & in multitudine vxorum, & cap. 43. dicit Deum, & Angelos orare pro Mahometo, quo nihil stultius excogitari potest.

17. Ad. 1. Aliæ sectæ licet habeant magnum numerum sectatorum, tamen habent pro se argumenta penitus contemptibilia, præsertim si comparentur cum argumentis, quibus nititur religio christiana: sed evidens est, quod nemo potest prudenter manere in sectis, quæ nitantur argumentis penitus contemnendis, etiamsi in talibus sectis sit natus, & magnum habeant numerum sectatorum; ergo evidens est, quod Infideles non possunt manere in suis sectis. Nec excusantur ab obligatione amplectendi religionem christianam ex eo, quod non sit evidens religionem christianam fuisse diuinitus reuelatam. Sicut enim licet non sit evidens aliquas leges humanas fuisse legitimè latas à Principe, si tamen sit evidens prudenter credi posse, ac debere illas leges fuisse legitimè latas, evidens est, quod subditi tenentur se subijcere talibus legibus, & si nolint se subijcere hoc prætextu, quod nō sit evidēs tales leges fuisse legitimè latas à Principe, sunt extremo supplicio digni, tanquam contumaces, & rebelles, & hoc principium in moralibus, & politicis est evidentissimum, et apud omnes gentes receptum: sic licet non sit evidens religionem, & legem christianam fuisse

fuisse diuinitus reuelatam, tamen cum ex vaticinijs Prophetarum, & ex miraculis euidentibus sit prudenter credi posse, ac debere religionem, ac legem christianam fuisse diuinitus reuelatam, euidentibus est omnes obligari ad amplectendam religionem christianam, ac si nolint amplecti eo prætextu, quod non sit euidentibus illam diuinitus fuisse reuelatam, esse extremo supplicio dignos, tanquam Deo contumaces, & rebelles. Confirmatur: nam nulla datur lex humana, de qua ita sit euidentibus prudenter credi debere illam fuisse latam ab habente legitimam potestatem, sicut de religione, ac lege christiana est euidentibus, prudenter credi posse, ac debere illam fuisse latam à Domino totius Mundi. Quis enim potest prudenter dubitare, vtrum lex, quæ diu antequam promulgaretur, fuit promissa, postquam est promulgata, fuit miraculis confirmata, fuerit lata à Deo Domino totius Mundi, qui solus potest præscire, ac disponere futura, antequam fiant; & cum sit Dominus totius naturæ, potest per miracula dispensare in legibus naturæ? ergo si excusaremur ab obligatione subiijciendi nos legi christianæ, quilibet excusari posset ab obligatione omnium legum humanarum eo prætextu, quod vel non sit euidentibus Authorem talium legum habuisse legitimam potestatem, vel non sit euidentibus tales leges latas fuisse ab illis Authoribus.

18. Ad 2. Simili argumento posset probari etiam Ethnicismum fuisse diuinitus

tus reuelatum. Constat enim ante aduentum Christi Ethnicismum multò magis fuisse propagatum, quàm post aduentum Christi propagatus fuerit Mahometanismus, siquidem ante aduentum Christi omnes gentes, & nationes, exceptis tantum Iudæis, colebant idola; sed factò dilemmate probari non potest Ethnicismum, ante Christum fuisse diuinitus reuelatum; ergo neque potest probari, post Christum Mahometanismum fuisse diuinitus reuelatum. Ratio est, quia vt secta, quæ blanditur sensui, & relaxat fræna licentiæ, propagetur, procul dubio non requiruntur miracula, sed potius requiruntur miracula, ne homines ad voluptates, & ad licentiam proni talem sectam amplectantur: sed Gentiles ante Christum, & Mahometani post Christum blanditi fuerunt sensui, & relaxarunt fræna licentiæ, permittentes multitudinem vxorum, & post hanc vitam promittentes beatitudinem quamdam bestialem, consistentem in voluptatibus corporeis; ergo non est mirum, quod Mahometanismus propagatus fuerit sine miraculis; præsertim cum propagatus fuerit vi armorum, & per potentiam bellicam. At christiana religio, quæ non indulget sensui, imò proponit difficillima ad credendum, ad sperandum, & ad agendum, propagata fuit toto orbe terrarum à paucis hominibus rudibus, & indoctis, non vi armorum, sed toto Mundo conante impedire, ne propagaretur: sed hoc non potuit euenire sine maximo miraculo, vt ostensum est; ergo &c.

QVAE-

QVÆSTIO XXI.

Utrum probetur euidenter solam religionem Catholicam Romanam esse prudenter credibilem, omnes alias sectas non esse prudenter credibiles, & credendas ?

1. **V** Idetur non probari euidenter; primò quia vt probaretur euidenter religionem Catholicam Romanam esse prudenter credibilem, & credendam, deberet ostendi nullum dogma in ea tradi contrarium veritati tum cognitæ per lumen naturale, tum diuinitus reuelatæ; sed hoc non ostenditur; ergo &c.

2. Secundò prudenter credi potest ad salutem sufficere, vt conueniamus in præcipuis dogmatibus spectantibus ad Deum trinum, & vnum, ad Incarnationem Verbi, & ad passionem, & mortem Christi, licet discrepemus quoad alia: sed hæretici recentiores nobiscum conueniunt quoad hæc præcipua dogmata, & solum discrepant quoad secundaria; ergo &c.

3. Tertiò non tantum doctis, sed etiam simplicibus, & indoctis deberet esse euidentis solam religionem christianam, & catholicam esse prudenter credendam; sed non explicatur, quo pacto hoc sit euidentis etiam indoctis; ergo &c.

4. Quartò si probaretur euidenter religio-

ligionem catholicam esse prudenter credibilem, & credendam, probaretur euidenter religionem catholicam esse veram: sed hoc non probatur euidenter; ergo &c.

5. Resp. euidenter esse solam religionem catholicam Romanam esse prudenter credibilem, & credendam, cæteras sectas prudenter credi non posse.

6. Probatur primò: nam ex dictis euidenter est religionem illam esse prudenter credibilem, & credendam, quam Christus fundauit, & instituit, sectas autem, quas instituerunt qui descuerunt à religione, quam Christus instituit, & rebellarunt ab Ecclesia, quam Christus fundauit, prudenter credi non posse: sed Ecclesiam catholicam Romanam Christus instituit, cæteras autem sectas instituerunt qui descuerunt à religione, quam Christus fundauit; ergo &c. Probatur minor: nam Christus Ecclesiam suam fundauit in Petro, eiusque successoribus, dicens Matth. 16. *Tu es Petrus, & super hanc petram edificabo Ecclesiam meam, & portæ inferi non præualebunt aduersus eam, & suas oues Petro commisit regendas, dicens Io. 21. pasce oues meas:* sed ecclesia catholica Romana est Ecclesia fundata in Petro, eiusque successoribus paret ab annis plusquam mille sexcentis; omnes aliæ sectæ descuerunt, & rebellarunt ab Ecclesia fundata in Petro, & quæ paret Petro, eiusque successoribus; ergo &c.

7. Confirmatur primò: nam sicut posito,

sito , quod regnum sit fundatum , & institutum sub Regibus, euidens est legitimum regnum manere apud eos, qui parent Regibus, cæteros autem , qui descuerunt, & rebellarunt à Regibus , fuisse , & esse rebelles regni ; sic cum Ecclesia , quæ est regnum Christi , fuerit à Christo fundata in Petro , eiusque successoribus , & fuerit Petro commissa, tanquam supremo Pastori, euidens est Ecclesiam Christi mansisse , & manere apud eos , qui ab annis plusquam mille sexcentis paruerunt, & parent Petro, eiusque successoribus , cæteros autem, qui descuerunt, & rebellarunt à Petro, eiusque successoribus , esse rebelles Ecclesiæ à Christo fundatæ, & institutæ .

8. Confirmatur secundò : nam procul dubio viuentē Petro, vera Ecclesia Christi fuit , quæ Petro paruit , & consensit , Simon magus , eiusque sectatores , qui se separarunt ab Ecclesia , quæ Petro consentiebat , & parebat , fuerunt hæretici , & rebelles ab Ecclesia Christi . Petro successit Linus, & Lino viuentē, vera Ecclesia fuit, quæ consensit Lino , Menander , Saturninus , & alij , qui separarunt se ab Ecclesia , quæ consentiebat Lino , fuerunt hæretici , & rebelles ab Ecclesia Christi . Temporibus sequentibus vera Ecclesia Christi fuit, quæ paruit , & consensit Cleto , Clementi , alijsque Romanis Pontificibus successoribus Petri ; Marcionitæ , Manichæi, Sabelliani, Arriani, Nestoriani, Eutichiani, Monotelitæ, Iconomachi , & superiori seculo Lutherani, Calvinistæ, alijque

que, qui se separarunt ab Ecclesia consentiente, & parente Romanis Pontificibus successoribus Petri, fuerunt hæretici, & rebelles ab Ecclesia Christi.

9 Respondent ab initio Petrum, Linum, Cletum, aliosque Romanos Pontifices mansisse in fide Christi, ideoque Ecclesiam illis consentientem fuisse Ecclesiam Christi: consecutis temporibus, Romanos Pontifices defecisse à fide Christi, & introduxisse varios errores, ac mutatos in Antichristos, ac proinde Ecclesiam Romanis Pontificibus consentientem defecisse à fide Christi, ac mutatam fuisse in Ecclesiam Antichristi.

10. Sed contra primò: nam Manichæi, Arriani, Nestoriani, & omnes, qui confessione recentiorum hæreticorum fuerunt hæretici, separarunt se ab Ecclesia consentiente Romanis Pontificibus, hoc prætextu, quod Romani Pontifices cum Ecclesia ipsis consentiente defecissent à fide Christi; ergo dum Lutherani, Calvinistæ, & omnes sectarij huius temporis dicunt hoc, dicunt id, quod dixerunt, & semper dicent omnes hæretici, & rebelles ab Ecclesia Christi, ac proinde habendi sunt ut hæretici, ac rebelles. Secundò mhristus Matth. 16. promisit portas inferi non prævalituras aduersus Ecclesiam fundatam in Petro: sed si Ecclesia consentiens Petro, eiusque successoribus, amisisset fidem mhristi, procul dubio portæ inferi prævaluissent aduersus eam: ergo &c. Tertiò contra est, nam ex historijs Ecclesiasticis
scimus

scimus, quandonam, & à quibus Authoribus introducti fuerint errores Arrianorum, Nestorianorum &c. scimus etiam, quæ turbæ, & qui tumultus ex occasione talium errorum fuerint exorti; quæ Concilia celebrata; qui libri scripti &c. ergo si Pontifices Romani introduxissent errores, & mutati fuissent in Antichristos, scriptum fuisset in Ecclesiasticis historijs; sed non est scriptum, imo de hac mutatione altum silentium apud omnes Scriptores; ergo imprudenter creditur, ac impudenter, & impiè dicitur ex sola libidine mentiendi Romanos Pontifices introduxisse errores, & Ecclesiam Christi mutasse in Ecclesiam Antichristi. Quartò si ab annis circiter mille, vt dicunt hæretici huius temporis, Ecclesia adherens Romanis Pontificibus defecit à fide Christi, & mutata est in Ecclesiam Antichristi, vel in terris remansit his annis mille visibilis Ecclesia Christi, vel non: si remansit, dicant vbinam gentium fuerit? quanam veram Christi religionem fuerint professi? quos libros scripserint? apud quos habeatur eius mentio? sed non possunt hæc dicere; ergo. Si non remansit: ergo iam portæ inferi per annos mille preualuerunt aduersus Ecclesiam Christi. Quintò Christus præcepit, vt audiremus Ecclesiam, & vt acquiesceremus eius iudicio, dicens Matth. 18. *si autem Ecclesiam non audierit, sit tibi velut Ethnicus, & Publicanus*: sed non de alia Ecclesia hoc est intelligendum, quam de ea, quam promisit se ædificaturum in Petro, & portas

tas inferi non praualliturus aduersus eam; ergo ex doctrina Christi qui nolunt audire Ecclesiam ædificatam in Petro, & nolunt eius iudicio acquiescere, habendi sunt vt Ethnici, & Publicani.

11. Confirmatur primò: nam procul dubio qui non solum nolunt acquiescere iudicio Regis, sed neque volunt acquiescere iudicio Regni congregati in comitijs generalibus repræsentantibus totum Regnum, sunt rebelles Regni; ergo qui non solum nolunt acquiescere iudicio successorum Petri Pontificum Romanorum, sed neque volunt acquiescere iudicio totius Ecclesiæ congregatæ in Concilijs generalibus repræsentantibus totam Ecclesiā, sunt rebelles Ecclesiæ: sed omnes sectæ, excepta Ecclesia catholica Romana, nolunt acquiescere iudicio Conciliorum generalium; ergo sunt rebelles Ecclesiæ, & earum sectatores habendi sunt vt Ethnici. Ratio est, quia in quolibet Regno, & Republica qui non vult acquiescere, & parere supremæ potestati, est rebellis; sed Christus supremam potestatem iudicandi de controuersijs fidei dedit Ecclesiæ fundatæ in Petro, dicens: *si Ecclesiam non audiuerit, sit tibi, velut Ethnicus*; ergo qui nolunt acquiescere, & parere Ecclesiæ fundatæ in Petro, eiusque successoribus, est rebellis Ecclesiæ; præsertim cum Christus promiserit portas inferi non praualliturus aduersus Ecclesiam ædificatam in Petro.

12. Confirmatur secundo: nam sectarij recentiores nolunt acquiescere iudicio vilius

lius Ecclesiæ visibilis ex ijs, quæ fuerunt ab annis circiter mille ante ipsos. Nam, dicunt Ecclesiam Romanam ab annis mille fuisse Ecclesiam Antichristi, alias Ecclesias fuisse Ecclesias hæreticorum, & Schismaticorum, & nullam assignant Ecclesiam visibilem, quæ fuerit his annis mille, cuius iudicio velint acquiescere; ergo procul dubio, cum nolint audire Ecclesiam, habendi sunt vt Ethnici.

13. Concluditur argumentum: Christus dixit: *Tu es Petrus, & super hanc petram ædificabo Ecclesiam meam, & portæ inferi non præualebunt aduersus eam*: Luterus, Calvinus, alijque sectarij dicunt Ecclesiam fundatam in Petro, eiusq; successoribus, ab annis mille defecisse à fide Christi, ac proinde aduersus eam præualuisse portas inferi. Cui prudenter est credendum, Christo, an Lutero, Caluino, & sectarijs? Christus postquam promisit portas inferi non præualituras aduersus Ecclesiam ædificandam in Petro, dedit illi Ecclesiæ supremam potestatem iudicandi, & præcepit, vt qui illam non audiunt, habeantur vt Ethnici: Ecclesia suprema hac potestate iudicat omnes, qui ipsam nolunt audire, habendos vt Ethnicos: Lutherani, Calvinistæ, & omnes sectarij, ac Schismatici nolunt Ecclesiā audire, ac dicunt potius habendos vt Ethnicos, qui audiunt Ecclesiam Romanam fundatam in Petro. Cuius iudicio prudenter standum, Ecclesiæ, an sectariorum?

14. Hoc argumento desumpto ex eo,
Lib. V, I quod

quod vera Ecclesia Christi sit, quæ consentit, & paret Romanis Pontificibus, qui Petro longo ordine successerunt, contra hæreticos, & Schismaticos communiter vñ sunt Patres. Tertullianus libro de Præscriptionibus dicit. *Cedant hæretici origine Ecclesiarum suarum: euoluant ordinem Episcoporum suorum, ita per successionem ab initio decurrentem, ut primus ille Episcopus aliquem ex Apostolis, vel Apostolicis viris habuerit Authorem, & Antecessorem.* Hoc enim modo. Romanorum Ecclesia Clementem à Petro ordinatum præfert: Optatus Milevitanus lib. 2. contra Parmenianum Donatistam, enumeratis Romanis Põtificibus à Petro vsque ad Siricium, qui tunc sedebat, subdit. *Vos vestra cathedre originem offendite, qui vobis vultis sanctam Ecclesiam indicare: & eodem libro: unde est inquit, quod claves Regni vobis Donatiste usurpare contenditis, qui cathedram Petri vestris presumptionibus, & audacijs sacrilegè conculcatis.* Augustinus ep. 165. ad eundem finem enumerat Romanos Pontifices à Petro vsque ad Anastasium, qui tunc sedebat: & in Psalmo contra partem Donati, Donatistas alloquẽs, dicit. *Numerate Sacerdotes, vel ab ipsa sede Petri, & in ordine illo Patrum quis cui successerit, videte: ipsa est Petra, quam non vincunt superba inferorum Portæ: & lib. contr. Ep. fundamenti cap. 4. dicit: Tenet me in Ecclesia ab ipsa sede Petri Apostoli, cui pascendas oves suas Dominus commendavit, vsque ad presentem Episcopatum successio Sacerdotum: & lib. de Vtil.*
cre-

credendi: dubitabimus nos illius Ecclesiæ concredere gremio, quæ ab Apostolica Sede, per successiones Episcoporum, frustra hæreticis circumlatrantibus, culmen authoritatis obtinuit? Cyprianus lib. 4. Ep. 8. loquens de Ecclesia Romana: scimus, inquit, hortatos nos esse, ut Ecclesiæ Catholicæ matricem, & radicem agnoscerent, & tenerent. Ambrosius in Oratione de Obitu Satyri dicit: Rogavit si cum catholicis, hoc est cum Ecclesia Romana consentiret. Hieronymus in Epistola ad Damasum de Hypostasis nomine: si quis, inquit, cathedra Petri iungitur, hic meus est: & Epistola superiori: Ego Beatitudini tuæ, id est cathedræ Petri communione consocior. Supra illam petram edificatam Ecclesiam scio. Quicumque extra hanc domum agnum comederit, prophanus est; si quis extra arcam furrit, peribit, regnante diluvio. Quicumque tecum non colligit, dispergit; id est qui Christi non est, Antichristi est: & in fine Dialogi contra Luciferianos, dicit: breuem, apertamque animi mei sententiam proferam: in illa esse Ecclesiā permanendum, quæ ab Apostolis fundata, usque ad diem hanc durat: ergo patet Patres docuisse Ecclesiam Christi esse, quæ consentit successoribus Petri, alias omnes esse Ecclesias hæreticorum, & Antichristi. Si autem argumentum allatum valebat tempore relatorum Patrum, quo Romana Ecclesia durauerat annis solum quadringentis, & numerabat quadraginta circiter Romanos Pontifices, multo magis valet temporibus nostris, quibus eadem Ecclesia

durauit annis plusquam mille sexcentis ,
& numerat ducentos quadragita quatuor
successores Petri , nec vnquam portæ in-
feri potuerunt præualere aduersus eam.

15. Probatur secundò: nam prudenter
credi potest , & debet, Ecclesiam Christi
esse illam, quæ ita fuit à Christo instituta,
vt per annos mille sexcentos semper man-
serit sub legitimis pastoribus; vt non possit
assignari , quando , & quo authore , post
Christum inceperit ; vt semper obtinue-
rit nomen Catholicæ , & fuerit re ipsa
catholica , hoc est vniuersalis , & toto ter-
rarum orbe diffusa; vt eius sectatores sem-
per in fide consenserint, semper floruerint
sanctitate , lumine prophetico, & gloria
miraculorum ; vt semper habuerit viros ,
qui Apostolorum more viuentes , & præ-
dicantes Euangelium , conuerterint ad
Christum nationes gentilium: cæteras au-
tem sectas , quibus conueniunt his contra-
ria , esse sectas rebellium ab Ecclesia
Christi , qui proinde habendi sint , vt
Ethnici; sed omnia enumerata conueniunt
soli Ecclesiæ Catholicæ Romanæ , cæteris
autem sectis conueniunt prorsus opposita;
ergo &c.

16. Probatur minor : nam primò
Christus fundauit Ecclesiam , eamque vo-
luit esse vnum ouile sub vno Pastore, di-
cens Io. 10. *fiet vnum ouile, & vnus Pastor;*
ac Pastorem Ecclesiæ constituit Petrum,
eiusque successores , dicens Petro Io. 21.
pasce oues meas : sed Ecclesia Romana ab
annis mille sexcentis mansit sub Petro ,
cuius-

eiusque successoribus, Lino, Cleto &c. omnes aliæ sectæ noluerunt, & nolunt manere sub Petro, eiusque successoribus; ergo &c.

17. Secundò non potest assignari, quandonam post Christum, & quo authore, inceperit secta adhærentium Romanis Pontificibus, imò positiuè probatur hanc sectam semper fuisse. Constat enim ex actis Apostolorum, & ex historijs Ecclesiasticis, post ascensionem Christi Ecclesiam Christi adhæsisse Petro; mortuo Petro, adhæsisse Lino &c. De alijs sectis scimus, quando, & quo tempore post Christum inceperint, & quo authore. Constat nimirum Simonianos incæpisse authore Simone Mago; Sabellianos authore Sabellio; Arrianos authore Arrio &c. Scimus per annos plusquam octingentos non fuisse sectam adhærentium Patriarchæ Constantinopolitano, vt supremo Pastori, & quo tempore, & quibus authoribus, inceperit hæc secta.

18. Tertiò Ecclesia adhærens Romanis Pontificibus ab annis mille sexcentis vocatur catholica, & hoc nomine illam designant, & ab alijs sectis distinguunt Iudæi, Gentiles, & Mahometani: cæteræ Ecclesiæ vocantur Ecclesiæ Arrianorum, Nestorianorum, Luteranorum &c. nec vnquam potuerunt obtinere, vt vocarentur catholicæ, ideoque ipsi hæretici, cum interrogantur à Iudeis, Mahometanis, & Gentilibus, quænam sit Ecclesia catholicorum, non audent suas Ecclesias osten-

dere. Utitur hoc argumento Augustinus libro contra Epist. Fundamenti, cap. 4. Utuntur, & alij Patres, quos refert Belarminus lib. 4. de Ecclesia, cap. 4.

19. Opponunt sectarij, nos vocari Papistas. Sed primò solum ab hæreticis recentioribus, præsertim in Germania, vocamur Papistæ: in reliquo Mundo etiam à Iudæis, Mahometanis, & Gentilibus vocamur Christiani, & ad distinctionem aliarum sectarum, vocamur Catholici. Secundò hoc nomen Papistæ significat eos, qui ab annis mille sexcentis adhæserunt Petro, Lino, alijsque successoribus Petri, hoc est Pastoribus à Christo constitutis; sed procul dubio nomen adhærentium Pastoribus à Christo constitutis, & successoribus Petri, non est nomen rebellium, aut hæreticorum: ergo nomen Papistarum non est nomen hæreticorum, & rebellium à Christo, sed solæ sectæ antipapistarum sunt sectæ rebellium, & hæreticorum, eo pacto, quo in regno nomen Rectorum non est nomen rebellium, sed solum nomen Antiregiorum est nomen rebellium.

20. Quartò Ecclesia adhærens Romanis Pontificibus non solum nomine, sed re ipsa est Catholica, hoc est vniuersalis: Primo est vniuersalis tempore, cum à Christo sine vlla interruptione durauerit, & duret annis plusquam mille sexcentis: nulla alia secta est vniuersalis tempore, cum omnes inceperint post Christum: Secundò à Christo vsque ad tempora Lutheri ortæ fuerant sectæ circiter ducentæ præ-

præcipuæ, ac tempore Lutheri defecerant omnes, excepta secta Græcorum, & quorundam Nestorianorum, & Eutichianorum in Oriente; & quorundam Hussitarum in Occidente in angulo Bohemiæ. Tertiò Ecclesia nostra est etiam vniuersalis quoad nationes, & loca: nam ab annis mille sexcentis diffusa est per omnes regiones, & nationes: at aliæ sectæ singulæ sunt in angulo orbis terrarum; sed veræ Ecclesiæ Christi promissa est hæc diffusio per omnes regiones, & nationes: Ps. 22: *Dabo tibi gentes hereditatem tuam, & possessionem tuam terminos terræ;* & Ps. 71. *Dominabitur à mari usque ad mare, & a flumine usque ad terminos orbis terrarum;* ergo sola nostra Ecclesia est Ecclesia Christi.

21. Quintò vera Ecclesia Christi est, cuius sectatores consentiunt, & semper consenserunt in fide; sed sectatores fidei Catholicæ toto orbe terrarum diffusæ, in omnibus fidei dogmatibus consentiunt, & semper consenserunt, nec possunt non consentire, cum omnes sint parati credere id, quod Summus Pontifex, & Ecclesia illi adhærens definierit; sectatores aliarum sectarum non consentiunt, nec vnquam consenserunt; ergo &c. Probatur minor: nam omnes aliæ sectæ vix ortæ diuisæ sunt in plures alias sectas: E. G. Arriani statim diuisi sunt in Acacianos, Macedonianos, Eunomianos, Semiarianos &c. vt patet ex Rufino lib. 10. Hist. cap. 25. imò Arriani singulis annis fidem mutabant, vt scribit Hilarius vtroque libro ad Con-

stantium. Euthichiani ita diuisi sunt, vt omnes ferè hæreses Orientis ortæ sint ex Eutichianis, vt scribit Euagrius lib. 3. & 4. Historiarum, & Damascenus libro de centum hæresibus: & superiori seculo Luterani, & Caluinistæ diuisi sunt in plufquam centum sectas, & quotidie in plures alias diuiduntur, præsertim in Angliâ. Confirmatur: nam hæretici non solum non consentiunt ad inuicem, sed neque ijdem numero consentiunt sibi ipsis, siquidem modo dicunt vnum, & modo aliud, & sunt velut arundines vento agitatæ.

21. Opponunt: etiam inter Catholicos diuersæ sunt opiniones Scotistarum, Thomistarum &c. ergo neque Catholici consentiunt.

22. Resp. primò omnes catholicos consentire in dogmatibus fidei, dissentire circa alia, quæ non spectant ad dogmata: Hæreticos autem dissentire in ipsis dogmatibus. Resp. secundò catholicos virtualiter semper consentire, cum sint parati acquiescere iudicio, ac definitionibus Ecclesiæ: at hæresici cum nolint acquiescere iudicio, & definitionibus Ecclesiæ, neque virtualiter consentiunt.

23. Opponi potest secundò, Schismaticos Græcos consentire in dogmatibus.

24. Resp. Græcos in antiquis Concilijs fassos fuisse Spiritum Sanctum procedere à Patre, & à Filio, & admisisse in Concilio Chalcedonensi, & alijs Epistolam Cyrilli Alexandrini, in qua id profitebatur, idque idem admisisse, & fassos esse in
Con-

Concilio Florentino, subscribente Imperatore, Patriarcha, & Episcopis, vno, vel duobus exceptis, ac deinde fuisse reuersos ad vomitum, negando Spiritum Sanctum procedere à Patre, & Filio; ergo soli catholici semper consenserunt quoad dogmata.

25. Sextò vera Ecclesia Christi est, quæ ab annis plusquam mille sexcentis semper floruit Sanctitate, lumine prophetico, & gloria miraculorum, cum hanc gloriam miraculorum Ecclesiæ suæ promiserit Christus, dicens Marci ultimo: *Signa autem eos, qui crediderint, hæc sequentur. In nomine meo dæmonia eijcient, linguis loquentur nouis &c.* sed sola Ecclesia adhærens Romanis Pontificibus ab annis mille sexcentis, floruit, & floret Sanctitate, lumine prophetico, & gloria miraculorum; ergo &c. Probatur minor: nam à plurimis Authoribus fide dignissimis narratur multi, singulis his septemdecim sæculis, Sanctitate, lumine prophetico, & miraculorum gloria floruisse: hos omnes constat adhæsisse Ecclesiæ, quæ paret Romanis Pontificibus. Constat etiam nullum ex ijs, qui se separarunt ab hac ecclesia, obtinuisse gloriam Sanctitatis, miraculorum, ac prophetiæ.

26. Possunt respondere sanctitatem fuisse simulatam, prophetias, & miracula fuisse conficta, vel præstigijs Dæmonum facta. Sed hæc reiecta sunt quæst. 19. in Resp. ad 1. & 2.

27. Confirmatur secundò: nam ex

historijs Ecclesiasticis constat authores aliorum sectarum fuisse viros scelestos, & superbiam præsertim vitio laborantes. Quales autem fuerint Luterus, Calvinus, Henricus VIII. Rex Angliæ, & alij, qui superiori sæculo novas sectas inuexerunt, nemo est, qui ignoret. Constat rursus illos, qui se hæreticis opposuerunt, & pro fide Catholica, & Romana pugnarunt, fuisse viros sanctissimos, quales fuerunt Athanasius, Basilus, Gregorius Nazianzenus, Augustinus, Hieronymus, institutores Ordinum Religiosorum &c.

28. Confirmatur tertio: nam in Græcia, Anglia, alijsque regionibus nunc hæresi infectis, dum paruerunt Romanis Pontificibus, semper fuerunt plurimi, qui sanctitate, dono prophetiæ, & miraculis supra modum claruerunt: postquam autem per schisma, & hæresim separarunt se ab Ecclesia, quæ paret Romanis Pontificibus, nullus ex ijs, qui se separarunt, omnino fuit, qui floruerit sanctitate, dono prophetiæ, & gloria miraculorum.

29. Septimò vera Ecclesia Christi est, in qua semper fuerunt viri, qui Apostolorum more viuentes, & prædicantes Evangelium, potuerunt conuertere infideles, præsertim gentiles ad Christum; sed in Ecclesia, quæ adharet Romanis Pontificibus ab annis mille sexcentis, semper fuerunt viri, qui Apostolorum more viuentes, legitimè missi, & prædicantes Evangelium, potuerunt conuertere infideles, præsertim gentiles, ad Christum: in cæte-
ris

ris sectis fuerunt quidem multi, qui peruerterent Christianos, eosque traherent ad suas hæreses: nullus fuit, qui prædicans Euangelium Apostolorum more conuerterit infideles ad Christum; ergo &c. Probatur minor: nam ex innumeris gentibus, quæ septemdecim post Christum sæculis ad fidem Christianam sunt conuersi, nulla est, quæ non fuerit conuersa à Prædicatoribus Catholicis, qui parebant Romanis Pontificibus, vt ex historijs Ecclesiasticis manifestè probat Thomas Bosius lib. 6. de Signis Ecclesiæ. cap. 1. 2. & 3. & Confessione Centuriatorum hæreticorum confirmat Bellarminus lib. 4. de Ecclesia, cap. 12.

30. Confirmatur: nam Angli cum Romanis Pontificibus paruerunt, per Sanctum Bonifacium, & alios conuerterunt ad Christum plures populos Germaniæ: Græci, dum tempore Basilij Imperatoris Romanis Pontificibus adhærebant, conuerterunt Russos, Moscos, aliasque nationes: postquam autem per hæresim, & schisma se à Romanis Pontificibus separarunt, nullam nationem infidelium conuere potuerunt; quia nimirum palmes separatus à vite, non potest amplius producere vllum fructum.

31. Confirmatur secundò: nam sæculo superiori post ortas sectas Lutheranorum, Caluinistarum, & aliorum, qui se reformatos appellant, ex Catholicis Romano Pontifici parentibus plurimi Apostolorum more peregrinati sunt ad Orientales, &

Occidentales Indias , & ad alias regiones infidelium , & quotidie peregrinantur , & innumeras nationes ad Christum conuerterunt , ac conuertunt . At hæretici nauigarunt ad illas regiones solius lucri gratia , non autem Euangelij causa , nec vllas nationes ad Christum conuerterunt .

32. Addit Thomas Bosius in Ecclesiasticis historijs versatissimus lib.6. de Signis Eccl. cap. 5. *Vniuersi hæretici ab Ecclesia Christianæ constitutione per tot secula, per annos mille quingentos, & amplius, haud traduxere ad hæreses suas tot gentes, aut Idololatrias, aut alioquin à Christi cultu alienas, quot vnus Xauerius ad Christi cultum annis undecim . Quod autem protuli de Xauerio, possem de multis alijs narrare . Vincentius Ferrerius Iudeorum vigintiquinq; millia ad Christum perduxit . Perlege omnes historias, ab omnibus hæreticis non inuenies ab ortu Ecclesiæ Christianæ tot millia Iudeorum Christo conciliata . Quod autem hæretici possint quidem Catholicos peruertere, non autem Gentiles, Iudæos, aliosque infideles conuertere ad Christum, notauerat ante annos plusquam mille trecentos Tertullianus lib. de Præscriptionibus Hæreticorum, dicens. De verbi administratione quid dicam ? cum hoc sit negotium illis non ethnicos conuertendi, sed nostros euertendi. Nostri effodiunt, ut sua ædificent .*

33. Opponi potest : Arriani tempore Valentis Imperatoris totam gentem Gothorum à Paganismo ad fidem Christianam conuerterunt , vt refert Prænulphus

in

in Chronico tom. 2. lib. 4. cap. 20.

34. Respondet Bellarminus lib. 4. de Ecclesia cap. 12. Gothos ab Arrianis non fuisse conuersos, sed deceptos. Cum enim Gothi iam sub Romani Imperij auspicijs militarent, & audita fama Religionis Christianæ, ad Christum vellent conuerti, Valens Imperator Arrianus misit ad Gothos instruendos quosdam Episcopos Arrianos, qui loco religionis catholicæ Arrianam hæresim illis propinarunt. Addit ex Socrate lib. 4. cap. 32. Sozomeno lib. 3. cap. 36. Theodoretto lib. 4. cap. ultimo, constare magnam Gothorum partem fuisse prius Christianam, & Catholicam, ac deinde ab Arrianis ad suam hæresim tractam.

35. Ad 1. nego maiorem. Vt ostendamus euidenter religionem Catholicam esse prudenter credendam, non requiritur, vt positinè ostendamus nullum dogma in ea traditum esse contrarium veritati, sed sufficit, vt non habeamus euidentiam, neque probabilitatem de hoc, quod aliquod dogma in religione catholica traditum sit contrarium veritati; sed non habemus euidentiam, neque probabilitatem, quod aliquod dogma traditum in religione catholica sit contrarium veritati, imò argumenta, quæ ab infidelibus, & hæreticis afferuntur contra nostra dogmata, comparatione rationum, quibus suadetur religio catholica, apparent euidenter contemnenda; ergo &c. Addo, quod vt argumenta contra nostra dogmata sint euidenter contemnenda.

remnenda , non requiritur , vt sciamus ea directè solvere, eo pacto , quo , vt subditi, præsertim simplices, cognoscant euidenter se debere obedire suis Principibus , & contemnere argumenta , quæ à rebellibus, vel ab alijs afferuntur contra legitimam potestatem suorum Principum, non requiritur , vt sciant ea directè solvere . Addo secundò , quod argumenta contra nostra dogmata sunt euidenter solubilia , ac de facto soluta sunt , & soluuntur à Doctis . Addo tertiò fundamenta religionis catholicæ obligare nos ad credendum ante examen speculatiuum singulorum dogmatum in particulari , ideòque non excusari infideles , & hæreticos , dum dicunt, se non amplecti religionem catholicam , quia adhuc non examinerunt singula dogmata ipsius . Examen enim speculatiuum singulorum dogmatum in particulari requirit multum temporis, ex quo fit, vt dum tales hæretici, & infideles versantur in hoc examine speculatiuo, moriantur in sua infidelitate , & hæresi . Eadem fundamenta nostræ religionis catholicis reddunt illicitum examen practicum dogmatum , ac solum relinquunt licitum examen merè speculatiuum . Ratio est, quia argumenta pro religione catholica ostendunt euidenter prudenter quiescendum esse in religione catholica sine vlla suspitione de eius falsitate etiam quoad singula dogmata particularia : sed examen practicum est , quo aliquid examinamus cum aliqua suspitione falsitatis , ac proinde parati illud

ne-

negare, si inueniamus esse falsum; ergo argumenta pro religione catholica reddunt illicitum examen practicum, ac solum relinquunt licitum examen purè speculatiuum, quo examinemus dogmata, antecedenter certi de eorum veritate, vt eandem veritatem distinctius cognoscamus, & possimus defendere, ac persuadere, & explicare alijs.

36. Ad 2. nego maiorem. Argumenta enim allata probant amplectendam esse religionem, quæ ab annis plusquam mille sexcentis adhæret Romanis Pontificibus; sed hæc religio inter cætera dogmata semper docuit, & docet eos, qui in quæstionifidei nolunt acquiescere iudicio Ecclesiæ, habendos esse vt ethnicos, & de facto ab annis plusquam mille sexcentis semper habiti sunt vt ethnici, iuxta illud Christi Matth. 18. *Si Ecclesiam non audiuerit, sit tibi velut ethnicus*, & iuxta illud Apostoli ad Tit. 3. *Hereticum hominem deuita*; ergo non solum qui nolunt Ecclesiæ acquiescere quoad dogmata Trinitatis, Incarnationis &c. sed etiam qui nolunt acquiescere quoad quodcunque aliud dogma, habendi sunt vt ethnici.

37. Infertur hæreticos formales esse, qui nolunt acquiescere Ecclesiæ in aliquo dogmate: eos autem, qui parati sunt acquiescere Ecclesiæ, posse quidem errare in rebus fidei, sed non posse esse hæreticos formales. Puri Schismatici sunt, qui licet consentiant Ecclesiæ Catholice quoad omnia dogmata, tamen se ab illa separant.

&

& nolunt communicare cum catholicis . Potest autem dari schisma sine hæresi , licet schisma, dum durat, degeneret in hæresim : E. G. Donatistæ ab initio fuerunt solum schismatici , deinde inciderunt etiam in hæresim . Cum enim Cæcilianus legitimè factus fuisset Episcopus Carthaginensis, quidam Episcopi Africani noluerunt illum recipere vt Episcopum, eo prætextu , quod non fuisset legitimè electus . Cum autem ab Ecclesia declaratum fuisset Cæcilianum fuisse legitimè electū , non solum noluerunt acquiescere Ecclesiæ, ac recipere Cæcilianum , sed se separarunt ab Ecclesia , & à communione Episcoporum Catholicorum , & Romani Pontificis, & sic facti sunt schismatici . Deinde inciderunt in hæresim , docentes baptizatos ab hæreticis , & schismaticis cum debitâ materia, forma, & intentione, non esse validè baptizatos , ac proinde rebaptizandos , & in hoc dogmate noluerunt acquiescere iudicio Ecclesiæ .

38. Ad 3. concedo , quod apud Fideles, non solum doctis , sed etiam indoctis euidens est solam religionem christianam, & catholicam esse prudenter credibilem , & credendam . Ratio est, quia etiam simplices, & indocti , non quidem ex lectione librorum , sed ex fama constanti sciunt, in Christo, & in religione christiana impleta esse , quæ de Messia , & de religione credentium in Messiam fuerant multo ante Iudæis promissa, & prænunciata: sciunt ex eadem fama Iudæorum regnum fuisse euer-
sum

sum, quia Iudæi noluerunt Christum recipere, ut Messiam, sed illum crucifixerunt: sciunt, & ex parte vident Iudæos ab annis mille sexcentis fuisse dispersos inter gentes, & contemni, atque irrideri ab omnibus gentibus, & ab ipsis pueris, ut crucifixores Christi: sciunt ab Apostolis, eorumque successoribus plurimas nationes à cultu Idolorum conuersas fuisse ad Christum, & christianam religionem propagatam fuisse per miracula, & martyria: sciunt etiam ethnicismum repugnare luminis naturæ, ac Deos Gentilium fuisse scelestissimos; Mahometanismum fuisse propagatum sine miraculis, ac laxare frænâ licentiæ, & esse sectam plenam stoliditatis, ac turpitudinis, &c. sed hæc notitia ex fama constanti sufficit ad hoc, ut simplices, & indocti cognoscant euidenter christianam religionem posse, ac debere prudenter credi, alias sectas non posse, nec debere prudenter credi; ergo &c. Rursus apud catholicos, etiam simplices, & indocti ex fama constanti sciunt religionem catholicam sub Romanis Pontificibus Vicarijs Christi, & successoribus Petri fuisse propagatam, & conseruatam annis plusquam mille sexcentis, & miraculis semper confirmatam, & per omnes gentes diffusam, in eaque semper fuisse viros sanctissimos; cæteras sectas incepisse post Christum, ac se separasse ab Ecclesia catholica, ac nullis miraculis fuisse confirmatas, nec in ijs extitisse viros Sanctos; sed hoc sufficit, ut cognoscant euidenter religionem catho-

catholicam posse, ac debere prudenter credi, ceteras sectas non posse credi, nisi imprudenter; ergo &c. Addo Deum, qui ut dicitur Io. 1. *illuminat omnem hominem venientem in hunc Mundum*, per internas etiam illuminationes facere, ut simplices, & indocti acquirant hanc euidenciam.

39. Proportionaliter dico, quod apud infideles, & hæreticos, ut plurimum non solum docti, sed etiam indocti identidem, ac veluti per lucida intervalla cognoscunt euidenter se non posse prudenter quiescere in suis sectis, sed obligari ad examinandum, quam sit vera religio. Ratio est, quia cum atheismus, & ethnicismus repugnet lumini naturæ, fama autem religionis christianæ colentis vnum Deum propagata sit apud omnes gentes, iuxta illud Psalmi relatum ab Apostolo ad Rom. 11. *In omnem terram exiit sonus eorum, & in fines orbis terræ verba eorum*, impossibile est, ut qui ratione vtuntur, saltem identidem non cognoscant euidenter se non posse prudenter quiescere in atheismo, ethnicismo, vel philosophismo, sed obligari ad ulteriorem inquisitionem veræ religionis, præsertim cum Deus internis illuminationibus illuminet omnem hominem venientem in hunc Mundum. Iudæi etiam cum videant se ab annis mille sexcentis à Deo derelictos, Christianos autem toto orbe terrarum diffusos florere fama sapientiæ, Sanctitatis, & miraculorum, impossibile est, ut identidem non cognoscant euidenter, se non posse prudenter quiescere in

Judaismo, sed teneri ad examinandum, vtrum prudenter credi debeat Christum fuisse verum Messiam. Mahometani cum non audiant afferri vlla miracula, vel vaticinia in confirmationem Mahometanismi; audiant autem fama constanti apud ipsos etiam recepta christianam religionem, fuisse confirmatam vaticinijs, & miraculis, impossibile est, vt identidem non cognoscant euidenter, se non posse prudenter quiescere in Mahometanismo, sed obligari ad vltius inquirendum, vtrum religio christiana sit præferenda?

40. Apud hæreticos, & schismaticos etiam indocti sciunt suas sectas esse nouas, nullisque miraculis confirmatas: audiunt autem ex fama constanti, quàm antiqua, quàm longè, latèque diffusa sit religio catholica, & quam multi in ea floruerint, & floreat gloria Sanctitatis, & miraculorum, ideoque impossibile est, vt identidem non cognoscant euidenter, se non posse prudenter quiescere in suis sectis, sed teneri ad examinandum, vtrum catholica religio debeat præferri. Iam verò si infideles, & hæretici etiam simplices, & indocti, prout identidem obligantur, examinent, quænam sit vera religio, Deo interius illuminante, ita penetrabunt motiua religionis catholicæ, vt cognoscant euidenter, solam religionem christianam, & catholicam prudenter credi posse, ac debere.

41. Infertur paucos esse adultos infideles, hæreticos, & schismaticos purè materiales,

riales, ita vt viuant ſeparati ab Eccleſia Catholica, & tamen toto vitæ tempore excuſentur à peccato infidelitatis, hæreſis, aut ſchiſmatis. Ratio eſt, quia ex dictis adulti infideles, hæretici, ac ſchiſmatici identidē cognoscunt euidentē, ſe non poſſe prudenter quieſcere in ſuis ſectis, ſed teneri ad inquirendum, quanā ſit vera religio. Si igitur non inquirent, peccant peccato infidelitatis, hæreſis, & ſchiſmatis, adeoque euadunt formaliter infideles, hæretici, ac ſchiſmatici. Si inquirent, vt debent, à Deo, *qui illuminat omnem hominem venientem in hunc Mundum*, & Lucæ 11. promiſit, *querite, & inuenietis*, illuminantur ita, vt cognoscant euidenter, ſolam religionem catholicam poſſe, ac debere prudenter credi, ideoque ſi credunt, iam ſunt catholici, ſi non credunt, peccant peccato infidelitatis, & euadunt formaliter infideles, hæretici, aut ſchiſmatici.

25. Quæri poteſt, vtrum in quolibet, ad hoc, vt credat fide diuina, requiratur, vt cognoscat euidenter religionem noſtram eſſe prudenter credibilem, & credendam? Reſpondeo affirmatiuè. Ratio eſt, quia vt credamus certiffimè, & ſuper omnia, & fide diuina, voluntas, qua volumus certiffimè credere, debet eſſe prudens, & firmiſſima, ac non fluctuans; ſed vt voluntas credendi ſit prudens, & firmiſſima, ac non fluctuans, fundari debet in cognitione, qua euidenter, & non ſolùm probabiliter, & fluctuanter iudicemus, religionem noſtram eſſe prudenter credibilem,

lem, & credendam; ergo &c. Probatur minor: nam voluntas fundata in cognitione solum probabili, & fluctuante, etiam ipsa est quodammodo fluctuans: E. G. qui sumit medicinam, probabiliter, & fluctuante iudicans illam esse utilem ad sanitatem, medicinam sumit voluntate fluctuante, & paratus non sumere, si cognosceret talem medicinam esse inutilem ad sanitatem; ergo qui solum probabiliter iudicat religionem nostram esse prudenter credibilem, & credendam, vult credere voluntate fluctuante, & paratus non credere, si cognoscat religionem nostram non esse credendam; ergo ut firmissimè velimus credere, requiritur, ut euidenter, ac non solum probabiliter iudicemus, religionem nostram esse credendam.

26. Nec opponas, cognitionem, qua iudicamus esse credendum, posse esse certam, & ineuidentem. Nam contra est primò: sola enim cognitio fidei potest esse certa, & ineuidens; sed cognitio, qua iudicamus esse credendum, non est actus fidei, sed est cognitio natura præcedens actum fidei, & ipsam voluntatem credendi; ergo non potest esse certa, nisi sit euidens. Secundò cognitio ineuidens potest esse certa solum ex imperio firmissimo voluntatis; sed imperium voluntatis, ut sit firmissimum, debet fundari in cognitione certa, quæ cognitio, nisi sit euidens, fundari debet in alio imperio voluntatis; ergo vel proceditur in infinitum, vel sistendū est in aliqua cognitione, qua nō solū certò, sed etiam

etiā euidenter cognoscamus esse credendū.

27. Infertur eos, qui non euidenter, sed solum probabiliter cognoscunt religionem nostram esse prudenter credibilem, & credendam, posse quidem credere aliqua fide humana, sed non posse credere fide diuina, firmissima, & super omnia. Infertur rursus eos, qui solum probabiliter existimant aliquid esse de fide, non posse illud credere super omnia.

28. Potest secundò quæri, vtrum cognitio, qua cognoscimus euidenter nos posse, ac debere credere, sēper sit supernaturalis?

29. Resp. affirmatiuè. Ratio est, quia cognitio per se ordinata ad fidem, & salutem, est supernaturalis, ac proinde ex auxilio gratiæ, & ex illuminatione Spiritus Sancti; sed cognitio, qua cognoscimus euidenter religionem christianam, & catholicam esse prudenter credibilem, & credendam, est per se ordinata ad hoc, vt credamus, & vt credentes, & secundum fidem viuentes, obtineamus salutem; ergo &c.

30. Confirmatur: nam cognitio procedens ex principijs, & causis à diuina prouidentia per se ordinatis ad causandum in nobis effectum non naturalem, sed supernaturalem, est supernaturalis; sed cognitio, qua cognoscimus nostram religionem esse prudenter credibilem, & credendam, causatur à diuinis reuelationibus, & miraculis ex fama nobis notis: reuelationes autem, & miracula à diuina prouidentia ordinata sunt ad hoc, vt per famam, causent in viatoribus cognitionem non
natu-

naturalem, sed supernaturalem de credibilitate nostræ religionis; ergo cognitio, qua cognoscimus euidenter, religionem nostram esse prudenter credibilem, & credendam, est supernaturalis. Et quia ad cognitionem supernaturalem eliciendam, non sufficiunt vires naturæ, sed requiritur internum auxilium gratiæ, & interna illuminatio Spiritus Sancti, ideò talis cognitio procedit ex interno auxilio gratiæ, & ex interna illuminatione Spiritus Sancti, quam propositis motiuis externis, Deus non denegat vlli viatori. In dæmonibus, ac damnatis cognitio, qua cognoscunt religionem nostram esse prudenter credibilem, & credendam, non est supernaturalis, quia non procedit ex auxilio gratiæ, sed solum ex naturali luminè intellectus, ideòque est prorsus inutilis ad salutem.

31. Potest tertio quæri, vtrum actus, quo cognoscimus religionem nostram esse prudenter credibilem, & credendam, procedat ab habitu fidei, vel ab alio habitu supernaturali?

32. Resp. probabilius esse, quod non procedat ab habitu supernaturali fidei, sed ab alio habitu annexo ipsi fidei, & qui sit etiam supernaturalis, vt docet Suarius disp. 4. de Fide, sect. 6. Cardinalis de Lugo disp. 5. sect. 3. alijque apud ipsos, contra Caietanum, & quosdam alios. Ratio est, quia per habitum fidei theologicæ non possumus vlli obiecto assentiri, nisi propter summam veracitatem Dei reuelantis, eo pacto, quo per habitum Charitatis non possu-

possumus quidquam velle, nisi propter summam bonitatem Dei; sed cognitio euidens, qua iudicamus nostram religionem esse prudenter credibilem, & credendam, non habet pro obiecto formali summam veracitatem Dei reuelantis, alioquin cum reuelatio sit obscura, non esset euidens, sed obscura; ergo &c.

33. Obijcitur S. Thomas 2. 2. quæst. 1. art. 4. ad 3. dicens, quod lumen fidei facit videre ea, quæ creduntur, & art. 5. ad. 1. dicens, medio lumine fidei vidèri obiecta nostræ religionis esse credenda.


34. Resp. ea, quæ videntur per lumen, & habitum annexum fidei, dici posse, quod videntur per lumen fidei, eo pacto quo quia Aristoteles 6. Eth. c. 9. ponit tres habitus annexos prudentiæ, actus bene consultandi, qui actus procedunt ab habitu consultatiuo annexo prudentiæ, dicuntur procedere ab ipsa prudentia.

35. Ad 4. nego maiorem. Vt enim supradictum est, & pluribus exemplis confirmatum, & infra ex professo explicabitur, multo plus requiritur ad probandum euidenter aliquid esse verum, quam ad probandum euidenter, aliquid esse prudenter credibile, & credendum; ergo non est mirum, quod argumenta probantia euidenter nostram religionem esse prudenter credibilem, & credendam, non probent euidenter nostram religionem esse veram. Vide quæ de hoc dicuntur quæst. 23. in Resp. ad 11. num. 28. & sequentibus.

TRA-

TRACTATUS TERTIVS

*De certitudine, obscuritate, libertate, & necessitate
Fidei.*

I.  **V**IA Fides est assensus certus, & obscurus rebus à Deo reuelatis, tanquam obiectis materialibus, propter summam Dei reuelantis veracitatem, tanquam propter obiectum formale, postquam egimus de obiecto materiali, & formali, ac de vltima resolutione fidei, sequitur, vt agamus de ipso actu fidei, & præsertim de eius certitudine, obscuritate, libertate, & necessitate.

QVÆSTIO XXII.

Quid, & quotuplex sit certitudo, & euidencia: & utrum possint mutuò, vel non mutuò separari?

I. **V**idetur certitudo non posse dari sine euidencia: primò quia certitudo naturalis non potest esse sine euidencia, ideòque nullus actus naturalis potest esse certus, quin sit etiam euidens; ergo etiam certitudo supernaturalis non potest esse si-

Lib. V.

K

ne

ne euidencia, ac proinde neque actus supernaturalis potest esse certus, quin sit etiam euidens.

2. Secundò effectus non potest esse sine sua causa, à qua necessariò pendet; sed certitudo est effectus necessariò pendens ab euidencia; nam ideo obiectis assentimur certò, quia videmus, hoc est euidenter cognoscimus, quod apparentiæ, quam de illis habemus, non potest subesse falsum; ergo &c.

3. Resp. quod quia non solum actus, sed etiam obiecta dicuntur, vel certa, & euidencia, vel incerta, & obscura, datur certitudo, & euidencia tum obiectiua, tum formalis. Certitudo obiectiua, qua nimirum obiecta dicuntur certa, est infallibilitas motiui exigentis, vt obiecto assentiamur firmissimè, & sine vlla dubitatione, ac formidine oppositi. Certitudo formalis, qua actus dicuntur certi, est firmitudo, qua obiecto assentimur sine vlla dubitatione, & formidine oppositi, propter infallibilitatem motiui. Euidencia obiectiua est apparentia conuincens intellectum, itaut necessitetur, vel saltem independenter ab imperio voluntatis sufficienter trahatur ad assentiendum obiecto, firmissimè, & sine vlla dubitatione, & formidine. Euidencia formalis est, qua intellectus assentitur obiecto sine vlla dubitatione, & formidine, quia clarè apparet apparentia conuincente intellectum.

4. Certum est apud omnes, quod euidencia ita conuincit intellectum, vt non possit

pōssit negare id, quod est evidens, ideòque necessitat quoad specificationem.

5. Quæritur, vtrum euidencia necessitet ità, vt neque per imperium voluntatis possimus suspendere assensum vero euidenti, adeòque necessitet etiam quoad exercitium. Ego quæst. 65. Logicæ cum S. Thoma, Scoto, alijsque communiter, dixi intellectum ab euidencia necessitari etiam quoad exercitium. Sed hic in allata definitione euidentiæ volui abstrahere ab hac quæstione.

6. Tùm euidencia, tùm certitudo diuiditur in Metaphysicam, Physicam, & Moralem. Aliqui dicunt euidenciam metaphysicam esse, cui metaphysicè non potest subesse falsum, itàut implicet contradictionem cum tali euidencia falsum coniungi: euidenciam physicam esse, cui licet metaphysicè possit subesse falsum, physicè non potest subesse, itàut licet non implicet contradictionem cum tali euidencia coniungi falsum, tamen talis coniunctio repugnet naturaliter, & sine miraculo: euidenciam moralem esse, cui licet metaphysicè, & physicè possit subesse falsum, tamen moraliter non potest subesse, itàut licet neque implicet contradictionem, neque naturaliter repugnet, tamen sit moraliter impossibile cum tali euidencia falsum coniungi. Explicatur exemplis. Est evidens metaphysicè omne totum esse maius sua parte: cuiuscunque trianguli tres angulos esse æquales duobus rectis: dari primam causam incausatam &c. quia cum tali eiden-

tia implicat contradictionem coniungi falsum. At est euidens solum physicè, quod cras Sol orietur, quod si quis mittatur in fornacem ardentem, comburetur &c. quia licet cum tali euidencia metaphysicè possit coniungi falsum, siquidem non implicat contradictionem, vt cras Sol non oriatur, & vt aliquis missus in fornacem ardentem, non comburatur, tamen physicè, hoc est, naturaliter, & sine miraculo hæc fieri nequeunt. Demum est euidens solum moraliter, quod si quis centies iaciat talos luforios sine vlla arte, non semper iaciet idem punctum, quia licet etiam sine miraculo posset hoc accidere, tamen est ita difficile, vt moraliter euenire non possit.

7. Contra hanc doctrinam est, quia multa sunt solum moraliter, vel physicè euidencia, & tamen cum tali euidencia implicat contradictionem, vt coniungatur falsum; ergo &c. Probatur antecedens: nam ijs, qui non viderunt Hispaniam, Galliam, Constantinopolim &c. est solum moraliter euidens istas regiones existere, vel aliquando extitisse, & tamen implicat contradictionem, vs cum tali euidencia coniungatur falsitas; ergo &c. similiter mihi solum physicè est euidens, quod nunc existo, & tamen implicat contradictionem, quod cum hac euidencia coniungatur falsum.

8. Dicendum igitur, quod euidencia metaphysica est, quæ fundatur in metaphysica, & necessaria connexionem prædicati cum subiecto, essentia, & naturæ cum passioni-

tionibus, & proprietatibus, & vnius passionis cum alia. E. G. est evidens metaphysicè, quod omne totum est maius sua parte, quia hæc euidencia fundatur in necessaria connexionẽ prædicati cum subiecto: quod omne rationale est admiratiuum, quia hæc euidencia fundatur in necessaria connexionẽ rationalitatis, quæ est essentia, & natura hominis, cum admiratiuitate, quæ est eiusdem proprietas, & passio: quod omne admiratiuum est risibile, quia hæc euidencia fundatur in necessaria connexionẽ admiratiui, quod est passio, & proprietas hominis, cum risibilitate, quæ est altera passio, & proprietas eiusdem.

9. Euidencia physica est, quæ fundatur in cognitione experimentalì, vel in naturali connexionẽ causæ physicæ cum effectu, aut effectus cum causa. E. G. mihi physicè evidens est, quod ego nunc existo, quod hoc gymnasium est illuminatum &c. quia hæc euidencia fundatur in experientia, quæ experior me existere, & hoc gymnasium esse illuminatum. Similiter est evidens physicè, quod si stupa conijciatur in fornacem ardentem, comburetur, quia hæc euidencia fundatur in naturali connexionẽ ignis cum combustionẽ stupæ coniectæ in ignem, quæ combustio est naturalis effectus ignis.

10. Euidencia moralis est, quæ fundatur in rebus extrinsecis, quæ non habent similitudinem naturalem cum obiecto, quod reddunt evidens, puta in testimonijs, in auctoritate sapientum.

11. Euidencia metaphysica solet dari præsertim in scientijs metaphysicis, mathematicis, & logicis, ideòq; potest subdiuidi in logicam, mathematicam, & metaphysicam specificè sumptam. Sæpe enim, vna species generis retinet nomen commune ipsius generis, eo pacto, quo Angeli ultimi chori retinent nomen commune Angeli. Euidencia physica solet dari in scientijs physicis, quæ fundantur in experientia, & in connexione causarum physicarum cum suis effectibus. Euidencia moralis solet dari in scientijs moralibus, politicis, & rhetoricis. Potest autem contingere, vt non minori, sed maiori certitudine assentiamur quibusdam euidentiis solum moraliter, aut physicè, quam multis euidentiis metaphysicè: E. G. non minori certitudine scio me existere, Galliam existere, vel extitisse, quam sciam aliquas propositiones mathematicè euidentes. Proportionaliter certitudo potest diuidi in metaphysicam, physicam, & moralem, quibus potest addi certitudo fidei, quæ potest vocari diuina.

12. His suppositis, quæritur, vtum certitudo, tum formalis, tum obiectiua possit dari sine euidencia, & vtum euidencia possit dari sine certitudine?

13. Dicendum primò: certitudo tum formalis, tum obiectiua supernaturaliter dari potest sine euidencia. Probatur: nam ex dictis certitudo obiectiua est infallibilitas motiui exigentis, vt obiecto assentiamur firmissimè, & sine vlla formidine:

eui.

evidentia obiectiua est apparentia conuincens intellectum &c. sed diuina veritas sufficienter reuelans nostram religionem, eiusque mysteria, est motium infallibile, vt rebus reuelatis assentiamur firmissimè, & sine vlla dubitatione, etiamsi non appareat ita, vt conuincat intellectum; ergo potest dari certitudo obiectiua sine evidentia. Similiter certitudo formalis est firmitas, qua obiecto assentimur sine vlla formidine propter infallibilitatem motiui: evidentia formalis est, qua assentimur obiecto sine vlla dubitatione, & formidine, conuicti ab eius apparentia; sed de facto per fidem rebus reuelatis assentimur firmissimè, & sine formidine, propter infallibilitatem Dei reuelantis, etiamsi non conuincamur ab apparentia talis motiui; ergo certitudo formalis potest dari sine evidentia.

14. Dicendum secundò: evidentia tum formalis, tum obiectiua non potest dari sine certitudine.

15. Probatur: nam eo ipso, quod obiectum habet apparentiam conuincentem, est infallibile, & exigit, vt intellectus illi assentiatur sine vlla dubitatione, atque formidine; sed evidentia obiectiua consistit in apparentia conuincente: certitudo obiectiua consistit in infallibilitate motiui exigentis assensum sine formidine; ergo eo ipso, quod datur evidentia obiectiua, datur etiam certitudo obiectiua, adeoque evidentia obiectiua dari non potest sine certitudine obiectiua. Rursus eo ipso, quod

obiecto assentimur conuicti ab eius apparentia, assentimur certò, & sine formidine propter infallibilitatem motiui : sed euidencia formalis est, qua assentimur obiecto conuicti ab eius apparentia: certitudo formalis est, qua obiecto assentimur sine formidine propter infallibilitatem motiui; ergo eo ipso, quod datur euidencia formalis, datur certitudo formalis, ac proinde euidencia formalis dari non potest sine certitudine formali.

16. Ad 1. concedo antecedens, & nego consequentiam. Disparitas est, quia nullum motium naturale non conuincens intellectum meretur, & exigit, vt obiecto assentiamur certò, & sine formidine; sed euidencia obiectiua consistit in hoc, vt per suam apparentiam conuincat intellectum; certitudo obiectiua consistit in hoc, vt obiectum mereatur, & exigit assensum sine formidine propter infallibilitatem motiui; ergo nullum motium naturale non euidens potest esse certum. E conuerso motium supernaturale Dei vt testantis, & docentis, propter suam summam infallibilitatem, & authoritatem meretur, & exigit, vt cum proponitur sufficienter, etiamsi non conuincat intellectum, assentiamur firmissimè, & sine vlla formidine, captiuantes intellectum in obsequium primæ veritatis, vt obscure loquentis; ergo &c.

17. Ad 2. concedo maiorem, & nego minorem, ac dico, quod licet certitudo naturalis necessario pendeat ab euidencia, tamen certitudo supernaturalis sufficienter potest

potest pendere ab infallibilitate Dei, ut obscure loquentis, & accedente imperio voluntatis captiuantis intellectum in obsequium diuinæ authoritatis, potest mouere intellectum ad assentiendum firmissimè, & sine vlla formidine rebus reuelatis. Hinc sequitur certitudinem abstrahentem à naturali, & supernaturali non necessario pendere ab euidencia.

Q V A E S T I O XXIII.

Utrum ad certitudinem fidei requiratur, ut euidenter innotescat, Deum reuelasse nostram religionem?

1. **V**idetur vera sententia Granado Tractatu 2. de Fide, disp. 4. num. 2. & P. Michaelis de Elizalda lib. de forma inueniendæ veræ religionis, quæst. 19. & 21. docentium ad certitudinem fidei requiri, ut saltem sit moraliter euidens, Deum reuelasse nostram religionem, eiusque mysteria. Primò, quia credenti debet esse certum, & indubitabile Deum reuelasse nostram religionem; sed quod non est saltem moraliter euidens, eo ipso est dubitabile, incertum, & merè probabile: siquidem sola euidencia potest reddere obiectum indubitabile; ergo &c.

2. Secundò omni credenti est euidens, quod si error est, quod credimus, à Deo

decepti sumus : ideòque communiter admittitur illud Riccardi de S. Victore lib. 1. de Trinit. cap. 2. *Domine si error est quod credimus, à te decepti sumus*: sed si non esset euidens Deum reuelasse nostram religionem, non esset euidens, quod si error est quod credimus, decepti fuisset à Deo; ergo &c.

3. Tertiò omni credenti euidens est solam nostram religionem esse prudenter credibilem, omnes alias sectas esse incredibiles; sed euidens pariter est, Deum non posse permittere, vt falsa sit religio, quæ sola est prudenter credibilis, ac reddit omnes alias sectas incredibiles; ergo omni credenti euidens est nostram religionem non esse falsam, ac proinde esse veram, & diuinitus reuelatam.

4. Quartò Sancti Patres in libris, quos pro nostra religione scripserunt, existimauerunt se posse euidenter concludere veritatem nostræ religionis, & conuincere aduersarios, contra quos disputabant; sed si non esset euidens Deum reuelasse nostram religionem, impossibilia tentassent, & ærem verberassent; ergo &c.

5. Quintò Sancti Patres dicunt, Ecclesiam Catholicam fuisse significatam Matth. 5. per Ciuitatem supra montem positam, quæ abscondi nequit; Danielis 2. per montem, qui impleuit vniuersam terram, ac proinde non potest in oculos non incurrere; ideòque Augustinus lib. 2. contra litteras Petiliani, & lib. 13. contra Faustum dicit: *clausis oculis offenditis montem*; sed

hæc

hæc non verificarentur, nisi evidens esset Deum reuelasse nostram religionem; ergo &c. Confirmatur: nam vera Ecclesia est visibilis; sed non esset visibilis, nisi evidens esset, quænam sit vera Ecclesia, & vera religio; ergo &c.

6. Sexto Augustinus lib. de vera religione cap. 2. dicit: *Christianis temporibus, quænam religio sit potissimum tenenda, & quæ ad veritatem, & beatitudinem via sit, non est dubitandum*: Chrysostomus Oratione, quod Christus sit Deus, concludit: *nullus itaque his contradixerit, nisi qui valde insanus, & totus stupidus sit, humanoque sensu priuatus*. Arnobius lib. 2. contra gentes ait. *Incredulũ genus humanum doctrinæ Christi nunquam fuisset consensurum nisi aperta res esset, & luce ipsa, ut dicitur, clarior*: Origenes Homil. 30. in Matth. dicit: *Ecclesia plena est fulgore ab Oriente usque ad Occidentem*: Sapientiæ 6. dicitur, *clara est sapientia, & quæ nunquam marcescit, ac facile videtur ab his, qui quærunt eam*: sed hæc ostendunt evidens esse, quænam sit vera religio reuelata à Deo; ergo &c.

7. Septimò Iudæis videntibus signa, & miracula facta à Moyse fuit evidens, religionem, quam profitebantur, fuisse reuelatam à Deo: videntibus miracula Christi fuit evidens doctrinam Christi esse diuinam; ergo &c.

8. Octauò vera religio debet esse ab omnibus inuenibilis; sed si de qualibet religione possemus dubitare, vtrum sit vera, vel falsa? non esset inuenibilis vera reli-

gib; ergo evidens est, quod vera religio sit à Deo reuelata; ergo datur aliqua religio, de qua non possumus dubitare, vtrum sit à Deo reuelata; sed de solis euidentibus dubitare non possumus; ergo evidens est, quod vera religio sit à Deo reuelata.

9. Nonò Deus posuit miracula, & signa, vt euidenter ostenderet nostram religionem esse veram, & à Deo reuelatam; sed si per hæc non probatur euidenter nostram religionem esse veram, frustratus fuisset suo fine; ergo &c.

10. Decimò homo non potest obligari ad sequendam religionem, de qua non sit evidens, sed solum probabile, vel dubium, quod sit vera; sed omnes obligamur ad sequendam religionem Catholicam; ergo &c.

11. Vndecimo demum communiter conceditur, evidens esse, quod nostra religio est credibilis, aliæ sectæ sunt incredibiles; sed argumenta probantia euidenter credibilitatem nostræ religionis, & incredibilitatem aliarum sectarum, probant etiam euidenter veritatem nostræ religionis, & falsitatem aliarum sectarum; ergo &c.

12. Resp. cum Bellarmino tom. 2. controu. 4. lib. 4. cap. 3. Suario de Fide, disp. 3. sect. 8. num. 5. Cardinali de Lugo de Fide, disp. 2. sect. 1. ac Theologis communiter, ad certitudinem fidei requiri quidem, vt habeatur euidencia de hoc, quod prudenter sit credibile, & credendum Deum reuelasse nostram religionem, sed non requiri,
vt

ut in Fidelibus communiter detur euidentia de hoc, quod Deus reuelauerit nostram religionem. Et quidem Suarius loco citato asserit, hanc conclusionem esse certam ex fide, & experimento cognitam. Eius verba sunt. *Quando fides proponitur mediate, hoc est per Praedicatores, certum de fide est, & experimento cognitum, non esse necessariam euidentiam testimonij diuini, quia constat simplices Fideles, imò omnes sic credentes non habere hanc euidentiam ipsius reuelationis, sed solum credibilitatis eius. Et quamuis Sapientes maiorem aliquam certitudinem habeant, non transcendit fidem humanam, & ad summum peruenire potest ad gradum euidentiae moralis. Probatur conclusio: nam ut dictum est quaest. 19. & ut fatetur Elizalda, euidentia, abstrahendo à physica, metaphysica, & morali, est apparentia conuincens intellectum, ita ut vel necessitetur, vel saltem sine imperio voluntatis sufficienter trahatur ad assentiendum obiecto absque formidine oppositi: sed ut firmissime credamus, non requiritur apparentia modo explicato conuincens intellectum de hoc, quod Deus reuelauerit nostram religionem; ergo &c. Probatur minor: ut enim certo, & sine vlla formidine, & dubitatione credamus Deum reuelasse nostram religionem, indigemus imperio voluntatis, ut patet experientia, & ut docent communiter Theologi, afferentes illud Augustini tract. 26. in Ioan. multa potest facere homo nolens, credere autem non potest, nisi volens: Patres etiam*
com-

communiter docent, fidem in nostra positam esse voluntate, licet voluntas sit à Domino præparanda: sed si solum possemus firmiter credere Deum reuelasse nostram religionem, cum de hoc haberemus euidenciam, ad firmiter credendum non indigeremus imperio voluntatis; ergo &c. Confirmatur primò: nam cum euidencia, etiam solum moralis conuincit, non requiritur, vt captiuetur intellectus: E. G. quia euidencia moralis conuincit existere Constantinopolim, vt ego sine vlla dubitatione credam existere Constantinopolim, non debeo captiuare intellectum, & inferre illi vllam violentiam, immò maximam violentiam inferrem intellectui, si conarer cohibere hunc assensum, & existimo quod frustra conarer: siquidem vero euidenti assentimur necessario, etiamsi nolimus: sed vt credamus Deum reuelasse nostram religionem, eiusque mysteria, debemus captiuare intellectum in obsequium Dei reuelantis, inferentes illi quamdam vim, & multò magis debemus captiuare intellectum, vt id credamus sine vlla dubitatione, & formidine: ergo non habemus euidenciam conuincentem intellectum de hoc, quod Deus reuelauerit nostram religionem.

13. Dices, non ad omnem euidenciam requiri, vt habeat vim conuincendi intellectum, eumque trahendi ad assensum sine formidine independentem ab imperio voluntatis, sed ad euidenciam moralem satis esse, vt sit apparentia sufficiens ad hoc, vt de-

de-

dependenter ab imperio voluntatis, possumus, ac debeamus obiecto assentiri sine formidine.

14. Sed contrâ: 'nam certum est apud omnes ad certitudinem fidei requiri apparentiam sufficientem ad hoc, ut dependenter ab imperio voluntatis possumus, ac debeamus obiecto assentiri sine formidine, quam apparentiam vocamus credibilitatem. Hoc supposito, quærimus, vtrum præter hanc credibilitatem requiratur euidencia de reuelatione, hoc est, vtrum requiratur apparentia habens vim conuincendi intellectum, eumque trahendi ad assensum reuelationis sine formidine independenter ab imperio voluntatis; ergo si Aduersarij concedunt non requiri apparentiam conuincentem, sed sufficere illam, quam communiter vocamus credibilitatem, eamque vocant euidenciam moralem, vel practicam, conueniunt nobiscum in re, & faciunt solam quæstionem de nomine, abutentes nominibus, dum apparentiam non conuincentem vocant euidenciam moralem, vel practicam.

15. Confirmatur secundò conclusio: nam ut ostendetur quæstione 24. si innotesceret euidenter reuelatio, innotescerent euidenter mysteria reuelata; ergo si fides non posset dari sine euidencia de reuelatione, nec posset dari sine euidencia de rebus reuelatis; ergo fides non esset argumentum non apparentium, ut definitur ab Apostolo ad Hæbreos 11. sed esset argumentum apparentium, si quidem non posset

fer

set assentiri vlli obiecto, nisi euidenter apparenti.

16. Confirmatur tertio conclusio: nam in hoc principio, quod non possumus, nec debemus certo credere Deum aliquid reuelasse, nisi de reuelatione habeamus euidentiam conuincentem, fundatur incredulitas sapientum huius Mundi, quorum sapientia, vt dicit Apostolus 1. ad Corinth. 3. *Stultitia est apud Deum*; sed aduersarij ponunt hoc principium; ergo &c. Probat-ur maior: nam Sapientes huius Mundi, cum proponitur illis, Deum reuelasse nostram religionem, adeoque illi firmissimè credendum, postulant, vt hoc probetur euidenter euidentia conuincente intellectum, ac dicunt, se non posse, nec debere firmiter hoc credere, nisi conuincantur probationibus euidentibus: & quia non afferuntur probationes euidentes, & conuincentes, nolunt credere, iuxta illud Thomæ, Ioann. 20. *Nisi videro, non credam*.

17. Addo, quod quia initio Ecclesiæ Sapientes, & Prudentes huius Mundi existimabant non esse credendum Deum reuelasse nostram religionem, nisi reuelatio probaretur euidenter, nolebant credere, ideoque vt dicit Apostolus 1. ad Corinth. 1. non multi sapientes crediderunt. E conuerso simplices, & indocti, cum non niterentur eo principio, firmissimè crediderunt, & non solum verbis, sed etiam sanctissimè viuendo, & fortissimè moriendo pro Christo, testati sunt se firmissimè

simè credidisse quæ non probabantur euidenter . Exemplo simplicium, & indoctorum excitati sapientes, etiam ipsi captiuarunt intellectum in obsequium Dei reuelantis, & experientia deprehenderunt se posse firmissimè, & certissimè credere Deum reuelasse nostram religionem, etiamsi talis reuelatio non probaretur euidenter.

18. Ad 1. distinguo maiorem: omni credenti debet esse indubitabile prudenter, & dependenter ab imperio voluntatis, Deum reuelasse nostram religionem, concedo: debet esse indubitabile etiam imprudenter, & independenter ab imperio voluntatis, nego; distinguo eodem pacto minorem; & nego consequentiam. Credentibus non est prudenter dubitabile nostram religionem fuisse reuelatam à Deo: nam omnis credens videt, quod si de hoc dubitet, imprudenter dubitat, ac peccat. At credentes communiter experiuntur, se posse imprudenter dubitare, vtrum Deus reuelauerit nostram religionem, & quod vt intellectum cohibeant à tali dubio, debent illum non sine difficultate captiuare in obsequium fidei. Sola euidencia potest reddere obiectum nullo modo, etiam imprudenter dubitabile, sed vt obiectum reddatur indubitabile solum prudenter, non requiritur euidencia moralis de obiecto, sed sufficit credibilitas, & euidencia de prudenti credibilitate obiecti. Porro quod propter infallibilitatem motiui ita est indubitabile prudenter, vt sit dubitabile
im-

imprudenter, non est euidens, neque dubium, neque merè probabile, sed est credibile certò, & obscurè. Concedo etiam omni credenti esse certum, quod Deus reuelauerit nostram religionem, siquidem ad hoc, vt sit certum, sufficit, vt propter infallibilitatem motiui debeat firmissimè credi Deum reuelasse nostram religionem; sed nego hoc esse euidens. Vt enim esset euidens, intellectus deberet ita conuinci, vt neque imprudenter dubitare posset, quod Deus reuelauerit nostram religionem.

19. Ad 2. nego maiorem, ac dico, quod omni credenti est certum, sed ineuidens, quod si error est, quod credimus, Deus nos decepit. Ratio est, quia ex dictis certum, & ineuidens est Deum reuelasse quod credimus; sed ex hoc, quod Deus reuelauerit quod credimus, sequitur, quod si error est quod credimus, Deus decepit nos; ergo est certum certitudine fidei, sed ineuidens, quod si error est quod credimus, Deus nos decepit: & dum aduersarij assumunt illam propositionem, Riccardi non solum esse certam, sed euidentem, petunt principium.

20. Ad 3. distingo maiorem: omni credenti euidens est, quod sola nostra religio est prudenter credibilis subiectiuè, concedo: est euidens, quod est prudenter credibilis vniuersaliter, & obiectiuè propter meritum obiecti, nego: distingo eodem pacto minorem; & nego consequentiam. Omni credenti est euidens, quod ipsi sola

sola nostra religio est prudenter credibilis subiectiuè, ita vt, si non credit, peccet; sed non est euidens, vtrum hæc credibilitas fundetur in sua particulari dispositione, quia nimirum natus est, & educatus in his regionibus, instructus à talibus Magistris, imbutus talibus disciplinis &c. an potius sit prudenter credibilis vniuersaliter, & obiectiuè, eò quod motiua, in quibus fundantur, talia sint, vt bene penetrata possint reddere solam nostram religionem credibilem, alias omnes incredibiles. Iam licet sit euidens Deum non posse permittere, vt sola religio falsa sit prudenter credibilis vniuersaliter, & obiectiuè, ita vt habeat motiua, quæ benè penetrata possint reddere illam solam prudenter credibilem, tamen non est euidens, Deum non posse permittere, vt alicui propter dispositionem subiecti, pro aliquo tempore, sola falsa religio sit prudenter credibilis. Imò multi dicunt de facto contingere, vt aliquibus pueris, & simplicibus Hæreticorum, antequam sufficienter instruantur de credibilitate fidei Catholicæ, solæ falsæ eorum sectæ sint prudenter credibiles subiectiuè, & per accidens. Addo, quod licet credentibus non sit euidens, tamen est certum, certitudine fidei, solam nostram religionem esse prudenter credibilem obiectiuè: siquidem omnes Catholici firmissimè, sed obscurè credunt solam religionem Catholicam esse veram, infallibilem, & per se, atque ex obiecto prudenter credibilem, & credendam, alias omnes sectas esse falsas,

&

& per se, & ex obiecto non prudenter credibiles.

21. Ad 4. nego maiorem, ac dico Sanctos Patres existimasse se posse euidenter, & conuincenter concludere prudentem, credibilitatem, & obligationem credendi, non autem veritatem nostræ religionis. Probatur: nam existimarunt Infideles, audita eorum doctrina, si non crederent, peccaturos, & merituros condemnationem, iuxta illud Christi, Marci ultimo, *Euntes docete &c. Qui crederit, & baptizatus fuerit, saluus erit, qui vero non crediderit, condemnabitur*; ergo existimarunt se posse Infideles conuincere de obligatione credendi, ita vt non possent hanc obligationem interius negare, & simul censuerunt Infideles, audita eorum doctrina, posse non credere, ac manere in sua infidelitate; ergo existimarunt, se non posse conuincere Infideles de reuelatione nostræ religionis, ita vt illam negare non possint. Addo cum Bellarmino citata, controuersia 4. lib. 4. cap. 3. posse euidenter probari euidencia consequentiæ, non autem euidencia consequentis, Deum reuelasse nostram religionem. Illud enim euidenter probatur euidencia solius consequentiæ, quod sequitur euidenter ex principijs positis, & admissis, licet talia principia non sint euidencia. Illud euidenter probatur, euidencia etiam consequentis, quod ita euidenter sequitur ex principijs positis, & admissis, vt talia principia sint euidencia: Sed euidenter sequitur

quitur Deum reuelasse nostram religionem, supposito quod reuelauerit Scripturas, quod principium ponitur, & admittitur à Iudæis, & Hæreticis, contra quos Sancti Patres disputabant: sed non est enidens Deum reuelasse Scripturas; ergo Deum reuelasse nostram religionem, adeoque illam esse veram, potuit à Patribus probari euidenter euidentia consequentiæ, non autem euidentia consequentis; & dum Patres insinuant, se euidenter probasse Deum reuelasse nostram religionem, loquuntur de euidentia consequentiæ, non autem de euidentia consequentis.

22. Ad 5. cōcedo maiorem, & nego minorem. Vt verificetur Ecclesiam esse Ciuitatem supra montem positam, esse montem, qui impleuit vniuersam terram, adeoque nos, clausis oculis, incurrere in hunc montem, esse visibilem &c. non est necesse, vt sit euidens doctrinam Ecclesiæ fuisse reuelatam à Deo, sed sufficit, vt sit euidens, quanam sit Ecclesia, cuius religionem debemus sequi, & amplecti; sed nos fatemur esse euidens nos debere amplecti, & credere doctrinam Ecclesiæ Catholicæ, quæ paret Romano Pontifici, & quæ Ecclesia est maximè visibilis; ergo &c.

23. Ad 6. Loca allata Patrum significant solum euidentem esse credibilitatem, non autem veritatem nostræ religionis primò enim Augustinus dicit non esse dubitandum, quanam religio sit tenenda, non

non autem dicit non esse dubitandum, quænam religio sit vera ; ergo etiam si per *ly non est dubitandum*, significaret, quod est evidens, docet solum esse evidentem credibilitatem, & obligationem credendi, non autem veritatem nostræ religionis. Addo, quod *ly non est dubitandum*, significat solam certitudinem, non autem evidentiā. Secundò Chrysostomus concludens : *Nullus his contradixerit, nisi valde insanus, & stupidus, & sensu priuatus sit*, quid aliud significat, quàm veritati nostræ religionis non posse contradici, nisi per summam imprudentiam? sed vero evidenti neque imprudenter potest contradici; ergo supponit veritatem nostræ religionis non probari evidenter. Addo, quod etiam si Chrysostomus per allata verba significasset se probasse evidenter dogmata, quæ probauerat, significauit solum se probasse evidenter evidentiā consequentiæ ex principiis positis, & admissis ab Hæreticis, & Iudæis, contra quos disputabat, non autem evidentiā consequentis. Tertiò Arnobius dicens genus humanum nunquam fuisse consensurum, nisi aperta res esset, & luce ipsa clarior, docet genus humanum liberè consensisse, quia aperta erat, & clara non veritas religionis, sed credibilitas, & obligatio credendi. Quartò Origenes etiam dicens, Ecclesiam plenam esse fulgore ab Oriente vsque in Occidentem, significat evidens esse, quænam sit Ecclesia, cuius religionem debemus sequi, licet non sit evidens veritas religio-

ligionis, quam debemus sequi. Quintò demum dum libro Sapientiæ dicitur claram esse Sapientiam, & facile videri ab his, qui quærunt ipsam, significatur clarum, & euidens esse, quæ sit sapientia, & doctrina, quam debemus sequi, & hoc facile videri, & cognosci ab his, qui quærunt, quam doctrinam, & religionem sequi debeant.

24. Ad 7. respondeo primò negando Iudæis videntibus miracula facta à Moyse, fuisse euidens religionem Iudaicam fuisse reuelatam à Deo, & similiter negando, hoc idem fuisse euidens ijs, qui viderunt miracula Christi, vt patet eo eo, quod multi videntes miracula Moysis, & Christi, non crediderunt doctrinam ipsorum, fuisse reuelatam à Deo. Respondeo secundo, transeat antecedens, & nego consequentiam. Nam quidquid sit, vtrum aliqui videntes miracula habuerint euidenciam, de reuelatione nostræ religionis, de quo disputabimus quæst. 25. solum hic dicimus talem reuelationem non esse necessariam ad credendum certissimè, & finissimè.

25. Ad 8. concedo maiorem, & distinguo minorem: si de qualibet religione possemus prudenter dubitare, vtrum sit vera, vel falsa, non esset inuenibilis vera religio, concedo: si possemus dubitare solum imprudenter, nego: & distinguo eodem pacto consequens. Vt vera religio sit inuenibilis, sufficit, vt sit aliqua religio, de qua non possimus prudenter dubitare, vtrum sit vera, vel falsa, & de qua sit euidens, quod debemus illam firmissimè sequi: sed

sed hoc totum saluatur ; ergo saluatur inuenibilitas veræ religionis . Addo inuentionem veræ religionis non necessario consistere in iudicio , quo euidenter iudicamus illam esse veram , & à Deo reuelatam , sed posse consistere in iudicio , quo euidenter iudicamus illam esse prudenter credibilem , & credendam , & certò , sed ineuidenter credimus illam esse veram , & à Deo reuelatam.

26. Ad 9. distinguo maiorem : Deus posuit miracula , vt ostenderet euidenter nostram religionem esse veram , nego ; vt ostenderet credibiliter , hoc est certò , & ineuidenter , concedo : distinguo eodem pacto minorem ; & nego consequentiam . Deus posuit signa , & miracula , non vt ostenderet euidenter nostram religionem esse veram , sed solum vt ostenderet euidenter , nos debere firmissimè sequi nostram religionem , & vt eius veritatem ostenderet credibiliter , hoc est certò , sed ineuidenter : sed hoc consequitur ; ergo non frustratur suo fine .

27. Ad 10. concedo maiorem , & minorem , & nego consequentiam . Licet enim non possimus obligari ad sequendam religionem , de qua non sit euidentis , sed solum probabile , aut dubium , quod sit vera , tamen possumus obligari ad sequendam religionem , de qua non est euidentis , neque solum probabile , aut dubium , sed certò , & ineuidenter credibile , & credendum , quod illa sit vera ; sed certò , & ineuidenter est credibile , & credendum , quod nostra

nostra religio est vera, & de hac ipsa credibilitate habemus euidentiam; ergo &c.

28. Ad 11. concedo maiorem, & nego minorem. Eadem argumenta, quæ probant euidenter aliquid esse prudenter credibile, & credendum, sæpe non probant euidenter illud esse verum. E. G. mihi euidentis est, quod ego debeo credere homini veraci, & prudenti, & tamen non est euidentis verum esse, quod ille dicit: Filijs paruis euidentis est, quod debent credere Patri, & Matri, & tamen non est euidentis vera esse, quæ dicunt Pater, & Mater; ergo non est mirum, quod argumenta probantia euidenter religionem nostram esse prudenter credibilem, & credendam, non probent euidenter religionem nostram esse veram, & à Deo reuelatam.

29. Dices primò: euidentis est veram esse religionem, in qua impleta sunt ea, quæ multo ante fuerant prædicta; sed euidentis est in religione Christiana impleta fuisse ea, quæ multo ante fuerant prædicta; ergo &c.

30. Respondeo negando minorem. Vaticinia enim veteris testamenti non sunt ita clara, vt non possint imprudenter trahi in alios sensus, prout de facto trahuntur à Iudæis; ergo est quidem prudenter credibile, & credendum, sed non est euidentis, vaticinia impleta fuisse in Christo, & in religione christiana, præsertim cum imprudenter dubitari etiam possit, multa casu impleta fuisse in Christo.

31. Dices secundo: euidentis est religionem,

Lib. V,

L

gionem,

gionem, quæ fuit per miracula propagata, esse veram; sed evidens est, religionem christianam fuisse per miracula propagatam; ergo &c.

32. Respondeo negando minorem. Non est evidens signa, & prodigia, quæ facta sunt in confirmationem religionis christianæ, non potuisse partim fieri, partim fingi à Dæmonibus illudentibus sensus hominum; ergo est quidem evidenter credibile, & credendum, sed non est evidens, religionem christianam fuisse confirmatam per vera miracula, ideòque de facto plurimi ex ethnicis videntes miracula, imprudenter asseruerunt illa fuisse miracula non vera, sed apparentia.

33. Dices tertio: evidens est aliquam religionem mundi esse veram; sed evidens est omnes alias sectas, excepta religione christiana, & catholica, esse falsas; ergo &c.

34. Respondeo, negando minorem. Nam saltem non est evidens falsum esse Philosophismum, hoc est sectam dicentium illud solum credi debere, quod probatur lumine naturali, cætera omnia fuisse conficta, licet hoc prudenter credi non possit.

35. Dices quarto: evidens est Deum non posse obligare ad religionem falsam; sed evidens est nos obligari ad religionem christianam, & catholicam; ergo &c.

36. Respondeo, distingo maiorem: evidens est Deum non posse directè obligare ad religionem falsam, concedo: evidens

dens est Deum non posse permittere, vt per accidens obligetur quis ad religionem falsam, nego. Potest imprudenter dubitari, vtrum Deus possit permittere, vt obligemur ad sequendam religionem falsam, eo pacto, quo potest permittere, & sæpè permittit, vt multi obligentur ad habendos, & honorandos tanquam parentes eos, qui verè non sunt ipsorum parentes.

37. Dices quintò: euidens est Deum non potuisse permittere, vt Dæmon per falsa miracula illuderet toti generi humano, ita vt homines obligarentur ad sequendam religionem christianam, si religio christiana esset falsa.

38. Respondeo, distingo antecedens: euidens est, Deum in pænam alicuius peccati, quod infecerit totum genus humanum, non potuisse permittere, vt Dæmon per falsa miracula illuderet toti generi humano, nego: & non in pænam alicuius peccati, transeat. Non est euidens Deum in pænam alicuius peccati, quod infecerit totum genus humanum, eo pacto, quo nos Christiani credimus peccatum originale infecisse totum genus humanum, non potuisse totum genus humanum tradere potestati Dæmonum, permittendo, vt per falsa miracula posset obligari ad sequendas sectas falsas: ergo potest non quidem prudenter, sed imprudenter de hoc dubitari.

39. Addo primò, hæc non posse, nisi imprudenter responderi. Verum ex hoc

sequitur quidem religionem christianam esse euidenter credibilem, & credendam, sed non sequitur illam esse euidenter veram.

40. Addo secundò argumenta allata, pro religione christiana, & catholica, posse ab aliquo ita penetrari, vt conuincatur de veritate christiana religionis, vt dicetur in questione 25.

41. Pro complemento libet proponere, & soluere sophisma celebre in hac materia, quod assertur etiam à Cardinali de Lugo disp. 5. sect. 2. num. 29. Religio euidenter falsa est euidenter incredibilis; ergo religio euidenter credibilis est euidenter vera; sed religio christiana est euidenter credibilis; ergo est euidenter vera. Probatur prima consequentia, in qua sola est difficultas. Nam est regula summulistica, quod cum ex aliquo antecedenti sequitur aliquod consequens, ex opposito talis consequentis sequitur oppositum illius antecedentis: E. G. quia valet, *est homo*; ergo *est Animal*, valet etiam *non est Animal*; ergo *non est homo*; sed ex hoc antecedenti: *hæc secta est euidenter falsa*, sequitur, ergo *est euidenter incredibilis*: ergo ex opposito consequentis, quod est, *hæc secta est euidenter credibilis*, sequitur, ergo *hæc secta est euidenter vera*, quod est oppositum antecedentis.

42. Respondeo regulam summulisticam esse, quod quia antecedens non potest esse verum, quin consequens sit verum, si consequens non est verum, sed falsum,

sum, etiam antecedens non est verum, sed falsum; & quia antecedens non potest esse falsum, quin eius contradictorium sit verum, si falsum est consequens, verum est contradictorium antecedentis. E converso, quia potest esse falsum antecedens, quin sit verum eius contrarium, siquidem est regula summulistica, quod contraria possunt esse simul falsa, licet non possint esse simul vera, ideò ex eo, quod falsum sit consequens, & verum sit contradictorium, vel etiam contrarium consequentis, non sequitur verum esse contrarium antecedentis. In casu igitur nostro valet: *Religio evidenter falsa est evidenter incredibilis; ergo religio evidenter credibilis non est evidenter falsa*: hoc enim est contradictorium antecedentis: at non valet, *ergo religio evidenter credibilis, est evidenter vera*: nam hoc non est contradictorium, sed contrarium antecedentis, siquidem potest contingere, ut aliqua religio neque sit evidenter vera, neque sit evidenter falsa, sed vtrumque sit inevidens.

QV AESTIO XXIV.

Vtrum si innotesceret evidenter Deum esse veracem, & revelasse mysteria, innotescerent evidenter etiam ipsa mysteria revelata?

1. **V** Idetur vera sententia Caietani
2.2. quaest. 5. art. 1. Vasquez 1.
L 3 parte,

parte, disp. 135. cap. 3. P. Michaelis de Elizalda lib. de forma inueniendæ veræ religionis, quæst. 19. num. 341. & aliorum docentium ex euidentiā in attestante, per quam nimirum innotescat euidenter Deū, qui est veritas infallibilis, reuelasse mysteria, non sequi euidentiā attestatorum, per quam cognoscantur euidenter ipsa mysteria: primò, quia licet imperiti Mathematicæ, & non percipientes demonstrationes Euclidis, habeant euidentiā moralem de hoc, quod omnes Mathematici testantur veras esse demonstrationes Euclidis, & quod eorum testimonium non potest esse falsum, & proindè veræ sunt omnes propositiones Euclidis, tamen non habent euidentiā de ipsis propositionibus Euclidis, cum illas non percipiant, neque intelligant; ergo etiamsi haberemus euidentiam de hoc, quod Deus, qui est veritas infallibilis, reuelauit mysteria, puta, quod Deus est trinus, & vnus, quod Verbum est Incarnatū, quod Christus est in Eucharistia, adeòque quod hæc mysteria sunt verā, tamen quia non percipimus, & intelligimus ipsa mysteria, non haberemus euidentiam de mysterijs reuelatis.

2. Secundò quod non est euidens per modum principij ex terminis, aut per cognitionem intuitiuam, non potest fieri euidens, nisi per demonstrationem; sed mysteria reuelata, puta quod Deus sit trinus, & vnus, non sunt euidentia per modum principij ex terminis, vel per cognitionem

tionem intuitiuam, vt supponitur; ergo non possunt fieri euidencia, nisi per demonstrationem; sed omnis demonstratio, vel est à priori per causam, vel à posteriori per effectum, vt docet Aristoteles 1. Posteriorum, text. 30. quem sequuntur omnes: ergo mysteria non possunt fieri euidencia, nisi per demonstrationem, qua demonstrantur per causam, vel effectum; sed dum probantur per diuinam reuelationem, neque probantur per causam, neque per effectum, sed per medium purè extrinsecum, quod non sufficit ad causandam euidenciam; ergo probatio, qua mysteria probantur per diuinam reuelationem, non sufficit ad causandam euidenciam mysteriorum.

3. Tertiò, & in idem recidit, euidens cognitio rei non potest causari, nisi vel ab ipsa re, vel à causis, aut effectibus habentibus proportionem, aut cognationem cum re, à medijs autem purè extrinsecis, ac non habentibus proportionem, & cognationem cum re, causari non potest; sed diuina reuelatio est medium purè extrinsecum, & non habens proportionem, vel cognationem cum mysterijs reuelatis; ergo diuina reuelatio non potest causare cognitionem euidenciam mysteriorum reuelatorum.

4. Quartò, nullum medium potest reddere euidentes omnes conclusiones faciles, ac difficiles; sed diuina reuelatio, si posset reddere euidencia mysteria reuelata, posset æquè reddere euidentes omnes con-

clusiones tùm faciles, tùm difficiles: E. G. redderet æquè euidens, quod Tobias habuit canem, quod est facillimum creditu, ac quod Deus est trinus, & vnus, quod est creditu difficillimum; ergo diuina reuelatio nullum mysterium potest reddere euidens.

5. Quintò medium, per quod res non potest percipi, atque intelligi, non potest rem reddere euidenter, cum non possimus habere euidenciam de rebus, quas non percipimus, neque intelligimus; sed reuelatio purè extrinseca est medium, per quod myſteria Trinitatis, Incarnationis, Eucharistiæ &c. non possunt percipi, neque intelligi; ergo &c. Probat minor: intelligere enim, vt docet S. Thomas 2.2. quæst. 8. art. 1. in corpore, est *quasi intus legere*; ergo vt rem intelligamus, debemus penetrare prædicata intrinseca rei; sed prædicata intrinseca rei non possumus penetrare, nisi se manifestent, vel per se ipsa, & per speciem propriam, & tùm de ipsis habemus euidenciam immediatam, & intuitiuam, vel per causas, & effectus habentes cognationem, & similitudinem cum ipsa re, & tum de ipsis habemus euidenciam demonstratiuam; ergo prædicata intrinseca rei non possunt manifestari per reuelationem purè extrinsecam, quæ neque est ipsa res, neque est causa, vel effectus rei reuelatæ.

6. Respondeo duas posse fieri quæstiones. Prima quæstio de re est, vtrum euidencia in attestante conuincat intellectum
de

de attestatis, hoc est, vtrum cum intellectus habet euidentiã de hoc, quod Deus, qui est veritas infallibilis, reuelauit aliquod mysterium, itãut conuincatur, & necessitetur ad assentiendum reuelationi, conuincatur etiam, & necessitetur ad assentiendum mysterio reuelato.

7. Respondendum affirmatiuè cum communi sententia omnium penè Authorum, etiam Caietani, & Vasquez 1. parte, disput. 125. cap. 3. Probatur primò ex Caietano: nam vt dicitur Iacobi 2. *Dæmones credunt, & contremiscunt*, adeòque coguntur ad credenda, & confitenda mysteria fidei, puta Deum esse trinum, & vnum, Christum esse Deum, iuxta illud Pauli ad Philipenses 2. *In nomine Iesu omne genuflectatur cœlestium, terrestrium, & infernorum, & omnis lingua confiteatur, quia Dominus Iesus Christus in gloria est Dei Patris*; sed, vt dicit S. Thomas 3. parte quæst. 77. artic. 2. in corpore, *Dæmones credunt conuicti per euidentiã signorum*, quæ facit solum euidentiã in attestante, nimirum de hoc, quod Deus, qui est prima veritas, reuelauerit mysteria; ergo euidentiã in attestante potest conuincere intellectum de attestatis, ac reuelatis, itãut cogatur ad assentiendum illis.

8. Probatur secundò: nam cum intellectus conuincitur de præmissis, & de bonitate illationis, seu consequentiæ, conuincitur etiam de consequenti illato; sed per euidentiã in attestante intellectus conuincitur de istis præmissis, *Deus est veritas*.

infallibilis, ac proinde quidquid dicit est *verum*: Deus dicit se esse trinum, & unum: conuincitur etiam de bonitate illationis, seu consequentiæ, per quam ex talibus præmissis infertur, Deum esse trinum, & unum, Verbum esse incarnatum &c. ergo conuincitur etiam de consequenti, hoc est de hoc, quod Deus est trinus, & vnus, Verbum est incarnatum &c.

9. Secunda quæstio, quæ aliquid habet de nomine, est, vtrum euidencia in attestante non solum conuincat intellectum de attestatis, sed etiam reddat euidencia ipsa attestata?

10. Respondeo affirmatiuè cum Sua-rio disput. 3. de Fide, sect. 8. num. 2. Cardinali de Lugo disput. 2. de Fide, sect. 1. num. 9. alijsque communiter, contra aucthores relatos in primo argumento.

11. Probatur primò: nam sola euidencia habet vim conuincendi, & necessitandi intellectum ad assentiendum obiecto sine vlla dubitatione: sed euidencia in attestante habet vim conuincendi, & necessitandi Dæmones ad assentiendum sine vlla dubitatione Trinitati, Incarnationi, alijsque mysterijs reuelatis; ergo &c.

12. Probatur secundò: nam euidencia ex ipsa nominis Etymologia est, per quam intellectus conuincitur, & necessitatur ad assentiendum obiecto, quia videt obiectum vel in se ipso, vel in alio essentialiter conexo cum tali obiecto: & quidem euidencia, per quam intellectus videt obiectum in se ipso, est euidencia immediata:

cui-

evidentia, per quam intellectus videt obiectum in præmissis, earumque connexionem cum tali obiecto, est evidentia mediata; sed cum intellectus habet evidentiam de istis duabus præmissis, *Deus est veritas infallibilis, ideòque quidquid dicit est verum: Deus dicit se esse trinum, & unum*, & habet evidentiam de connexionem, seu necessitate, per quam illæ duæ præmissæ non possunt esse veræ, quin Deus sit trinus, & unus, convincitur, & necessitatur ad assentiendum, quod Deus est trinus, & unus, quia in illis præmissis ut essentialiter connexis cum conclusione, videt Deum esse trinum, & unum; ergo &c.

13. Probatur tertio: nam eatenus in demonstratione à priori per causam innotescit evidenter effectus, & in demonstratione à posteriori per effectum innotescit evidenter causa, quatenus in connexionem evidenter cognita causæ cum effectu, videtur mediatè effectus; & in connexionem effectus cum causa videtur mediatè causa; sed etiam in connexionem evidenter cognita revelationis, qua Deus revelavit se esse trinum, & unum, videtur mediatè Deum esse trinum, & unum; ergo etiam per diuinam revelationem evidenter cognitam innotescit evidenter mysterium revelatum. Confirmatur: nam cum connectio revelationis cum obiecto revelato non sit minor, quam connectio causæ cum effectu, puta interpositionis terræ cum eclipsi Lunæ, sicut per causam essentialiter connexam potest evidenter innotescere

252 *De euidētia in attestante .*
effectus, sic per reuelationem essentialiter
connexam potest euidenter innotescere
obiectum reuelatum.

14. Probatur quartò : nam diuina re-
uelatio, qua Deus reuelauit se esse trinum,
& vnum, est effectus essentialiter pendens,
tanquam à causa, à Deo, prout sciente se
esse trinum, & vnum; sed, vt Aduersarij
concedunt, per effectum potest euidenter
innotescere causa, à qua talis effectus pen-
det essentialiter; ergo per reuelationem
potest euidenter innotescere scientia, qua
Deus cognoscit se esse trinum, & vnum:
sed per scientiam Dei euidenter cognitam
potest euidenter innotescere obiectum
affirmatum per talem scientiam, cum per-
fectissimè contineat hoc obiectum; ergo à
primo ad vltimum per reuelationem po-
test euidenter innotescere obiectum, vt
magis patebit ex solutione obiectionum.

15. Ad 1. distinguo antecedens: impe-
riti Mathematicæ per testimonium mathe-
maticorum non habent euidētia de pro-
positionibus Euclydis secundum rationes,
secundum quas apparent euidenter vt
connexæ cum testimonio mathemati-
corum, nego: secundum alias rationes,
concedo; & nego consequentiam.
Cum præmissæ sunt euidentes, & appa-
rent euidenter vt connexæ cum aliqua
conclusionē secundum aliquam ratio-
nem formalem, illa conclusio innotē-
scit euidenter secundum illam rationem
formalem, non autem secundum alias:
E. G. si testimonium mathematicorum
appa,

appareat euidenter vt connexum cum hoc , quod omnes propositiones Euclydis in genere , non autem in specie sunt veræ , innotescit euidenter solum , quod omnes propositiones Euclydis in genere , non autem in specie sunt veræ : si testimonium mathematicorum apparet euidenter vt connexum cum hoc , quod est vera hæc propositio in specie , cuiuscumq; trianguli tres anguli sunt æguales duobus rectis , non autem cum alijs propositionibus in specie , innotescit euidenter solum illa propositio in specie , non autem aliæ . Proportionaliter per diuinam reuelationem , quæ euidenter appareat connexa solum cum hoc , quod nostra religio est vera , innotescit euidenter solum , quod nostra religio est vera : per reuelationem , quæ appareat connexa cum hac propositione in specie , *Deus est trinus, & vnus* , innotescit euidenter , quod Deus est trinus , & vnus , sub hac ratione formali , sub alijs rationibus formalibus non innotescit euidenter . Confirmatur : nam quia creaturæ apparent euidenter vt connexæ cum Deo solum quoad vnitatem essentiæ , non autem quoad Trinitatem Personarum , Deus per creaturas innotescit euidenter solum quoad vnitatem essentiæ , nō autem quoad Trinitatem Personarum ; ergo proportionale quid accidit in casu nostro . Addo , quod sicut communiter dicitur , Deum per creaturas innotescere euidenter solum quoad *an est* , non autem quoad *quid est* , quia ad cognitionem quidditatiuam , quæ sola dicitur cognoscere

quid

quid est, requiritur, vt sit per species proprias rei, vel saltem per species alicuius continentis adæquatè talem rem: sic ex proportionali ratione per diuinam reuelationem Trinitas, & alia Myſteria cognoscerentur euidenter solum quoad *an est*, non autem quoad *quid est*.

16. Ad 2. nego vltimum assumptum, ac dico, quod dum myſteria probantur per diuinam reuelationem, probantur per effectum, adeoque per demonstrationem à posteriori, vt dictum num. 14. in quartà probatione conclusionis. Addo primò, quod sicut demonstratio à priori est per causam, & per omnia, quæ quomodolibet sunt priora re, dummodo sint cum illa essentialiter connexa: sic demonstratio à posteriori est per effectus, & per omnia, quæ sunt quomodolibet posteriora, vel etiam comitantia rei, dummodo sint cum illa essentialiter connexa; ergo &c. Addo secundò demonstrationem posse fieri per medium etiam purè extrinsecum: alioquin Deus non posset demonstrari per creaturas, quæ sunt medium purè extrinsecum. Deo.

17. Ad 3. concedo maiorem, & nego minorem, ac dico, quod reuelatio est medium purè extrinsecum, sed habens essentialem connexionem cum myſterijs reuelatis, quæ essentialis connexio est cognatio, & proportio sufficiens ad causandam euidentiã de re, cum qua datur talis connexio. Addo, quod reuelatio habet cum obiecto reuelato etiam cognitionem effectus

Etus cum causa, yt dictum est in responsione ad 1.

18. Ad 4. distinguo maiorem: nullum medium genericè vnum potest reddere euidentes omnes conclusiones faciles, & difficiles, nego: nullum medium specie infima vnum, transeat; distinguo eodem pacto minorem; & nego consequentiam. Sicut multæ sunt species obiectorum reuelabilium conuenientes in genere obiecti reuelabilis, sic multæ sunt species reuelationum conuenientes in genere reuelationis; reuelatio autem cuiuslibet obiecti, si innotescat euidenter, potest causare euidentiam de tali obiecto, non autem de alio: E. G. reuelatio de Trinitate, si innotescat euidenter, causat euidentiam de Trinitate, non autem de Incarnatione: reuelatio de Incarnatione causat euidentiam de Incarnatione, non autem de Trinitate.

19. Ad 5. distinguo maiorem: medium, per quod res non potest percipi, neque intelligi secundum vllam rationem formalem, non potest rem reddere euidentem secundum vllam rationem formalem, concedo: medium, per quod res non potest percipi, neque intelligi secundum aliquas rationes formales, sed potest percipi secundum alias, non potest reddere rem euidentem secundum illas rationes formales, secundum quas potest percipi, & intelligi, nego: distinguo eodem pacto minorem; & nego consequentiam. Per reuelationem, qua reuelatur, Deum esse trinum, & vnum, Deus percipitur, & intelligitur

igitur secundum istam rationem formalem, *Deus est trinus, & unus* ; ergo secundum istam rationem formalem potest euidenter cognosci, licet non secundum alias. Confirmatur argumentum: nam quia Deus per creaturas pure extrinsecas percipitur quoad *an est*, & quoad plures alias rationes formales, innotescit euidenter quoad *an est*, & quoad plures alias rationes formales; ergo idem dicendum in casu nostro. Porro sicut per creaturas pure extrinsecas possumus penetrare, & intus legere, adeoque intelligere illa prædicata intrinseca Dei, cum quibus creaturæ euidenter apparent ut connexæ: sic per reuelationem pure extrinsecam possumus penetrare, & intus legere, ac proinde intelligere illa prædicata intrinseca Dei, cum quibus reuelatio apparet ut connexa.

QVÆSTIO XXV.

Utrum à non vidente Deum possit euidenter cognosci Deum loqui, & de facto ab aliquibus credentibus euidenter cognoscatur?

1. **V**idetur vera sententia Bannez 2. 2. quæst. 1. artic. 3. docentis, quod qui Deum non videt, non potest immediate euidenter cognoscere Deum loqui; pri-

primò quia qui non videt hominem loquentem, non potest euidenter immediatè cognoscere illum loqui; ergo qui non videt Deum loquentem, non potest euidenter immediatè cognoscere Deum loqui.

2. Secundò actus immanentes, ac liberi Dei non possunt immediatè, ac euidenter cognosci, Deo non viso; sed Diuina locutio consistit in aliquò actu immanente libero diuini intellectus, vel diuinæ voluntatis; ergo &c.

3. Tertiò videtur, quod neque per signa possit euidenter mediatè cognosci Deum loqui. De quolibet enim signo potest saltem imprudenter dubitari, vtrum sit positum à Dæmone transfigurante se in Angelum lucis; ergo per illud non potest euidenter cognosci Deum loqui, non autem Dæmonem.

4. Quartò si dicatur, Dæmonem non posse facere miraculum, puta suscitare mortuum, adeoque si fiat miraculum ad probandum aliquid fuisse reuelatum à Deo, euidenter esse, quod illud à Deo fuerit reuelatum: contra est, quia si Deus dedisset alicui potestatem faciendi aliqua miracula, puta illuminandi cæcos, posset ille abuti tali potestate, illuminando cæcos ad persuadendum Deum reuelasse aliquod falsum dogma, puta Christum non esse in Eucharistia; ergo neque ex miraculis euidenter cognoscitur diuina reuelatio: eo pacto, quo licet Christus suscitauerit Lazarum in testimonium suæ Deitatis, non euidenter probauit suam Deitatem,

tem , ideòque Iudæi crediderunt quidem Christum fecisse miraculum suscitandi Lazarum , at non crediderunt Christum esse Deum .

5. Quintò videtur , quod saltem signa credibilitatis , quibus Deus de facto confirmavit se reuelasse nostram religionem , non sufficiant ad probandum euidenter nostram religionem fuisse reuelatam à Deo . Deus enim posuit talia signa ad generandam in nobis fidem , qua non euidenter , sed solum obscurè credamus nostram religionem fuisse reuelatam à Deo ; sed signa posita ad generandam fidem obscuram , non possunt sufficere ad generandam cognitionem euidentem , quæ non potest esse cognitio fidei ; ergo &c.

6. Respondeo , quod cum quæst. 23. ostenderimus euidentiam de diuina reuelatione non esse necessariam ad certitudinem fidei , quærimus , vtrum saltem sit possibilis , & vtrum in aliquo data fuerit , vel detur de facto .

7. Dicendum igitur primò cum omnibus Theologis : Beati de facto immediatè vident , & euidentissimè cognoscunt Deum ipsis loqui , & reuelare ea , quæ reuelat . Ratio est , quia connaturale est , vt Deus , qui exhibet se videndum Beatis facie ad faciem , cum illos alloquitur , exhibeat illis immediatè videndam suam locutionem .

8. Dicendum secundò contra Bannez cum Caietano 2.2. quæst. 5. art. 1. Durando,

do, alijsque communiter, quos refert, & sequitur Suarius, disp. 3. sect. 8. num 2. possibile est, ut etiam qui Deum non videt, euidenter immediatè cognoscat Deū loqui. Probatur: nam ut dictum est quaest. 15. locutio passiva Dei consistit in aliquo actu intellectus nostri, qui essentialiter est locutio, qua Deus nos alloquitur, & reuelat hoc, vel illud, puta Mystrium Trinitatis, Incarnationis &c. sed potest Deus ita intellectum illuminare, ut penetret, vel etiam comprehendat illum actum intellectus, qui est locutio Dei, ac proinde videat illum esse talem locutionem; ergo &c.

9. Dicendum tertio: signa, & motiua credibilitatis, quibus de facto Deus confirmavit se reuelasse nostram religionem, si benè penetrentur, prout de facto penetrantur à Dæmonibus, & animabus separatis, sufficiunt ad probandum euidenter, & ad conuincendum intellectum de hoc, quod Deus reuelauerit nostram religionem, & quòd proinde sit vera. Probatur: ut enim dicitur Iacobi 2. *Dæmones credunt, & contremiscunt*; sed non crederent, nisi mouerentur à diuino testimonio, & ex alià parte non credunt liberè, captiuantes intellectum in obsequium Dei reuelantis; ergo credunt coacti euidentia signorum, quæ Deus exhibuit ad ostendendum se reuelasse nostram religionem. Rursus ad Philippenes 2. dicitur: *propter quod & Deus exaltauit illum, & donauit illi nomen, quod est super omne nomen, ut in nomine*

mine Iesu omne genuflectatur cælestium, terrestrium, & infernorum, & omnis lingua confiteatur, quia Dominus Iesus Christus in gloria est Dei patris; ergo etiam dæmones, & damnati in infernō genuflectuntur Christo, eumque adorant vt Deum, & credunt, ac confitentur illum esse in gloria Dei patris; sed non credunt liberè, sed coacti per euidētiā signorum; ergo signa à Deo exhibita pro diuinitate Christi, & pro alijs mysterijs religionis nostræ habent vim conuincendi, & necessitandi intellectum dæmonum, ac damnatorum ad credenda mysteria fidei. Docet autem hoc expressè S. Thomas 2.2. quæst. 5. artic. 2. vbi in corpore loquens de dæmonibus dicit. *Vident enim multa manifesta indicia, ex quibus percipiunt doctrinam Ecclesiæ esse veram, quamuis ipsi res ipsas, quas Ecclesiā docet, non viderint, puta Deum esse trinum, & vnum, vel aliquid huiusmodi;* & in responsione ad 3. dicit, quod *dæmonum fides est quodammodo coacta ex signorum euidētia*: & cum obiecisset, quod infidelitas est maximum peccatorum, adeòque quod si dæmones non essent infideles, homines infideles haberent peccatum maius, quam dæmones: Respondet, quod hoc ipsum dæmonibus displicet, quod signa fidei sint adeò euidētia, vt per ea credere compellantur, & ideò in nullo malitia eorum minuitur. Idem docet Suarius disput. 3. sect. 8. num. 3. qui addit animas Purgatorij habere fidem de mysterijs reuelatis, cum illa non videant, &

tamen

tamen euidentiam habere de diuina reuelatione propter signa, quæ experiuntur.

10. Dicendum quartò : etiam aliquibus hominibus viatoribus mysteria fidei proposita fuerunt per signa conuincencia de diuino testimonio, adeòque de veritate mysteriorum reuelatorum.

11. Probatur : nam euident est, quod Deus sincerè, & ex affectu veritatis inuocatus ad aliquid testificandum per prodigia, & signa, non potest facere illa prodigia, signa, & portenta, neque potest permittere, vt fiant, si id, ad quod testificandum inuocatur, sit falsum : aliòqui Deus testificaretur falsum; sed aliquibus hominibus viatoribus, puta Moyfi, Apostolis, & alijs viris sanctis, fuit euident, quod Deus ab ipsis sincerè, & ex veritatis affectu inuocatus ad facienda prodigia, & portenta in testimonium, quod religio Iudaica, & Christiana fuisset à Deo reuelata, faciebat prodigia, & portenta; ergo conuincebantur de hoc, quod religio, quam prædicabant, esset à Deo reuelata.

12. Addo, quod aliquando signa exhibita in testimonium mysteriorum, non solum conuincebant eos, qui per inuocationem Dei faciebant talia signa, sed etiam conuincebant alios. Docet hoc expressè S. Thomas 2.2. quæst. 5. art. dicens. *Si aliquis Propheta in sermone Domini prænunderet aliquid futurum, & adhiberet signum, mortuum suscitando, conuinceretur intellectus videntis, vt cognosceret manifestè hoc dici à Deo.* Probatur autem, & explicatur exem-

exemplis. Beata Virgo per reuelationem Angeli non fuit conuicta de mysterio Incarnationis, vt patet ex eo, quia per similem reuelationem eiusdem Angeli de re multò faciliori, Zacharias non solum non fuit conuictus, sed de facto non credidit. At postquam Beata Virgo in signum Incarnationis, per quam Verbum factum est caro, experta est, quod ipsa remanens Virgo, concepit, & peperit, ab hoc signo fuit conuicta de veritate omnium, quæ illi prædixerat Angelus, adeoque etiam de Incarnatione Verbi, cum sit euidens, quod Virgo non potest concipere, & parere in signum falsi. Similiter Apostoli, cum in signum, quod Deus reuelasset religionem Christianam, impleti sunt Spiritu Sancto, & mutati in viros alteros, acceperunt sapientiam infusam, donum linguarum, & virtutem faciendi miracula in nomine Christi, conuicti sunt de veritate omnium, quæ docuerat Christus, præsertim cum illis apertus sit intellectus ad intelligendas Scripturas, ita vt clarè intellexerint illa omnia, quæ in ipsis Apostolis implebantur, fuisse prædicta, & præfigurata in sacris literis multo antè, quam fierent. Euidens nimirum est, quod non potest aliquis impleri Spiritu Sancto, accipere sapientiam infusam, donum linguarum, & potentiam faciendi miracula in confirmationem falsi. Suarius disput. 3. sect. 8. num. 3. affert exemplum Lazari, qui cum sciret se suscitatum à mortuis in testimonium diuinitatis Christi, conuincebatur de

Christi unitate Christi.

Di-

13. Dicendum quintò : probabile est aliquos viatores aliquando ita illuminari ad penetranda signa communia religionis Christianæ, vt per ea conuincantur, & euidenter cognoscant Deum esse Authorem religionis Christianæ, adeòque illam esse veram.

14. Probatur: nam ex dictis conclusione 3. signa religionis christianæ si bene penetrentur, habent vim conuincendi intellectum, in eoque generandi euidentiam de hoc, quod Deus reuelauerit religionem christianam; sed frustra est potentia, quæ nunquam reducitur ad actum; ergo virtus conuincendi intellectum aliquando reducitur ad actum, adeòque aliqui viatores conuincuntur, & euidenter per signa fidei cognoscunt Deum reuelasse religionem christianam. Neque dicas sufficere, vt signa fidei christianæ conuincant Dæmones, & Animas separatas, iuxta dicta conclusione 3. Nam signa religionis christianæ primò, & per se exhibentur pro viatoribus; ergo Deus debet facere, vt conuincant, & generent euidentiam in aliquibus viatoribus.

15. Confirmatur: nam spectat ad diuinam providentiam ita proportionare actiua passiuis, vt actiua non semper causent actus imperfectos, sed aliquando causent actus perfectos, vt patet inductione in naturalibus: E. G. visibilia, & audibilia non semper causant visiones, & auditiones imperfectas, & obscuras, sed aliquando causant perfectas, & claras; sed si Deus nunquam illuminaret intellectum viatoris,

vt

vt perfectè penetraret signa fidei, & convinceretur de Diuina reuelatione, signa fidei nunquam causarent actum perfectum; ergo Deus debet ita illuminare aliquos viatores, vt perfectè penetrent signa fidei, ità vt ab illis conuicti, euidenter cognoscant Deum reuelasse religionem christianam. Ad hanc autem perfectam penetrationem signorum, per quam conuincantur viri sancti, quibus confertur hoc donum gratis datum, non solent peruenire, nisi per exercitium actuum fidei, quibus firmissimè credant, antequam conuincantur, iuxta illud Isaiaë 7. secundum versionem 70. interpretum, *si non credideritis, neque intelligetis*. Hoc autem lumen, per quod aliqui perfectè penetrant vim signorum, videtur spectare ad gratiam sermonis, sapientiæ, vel scientiæ, quæ inter cæteras gratias gratis datas enumerantur ab Apostolo.

16. Dicendum sextò: probabile est primis Doctoribus fidei, Patriarchis nimirum, Prophetis, Apostolis &c. doctrinam nostræ religionis reuelatam fuisse reuelatione immediatè euidenti. Probaturnam primi Doctores fidei electi sunt à Deo, vt essent primi testes reuelationis diuinæ, sed primi testes debent esse de visu; ergo primi Doctores fidei debuerunt posse testari, se vidisse, hoc est euidenter per lumen propheticum cognouisse reuelationem diuinam; ergo debuerunt habere cognitionem immediatam euidentem de diuina reuelatione. Hanc rationem insinuat

nuat Augustinus lib. 11. de Ciuitate Dei cap. 3. dicens . *Sicut de visibilibus, quæ non vidimus, eis credimus, qui viderunt, atque ita de cæteris, quæ ad suum quemquem sensum corporis pertinent: ita de his, quæ animo, & mente sentiuntur (quia & ipse rectissime dicitur sensus, unde & sententiam vocabulum accepit,) hoc est de inuisibilibus, quæ a nostro sensu exteriori remota sunt, ijs nos oportet credere, qui hæc in illo incorporeo lumine disposita didicerunt.*

17. Probatur secundò authoritate. Primò enim in scriptura Prophetæ appellantur videntes; ergo signum est, quod per lumen propheticum videbant, hoc est euidenter cognoscebant Deum illis loqui, & reuelare mysteria. Rursus 2. Regum 23: Dauid de se ipso dicit: *mibi locutus est fortis Israel, dominator hominum, sicut lux auroræ, oriente Sole, manè absque nubibus rutilat; ergo Dauid significat, Deum locutum fuisse sibi locutione clara, ideòque illam comparat luci auroræ, oriente Sole, & quæ manè nullis nubibus, aut vaporibus obscuratur. Ideò hanc sententiam docuit Caietanus 2.2. quæst. 171. artic. 5. & quæst. 174. art. 3. illique fauet S. Thomas duobus articulis citatis, & quæst. 12. de veritate artic. 3. & 3. contra Gentes cap. 154. vbi prophetica cognitionem comparat euidenti cognitioni principiorum. Fauet etiam Scotus in 3. distinct. 24. quæst. unica, vbi dicit ex efficacia Dei reuelantis prophetam habuisse necessarium assensum, quod Deus esset, qui sibi loqueretur; sed*

solus assensus euidens est necessarius ; ergo &c. Scotum sequitur Gabriel eadem dist. concl. 7. In eandem sententiam inclinant Riccardus in 3. distinct. 23. art. 8. quæst. 1. Ferrariensis 3. contra Gentes, cap. 40. Vega lib. 9. in Tridentinum cap. 20. Videri potest Suarius disputat. 3. sect. 8. num. 10. & seqq.

18. Addo probabile mihi esse primis Doctoribus nostræ religionis mysteria fidei ab initio proposita fuisse reuelatione obscura , vt haberent meritum captiuandi intellectum in obsequium Dei obscure loquentis ; deinde verò , vt possent esse testes de visu diuinæ reuelationis , eadem mysteria proposita fuisse reuelatione euidenti .

19. Ad 1. nego antecedens . Aliquando , licet non videamus hominem loquentem , audita voce ipsius , euidenter cognoscimus illum loqui ; ergo potest etiam homo licet non videat Deum , tamen per lumen propheticum ita penetrare diuinam reuelationem , vt euidenter cognoscat illam esse reuelationem Dei , vt explicatum est conclusione 2.

20. Ad 2. concedo maiorem , & distinguo minorem : locutio actiua consistit in aliquo actu immanente diuini intellectus , vel voluntatis , transeat : locutio passiua , nego . Ex dictis quæst. 13. locutio passiuæ Dei consistit in aliquo actu intellectus nostri ; ergo licet homo Deum non videat , potest diuinitus illuminatus per lumen propheticum ita penetrare talem actum
sui

fui intellectus, vt euidenter cognoscat, illum esse diuinam locutionem.

21. Ad 3. nego antecedens. Potest enim aliquis, vel per naturalem perspicaciam sui intellectus, vel per lumen infusum ita penetrare signa, per quæ Deus confirmat suam reuelationem, vt neque imprudenter possit dubitare, illa posita fuisse à Deo ad confirmandam reuelationem; ergo potest per signa cognoscere euidenter diuinam reuelationem. Et quidem daemones, quia per naturalem perspicaciam sui intellectus ita penetrant signa nostræ fidei, vt euidenter cognoscant illa non potuisse poni nisi à Deo, fide quadam coacta credunt Deum reuelasse nostram religionem: aliqui autem viatores, vt probatum est conclusione 4., per lumen infusum, & supernaturale hoc idem penetrantes cognoscunt euidenter Deum reuelasse nostram religionem.

22. Ad 4. Certum est Deum non posse facere miracula in testificationem rei falsæ, alioquin testificaretur falsum. Quaritur, vtrum si Deus dedisset alicui potestatem generalem faciendi miracula, & ille vellet abuti tali potestate in testificationem falsi dogmatis, Deus posset cum illo concurrere ad miraculum factum in confirmationem falsi dogmatis. Affirmat Hurtadus disputat. 27. de fide, sect. 4. §. 9. & sequentibus, idemque videtur docuisse Durandus quaest. 1. Prologi num. 47. Bannez in præfenti, quaest. 5. artic. 1. & Michael de Medina lib. 5. de recta in Deum fide, cap. 7.

Probabilius negant Suarius tom. 2. in 3. partem. Disp. 31. sect. 2. post 3. conclusionem, Granado disp. 8. de fide num. 10. & sequentibus, ac docent Deum non posse concurrere ad miraculum factum in confirmationem falsi, saltem in circumstantijs, in quibus non posset aliundè constare miraculum, prout procedit à Deo, non fieri in confirmationem illius dogmatis, sed ad alium finem. Ratio est, quia miraculum factum in confirmationem alicuius dogmatis in circumstantijs, in quibus non potest aliundè constare tale miraculum, prout procedit à Deo, non fieri in confirmationem illius dogmatis, sed ad alium finem, naturaliter significat Deum confirmare illud dogma: sed Deus non potest ponere signum naturaliter significans Deum confirmare falsum; ergo &c. Hinc sequitur Deum posse quidem dare alicui potestatem generalem faciendi miracula, sed non posse dare potestatem etiam abutendi potestate faciendi miracula in confirmationem falsi. Addo, quod dato, sed non concesso, quod vnum, vel alterum miraculum posset ab homine fieri in confirmationem falsi, tamen complexum omnium signorum, quibus confirmatur religio christiana, est essentialiter connexum cum hoc, quod Deus reuelauerit christianam religionem; ergo potest intellectus creatus, vel naturali perspicacia, vel lumine infuso ita penetrare hoc complexum, vt conuincatur Deum reuelasse religionem christianam.

23. Ad 5. distinguo maiorem: Deus ponit signa nostræ religionis solum ad generandam fidem obscuram de diuina reuelatione, nego: ponit signa ad generandam fidem obscuram in ijs, qui non penetrant talia signa, & ad generandam etiam cognitionem euidentem in aliquibus penetrantibus talia signa, concedo: distinguo eodem pacto minorem; & nego consequentiam. Deus ponit signa nostræ religionis non solum ad generandam fidem obscuram in Fidelibus communiter, sed etiam ad generandam in aliquibus perfectè penetrantibus talia signa, cognitionem euidentem de diuina reuelatione; ergo non est mirum, quod si bene penetrentur, sufficiant ad generandam cognitionem euidentem de diuina reuelatione.

QVÆSTIO XXVI.

Vtrum de ratione fidei infusæ sit, ut ineuidenter cognoscat diuinam reuelationem?

1. **V**Idetur de ratione fidei infusæ esse, ut obscure, & ineuidenter cognoscat diuinam reuelationem: primò, quia cum fides ab Apostolo ad Hæbreos II. definiatur, *sperandarum substantia rerum, argumentum non apparentium*, de ratione fidei est, ut sit argumentum, seu firma adhæsiō rebus non apparentibus; sed si

fides cognosceret euidenter diuinam reuelationem, diuina reuelatio appareret, & etiam myſteria reuelata propter connexionem cum reuelatione apparerent euidenter; ergo &c.

2. Secundò de ratione fidei infusæ eſt, vt ſit aſſenſus liber, & meritorius; ſed ſi cognosceret euidenter reuelationem, non liberè, ac proinde nec meritoriè aſſentiretur reuelationi, neque obiectis reuelatis, quæ euidenter apparerent vt connexa cum diuina reuelatione: euidencia enim neceſſitat ad aſſenſum; ergo &c.

3. Reſpondeo plures diſtingui poſſe quæſtiones. Prima quæſtio eſt, vtrum de ratione fidei vniuerſaliſſimè ſumptæ ſit, vt cognoscat reuelationem obſcurè, & ineuidenter?

4. Dicendum, fidem, qua credimus Deo, ex ſua vniuerſaliſſima ratione abſtrahere ab hoc, quod habeat, vel non habeat euidenciam de diuino teſtimonio, & etiam ab hoc, quod ſit libera, vel neceſſaria. Probatur: nam fides ex ſua vniuerſaliſſimà ratione eſt habitus credendi quæ Deus dicit ex ſolo motiuo diuinæ veritatis illa teſtificantis; ſed ſiue credamus quæ Deus dicit propter diuinum teſtimonium euidenter cognitum, ſiue propter diuinum teſtimonium cognitum ſolum obſcurè, & ineuidenter, ſiue aſſentiamur liberè, ſiue neceſſariò, credimus quæ Deus dicit ex ſolo motiuo diuinæ authoritatis illa teſtificantis; ergo &c.

5. Confirmatur: nam quia Charitas ex
ſua

sua ratione vniuersalissima nihil aliud est, quam habitus diligendi Deum ex solo motiuo diuinæ bonitatis; possumus autem ex solo motiuo diuinæ bonitatis Deum diligere, vel amore necessario, vt diligunt Beati, vel amore libero, vt diligunt viatores; Charitas abstrahit ab hoc, vt diligit Deum amore necessario, vel libero; ergo quia fides ex sua ratione vniuersalissima est habitus credendi quæ Deus dicit ex solo motiuo diuinæ authoritatis; possumus autem ex hoc motiuo credere necessario, vel liberè; fides ex sua ratione vniuersalissima abstrahit ab hoc, quod credat assensu necessario, vel libero.

6. Secunda quæstio est, vtrum de ratione fidei liberæ, & meritoria sit cognoscere reuelationē obscure, & ineuidenter?

7. Dicendum, fidem vt meritoriam, & liberam abstrahere ab hoc, vt diuinam reuelationem cognoscat euidenter, vel ineuidenter. Probatur: nam licet intellectus, cum habet euidentiam de diuina reuelatione, necessitetur ad credendum, tamen non necessitatur ad credendum super omnia, sed potest credere aliqua fide inferiori, qualis est, qua credunt dæmones, & damnati; ergo assensus, quo credit super omnia propter reuelationem euidenter cognitā, potest esse liber, & meritorius. Explicabitur. Fideles cōmuniter, licet nō habeāt euidentiam de diuina reuelatione, & non conuincantur de mysterijs reuelatis, tamen non solum liberè credunt, sed etiam credunt super omnia, & credunt maiori

adhæſione, quàm credant multa alia, de quibus habent euidētiā, & conuincuntur; ergo posſumus ex imperio voluntatis aſſentiri obiecto per aſſenſum, ad quem non conuincimur, & qui ſit etiam firmior alijs aſſenſibus, per quos aſſentimur obiectis, à quibus conuincimur; ergo intellectus etiamſi conuincatur, poteſt ex imperio voluntatis aſſentiri obiecto aſſenſu firmiori, quàm ſit is, ad quem ſecundum ſe præciſè conuincitur à motiuo; ergo etiamſi euidenter cognoſcatur diuina reuelatio, tamen aſſenſus fidei poteſt eſſe meritorius, & liber, ſaltem quoad modum aſſentiendi ſuper omnia. Negari tamen non poteſt, quod actus fidei, qui cognoſcit reuelationem obſcurè, & ineuidenter, habeat aliquam ſpecialem libertatem, adeòque aliquod ſpeciale meritum. Patet. Nam cum reuelatio eſt ineuidens, non ſolum posſumus non credere ſuper omnia, ſed etiā posſumus ſimpliciter non credere, & fortalſe posſumus etiā negare reuelationem, & rem reuelatam, vt dicitur qu. 30. ſed poſſe ſimpliciter non credere, imò negare reuelationem, & rem reuelatam eſt aliqua ſpecialis libertas; ergo &c. Rurſus in credendo ſuper omnia obiecto obſcuro, captiuando intellectum in obſequium Dei reuelantis, datur meritum ſpeciale; ſed cum reuelatio eſt obſcura, posſumus habere hoc meritum; ergo &c.

8. Tertia quæſtio eſt, vtrum ad fidem, quæ eſt principium merendi vitam æternam, requiratur, vt cognoſcat diuinam reue-

revelationem obscurè, & ineuidenter?

9. Dicendum fidem, quæ est principium meriti, abstrahere ab hoc, quod diuinam revelationem cognoscat euidenter, vel ineuidenter, per actum necessarium, vel liberum.

10. Probatur: nam cognitio, quæ in Christo fuit principium totius meriti, erat euidentissima, & non libera, sed necessaria, cum vel esset visio beatifica, vel scientia infusa; ergo cognitio, quæ credimus mysteria propter authoritatem Dei reuelantis, etiamsi euidenter cognosceret diuinam, revelationem, & esset omninò necessaria, ac non libera, posset esse supernaturalis, & ex auxilijs gratiæ, & habere alias conditiones requisitas ad hoc, vt esset principium meriti. Hinc sequitur fidem, quæ, vt dictum est quaest. 22. concl. 6. Prophetæ credebant mysteria propter reuelationem, immediatè visam, & euidenter cognitam, cum esset supernaturalis, & elicitæ ex lumine supernaturali Prophetiæ, potuisse esse principium proximum exercendi actus meritorios vitæ æternæ. Ex opposita ratione fides coacta, quæ daemones credunt, & contremiscunt, non potest esse principium vllius meriti, quia est purè naturalis, & non ex auxilio gratiæ supernaturalis.

11. Quarta quaestio est, vtum de ratione fidei infusæ, ac Theologicæ sit, vt diuinam revelationem cognoscat obscurè, & ineuidenter?

12. Dicendum, fidem infusam, & Theologi-

logicam ex sua ratione vniuersalissima abstrahere ab hoc, quod diuinam reuelationem cognoscat euidenter, vel ineuidenter. Probatur: nam fides infusa, & theologica ex sua ratione vniuersalissima est habitus credendi quæ Deus dicit propter authoritatem Dei reuelantis, sistendo in ipsa; sed siue euidenter, siue ineuidenter cognosceretur reuelatio, saluaretur, quod crederemus quæ Deus dicit propter authoritatem Dei reuelantis, sistendo in ipsa; ergo &c.

13. Quinta quæstio est, vtrum de ratione fidei habitualis per se infusæ, quam habemus de facto, sit, vt diuinam reuelationem cognoscat obscure, & ineuidenter?

14. Respondeo affirmatiuè cum communi sententia, quam sequuntur. Suarius disput. 3. sect. 8. num. 18. & Cardinalis de Lugo disput. 2. sect. 1. num. 7:

15. Probatur primò: nam quæ ponuntur in definitione fidei, quam habemus de facto, sunt eius prædicata essentialia; sed in definitione fidei tradita ab Apostolo ad Hebr. 11. ponitur, quod sit argumentum non apparentium; ergo est prædicatum essentialiale fidei, quam habemus de facto, vt sit argumentum siue firma adhæsiō rebus non apparentibus, hoc est non euidenter cognitis saltem per ipsam fidem: sed si posset euidenter cognoscere diuinam reuelationem, posset assentiri rebus apparentibus, hoc est euidenter cognitis per ipsam fidem; ergo fides nostra non potest euidenter

denter cognoscere diuinam reuelationem. Confirmatur: nam de ratione fidei nostræ est, vt per illam videamus per speculum, & in ænigmate, vt dicitur 1. ad Corinth. 13. sed videre in ænigmate est habere cognitionem obscuram, & ineuidetem; ergo &c. Rursus de ratione fidei nostræ est, vt assentiamur propter reuelationem, quæ, vt dicitur 1. Petri, sit veluti lucerna lucens in caliginoso loco; sed hoc significat reuelationem obscuram; ergo de ratione fidei nostræ est, vt credat propter reuelationem obscuram.

16. Probatur secundò: nam de ratione fidei nostræ est, vt credat per actum voluntarium, & liberum, & quo captiuetur intellectus in obsequium Dei loquentis: ideòq; Bernardus lib. 5. de consideratione cap. 6. fidem nostram definiens, dicit, *Fides nostra est voluntaria quadam, & certa prelibatio nondum prepalata veritatis*: & Augustinus tract. 16. in Ioann. dicit: *Multa homo potest facere non volens, credere autem non potest nisi volens*: sed si fides nostra posset credere propter reuelationem euidenter cognitam, posset credere assensu necessario, & non captiuante intellectum: neque enim captiuamus intellectum, cum credimus per actum euidentem; ergo &c.

17. Sexta quaestio est, vtrum sit possibilis habitus fidei per se infusæ idem numero indifferens ad credendum, vel per actum necessarium propter reuelationem Dei euidentem, vel per actum liberum.

propter reuelationem obscuram, & ineuidentem?

18. Respondeò affirmatiuè. Probatur primò: nam de facto Charitas per se infusa est indifferens ad amandum Deum amore necessario, vel libero, ideòque eadem numero charitas in via amat Deum amore libero, in patria Deum amat amore necessario; ergo idem numero habitus infusus fidei posset esse indifferens ad credendum Deo, vel actu necessario propter reuelationem euidentem, vel actu libero propter reuelationem obscuram.

19. Probatur secundò à priori. Nam habitus per se infusi habent rationem potentia, vt dictum est lib. 5. quæstione 20. de Gratia: sed eadem numero potentia potest esse indifferens ad eliciendos actus claros, vel obscuros, necesarios, vel liberos; ergo idem numero habitus per se infusus fidei posset esse indifferens ad credendum per actum euidentem, vel obscurum, necessarium, vel liberum.

20. Dices primò: quare ergo Deus de facto infundit nobis habitum charitatis eundem numero indifferentem ad amandum Deum amore necessario, vel libero, & non infundit habitum fidei proportionaliter indifferentem?

21. Respondeo rationem esse, quia habitus charitatis debuit idem numero manere in Patria, iuxta illud Apostoli 1. ad Cor. 13. *Charitas nunquam excidit*: habitus fidei non debuit manere in Patria, iuxta illud eiusdem Apostoli eodem cap. 13.

cum venerit quod perfectum est, euacuabitur quod ex parte est: videmus nunc per speculum, & in enigmate, tunc autem facie ad faciem: sed vt habitus charitatis maneat in patria, debuit idem numero esse indifferens ad amandum Deū amore necessario, prout amatur in patria, vel amore libero, vt amatur in via: vt habitus fidei non maneret in patria, debuit esse determinatus ad credendum obscurè, & liberè; ergo &c. Ratio, quare charitas debet manere in Patria, non autem Fides, est, quia sicut charitas ordinatur ad amandum Deum, non solum tanquam obiectum formale, sed etiam tanquam obiectum materiale primum, sic fides ordinatur ad credendum Deum tanquam obiectum materiale primum: sed Deum possumus amare, non solum cum illum non videmus, sed multò magis cum videmus facie ad faciem, Deum autem, & diuina non possumus credere, cum illa videmus, vt dicitur quaestione 28. ergo &c.

22. Dices secundò: habitus debent differre ex obiecto formali; sed habitus credens Deo propter reuelationem euidentem, vel obscuram, non differrent ex obiecto formali; siquidem eadem numero reuelatio potest cognosci euidenter, ac denominari euidentem, vel obscurè, ac denominari obscura; ergo &c.

23. Respondeo, distinguo maiorem: habitus debent differre ex obiecto formali, vel ex ratione, sub qua proponitur, concedo: & non sufficit, vt differant ex ratione,

ne, sub qua proponitur obiectum formale ;
 nego; distinguo eodem pacto minorem ;
 & nego consequentiam . Habitus, & actus
 possunt specie differre ex ipsa ratione, sub
 qua proponitur obiectum formale , co pa-
 cto, quo desiderium, & gaudium differunt
 per hoc, quod desiderium habet pro obie-
 cto formali bonum cognitum , vt absens ;
 gaudium habet pro obiecto formali bonum
 cognitum , vt præsens ; ergo habitus , &
 actus fidei possunt differre per hoc , quod
 moueantur à reuelatione cognita euiden-
 ter, vel ineuidenter .

24. Confirmatur solutio : nam actus
 credens propter reuelationem cognitam
 euidenter, procul dubio differret specie
 ab actu credente propter eandem reuela-
 tionem cognitam obscure ; ergo etiam ha-
 bitus credendi propter reuelationem co-
 gnitam euidenter, potest specie differre
 ab habitu credente propter reuelationem
 cognitam obscure . Addo ipsam euiden-
 tiam , vel obscuritatem esse complemen-
 tum reuelationis; ergo reuelatio euidens,
 & obscura vltimo completæ differunt spe-
 cie ; ergo habitus credens propter reuela-
 tionem euidenter habet obiectum forma-
 le specie differens ab habitu credente pro-
 pter reuelationem obscuram .

25. Infertur primò actus , quibus Dæ-
 mones credunt , non elici ab habitu theo-
 logico fidei infusæ, qualis est nostra . Pro-
 batur primò: nam ille actus est merè natu-
 ralis, & necessarius, & quodammodo coa-
 ctus , & non resoluitur vltimo in diuinam
 reue-

reuelationem, sed in motiua, quibus euidenter probatur diuina reuelatio; sed nostra fides infusa potest elicere solus assensus supernaturales, non necessarios, sed liberos, non euidentes, sed obscuros, & qui vltimò resoluuntur in diuinam reuelationem, non autem in motiua, quibus probatur diuina reuelatio; ergo &c.

26. Infertur secundò actus, quibus, vt dictum est quæst. 25. concl. 5. num. 13. aliqui homines diuinitus illuminati ita, penetrant signa credibilitatis, vt ex ijs cognoscant euidenter Deum reuelasse nostram religionem, non elici ab habitu nostræ fidei infusæ. Probatur: nam illi actus licet sint supernaturales, tamen sunt euidentes, & vltimò resoluuntur non in diuinam reuelationem, sed in signa credibilitatis; sed habitus nostræ fidei infusæ elicit solum actus obscuros, & qui vltimò resoluuntur in diuinam reuelationem; ergo &c. Si verò quærat, à quo habitu eliciantur tales actus, primò potest dici, quòd eliciantur ab habitu intellectus, vel sapientiæ, qui recensentur inter dona Spiritus Sancti. Secundò potest dici, quòd non eliciuntur ab aliquo lumine habituali, sed solum ab aliquo lumine actuali, & transeunte, eo pacto, quo communiter actus prophetandi non eliciuntur à lumine prophetico habituali, sed à lumine prophetico merè actuali, & transeunte.

27. Infertur tertio actus, quibus, vt dictum est quæst. 26. nu. 16. concl. 6. primi Doctores fidei cognouerunt immediate,

&

& euidenter diuinam reuelationem, non elicitos fuisse ab habitu fidei nostræ. Ratio est, quia fides nostra elicit solos actus inuidentes; sed illi actus erant euidentes; ergo &c. Potest igitur dici illos actus elicitos fuisse à lumine prophetico, vel actuali, & transeunte, vel habituali, & permanente.

28. Infertur quartò, quod si, vt docent aliqui, Angeli in via crediderunt Deo propter reuelationem immediatè euidenter cognitam, tales actus fuerunt quidem actus fidei theologicæ, cum resoluerentur ultimò in diuinam reuelationem, sed elicti fuerunt ab habitu diuersæ rationis à nostra fide, quæ solum potest credere propter reuelationem obscuram. Probabile porrò est, quod Angelus præsertim primus crediderit propter reuelationem euidenter cognitam. Cognoscebat enim euidenter mysteria sibi proponi sufficienter, & cum obligatione credendi super omnia; sed etiam cognoscebat euidenter à nulla creatura posse sibi proponi mysteria cum obligatione credendi super omnia, siquidem sciebat non dari creaturam superiorem se; ergo cognoscebat euidenter mysteria sibi proponi à Deo, ac proinde habebat euidenciam de diuina reuelatione. Quo pacto licet Angelus cognouerit euidenter diuinam reuelationem, tamen potuerit credere super omnia fide meritoria, & libera, explicari potest ex doctrina tradita in responsione ad 2. quæstionem. De fide Angelorum videri potest Suarius *comode*

etc

de Angelis lib. 5. cap. 5. & Cardinalis de Lugo disput. 17. de fide, sect. 1.

29. Ad 1. Apostolus definit fidē nostram, non autem fidem ex sua ratione vniuersalissima; ergo solum sequitur de essentia fidei nostræ esse, vt cognoscat reuelationem obscure, quod vltro concessimus in responsione ad 5. quæst. non autem sequitur de ratione fidei in genere esse, vt cognoscat reuelationem obscure, quod solum negauimus in responsione ad 1. quæst.

30. Ad 2. respondeo primò distinguo maiorem: de ratione fidei nostræ est, vt sit assensus liber, & meritorius, concedo: de ratione fidei in genere, nego: concedo minorem; & nego consequentiam. De ratione fidei nostræ est, vt sit libera, & meritoria, adeoque vt cognoscat reuelationem ineuidenter. At fides in genere sicut potest esse necessaria, sic potest cognoscere reuelationem euidenter. Respondeo secundò, concedo maiorem, & nego minorem. Explicatum enim est in respon-

sione ad 2. quæst. quo pacto assensus fidei, licet cogno-

sceret reuelationem

euidenter, nihilo-

minus posset

esse

liber, & me-

ritorius.

*

(**) (**) (**) *

QVÆ

Q V A E S T I O XXVII.

Vtrum per fidem possit credi obiectum materiale partialiter evidens ?

1. **V**idetur non posse : eadem enim rationes , quæ probant non posse credi obiectum materiale totaliter evidens , probant etiam non posse credi obiectum materiale partialiter evidens ; sed ut dicitur quæst. 28. non potest credi obiectum materiale totaliter evidens ; ergo neque potest credi obiectum materiale partialiter evidens .

2. Respondeo, quod cum egerimus de evidentialia, vel obscuritate revelationis, quæ est obiectum formale fidei, agendum est de evidentialia, vel obscuritate obiecti materialis, quod potest esse, vel totale, vel partiale. Quærimus igitur in hac quæstione, vtrum possit credi obiectum materiale partialiter evidens ? Quæstione sequenti quæremus, vtrum possit credi obiectum materiale totaliter evidens ? Nomine obiecti materialis partialiter evidentialis intelligimus propositionem obiectivam complexam resolubilem in plures propositiones, quarum aliqua seorsim sit evidens, licet aliqua alia sit obscura. E. G. videnti aliquos Æthyopes habere dentes albos, hæc propositio obiectiva, *Omnis Æthyops habet dentes albos*, est partialiter evidens, quia potest

potest resolui in plures propositiones singulares, quibus dicatur, *hic Æthyops habet dentes albos*, & *hic habet dentes albos*, &c. quarum aliqua, quæ sunt de illis Æthyopibus, quos video habere dentes albos, sunt euidentes, licet de cæteris Æthyopibus, quos non video, neque vidi habere dentes albos, sint obscuræ.

3. Hoc posito, dicendum, posse nos credere obiectum materiale partialiter euidens. Probatur primò: nam fide humana possumus credere obiectum materiale partialiter euidens: E. G. cum ego video aliquos Æthyopes habere dentes albos, adeoque habeo de hoc euidentiam, si testes fide digni testentur, omnes Æthyopes habere dentes albos, possum propter eorum testimonium credere omnes Æthyopes habere dentes albos, licet hæc propositio sit mihi partialiter euidens; ergo etiam per fidem diuinam possumus credere obiectum partialiter euidens: E. G. qui habet euidentiam de hoc, quod Deus est vnus, potest fide diuina credere Deum esse trinum, & vnum, quamuis hæc propositio sit partialiter euidens, vtpotè resolubilis in duas propositiones, *Deus est vnus*: *Deus est trinus*, quarum prima est euidens, secunda obscura.

4. Probatur secundò: nam per fidem potest credi obiectum materiale obscurum; sed obiectum partialiter euidens simpliciter, & absolutè est obscurum, E. G. videnti aliquos Æthyopes habere dentes albos, simpliciter est obscurum
omnes

omnes Æthyopes habere dentes albos : cognoscenti euidenter Deum esse vnum , simpliciter est obscurum Deum esse trinum, & vnum ; & ratio est, quia bonum ex integra causa , malum autem ex singulis defectibus ; ergo obiectum solum partialiter euidens , cum simpliciter, & absolutè sit obscurum , potest credi per fidem .

5. Addo primò , quod cum per fidem credimus obiectum partialiter euidens , partem euidentem non credimus seorsim , sed solum prout includitur in toto , & complexo obscuro. E.G. cum credo Deum esse trinum , & vnum , Deum esse vnum non credo seorsim , sed solum prout includitur in hoc complexo obscuro : *Deus est trinus , & unus* . Vtrum pars euidens , quia non creditur seorsim, sed solum prout includitur in complexo obscuro , debeat dici credita non per se , sed per accidens , est quæstio de nomine .

6. Addo secundò actum , quo affirmatur obiectum partialiter verum , vel partialiter euidens , propriè non dici partialiter verum , & partialiter euidentem . Probatur : nam actus , quo quis dicit , *dantur in Deo quatuor Personæ* , non est partialiter verus , nec partialiter euidens ; sed obiectum talis actus est partialiter verum , & partialiter euidens ; ergo &c. Probatur minor : nam cum quatuor includant tria , duo , & vnum , qui affirmat dari in Deo quatuor Personas , affirmat etiam dari tres , duas , & vnā ; sed dari in Deo tres , & duas Personas est verum : dari
vnā

vnam Personam non solum est verum, sed etiam est euidens, cum euidens sit, Deum esse Personam, hoc est, suppositum naturæ intellectualis; ergo &c. Ratio est, quia denominationes significantes adæquationem rei cum aliquo toto, cum res adæquatur soli parti, neque partialiter tribuuntur tali rei: E. G. numerus ternarius non dicitur partialiter æqualis centenario, licet sit æqualis parti centenarij, quia æqualitas cum centenario significat adæquationem ternarij cum toto, non autem cum parte centenarij: sed veritas actus consistit in adæquatione, & conformitate actus cum toto obiecto affirmato; ergo cum obiectum affirmatum est verum solum partialiter, actus non dicitur verus partialiter; sed euidencia consistit in hoc, quod euidenter cognoscatur id, per quod actus est verus; ergo cum obiectum affirmatum est verum solum partialiter, actus non dicitur partialiter euidens.

7. Potest quæri, vtrum cum intellectus affirmat aliquod totum, affirmet necessario omnes partes illius totius. Ratio dubitandi est, quia vt ponamus, & efficiamus totum, non est necesse, vt ponamus omnes partes talis totius, sed sufficit, vt suppositis alijs partibus, ponamus partem, quæ deest, & qua totum vltimo constituitur: E. G. vt artifex ponat statuam, quæ constat ex materia, & forma, puta, ex marmore, & figura, non requiritur, vt ponat materiam, seu marmor, sed sufficit, vt supposita materia, ponat formam, seu figuram statux.

Rursus

Rursus ut aliquis velit totum existere, non requiritur, ut velit existere omnes eius partes: E. G. licet punitio sit totum constans ex culpa, & poena, ut quis velit existere punitorem, non requiritur, ut velit existere culpam, & poenam, sed sufficit, ut supposita existentia culpæ, quam ex se vellet non esse, velit existere poenam; ergo ut intellectus affirmet totum existere, non requiritur, ut affirmet omnes eius partes, sed sufficit, ut supposita affirmatione unius, affirmet aliam.

8. Dicendum nihilominus, quod intellectus non potest affirmare existere totum, quin affirmet existere omnes partes talis totius. Ratio est, quia licet ponere totum non sit ponere omnes partes illius, sed sit ponere, vel omnes, vel partem, quæ deest, tamen existere totum est existere omnes partes illius, puta existere statuum, est existere omnes partes statuum; sed affirmatio totius nihil aliud est, quam quædam existentia intentionalis, per quam totum existit in mente, proportionaliter, ac existat à parte rei; ergo affirmari totum est affirmari omnes partes ipsius. Hinc patet disparitas actus affirmantis ab actu volente. Affirmatio enim est existentia intentionalis obiecti affirmati: volitio non est existentia, sed est positio intentionalis obiecti voliti: sed totum existere est existere omnes eius partes, totum poni non est poni omnes eius partes, sed vel poni omnes, vel poni partem, quæ deest; ergo affirmare totum est affirmare omnes eius partes.

partes, & omnia constitutiva: Velle totum non est velle omnes eius partes, sed vel velle omnes, vel suppositis alijs, velle partem, quæ deest, & per quam res ultimum constituitur.

9. Infertur primò, quod credere totum propter solam authoritatem Dei reuelantis, est affirmare omnes partes totius, non seorsim, sed simul, propter solam authoritatem Dei reuelantis. Ratio est, quia affirmare totum est affirmare omnes partes totius; sed credere est formaliter affirmare; ergo credere totum est affirmare omnes partes totius; ergo cum per fidem credimus Deum esse trinum, & vnum propter solam authoritatem Dei reuelantis, credimus propter solam authoritatem Dei reuelantis non solum partem obscuram, sed etiam partem evidentem, nimirum quod Deus sit vnus, licet partem evidentem non credamus seorsim, sed prout inclusam in toto obscuro.

10. Infertur secundò, quod sicut totum non existere, non est nullam eius partem existere, sed est vel nullam, vel aliquam partem non existere, eo pacto, quo statua potest non existere per hoc, quod licet existat marmor, non existat figura: sic negare totum non est negare omnes eius partes copulatiue, sed est disiunctiue negare, vel omnes, vel aliquam: E. G. cum nego dari statuam, dico vel nullam dari partem statuæ, vel si aliquæ dentur, aliquam partem non dari. Licet ergò fidelis, cum affirmat Deum esse trinum, & vnum, non

non solum affirmet, Deum esse trinum; quod est obscurum, sed etiam Deum esse unum, quod est evidens, tamen cum infidelis negat Deum esse trinum, & unum, non est necesse, ut neget Deum esse unum, quod est evidens, sed sufficit, ut neget Deum esse trinum, quod est obscurum.

II. Ad argumentum in contrarium, nego maiorem. Ut enim explicabitur questione sequenti, per fidem non possumus credere obiectum totaliter evidens, quia obiectum totaliter evidens est evidens simpliciter, ita ut convincat intellectum, eumque necessitet ad assentiendum sine ulla dubitatione, & formidine: sed obiectum solum partialiter evidens simpliciter est obscurum, ita ut non convincat intellectum, neque necessitet ad assentiendum sine ulla dubitatione, atque formidine; ergo obiectum solum partialiter evidens potest credi per fidem.



Q V A E S T I O XXVIII.

*Utrum actus fidei obscurus possit
 coniungi cum actu evidenti
 circa idem obiectum
 materiale to-
 tale?*

1. **V**idetur, quod possit, ut docent
 Halensis, Albertus Magnus,
 S. Bonaventura, Altisiodorensis, Duran-
 dus, & Gabriel, quos ex nostris referunt,
 & sequuntur Valentia 2.2. disp. 1. puncto 4.
 sect. 5. Suarius de fide disp. 3. sect. 9. num. 5.
 Cardinalis de Lugo de fide disp. 2. sect. 2.
 num. 58. & plures alij: primò quia habitus
 fidei obscurus potest coniungi cum habitu
 evidenti circa idem obiectum materiale
 totale: E. G. habitus credendi obscure
 Deum esse, potest coniungi cum habitu
 cognoscendi euidenter Deum esse; ergo
 etiam actus fidei obscurus potest coniungi
 cum actu evidenti circa idem obiectum
 materiale totale.

2. Secundò vel actus obscurus, & ac-
 tus evidens circa idem obiectum materia-
 le, puta circa existentiam Dei, repugnant,
 quia alter est evidens, alter obscurus; vel
 quia alter est necessarius, alter liber; vel
 quia alter quietat intellectum, & est per-
 fecta possessio veritatis cognitæ, alter non
 quietat, & non est perfecta possessio veri-

Lib. V.

N

tatis

tatis cognitæ ; nullum ex his dici potest ; ergo &c. Probatur prima pars minoris : nam actus clarus , & obscurus circa idem obiectum non possunt quidem identificari , sed possunt simul esse in eodem intellectu , eo pacto , quo cognitio obscura , & definibilis non potest identificari cum cognitione clara , & definiriva eiusdem obiecti , sed possunt simul esse in eodem intellectu. Probatur secunda pars : nam actus necessarius , & liber circa idem obiectum non possunt identificari , sed possunt simul esse in eodem subiecto , ac de facto Christus simul habuit amorem beatificum , quo amavit Deum necessariò , & alium amorem , quo Deum amavit liberè . Probatur tertia pars : nam actus quietans , & non quietans non possunt identificari , sed possunt coniungi in eodem subiecto , ac de facto Beati simul amant Deum , tum amore concupiscentiæ , tum amore amicitiae strictè sumptæ , tum amore perfectissimi gaudij , ex quibus actibus solus ultimus quietat Beatum , & est perfecta possessio finis ultimi , duo primi non quietant , & non sunt perfecta possessio finis ultimi.

3. Tertiò si ea , quæ lumine naturæ sunt evidentiæ , non possent credi fide diuina , non exigua pars doctrinæ , quæ continetur in Sacra Scriptura , & præsertim in libris Sapientialibus , nimirum in Prouerbijs , Ecclesiaste , Ecclesiastico , Psalmis &c. non posset credi fide diuina , quod est absurdum. Probatur sequela : nam libri Scripturæ præsertim sapientiales pleni sunt sententijs

tentijs lumine naturæ evidentibus, quales sunt Prouerb. 15. *Responsio mollis frangit iram*: Ecclesiastici 19. *Qui citò credit, leuis est corde*: Matthæi 6. *Nemo potest duobus Dominis seruire*: 1. ad Corinth. 6. *non est societas luci ad tenebras &c.* Confirmatur, nam Sancti Petres, dum conati sunt auctoritate diuina persuadere tales veritates euidentes, fuissent stultissimi, cum veritates euidentes credi non possint propter diuinam auctoritatem.

4. Quartò ex S. Thoma 1.2. quæst. 67. art. 3. in corpore, & 3. parte, quæst. 9. art. 3. ad 2. & in 3. dist. 21. quæst. 2. art. 1. quasi-
tiunc. 2. ad 4. & alibi, possunt simul in eodem intellectu coniungi actus opinionis ineuidens, & actus scientiæ euidens circa idem obiectum materiale; ergo possunt etiam coniungi actus fidei ineuidens, & actus scientiæ euidens circa idem obiectum materiale.

5. Quinto Fidelis, cum per demonstrationem cognoscit euidenter animam esse immortalem, per fidem etiam cognoscit Deum reuelasse immortalitatem animæ, & hanc reuelationem esse essentialiter connexam cum veritate sui obiecti, hoc est cum immortalitate animæ; sed cognoscere Deum reuelasse immortalitatem animæ reuelatione essentialiter connexa cum immortalitate animæ est credere immortalitatem animæ propter diuinam reuelationem essentialiter connexam cum animæ immortalitate; ergo Fidelis simul cognoscit euidenter immortalitatem animæ, &

N

2

illam

illam credit obscure propter diuinam
authoritatem, & reuelationem.

6. Sextò ex S. Thoma 3. parte, quæst.
9. art. 4. Christus quædam obiecta debet
cognoscere non solum per scientiam bea-
tam, & infusam, sed etiam per scien-
tiam acquisitam, & experimentalem de-
pendentem à sensibus, & à phantasmati-
bus, quia cum anima Christi habeat respec-
tum non solum ad superiora, sed etiam
ad inferiora, hoc est ad sensibilia, non
solum debet habere scientiam, qua cogno-
scat obiecta per superiora, sed etiam scien-
tiam, qua eadem obiecta cognoscat per
inferiora, & sensibilia; sed hæc ratio osten-
dit, quod non solum debemus cognoscere
quædam obiecta per superiora, hoc est per
diuinam reuelationem, sed etiam per infe-
riora, hoc est per scientiam naturalem de-
pendentem à sensibus, & à phantasmati-
bus; ergo &c. Confirmatur: nam scientia
acquisita, & non comprehensua, qua
Christus cognoscit quædam obiecta de-
pendenter à sensibus, & phantasmatibus,
comparatur cum scientia comprehensua,
ac beata, qua eadem obiecta cognoscit in
diuina essentia, ut cognitio obscura ad cla-
ram, & tamen istæ duæ scientiæ coniun-
guntur in Christo; ergo licet actus fidei
comparatus cum actu scientiæ sit obscurus,
tamen potest coniungi in eodem intellectu
cum actu scientiæ.

7. Septimò ex Apostolo ad Hebræos
11. *Accedentem ad Deum oportet credere,*
quod

quod Deus est, & quarentibus se remunerator est; sed hæc sunt lumine naturæ euidencia; ergo etiam quæ sunt euidencia, credi possunt, ac debent. Nec dicas Sapientes, ac doctos, qui habent de his euidentiam, non posse hæc credere: nam, sequeretur, quod de diuina existentia certiores essent simplices, & indocti, quàm sapientes, ac docti. Simplices enim, & indocti de diuina existentia certi sunt certitudine fidei, Sapientes, ac docti sola certitudine scientiæ: sed certitudo fidei maior est certitudine scientiæ, ut dictum est supra, & probabitur inferius; ergo &c.

8. Octauò sequeretur, quod Paulus post raptum, in quo, ut ex Augustino docet S. Thomas 2.2. quæst. 75. art. 3. vidit diuinam essentiam, non potuisset quidquam credere, siquidem retinebat memoria euidentiam eorum, quæ viderat.

9. Respondeo cum S. Thoma 2. 2. quæst. 1. art. 4. & 5. & Scoto in 3. quæst. 1. quos præter Thomistas, & Scotistas sequuntur etiam Riccardus, Gabriel, & ex nostris P. Molina, P. Sparza quæst. 25. & alij: non potest intellectus, cum de aliquo obiecto habet euidentiam, qua convincitur, & necessitatur ad assentiendum tali obiecto sine vlla dubitatione, & formidine, idem obiectum secundum eandem rationem formalem obscure credere propter diuinam auctoritatem, & testimonium.

10. Probatur primò: nam testimonia neque possunt prudenter adhiberi ad persuadenda ea, quæ videntur, neque potest

aliquis prudenter vti testimonijs ad credenda ea, quæ videt; sed vt credamus, & Deus suum debet adhibere testimonium ad persuadenda ea, quæ credimus, & nos debemus vti diuino testimonio ad credenda ea, quæ Deus testatur; ergo non possumus credere quæ videmus, siue euidenter cognoscimus. Probatur maior: nam si quis dum video templum S. Petri, afferret testimonia ad persuadendum mihi dari templum S. Petri, irrideretur vt insanus, & similiter censeretur insanus qui videns templum S. Petri, fineret sibi testimonijs adductis persuaderi dari templum S. Petri; sicut ridendus etiam esset, qui adhiberet testimonia ad persuadendum mihi, quod quatuor, & tria faciunt septem. Ratio à priori est, quia natura testimonij alieni est; vt adhibeatur in defectum visionis propriæ. Cum enim non possimus omnia videre per nos ipsos, ponuntur testimonia; vt dum credimus, videamus quodammodo per alios ea, quæ non videmus per nos ipsos; ergo cum aliquam veritatem videmus per nos ipsos, hoc est euidenter illam cognoscimus, vel in se ipsa, vel in aliquo medio essentialiter connexo cum tali veritate, non possumus illam videre per alios, credendo propter testimonium aliorum. Confirmatur: nam quia Deus omnia videt per se ipsum, nihil potest credere propter testimonium aliorum; ergo etiã intellectus creatus dum veritatem aliquam videt per se ipsum, non potest illam credere propter testimonium aliorum.

11. Probatur secundo authoritate, quæ etiam confirmatur allata ratio. Nam Scriptura, & Patres, dum agunt de fide, expriment hoc prædicatum, ut sit de ijs, quæ non videntur; ergo &c. Probatur antecedens: Apostolus enim ad Hebræos 11. fidem definit *Argumentum non apparentium*; sed idem est esse argumentum non apparentium, ac esse firmam adhæSIONem ijs, quæ non videntur, & non cognoscuntur euidenter, ut explicat S. Thomas in commentario eius loci; ergo &c.

12. Respondent aliqui fidem ab Apostolo dici argumentum non apparentium, non in sensu restrictiuo, ita ut significetur fidem esse assensum firmum solis rebus non apparentibus, sed in sensu ampliatiuo, ita ut significetur fidem esse assensum firmum non solis rebus apparentibus, & euidentibus, sed etiam obscuris, & inenidentibus, qualia sunt myteria Trinitatis, Incarnationis &c.

13. Reijcitur hæc responsio: nam Patres, & interpretes communiter verba Apostoli intelligunt non in sensu ampliatiuo, sed restrictiuo. Chrysostomus in Commentario illius loci dicit: *Proinde, neque circa ea, quæ videntur, credulitas, vel incredulitas dici potest*; ergo docet fidem ita esse argumentum non apparentium, ut non possit fides, seu credulitas esse eorum, quæ videntur. Athanasius lib. de Salutari Christi aduentu dicit: *non fides de re euidenter concepta fides dici potest*. Gregorius homil. 26. in Euangel. *Apparentia non ha-*

bent fidem, sed agnitionem; & proposita
 quæstione, quo pacto Christus dixerit
 Thomæ, *Quia vidisti me Thoma credidisti*,
 cum fides sit de non apparentibus, respon-
 det: *Vnum vidit, & aliud credidit: nam
 vidit hominem, & credidit Deum: & a ibi
 dicit: non est fidei meritum, ubi humana
 ratio præbet experimentum.* Augustinus
 tract. 40. in Ioan. dicit: *Quid est fides, nisi
 credere quod non vides? Fides ergo est, quod
 non vides credere, veritas quod credidisti
 videre: & tract. 49. dicit: hæc est enim laus
 fidei, si quod creditur, non videtur: & paulò
 post, nescio utrum credere dicendus est quis-
 que, qui videt. Nam ipsa fides in epist. quæ
 legitur ad Hebræos est ita definita: est autem
 fides sperandarum substantia, convictio re-
 rum, quæ non videntur, ac deinde proposita
 quæstione de Thoma, cui dictum est, *quia
 vidisti me Thoma credidisti*, dicit; *Non hoc
 credidit quod vidit, sed aliud vidit, aliud cre-
 didit. Vidit enim hominem, credidit Deum:
 & concludit: Et si dicuntur credi, quæ vi-
 dentur, sicut dicit unusquisque se oculis suis
 credidisse, non tamen ipsa est, quæ in nobis
 edificatur fides. Idem in Enchiridio ad
 Laurentium cap. 7. cum dixisset verbum
 credo sapè accommodari rebus visis, sub-
 dit: sed melius hæc appellamus fidem, quam
 divina eloquia docuerunt earum rerum, quæ
 non videntur. Lib. 11. de Ciuit. Dei cap. 3.
 dicit: Cui (idest Scripturæ) fidem adhibe-
 mus de ijs rebus, quas ignorare non expedit,
 nec per nos ipsos nosse idonei sumus; & alia
 addit in eandem sententiam, quæ fufius
 pro-**

prosequitur Epist. 112. cap. 2. & sequentibus. S. Prosper etiam libro Sententiarum ex Augustino decerptarum sententia 350. affert hanc Augustini sententiam: *Fides semper praeuenit visionem. Credimus enim, ut cognoscamus, non cognoscimus, ut credamus. Fides ergo est, quod non vides credere; veritas, quod credidisti, videre.* Patet ergo Patres communiter verba Apostoli, *Fides est argumentum non apparentium* intellexisse in sensu non ampliatiuo, sed restrictiuo, ita ut fides dici non possit, quae credimus quae videmus, ac proinde opinionem contrariam asserentem posse credi, quae videntur, defendi non posse, nisi inferendo vim Scripturae, & Patribus.

14. Probatur tertio conclusio: nam repugnat, ut intellectus moueatur ad aliquam veritatem, ut non possessam, & eodem tempore quiescat in illa ipsa veritate, ut possessa: sed intellectus per fidem obscuram mouetur ad veritatem, quam credit, ut non possessam; per cognitionem euidentem quiescit in veritate, ut possessa, ideoque Fides causat desiderium videndi, visio, seu cognitio euidens causat delectationem de re, ut visa; ergo &c. Confirmatur primo: nam ex Augustino apud Prosperum sententia 350. citata in secunda probatione credimus, ut cognoscamus, non cognoscimus, ut credamus; ergo per fidem mouemur ad cognitionem euidentem, ac proinde dum credimus, non possumus habere ipsam cognitionem euidentem, in eaque quiescere. Confirmatur se-

N 2

cundo:

cundò : nam quia voluntas per desiderium mouetur ad bonum, vt non possessum, per gaudium quiescit in bono, vt possessum, non possunt in voluntate simul coniungi desiderium, & gaudium de eodem obiecto materiali ; ergo quia intellectus per fidem, mouetur ad veritatem, vt non possessam, per cognitionem, & visionem euidentem quiescit in veritate, vt possessa, non possunt coniungi fides, & cognitio euidens in eodem intellectu.

15. Probatur quartò : nam si fides coniungeretur cum euidentia, prius natura obiectum videremus euidenter, deinde illud crederemus obscurè ; sed hoc est impossibile ; ergo &c. Probatur sequela : nam cum fides sit libera, & prudens, antequam liberè credamus, consideramus, vtrum obiectum sit prudenter credibile ; sed vt iudicium formemus de prudenti credibilitate obiecti, debemus considerare omnia motiua, quibus obiectum potest suaderi ; ergo si habemus motiuium euidenter probans obiectum, iam propter tale motiuium, antequam credamus, euidenter cognoscimus obiectum, adeoque cognitio euidens præcedit naturam actum fidei obscurum.

16. Probatur iam minor : nam qui de obiecto iam in priori natura habet euidentiam, non potest sibi circa idem obiectum imperare, & dependenter à tali imperio elicere assensum obscurum. Ratio est, quia supposito, quod obiectum iam appareat euidenter, per nullum actum posterio-
riorem

riorem naturâ possumus tendere in idem obiectum, præsciindendo ab hac euidentiâ, eo pacto, quo posito, quod paries sit illuminatus lumine solari, repugnat, ut videamus illum, & non ut illuminatum lumine solari; sed ut assensus consequens actum euidentem esset obscurus, deberet præsciindere ab euidentiâ; ergo &c. Confirmatur: nam ex se apparet nugatorius actus, quo quis videns aliquod obiectum esse euidens dicat: *volo assentiri huic obiecto obscure, abstrahendo ab euidentiâ, quam de illo habeo.*

17. Probatur quinto: nam certitudo fidei obscuræ debet fundari, non in euidentiâ obiecti, sed in imperio voluntatis, & in diuino testimonio obscure proposito; sed si dum elicimus actum fidei, haberemus euidentiâ de obiecto materiali, certitudo fidei de tali obiecto fundaretur etiam in euidentiâ; ergo &c. Probatur minor: nam certitudo assensus fundatur in eo, propter quod assentimur sine vlla dubitatione, & formidine; sed cum habemus euidentiâ de obiecto, propter ipsam euidentiâ assentimur obiecto sine vlla dubitatione, & formidine; ergo &c. Probatur minor: euidentiâ enim est causa exclusiua formidinis ab omni actu, quem circa obiectum euidens elicimus, cum habemus talem euidentiâ; ergo euidentiâ est causa exclusiua formidinis ab assensu fidei, si eliciatur ab habente euidentiâ; ergo si assensus fidei elicitur ab habente euidentiâ de obiecto, eo ipso certitudo assensus

fidei fundatur etiam in euidentia .

18. Confirmatur : nam ad actum fidei obscurum requiritur , vt intellectus liberè non dubitet de veritate obiekti ; sed cum habemus euidentiam, non possumus liberè non dubitare; ergo &c. Probatur minor : vt enim liberè non dubitemus , debemus habere potentiam proximam dubitandi ; sed euidentia excludit potentiam proximam dubitandi ; ergo &c,

19. Infertur solam euidentiam propriam , quæ nimirum excludit potentiam dubitandi de obiecto , esse inconiungibilem cum actu fidei ; euidentiam autem , impropriad , quæ non excludit potentiam dubitandi de obiecto , non esse inconiungibilem cum actu fidei , vt patet ex omnibus rationibus allatis. Cum enim possumus de obiecto saltem imprudenter dubitare , possumus prudenter niti testimonio Dei ad excludendam omnem dubitationem .

E conuerso cum de obiecto neque imprudenter dubitare possumus , non possumus niti testimonio Dei . Ideò Gregorius Nissenus lib. de anima , & resurrectione dicit : *fides sustentaculum , & fundamentum est incertitudinis earum rerum , quæ sperantur .* Quia nimirum ad fidem obscuram , de qua hic loquimur , requiritur , vt ea , quæ credimus , & speramus , sint aliquo pacto incerta , ità vt de illis saltem imprudenter dubitare possimus ; ergo cum obiecta apparent ità euidenter , vt de illis neq; imprudenter dubitare possimus , non possumus illa credere , neque sperare . Con-
fir-

firmatur: nam quia Beati non possunt dubitare de futura corporum resurrectione, non possunt illam sperare, ideoque spes non datur in Beatis; ergo ex proportionali ratione non possumus credere obiecta ita euidencia, vt de illis neque imprudenter possimus dubitare.

20. Ad 1. concedo antecedens, & nego consequentiam. Ex eo, quod duo habitus possint coniungi, non infertur eorum actus posse coniungi; & proportionaliter ex eo, quod duo actus non possunt coniungi, non infertur eorum habitus non posse coniungi: E. G. licet possint in aliquo coniungi habitus ludendi, & studendi, non possunt coniungi actus ludendi, & studendi; ergo in casu nostro licet habitus credendi Deum esse remuneratorem, possit coniungi cum actu euidenter cognoscendi Deum esse remuneratorem, tamen actus fidei, quo obscure credatur Deum esse remuneratorem, non potest coniungi cum actu, quo euidenter cognoscatur Deum esse remuneratorem. Habitus igitur fidei potest coniungi cum habitu, & etiam cum actu scientiae circa idem obiectum materiale: habitus scientiae potest coniungi cum habitu, & etiam cum actu fidei circa idem obiectum materiale: at actus fidei, & scientiae de eodem obiecto materiali coniungi nequeunt, ac proinde datur coniungibilitas habitus cum habitu, & habitus cum actu, sed non datur coniungibilitas actus cum actu. Addo, quod si quis circa aliquod obiectum praedictus esset tali habitu scien-

scientiæ, vt non posset de illo obiecto cogitare, quin saltem propter aliqualem memoriam demonstrationis haberet euidentiā, ex vi cuius non posset dubitare de obiecto, cum tali habitu coniungi nequiret actus fidei; & in hoc sensu intelligendus est S. Thomas, dum negat, etiam habitum scientiæ coniungi posse cum actu fidei. Loquitur enim de habitu, ex vi cuius non possumus cogitare de obiecto, quin de eo habeamus actualem euidentiā, qualis est, quo E. G. cognoscimus, quatuor, & tria facere septem.

21. Ad 2. transeat maior, & nego minorem, ac dico actum fidei ex omnibus tribus allatis capitibus benè explicatis esse impossibilem cum actu scientiæ. Primò ergo actus fidei est impossibilis cum actu scientiæ, quia actus fidei est obscurus obscuritate, quæ à natura admittitur solum in supplementum euidentiæ conuincentis, vt explicatum est in prima probatione conclusionis: actus autem scientiæ est euidens euidentiā conuincente. Hinc patet disparitas ad paritatem, actus definitiui, & definibilis. Actus enim definibilis est obscurus obscuritate, quæ non est supplementum actus definitiui, sed est explicabilis per actum definitiuum; ergo actus definibilis potest coniungi cum actu definitiuo: at actus fidei est obscurus obscuritate, quæ admittitur solum in supplementum euidentiæ. Secundò actus fidei est impossibilis cum actu scientiæ, quia actus fidei est liber libertate fundata in hoc,

hoc, quod non videatur veritas obiecti crediti; actus scientiæ est necessarius necessitate fundata in hoc, quod videatur veritas obiecti crediti, ut explicatum est in quintâ probatione conclusionis; sed repugnat, ut eadem veritas pro eodem instanti videatur, & non videatur; ergo &c. Ad paritatem ex eo, quod Christus habeat simul amorem necessarium, & liberum. Respondeo primò, negando antecedens, & retorquendo argumentum. In Christo enim communiter ponitur solus amor Dei necessarius, non autem liber; ergo non potest intellectus eidem obiecto assentiri per actum scientiæ necessarium, & per actum fidei liberum. Probo consequentiam: ideò enim in Christo ponitur solus amor necessarius, quia amor Christi necessarius fundatur in hoc, quod Christus videt summum bonum in se ipso; ad amorem autem liberum requiritur, ut summum bonum non videatur in se ipso; sed fides libera quoad substantiam assensus fundatur in hoc, quod non videatur veritas obiecti affirmati; assensus necessarius fundatur in hoc, quod videatur talis veritas; ergo &c. Respondeo secundò, transeat antecedens, & nego consequentiam, ac retorqueo argumentum. Nam licet in Christi voluntate ponatur simul amor Dei necessarius, & liber, tamen in Christi intellectu non ponitur. E. G. simul visio clara, & necessaria Trinitatis, & eiusdem Trinitatis fides obscura; ergo signum est, quod licet actus amoris liber esset coniungibilis cum amo-

re

re necessario eiusdem obiecti, tamen actus fidei liber esset inconiungibilis cum assensu evidenti, & necessario. Disparitas posset esse, quia assensus fidei liber, & obscurus admittitur à natura solum in supplementum cognitionis evidenter: ac amor liber non admittitur solum in supplementum, sed propter ipsam suam libertatem talis actus. Tertiò demùm actus fidei est impossibilis cum actu scientiæ, quia per actum scientiæ evidentem quietamur in obiecto, vt possesso: per actum fidei obscurum non solum non quietamur, sed etiam mouemur ad obiectum; sed licet possint coniungi actus quietans, & præcisè non quietans, tamen non possunt coniungi actus, quorum alter sit quies, alter sit motus ad obiectum, eo pacto, quo non possunt coniungi gaudium, & desiderium de eodem obiecto, quia gaudium est quies in obiecto, vt possesso, desiderium est motus intentionalis ad obiectum, vt non possessum, sed possidendum; ergo &c. Ad paritatem ex eo, quod in Beatis cum gaudio amicitiae quietante coniungatur actus amoris stricti, & amoris concupiscentiæ non quietantis, dico quod tales actus præcisè non quietant, sed non sunt motus ad obiectum: desiderium autem, & spes, quia non solum non quietant, sed sunt motus ad obiectum desideratum, & speratum, non possunt coniungi cum gaudio; sed actus fidei obscurus est quidam motus ad obiectum; ergo &c. Addo, quod quia amor beatificus fundatur in visione, non

non datur in Beatis amor strictus abstra-
hens à præsentia, vel absentia obiecti, sed
solum datur amor perfectissimi gaudij, vt
explicatū est lib. 4. de actib. hum. q. 5. n. 27.

22. Ad 3. respondeo, quod vt dicit
Augustinus lib. 11. de Ciuit. Dei, cap. 3.
relatus in secunda probatione conclusio-
nis: *Diuine Scripturæ fidem adhibemus de
his rebus, quas ignorare non expedit, nec
per nos ipsos nosse idonei sumus*; ergo cum
Scriptura proponit nobis res ita manife-
stas, vt statim ac proponuntur, simus ido-
nei illas per nos ipsos euidenter nosse,
tales res per fidem non credimus. Confir-
matur: nam Magister non omnia, quæ
tradit discipulis, tradit, vt illa credant
propter authoritatem Magistri, sed res
manifestissimas tradit, vt illis assentiantur
propter se; ergo etiam Deus, cum in
Scripturis, vt Magister tradit res manife-
stissimas, puta quod non est societas lucis
ad tenebras, tradit, vt illis assentiamur
propter se, & non propter diuinum testi-
monium. Addo, quod licet veritates ma-
nifestas seorsim sumptas non possimus cre-
dere propter authoritatem diuinam, tamen
veritates complexas obscuras, quæ inclu-
dunt veritates manifestas, possumus cre-
dere propter authoritatem diuinam: E. G.
licet non possim credere seorsim propter
authoritatem Dei hanc propositionem,
incomplexam manifestissimam, *non est so-
cietas lucis ad tenebras*, tamen possum
credere propter diuinam authoritatem
hanc propositionem complexam obscu-
ram,

ram, sicut non est societas lucis ad tenebras, sic non est societas Christi ad Belial, in qua propositione complexa obscura includitur illa propositio incomplexa evidens, non est societas lucis ad tenebras. Quia verò non est manifestum, sed obscurum, quod veritates evidentes, quæ continentur in Scripturis, fuerint à Deo reuelatæ, ideo possumus per fidem credere veritates etiam manifestissimas contentas in Scripturis, in quantum continentur in propositionibus complexis, per quas asserimus illas fuisse reuelatas à Deo.

23. Ad 4. nego antecedens. Quæstione enim sequenti ostendam actum scientiæ non posse coniungi cum actu opinionis circa idem obiectum materiale, & conciliabo quasdam authoritates S. Thomæ, quæ circa hoc punctum videntur contrariæ.

24. Ad 5. nego minorem. Falsum est, quod cognoscere, Deum reuelasse immortalitatem animæ reuelatione essentialiter connexa cum ipsa animæ immortalitate, sit credere, vel affirmare animam esse immortalem, quia Deus id reuelavit. Probatur: nam Deus, & Beati affirmant Deum reuelasse immortalitatem animæ reuelatione essentialiter connexa cum ipsa animæ immortalitate, & tamen Deus, & Beati non credunt, nec affirmant animam esse immortalem, quia Deus id reuelavit. Confirmatur: nam potest aliquis cognoscere, & affirmare Deum aliquid reuelasse reuelatione essentialiter connexa cum

cum obiecto à se cognito, & affirmato, non propter ipsam reuelationem, sed aliunde, ac de facto Deus, & Beati cognoscunt Deum reuelasse mysteria Trinitatis, Incarnationis &c. per reuelationes essentialiter connexas cum talibus mysterijs ab ipsis cognitis, & affirmatis, non propter reuelationem, sed aliunde, hoc est per claram visionem, qua vident mysteria in Verbo, & in diuina essentia; ergo potest aliquis cognoscere, & affirmare dari reuelationem essentialiter connexam cum aliqua veritate, absque eo quod talem veritatem cognoscat, & credat propter reuelationem; ergo qui cognoscit Deum reuelasse immortalitatem animæ reuelatione essentialiter connexa cum ipsa immortalitate, potest non credere immortalitatem animæ propter diuinam reuelationem, sed illam affirmare propter euidentem demonstrationem, quam habet de immortalitate animæ.

25. Ad 6. distinguo maiorem: ideo Christus habet scientiam beatam, infusam, & acquisitam, quia debet obiecta non solum cognoscere per superiora, sed etiam per inferiora, & sensibilia, & nulla ex his scientijs admittitur à natura solum in supplementum alterius, concedo: & aliqua admittitur solum in supplementum alterius, nego: distinguo eodem pacto minorem; & nego consequentiam. Possunt coniungi cognitiones, quarum nulla admittitur solum in supplementum alterius, licet vna sit perfectior altera: at non possunt coniun-

niungi cognitiones, quarum una ex suo genere admittitur solum in supplementum alterius. Cognitio sensitiva, imaginativa, intellectiva, discursiva à priori, & per causam, vel à posteriori per effectum, per superiora descendendo, vel per inferiora ascendendo, sunt plures modi cognoscendi naturales homini, sed ita, ut nullus eorum admittatur solum in supplementum alterius; ergo non est mirum, quod etiam circa idem obiectum materiale possint naturaliter coniungi. A fortiori possunt isti modi naturales cognoscendi coniungi cum modis cognoscendi supernaturalibus, per quos homo eleuatur ad cognoscenda obiecta modo diuino per scientiam beatam in diuina essentia, vel modo angelico per scientiam per se infusam. Nam modi naturales cognoscendi non admittuntur solum in supplementum cognitionum supernaturalium; & sicut Gratia naturam non destruit, sed perficit, sic supernaturales modi cognoscendi non destruunt, sed potius perficiunt modos naturales cognoscendi. At fides, qua credimus aliquid propter testimonium alienum, ex suo genere admittitur à natura solum in supplementum cognitionis, qua illud cognoscimus per nos ipsos, ut probatum est in primo fundamento; ergo fides non potest coniungi cum cognitione euidenti eiusdem obiecti materialis. Confirmatur solutio, & retorquetur argumentum. Nam licet in Christo cum scientia beata, & infusa detur simul scientia acquisita, tamen non
datur

datur fides ; ergo signum est , quod licet scientia acquisita , & imperfecta possit coniungi cum scientia beata , quæ est perfectissima , tamen fides non potest coniungi cum scientia beata , & evidenti : alioquin , sicut in Christo datur scientia acquisita , sic deberet etiam dari fides.

26. Ad 7. distinguo maiorem : *Accidentem ad Deum oportet credere , quod Deus est , & quod remunerator est* , remuneratione purè naturali , nego : remuneratione supernaturali , concedo : distinguo eodem pacto minorem ; & nego consequentiam . Apostolus verbis citatis loquitur de necessitate fidei , quam definiuerat ; sed definiuerat fidem , quæ est fundamentum spei , & consequenter charitatis ; fides autem , quæ est fundamentum spei , est , qua creditur , Deum esse authorem supernaturalium , & esse remuneratorem præmio supernaturali ; ergo dum dicit , *accidentem ad Deum oportet credere , quod Deus est , & quod remunerator est* , significat per fidem credendum esse Deum esse Authorem supernaturalium , ac remuneratorem præmio supernaturali ; sed quod Deus sit Author supernaturalium , & remunerator præmio supernaturali , non est evidens lumine naturæ , sed est obscurum ; ergo quod ab Apostolo proponitur ut credendum non est evidens , sed obscurum .

27. Dum opponitur , quod de diuina existentia haberent maiorem certitudinem simplices , quam docti , nego sequelam : Nam docti habent de diuina existentia , licet .

licet non eodem tempore, vtramque certitudinem, scientiæ nimirum, & fidei. Cum igitur diuina existentia ita illis proponitur per demonstrationem, vt conuincatur, & necessitentur ad illam affirmandam sine ulla dubitatione, tunc de illa habent in actu secundo solum certitudinem, & euidentiā scientiæ inferiorem certitudine fidei: cum autem diuina existentia ita illis proponitur, vt possint de ea imprudenter dubitare, vt cum Dauid in persona pusillorū dicebat: *Mis autem penè moti sunt pedes, quia zelauit super iniquos, pacem peccatorum videns* Ps. 72. tum habent de diuina existentia certitudinem fidei maiorem certitudine scientiæ; ergo absolutè docti sunt melioris conditionis, quam simplices, & indocti; nam de existentia Dei habent, licet non pro eodem tempore, vtramque certitudinem, fidei nimirum coniunctam cum obscuritate, & scientiæ coniunctam cum euidentiā. Addo, quod Sapientes de diuina existentia, in quantum includitur in hoc complexo obscuro, *Deus est remunerator premio supernaturali*, habent solam certitudinem fidei, non autem scientiæ.

28. Ad 8. Si S. Paulus vidit essentiam Dei, & retinebat memoriam eorum, quæ viderat, non poterat illa credere per fidem, sed illis assentiebatur per lumen supernaturale multo perfectius, hoc est per memoriam de visione Dei. Quod autem eorum, quæ nos vidisse recordamur, non detur fides, docet expressè Augustinus Epist. 112. cap. 2, vbi cum dixisset ea
solum

solum credi, quæ absunt à sensibus nostris externis, & internis, addit, quod etiam ea, quæ nos aliquo sensu interno, vel externo vidisse recordamur, non credimus, dicens. *Nec quia dixi ea credi, quæ absunt à sensibus nostris, sic accipiat, ut inter ea deputentur, quæ aliquando vidimus, & nos vidisse retinemus, certique sumus, quamvis tunc non præsto sint, cum recoluntur à nobis. Neque enim inter credita, sed inter visa deputantur, & ideo nota sunt, non quia fidem adhibemus alijs testibus, sed quia nos vidisse sine dubio recordamur, & scimus. Addo, quod licet Paulus non posset credere quæ recordabatur se vidisse in essentia diuina, potuisset tamen credere quæ in essentia diuina non viderat, vel non recordabatur se vidisse.*

QVÆSTIO XXIX.

Vtrum cum actu fidei possit coniungi actus opinionis circa idem obiectum materiale totale, vel partiale?

1. **V**idetur, quod possit; primò quia cum possunt coniungi duæ causæ adæquatæ duorum effectuum, possunt etiam coniungi tales effectus; sed cum causa adæquata actus fidei potest in intellectu coniungi causa adæquata actus opinionis circa

circa idem obiectum materiale totale; ergo actus fidei potest coniungi cum actu opinionis circa idem obiectum materiale totale. Probatur minor: nam syllogismus constans ex his præmissis fidei: *Deus est veritas infallibilis, adeoque quidquid dicit est verum: Deus dicit Mundum non fuisse ab eterno*, est causa adæquata actus fidei, quo credimus Mundum non fuisse ab eterno. syllogismus constans ex his præmissis probabilibus, quod dicunt Sapientes plerumque est verum; multi Sapientes dixerunt, Mundum non fuisse ab eterno; est causa adæquata actus opinionis, quo opinemur Mundum non fuisse ab eterno; sed illi duo syllogismi possunt coniungi in eodem intellectu; ergo &c.

2. Secundò, cum imperfectum est dispositio ad perfectum, potest coniungi cum perfecto: E.G. quia prima apprehensio est cognitio imperfecta disponens ad iudicium, quod est cognitio perfecta, prima apprehensio potest coniungi cum iudicio; sed actus fidei humanæ, quo credimus veram esse nostram religionem propter auctoritatem humanam Ecclesiæ, in quantum est communitas humana, & propter motiva credibilitatis, est dispositio ad actum fidei diuinæ, quo credimus veritatem nostræ religionis propter auctoritatem diuinam, vt dictum est quæstione 14. in responsione ad 3. quæsitum; ergo actus fidei humanæ potest coniungi cum actu fidei diuinæ circa idem obiectum materiale, hoc est circa veritatem nostræ religionis: sed actus

tus fidei humanæ, cum nitatur motiui fallibili, est opinatiuus; ergo actus opinatiuus potest coniungi cum actu fidei diuinæ circa idem obiectum materiale.

3. Tertiò, eatenus actus opinionis non posset coniungi cum actu fidei diuinæ circa idem obiectum materiale, quatenus actus opinionis non posset dari sine actuali dubitatione, & formidine circa suum obiectum materiale, actus autem fidei excluderet essentialiter actualem dubitationem, & formidinem circa suum obiectum materiale; sed actus opinionis potest dari sine actuali dubitatione, & formidine circa suum obiectum materiale; ergo &c. Probat minor: nam actus opinionis differt ab actu scientiæ per hoc solum, quod actus scientiæ excludit formidinem, actus opinionis formidinem non excludit, eo pacto, quo peccatum mortale, & veniale differunt per hoc, quod peccatum mortale excludit gratiam, veniale non excludit gratiam; sed peccatum veniale non excludens gratiam potest coniungi cum peccato mortali excludente gratiam; ergo actus opinionis non excludens dubitationem, & formidinem, potest coniungi cum actu fidei, vel scientiæ, excludente dubitationem, & formidinem. Quod autem actus opinionis non solum non excludat formidinem, sed illam includat, & trahat essentialiter, vel saltem naturaliter, gratis assumitur, & non probatur.

4. Quartò Mathematicus cum paralogizans existimat se demonstrasse aliquam

Lib. V,

O

pro-

propositionem, quam verè non demonstravit, assentitur illi propositioni sine vlla dubitatione, & formidine; sed assentitur per actum opinionis, præsertim si propositio illa sit falsa; nam propositioni falsæ non possumus assentiri per alium actum, quam opinionis; ergo dari potest actus opinionis sine actuali formidine, ac proinde potest coniungi cum actu fidei.

5. Quintò, si actus opinionis non posset dari sine actuali formidine, & dubitatione, sicut cum aduertimus aliquid esse de fide, non possumus de illo dubitare, quin peccemus contra fidem, sic non possemus licitè illi assentiri per actum opinionis; siquidem eo ipso de eius veritate dubitaremus, & formidaremus.

6. Sextò, ex dictis quæstione 27. actus scientiæ, & fidei circa idem obiectum materiale partiale possunt coniungi; ergo etiam actus fidei, & opinionis circa idem obiectum materiale partiale possunt coniungi.

7. Respondeo plures posse distingui quæstiones. Prima est, vtrum actus opinionis includens actualem, & absolutam formidinem, ac dubitationem de suo obiecto materiali, possit coniungi cum actu fidei circa idem obiectum materiale totale, vel partiale.

8. Respondendum negatiuè cum Aristotele 1. Poster. textu 44. quem sequuntur omnes. Ratio est, quia sicut intellectus cum affirmat aliquod obiectum, non potest illud in eodem instanti negare, neque
per

per eundem, neque per diuersum actum; sic cum est certus de aliquo obiecto, non potest pro eodem instanti de eo dubitare, vel formidare, neque per eundem, neque per diuersum actum; sed per actum fidei intellectus est certus de obiecto non solum totali, sed etiam partiali: E. G. per actum fidei, quo credimus Deum esse trinum, & vnum, sumus certi etiam de hoc obiecto partiali, *Deus est trinus*; ergo cum habemus actum fidei, non possumus pro eodem instanti habere actum opinionis, quo actu dubitemus, vel formidemus de obiecto totali, vel partiali.

9. Hinc sequitur actum certum neque de potentia absoluta posse coniungi cum actu dubitationis includente actualem dubitationem, vel formidinem. Ratio est, quia actus sibi contradicentes non possunt coniungi in eodem intellectu: cuius vlterior ratio est, quia contradictoria sicut non possunt coniungi in esse reali, sic nec possunt coniungi in esse intentionali; sed actus certus, & dubitans, vel formidans sibi contradicunt; nam per actum certum dicimus, *obiectum omnino ita est*, per actum dubitantem, vel formidantem dicimus, *obiectum fortasse non ita est*; tales autem actus sibi contradicunt; ergo &c.

10. Quod actus certus, & actus dubitans, vel formidans actualiter sibi contradicant, adeoque sint inconiungibiles, probat Aristoteles 1. Poster. textu 44. ex eoq; S. Thomas in Commentario, & 2.2. quaest. 1. artic. 5. ad 3. quia per actum certum

dicimus obiectum non posse aliter se habere : per actum dubitantem dicimus , obiectum posse aliter se habere : contradictoria autem sunt , quod idem obiectum possit , & non possit aliter se habere . Vt hæc ratio habeat vim , non debet ità intelligi , vt dicat , actum certum affirmare obiectum secundum se non posse aliter se habere , ac proindè non esse contingens . Nam cum per actum certum affirmamus obiectum contingens , affirmamus simul illud secundum se posse aliter se habere : E. G. cum certissimè affirmo me existere , affirmo me contingenter existere , adeoque ità existere , vt possim non existere . Similiter cum per actum formidolosum , & incertum affirmamus obiectum necessarium , affirmamus obiectum non posse aliter se habere secundum se , & tamen dubitamus , an aliter se habeat : E. G. dum affirmo probabiliter diuinam essentiam necessariò virtualiter intrinsecè distingui à personalitatibus , affirmo diuinam essentiam ità distingui à personalitatibus , vt non possit non distingui , & tamen dubito , vtrum sic distinguatur . Debet igitur id ità intelligi , vt per actum certum dicamus , nullum obiectum apparens tali gradu apparentiæ , qua apparet id , quod certò affirmamus , posse aliter se habere , ac appareat : per actum autem formidantem , ac dubitantem dicamus : aliquod obiectum apparens tali gradu apparentiæ , quo apparet id , quod dubitanter affirmamus , posse aliter se habere , ac appareat . Vtrum autem certitudo

con-

consistat in hoc, vt affirmemus obiectum non posse aliter se habere in sensu explicato, dubitatio, vel formido consistat in hoc, vt affirmemus obiectum posse aliter se habere in sensu explicato, explicabitur infra. In praesentia ad probandam conclusionem non vsus sum hac ratione, sed duabus rationibus allatis, quae sunt faciliores.

11. Secunda quaestio est, vtrum actus fidei possit coniungi cum actu, quo de obiecto materiali credito dubitemus, & formidemus, non quidem absolute, sed cum quadam restrictione, & veluti conditione, hoc est, quantum est ex motiuo merè probabili: E. G. vtrum cum actu fidei, quò firmissimè credimus mundum non fuisse ab aeterno, possit coniungi actus, quo dicamus: *quantum est ex rationibus philosophicis, Mundus fortassè fuit ab aeterno.*

12. Respondeo affirmatiuè. Ratio est, quia per illum actum non dubito absolute, an Mundus fuerit ab aeterno, sed solum dubito vtrum rationes philosophicae efficaciter probent Mundum non fuisse ab aeterno; immò potius assero rationes philosophicas efficaciter, & certò id non probare; sed licet ego certissimè credam Mundum non fuisse ab aeterno, possum dubitare, vtrum haec veritas efficaciter, & certò probetur rationibus purè philosophicis; ergo &c. Rursus per illum actum non dubito absolute, vtrum Mundus fuerit ab aeterno, sed dubito solum conditionatè, hoc est sum paratus, & determinatus ad

dubitandum, & formidandum pro casu, pro quo temporalitas Mundi suaderetur mihi solis rationibus philosophicis, non autem suaderetur testimonio Dei; sed non repugnat, vt ego certissimè credam propter testimonium diuinum, Mundum non fuisse ab æterno, & simul sim paratus, & determinatus ad dubitandum de æternitate Mundi pro casu, pro quo hæc veritas non suaderetur testimonio diuino, sed solis rationibus philosophicis; ergo &c. Explicatur exemplo. Nam licet aliquis sit certus regem Hispaniæ absolutè esse potentio-rem singulis suis subditis, potest dubitare, vtrum Rex Hispaniæ præcisè, in quantum est Dominus alicuius parvæ Ciuitatis, sit potentior aliquibus suis subditis: nam per hunc actum dubitat solum, vtrum dominium talis ciuitatis secundum se præcisè sufficiat ad reddendum Regem Hispaniæ potentio-rem singulis suis subditis, paratus dubitare, vtrum esset potentior singulis suis subditis pro casu, pro quo esset Dominus illius tantum ciuitatis; ergo à pari &c.

13. Tertia quæstio est, vtrum actus, qui assentitur adæquatè obiecto propter moti-um merè probabile, & fallibile cognitum vt tale, dari possit sine actuali formidine, & dubitatione de suo obiecto materiali: E. G. vtrum actus, quo quis adæquatè credit Mundum non fuisse ab æterno propter solas rationes philosophicas, quas cognoscit vt merè probabiles, & fallibiles, possit dari sine actuali dubitatione

tionem, & formidine de existentia Mundi ab æterno?

14. Respondeo negatiuè. Probatur primò: nam impossibile est, vt quod nititur adæquatè fundamento instabili, & fluctuante, actu non fluctuet; sed actus nitens adæquatè motiuo fallibili cognito vt fallibili, nititur adæquatè fundamento fluctuante, cognito vt fluctuante: siquidem motiuum est fundamentum, quo nititur assensus; ergo impossibile est, vt assensus, qui nititur adæquatè motiuo fallibili cognito vt fallibili, actu non fluctuet; sed fluctuatio assensus consistit in dubitatione, & formidine, quibus ita assentitur, vt dicat *fortassè non ita est*; ergo &c.

15. Posset primò dici sufficere, vt actus fluctuet, & formidet radicaliter.

16. Sed contrà est, quia quod nititur adæquatè fundamento fluctuante, non potest actu, & formaliter non fluctuare; ergo assensus nitens adæquatè motiuo, quod cognoscitur vt fallibile, & fluctuans, non potest formaliter, & actu non fluctuare, dicendo, *fortassè non ita est*. Secundò assensus, qui nititur motiuo certo, & euidenti cognito vt certò, & euidenti, non solum radicaliter, sed formaliter, & actualiter est certus, & euidens; ergo assensus nitens adæquatè motiuo fallibili, & fluctuante cognito vt fallibili, & fluctuante, non solum radicaliter, sed formaliter, & actualiter fluctuat, & formidat, ne fortè realiter se habeat. Probatur consequentia: nam licet possit contingere, vt quod nititur

tur adæquatè fundamento stabili, & non fluctuante, tamen fluctuet, & dilabatur, eo pacto, quo domus adæquatè nitens fundamento stabilissimo, tamen potest fluctuare, & dilabi propter debilitatem parietum, tamen impossibile est, vt quod nititur adæquatè fundamento fluctuante, non fluctuet actu; ergo si assensus nitens adæquatè motiuo certo cognito vt certo, non potest non esse formaliter, & actu certus, à fortiori assensus nitens adæquatè motiuo fluctuante, non potest non esse formaliter, & actu fluctuans, & formidans. Ratio à priori est, quia licet possit impediri, ne effectus procedens à causa perfecta sit perfectus: aliquando enim effectus per accidens deficit à perfectione causæ, eo pacto, quo per accidens ex homine nascitur monstrum: tamen est impossibile, vt effectus procedens adæquatè à causa imperfecta non sit imperfectus imperfectione proportionali: E.G. est impossibile, vt ambulatio procedens à tibia clauda, non sit defectuosa, & claudicans; ergo assensus adæquatè procedens à motiuo claudicante cognito vt claudicante non potest non claudicare, & formidare.

17. Posset secundò responderi, quòd sicut assensus nitens motiuo certo habet perfectionum certitudinis, sic assensus nitens adæquatè motiuo incerto, & fluctuante caret perfectione certitudinis, & est incertus negatiuè: at non eo ipso habet positiuam imperfectionem formidinis, & dubitationis, per quam sit positiuè incertus

tus

tus, formidans, ac dubitans.

18. Sed contrà: nam motium fallibile cognitum vt fallibile sicut ex se mouet ad assensum incertum negatiuè, hoc est carentem perfectione certitudinis, sic mouet ad assensum incertum positiuè, hoc est habentem imperfectionem dubitationis, & formidinis; ergo sicut motium fallibile, si moueat adæquatè, non potest mouere ad actum, qui non sit negatiuè incertus, sic non potest mouere ad actum, qui non sit positiuè incertus, & formidans de obiecto propter fallibilitatem motiui. Confirmatur, & explicatur: nam bonum mixtum, malo cognitum vt tale non potest mouere ad amorem, & complacentiam boni, qui non habeat admixtam positiuam displicentiam mali, cum quo bonum apparet coniunctum; ergo motium fallibile cognitum vt fallibile non potest adæquatè mouere ad assensum obiecti materialis, qui assensus non habeat admixtam positiuam formidinem de falsitate talis obiecti propter fallibilitatem motiui adæquati. Hinc reiicitur doctrina dicentium, quod cum intellectus assentitur alicui obiecto cum actuali formidine, & dubitatione, formido, & dubitatio distinguuntur ab assensu. Nam sicut cum amamus bonum mixtum malo, amor, & complacentia boni habet secum identificatam displicentiam mali: sic cum assentimur obiecto cum formidine oppositi, assensus habet secum identificatam formidinem oppositi; & sicut bonum mixtum malo cognitum vt tale non potest

adæquatè mouere ad complacentiam, quæ non habeat secum identificatam displicentiam, sic motiuum fallibile cognitum vt fallibile non potest adæquatè mouere ad assensum, qui non habeat secum identificatam formidinem oppositi. Rursus sicut voluntas amans bonum mixtum malo non habet libertatem ad amandum bonum sine vlla displicentia mali: sic non habet libertatem faciendi, vt intellectus, dum assentitur obiecto adæquatè propter motiuum fallibile cognitum vt fallibile, assentiatur sine formidine actuali de opposito. Neque enim voluntas habet plus dominij in actus intellectus, quam in actus proprios. Demum sicut vt actus nitens motiuo incerto non habeat incertitudinem negatiuam, requiritur, vt non nitatur adæquatè motiuo incerto, sed vt etiam nitatur motiuo certo; sic vt actus nitens motiuo incerto, & fallibili careat positiua incertitudine, & formidine, requiritur, vt nitatur non solum motiuo fallibili, & incerto, sed etiam infallibili, & certo.

19. Probatur secundò conclusio. Nam repugnat, vt assensus careat formidine actuali, si innitatur adæquatè motiuo ex se inductiuo formidinis, & ex se inepto ad formidinem impediendam; sed motiuum fallibile cognitum vt fallibile tale est; ergo est impossibile, vt assensus nitens adæquatè motiuo fallibili cognito vt fallibili careat formidine actuali. Confirmatur: nam repugnat, vt si assensus adæquatè nititur motiuo ex se inductiuo formidinis, à tali assensu

assensu excludatur formido ab alio motiuo, quo non nititur assensus; eo pacto, quo est impossibile, vt si domus nititur adæquatè fundamento fluctuante, adeoque ex se inductiuo fluctuationis in domo, fluctuatio excludatur à domo ab alio fundamento, cui domus non nititur; sed assensus opinatiuus niteretur adæquatè motiuo fallibili cognito vt fallibili, adeoque ex se inductiuo formidinis; ergo impossibile est, vt motiuum certum, cui assensus opinatiuus non nititur, excludat ab assensu opinatiuo formidinem: sed motiuum fidei certum, cui assensus opinatiuus non nititur, excluderet à tali assensu formidinem; ergo &c. Probatur assumptum. Motiuum enim inducens certitudinem exclusiuam, formidinis ab aliquo actu, excludit ab illo formidinem, eo pacto, quo causa inducens lucem excludit tenebras: sed motiuum fidei inducit certitudinem excludentem, formidinem ab actu opinatiuo coexistente actui certo; ergo excludit formidinem ab actu opinatiuo.

20. Quarta quaestio est, vtrum cum assensu fidei possit circa idem obiectum materiale totale, vel parziale coniungi assensus nitens adæquatè motiuo fallibili cognito vt fallibili.

21. Respondeo negatiuè. Probatur ex dictis. Nam cum actu fidei certo non potest coniungi actus includens actualem formidinem, & dubitationem circa idem obiectum materiale totale, vel parziale; sed actus nitens adæquatè obiecto fallibili

cognito vt fallibili includit necessario actualem formidinem, & dubitationem, circa suum obiectum materiale, vt probatum est in responsione ad 3. quæstionem; ergo &c.

22. Quinta quæstio est, vtrum cum actu fidei possit coniungi actus, qui eidem obiecto materiali assentiatur propter motium fallibile cognitum vt fallibile, sed ita, vt de obiecto materiali non formidet actu, quia aliquo pacto nititur etiam motiuo infallibili fidei.

23. Respondeo probabile esse, quod possit. Probatur. Nam eatenus cum actu fidei certo non potest coniungi actus assentiens eidem obiecto materiali propter solum motium fallibile cognitum vt fallibile, quatenus talis actus eo ipso deberet actu formidare; sed si nitatur etiam motiuo infallibili non debet actu formidare, eo, pacto, quo domus nitens fundamento fluctuante, si nitatur etiam alio fundamento solido, ac potente impedire fluctuationem, potest actu non fluctuare; ergo &c. Intellectus igitur, dum credit Mundum non fuisse ab æterno propter authoritatem Dei, potest simul iudicare Mundum non fuisse ab æterno propter rationes philosophicas fallibiles cognitæ vt fallibiles, dubitaturus de hoc, nisi adesset etiam motium fidei, ac de facto non dubitans, quia adest etiam motium infallibile diuinæ authoritatis. Talis autem actus niteretur motiuo opinionis, coadiuuante motiuo fidei, adeoque primario niteretur motiuo opinionis, secundum

secundariò motiuo fidei, & quia niteretur primariò motiuo opinionis, esset assensus debilis, quia niteretur secundariò motiuo fidei, vt adiuuante motiuum opinionis, esset assensus actu non formidans.

24. Infertur primò, quod hic actus neque esset actus fidei, neque actus opinionis, sed esset actus tertiæ speciei mediæ, eo pacto, quo Lycisca neque est canis, neque lupus, sed est animal speciei mediæ inter canem, & lupum.

25. Infertur secundò, quod sicut ad hunc actum concurrunt motiuum opinionis, adiuuante motiuo fidei, sic concurrunt lumen naturale, adiuuante lumine supernaturali fidei. Rursus sicut canis per se non potest generare nisi canem, per accidens potest generare Lyciscam, quod est animal medium inter canem, & lupum, sic lumen fidei per se non potest producere nisi actum fidei, per accidens potest etiam concurrere ad actum medium.

26. Infertur tertiò talem actum non fore naturalem, sed metaphysicè supernaturalem. Ratio est, quia actus, ad quem non sufficit lumen naturale, est metaphysicè supernaturalis. Licet autem inter fidem, & opinionem detur species media, quæ neque sit fides, neque opinio, tamen inter actum naturalem, & supernaturalem non datur actus speciei mediæ, qui neque sit naturalis, neque supernaturalis: siquidem actus, qui non est naturalis, quia ad ipsum non sufficit lumen naturale, eo ipso est supernaturalis.

Sexta

27. Sexta quæstio est, vtrum cum actu fidei possit coniungi actus, qui nitatur motiui fallibili non cognito vt fallibili, sed existimato infallibili.

28. Respondeo negatiuè. Ratio est, quia solum motiuum infallibile potest mouere ad assensum sine vlla prorsus formidine, sicut solum motiuum infallibile potest mouere ad assensum positiuè certum; motiuum autem fallibile non potest mouere ad assensum sine vlla prorsus formidine, sicut non potest mouere ad assensum positiuè certum; sed actus fidei excludit omnem prorsus formidinem; ergo cum actu fidei non potest coniungi actus, quo intellectus assentiatur eidem obiecto materiali adæquatè propter motiuum fallibile. Nec dicas, quod tale motiuum existimatur infallibile, ideòq; potest mouere ad assensum sine vlla prorsus formidine. Nam motiuum fallibile non potest existimari infallibile, nisi per assensum falsum, & incertum, adeòque formidantem de fallibilitate talis motiui; sed cum quis assentitur obiecto adæquatè propter motiuum, quod ita existimat infallibile, vt formidet, ne fortè sit fallibile, eo ipso habet etiam aliquam saltem leuissimam formidinem de obiecto, cui assentitur; ergo &c. Vt igitur assensus, quo assentimur obiecto propter motiuum fallibile existimatum, infallibile careat omni formidine, ac proinde sit coniungibilis cum fide, debet niti etiam motiui fidei, vt dictum est in responsione ad quintam quæstionem.

Ex

29. Ex allata doctrina conciliari possunt quædam authoritates S. Thomæ, quæ videntur oppositæ. Nam 2.2.q.1.art.5. ad 4. docet expressè opinionem nō posse coniungi cum scientia, vel fide circa idem obiectum materiale, dicens. *Scientia enim cum opinione esse non potest simpliciter de eodem, quia de ratione scientiæ est, quod id, quod scitur, existimetur esse impossibile aliter se habere; de ratione autem opinionis est, quod id, quod est opinatum, existimetur possibile aliter se habere; sed id, quod fide tenetur, propter fidei certitudinem existimatur etiam impossibile aliter se habere.* At 3. parte, quæst. 9. art. 3. ad 2. docet, quod opinio causata per syllogismum dialecticum est via ad scientiam, & tamen acquisita scientia, potest manere cognitio causata per medium dialecticum; & 1.2. quæst. 67. art. 3. docet, posse hominem eandem conclusionem obiectiuam cognoscere simul per medium probabile, & per medium demonstratiuum.

30. Dicendum, quod S. Thomas docet cum actu scientiæ, & fidei non posse coniungi actum opinionis includentis actualem formidinem; & quia actus nitens adæquatè motiuo fallibili, & dialectico includit actualem formidinem; ideò docet cum actu scientiæ, vel fidei non posse coniungi actum nitentem adæquatè motiuo fallibili, & dialectico. At concedit cum actu fidei, & scientiæ posse coniungi cognitionem, quæ ita principaliter nitatur motiuo fallibili, & dialectico, vt etiam aliquo pacto

nitatur

nitatur, vel confirmetur motiuo infallibili scientiæ, vel fidei excludente à tali actu formidinem actualem. Quod hæc sit mens D. Thomæ, colligitur ex verbis ipsius. 3. enim parte, quæst. 9. artic. 3. ad 2. dicit: *Similiter opinio ex syllogismo dialectico causata est via ad scientiam, quæ per demonstrationem acquiritur: quæ tamen acquisita, potest remanere cognitio, quæ est per syllogismum dialecticum, quasi consequens scientiam demonstratiuam, quæ est per causam, quia ille, qui cognoscit causam, ex hoc magis potest cognoscere signa probabilia, ex quibus procedit dialecticus syllogismus; & sicut in Christo simul cum scientia beatitudinis manet scientia indita, non quasi via ad beatitudinem, sed quasi per beatitudinem confirmata. Potest igitur ex doctrina S. Thomæ cum fide, & scientia manere actus nitens motiuo probabili, sed perfectus, & confirmatus per scientiam, vel fidem, quia nimirum aliquo pacto nititur, & confirmatur motiuo infallibili scientiæ, vel fidei, vt explicatum est.*

31. Ad 1. distinguo maiorem: cum possunt coniungi plures causæ adæquatæ effectuum compossibilium, possunt coniungi tales effectus, concedo: effectuum incompossibilium, nego: distinguo eodem pacto minorem; & nego consequentiam: In quolibet liberè operante coniunguntur causæ adæquatæ actuum oppositorum, & tamen actus oppositi non possunt coniungi, puta amor, & odium eiusdem obiecti, quia sunt mutuò impossibiles; ergo vt
duo

duo effectus possint coniungi, non sufficit, ut causæ adæquatæ possint coniungi, sed requiritur, ut ipsi effectus non sint impossibiles, & oppositi; sed actus opinionis, utpotè includens actualem formidinem, est impossibilis cum actu fidei, & cum omni actu certo circa idem obiectum materiale, ut probatum est; ergo licet syllogismus fidei possit coniungi cum syllogismo probabili, tamen actus fidei certus non potest coniungi cum actu opinionis circa idem obiectum materiale. Confirmatur: nam syllogismus merè probabilis, ac actu dubitans, ac formidans de veritate præmissarum est causa adæquata conclusionum actu dubitantium de suo obiecto materiali, & tamen talis syllogismus potest coniungi cum syllogismo fidei, conclusio autem actu formidans non potest coniungi cum actu fidei circa idem obiectum materiale, ut fatentur aduersarij; ergo doctrina, & distinctio tradita admitenda etiam est ab aduersarijs. Addo, quod sicut tractio, qua ego traho baculum E.G. ad vnâ partem, puta ad partem orientalem, est causa adæquata motus baculi ad partem orientalem pro casu, pro quo baculus non trahatur æquali, vel maiori vi ad aliam partem, puta ad occidentalem: pro casu verò, pro quo baculus trahatur æquali, vel maiori vi ad partem occidentalem, non est causa adæquata motus ad partem orientalem, adeoque causa adæquata motus ad partem orientalem completur per negationem tractionis æqualis ad

ad alteram partem ; sic syllogismus probabilis pro casu , pro quo non adest syllogismus fidei , & imperium voluntatis determinans ad assensum certum , est causa adæquata conclusionis probabilis ; pro casu autem , pro quo intellectus per syllogismum fidei , & per imperium voluntatis determinatur ad assensum certum , non est causa adæquata assensus probabilis circa idem obiectum materiale , adeoque causa adæquata assensus opinatiui ultra syllogismum probabilem includit negationem determinationis ad actum certum circa idem obiectum materiale.

32. Ad 2. nego maiorem vniuersaliter sumptam , vel claritatis gratia illam distinguo : cum imperfectum est dispositio merè transiens , & per modum viæ ad perfectum , potest coniungi cum perfecto , nego maiorem ; si sit dispositio permanens , concedo : distinguo eodem pacto minorem ; & nego consequentiam . Plures formæ imperfectæ sunt dispositiones merè transeuntes ad formas perfectas , ac proinde non possunt coniungi cum formis perfectis : E. G. forma oui , quæ est imperfecta , est dispositio transiens ad formam perfectam pulli , ideoque est impossibilis cum forma perfecta pulli in eadem materia : idemque proportionaliter dic de formis omnium , & feminum . Dubitatio actualis est impossibilis cum certitudine , licet sit dispositio ad inueniendam certitudinem ; siquidem intellectus per hoc , quod bene dubitat , & suspicetur , disponitur ad acquirendam

dam certitudinem de rebus. In casu nostro fides humana, & omnis actus opinatiuus nitens motiuo merè probabili, licet sit dispositio ad actum certum, tamen quia includit aliquam formidinem actualem, non potest coniungi cum actu certo circa idem obiectum materiale. Apprehensio è conuerso potest, ac debet coniungi cum iudicio, quia non est dispositio transiens, sed permanens, siquidem non possumus ferrè iudicium de eo, quod eodem instanti non apprehendamus; sicut non possumus velle quod eodem tempore non cognoscamus.

33. Ad 3. concedo maiorem, & nego minorem. Ad probationem nego maiorem, ac dico, quod actus opinionis, & fidei differunt per hoc, quod actus fidei excludit formidinem, actus autem opinionis vtpotè nitens motiuo fallibili, formidinem non solum non excludit, sed etiam includit, vt probatum est ex professio.

34. Dices: peccatum veniale differt à mortali per hoc, quod peccatum mortale excludat gratiam, veniale gratiam non excludat, licèt nec includat; ergo actus opinatiuus differt à certo per hoc, quod assensus certus excludat formidinem, assensus opinatiuus non excludat, licet neque includat.

35. Respondeo, nego consequentiam. Disparitas est, quia peccatum veniale differt à mortali per hoc, quod peccatum mortale est grauis offensa Dei, adeoque excludit gratiam, & amicitiam diuinam:

pec-

peccatum autem veniale est levis transgressio legis; sed ex hoc, quod peccatum veniale sit levis solum transgressio legis, sequitur quidem, quod non excludat gratiam, at nullo pacto sequitur, quod gratiam includat; ergo &c. At actus opinativus differt à certo per hoc, quod actus opinativus nititur adæquatè fundamento, & motivo fluctuante; sed ex hoc, quod actus nitatur adæquatè fundamento, & motivo fluctuante, sequitur, ut non solum, nō excludat fluctuationem, & formidinem, sed ut illam includat, & actu fluctuet, ut probatum est; ergo &c.

36. Ad 4. nego maiorem. Cum Mathematicus aliquam propositionem non demonstravit, non potest habere certitudinem, sed solum opinionem de hoc, quod illam demonstraverit, siquidem de falsis non potest haberi certitudo, sed sola opinio; sed opinio cum nitatur motivo fluctuante, & fallibili, semper includit aliquam saltem leuissimam, & vix discernibilem fluctuationem, & formidinem; ergo Mathematicus cum falsò existimat se aliquam propositionem demonstrasse, formidat actu, utrum demonstraverit; sed si formidat actu de demonstratione, formidat actu de ijs, quæ se existimat demonstrasse; ergo &c.

37. Ad 5. concedo, quod cum aduertimus aliquid esse de fide, ac nos de illo non posse licitè formidare, non possumus illi assentiri per actum nitentem purè fallibili fundamento, sed tenemur assentiri,
vel

vel per actum nitentem adæquatè motiuo infallibili fidei, vel per actum nitentem motiuo fallibili vt coniuncto cum motiuo infallibili fidei, quem actum concessimus esse possibilem in responsione ad 5. quæst.

38. Ad 6. concedo antecedens, & nego consequentiam. Disparitas est, quia ad fidem requiritur, & sufficit, vt assentiatur obiecto simpliciter obscuro; sed complexum, cuius non omnes, sed aliquæ solum partes sint euidentés, simpliciter est obscurum; ergo per fidem possumus assentiri complexo, cuius aliquæ partes sint euidentés, ac proindè actus fidei potest coniungi cum actu euidentè circa obiectum materiale partiale. E conuerso cum per fidem assentimur alicui complexo, assentimur certò toti complexo, & singulis eius partibus, vt probatum est quæst. 27. sed repugnat, vt eidem assentiamur certò, & de illo formidemus actu; ergo cum actu fidei non potest coniungi actus opinionis de vlla parte complexi; siquidem talis actus includeret actualem dubitationem, & formidinem de tali parte, de qua per actum fidei essemus certi.

Q V A E S T I O XXX.

Vtrum, & qua libertate actus fidei sit liber?

1. **P**rimò videtur, quod posità consideratione motiuorum, propter quæ reli-

religio nostra apparet ut euidenter credibilis, non possumus suspendere assensum fidei, adeoque quod ex illa suppositione assensus fidei neque sit liber quoad exercitium. Posita enim sufficienti applicatione potentiae visuæ, & oculi ad obiectum visibile, non possumus suspendere visionem; ergo posita applicatione intellectus ad obiectum credibile, non possumus suspendere assensum; ergo sicut tota libertas videndi consistit in hoc, ut possumus oculum applicare, vel non applicare obiecto visibili, sic tota libertas credendi consistit in hoc, ut possumus per considerationem motiuorum applicare, vel non applicare intellectum obiecto credibili, & credendo.

2. Secundò videtur, quod saltè actus fidei, posita consideratione motiuorum, non sit liber quoad specificationem. Ut enim sit liber quoad specificationem, requiritur, ut possumus iudicare religionem nostram esse falsam; sed posito, quod cognoscamus euidenter religionem nostram esse prudenter credibilem, & credendam, ac non nisi imprudenter, & stultè posse asseri illam esse falsam, non possumus iudicare religionem nostram esse falsam; ergo &c. Probatur minor: nam intellectus non potest ferre iudicium, quod euidenter cognoscit esse prorsus improbabile, stultum, & imprudens.

3. Respondeo circa libertatem fidei plures posse fieri quæstiones. Prima est, *utrum actus fidei sit liber immediatè?*

Res-

4. Respondeo negatiuè cum omnibus fere Theologis contra Durandum. Probatur: nam soli actus elicit à potentia libera possunt esse immediatè liberi, itaut procedant à principio proximo indifferenti; sed sola voluntas est potentia libera, intellectus autem est potentia necessaria, vt disput. 21. de actibus humanis probauimus contra Durandum; ergo cum actus fidei sit actus intellectus, non potest esse immediatè liber, sed solum mediatè per denominationem ab actu voluntatis, quo liberè volumus credere.

5. Secunda quæstio est, vtrum possimus liberè applicare, vel non applicare intellectum ad considerata, vel non considerata motiua fidei.

6. Respondeo affirmatiuè, vt docent omnes, & patet experientia. Addo, quod hac libertate etiam plurimi actus euidentés sunt liberi; E.G. quia liberè considero demonstrationes mathematicas, assensus euidentis conclusioni mathematicæ est liber: & in casu nostro assensus, quo euidenter cognoscimus nostram religionem esse credibilem, & credendam, solet esse liber saltem quoad exercitium, quia auocando intellectum à consideratione motiuorum, possumus impedire talem assensum.

7. Tertia quæstio est, vtrum possimus liberè non assentiri alicui veritati, dum apparet nobis euidenter?

8. Respondeo negatiuè, vt dixi etiam quæstione 63. Logicæ, & vt patet experientia; alioquin qui commisit homicidium

dium E. G. & de eo interrogatur à Iudice, posset illud non fateri non solum Iudici, sed etiam sibi ipsi, suspendendo assensum, quo intra suam conscientiam, dicat se fecisse homicidium. Hinc sequitur, quod cum infidelibus, & hæreticis sufficienter proponuntur motiva nostræ religionis, non possunt suspendere assensum, seu dictamen conscientiæ, quo interius iudicent se obligari ad credendam nostram religionem. A fortiori non possumus negare aliquam veritatem, dum apparet euidenter.

9. Quarta quæstio est, vtrum necessitemur ad assentiendum alicui veritati non apparenti euidenter, sed solum probabiliter, vel credibiliter?

10. Respondeo negativè. Ratio est, quia intellectus nunquam necessitatur ad assensum, nisi conuincatur; sed sola euidentia habet vim conuincendi intellectum; ergo &c. Hinc sequitur, quod quia ex dictis non probatur euidenter, sed solum credibiliter nostram religionem esse veram, intellectus non necessitatur ad credendum nostram religionem esse veram, adeoque etiam posita cognitione euidenti de credibilitate nostræ religionis, possumus non credere, ac proindè liberè credimus, saltem libertate quoad exercitium.

11. Quinta quæstio est, vtrum vt intellectus assentiatur obiecto apparenti non euidenter, sed solum probabiliter, vel credibiliter, requiratur positium imperium volun-

voluntatis : an sufficiat , vt voluntas non impediatur assensum ?

12. Respondeo probabilius esse, quod requiratur positium imperium voluntatis. Ratio est, quia intellectus, cum non conuincitur, remanet indeterminatus; sed cum obiectum non apparet euidenter, intellectus non conuincitur; ergo cum obiectum non apparet euidenter, intellectus remanet indeterminatus; sed cum intellectus remanet indeterminatus, vt assentiatur, indiget positio imperio voluntatis determinantis, eo pacto, quo potentia motiua cum est indeterminata ad ambulandum, vt ambulet, indiget positio imperio voluntatis; ergo &c.

13. Dices: multis obiectis ineuidentibus assentimur sine imperio voluntatis; ergo &c.

14. Respondeo, distinguo antecedens; sine positio imperio discernibili, transeat: indiscernibili, nego. Sicut non possumus exercere vllum motum spontaneum, puta ambulandi, fricandi barbam &c. sine positio imperio voluntatis, & tamen talia imperia saepe sunt indiscernibilia; sic nulli obiecto ineuidenti possumus assentiri sine imperio saltem indiscernibili.

15. Addo, quod ex specialibus rationibus actus fidei non potest elici sine positio imperio voluntatis, vt contra opinionem, quae tribuitur Scoto, docent communiter Theologi, quos refert Cardinalis de Lugo disp. 10. sect. 1. num. 3. Obiecta enim ineuidentia non possumus credere

certò, & super omnia,excludendo omnem dubitationem, & formidinem, sine imperio voluntatis; sed per fidem Theologicam obiecta inevidentia credimus certò super omnia, & sine vlla dubitatione, & formidine; ergo &c. Confirmatur: nam experiatur vnusquisque, vtrum absque imperio voluntatis possit firmissimè credere, Deum esse trinum, & vnum.

16. Sexta quæstio est, vtrum ad credendum fide theologica, requiratur, vt actus, quo volumus credere, sit honestus, & supernaturalis?

17. Respondeo affirmatiuè cum communiiori opinione Theologorum, quos refert, & sequitur Cardinalis de Lugo, de fide disp. 10. sect. 1. num. 3. Ratio est, quia cum actus fidei theologicæ debeat esse supernaturalis, debet imperari per imperium voluntatis eiusdem ordinis, adeoque honestum, & supernaturale. Ideò Concilium Arausicanum secundum can. 5. dicit: *siquis sicut augmentum, sic etiam initium fidei, ipsumque credulitatis affectum, non per gratiæ donum, sed naturaliter nobis inesse dicit, Apostolicis Dogmatibus Aduersarius probatur.*

18. Dices: quid si quis velit credere ex motiuo vanæ gloriæ, adeoque per actum peccaminosum, & merè naturalem?

19. Respondeo, quod credet fide humana, ac merè naturali: & quia probabile est, quod sola fides theologica possit vltimò resolui in authoritatem Dei reuelantis, idè probabile est, quod credet per actum, qui

qui non resoluatur vltimò in authoritatem Dei reuelantis, sed in motiua humana. Voluntas porrò supernaturalis credendi vocari solet pia affectio, & pia credulitas: habitus per se infusus inclinans ad volendum credere propter ipsam honestatem credendi, vocari solet habitus piæ affectionis, seu piæ credulitatis, & infunditur simul cum habitu fidei, amittitur, cum amittitur habitus fidei, ideòque annexus est habitui fidei.

20. Dices: qui potest & vult credere fide theologia, credit fide theologia; sed qui ex motiuo vanæ gloriæ imperat sibi actum fidei theologicæ, potest, & vult credere fide theologia; ergo &c.

21. Respondeo, distinguo maiorem: qui potest, & voluntate proportionata vult credere fide theologia, credit fide theologia, concedo: voluntate improporcionata, nego: distinguo eodem pacto minorem; & nego consequentiam. Possumus credere fide theologia, si velimus voluntate proportionata, hoc est honesta, & supernaturali: non autem si velimus voluntate peccaminosa, adeòque improporcionata.

22. Septima quæstio est, vtrum cum cognoscimus euidenter religionem nostram esse prudenter credibilem, & credendam, ac non posse negari, nisi imprudenter, non solum simus liberi quoad exercitium, ità vt possimus non credere, sed etiam quoad specificationem, ità vt possimus discredere, affirmando religionem

nostram esse falsam. ?

23. Respondeo affirmatiuè . Probatur: nam cum voluntati proponuntur motiua , tùm ad eligendam obseruantiam , tùm ad eligendam transgressionem præcepti , etiam si cognoscamus euidenter nos debere eligere obseruantiam præcepti , transgressionem autem non posse eligere , nisi imprudenter , sumus liberi non solum ad eligendam , vel non eligendam obseruantiam præcepti , sed etiam ad eligendam obseruantiam , vel transgressionem præcepti ; ergo cum intellectui proponuntur motiua , & rationes , tùm ad affirmandum , quod religio nostra sit vera , tùm ad affirmandum , quod sit falsa , licet cognoscamus euidenter , quod prudenter debemus credere religionem nostram esse veram , & solum imprudenter possumus iudicare , quod sit falsa , tamen sumus liberi non solum ad credendum , & non credendum , sed etiam ad credendum religionem nostram esse veram , & ad affirmandum , quod sit falsa . Intellectus igitur , & voluntas conueniunt in hoc , quod cum habent motiua in vtramque partem , habent libertatem non solum quoad exercitium , sed etiam quoad specificationem : differunt in hoc , quod voluntas ita est libera , vt per se ipsam possit seipsam determinare ; intellectus autem non possit determinare seipsum , sed debeat determinari dependenter ab imperio voluntatis .

24. Concluditur , quod ad actum fidei
sumus

sumus multiplicetur liberi. Primò possumus intellectum liberè applicare, vel non applicare considerandis motiuis. Secundò possumus applicare considerandis efficacius motiuis pro hac, vel pro illa parte. Tertio posita euidenti cognitione de credibilitate, & de obligatione credendi, possumus credere, vel non credere, sed suspendere assensum. Quartò possumus credere super omnia, vel non super omnia, & etiam dubitare. Quintò demum possumus credere, vel discredere, afirmando religionem nostram esse falsam.

25. Ad 1. concedo antecedens, & distinguo consequens; ergo posita applicatione intellectus ad obiectum credibile, apparens euidenter, non possumus suspendere assensum, concedo: apparens ineuidenter, nego consequentiam. Sicut posita applicatione oculi ad obiectum visibile, non possumus suspendere visionem, sic posita applicatione intellectus ad obiectum, apparens euidenter, non possumus suspendere assensum euidentem: siquidem assensus euidentis est quædam visio intellectualis, qua videmus obiectum ità se habere. At posita applicatione intellectus ad obiectum apparens ineuidenter, de quo proinde non videmus, quo pacto se habeat, possumus suspendere assensum, præsertim si habeamus rationes pro vtraque parte.

26. Ad 2. respondeo primò argumentum nimis probare. Primò enim probat, quod cum cognoscimus euidenter nos non posse, nisi stultè, & imprudenter sus-

pendere assensum fidei, non possumus suspendere assensum. Sicut enim intellectus non potest ferrè iudicium, quod euidenter cognoscit esse stultum, & imprudens, sic non potest suspendere iudicium suspensione, quam euidenter cognoscat esse stultam, & imprudentem. Secundò probat, quod dum cognoscimus euidenter nos non posse nisi stultè, & imprudenter dubitare de veritate fidei, neque possumus dubitare: siquidem non possumus dubitare dubitatione, quam euidenter cognoscamus esse stultam, & imprudentem. Tertiò probat, quod cum euidenter cognoscimus nos non posse transgredi præceptum, nisi stultè, & imprudenter, non possumus eligere transgressionem præcepti. Nam non possumus facere electionem, quam euidenter cognoscamus esse stultam, & imprudentem.

27. Respondeo secundò directè nego minorem, & distinguo antecedens probationis distinctione, qua potest etiam distinguui minor: intellectus non potest ferrè iudicium, quod euidenter cognoscit esse imprudens, & stultum physicè, concedo: moraliter tantum, nego. Imprudens, & stultum moraliter est, quod fieri non potest, nisi peccando, & operando contra regulas honesti: prudens moraliter est, quod fieri potest, operando iuxta regulas honesti. Imprudens, & stultum physicè est, quod non potest fieri ab homine sanæ mentis: prudens physicè est, quod potest fieri ab homine sanæ mentis, si nolit operari iuxta regu-

regulas honesti. Intellectus potest ferre iudicium, quod euidenter cognoscat esse stultum, & imprudens moraliter, itaut non possit fieri, nisi peccando, & operando contra regulas honesti, ac de facto cum quis prorumpit in iudicium temerarium, cognoscens illud esse temerarium, facit iudicium, quod euidenter cognoscit esse stultum, & imprudens moraliter, hoc est peccaminosum, & contra regulas honesti.

At nō potest ferre iudicium, quod euidenter cognoscat esse imprudens physicè, ita ut fieri non possit ab homine sanæ mentis.

In casu nostro cognoscimus euidenter non posse asseri nostram religionem esse falsam, nisi stultè, & imprudenter in genere morali, non autem in genere physico; immò cognoscimus, quod rationes suadentes falsitatem nostræ religionis possunt mouere homines physicè sapientes, & prudentes, qui nolint operari iuxta regulas honesti, ad asserendum nostram religionem esse falsam. Confirmatur solutio: nam licet non possimus facere electionem, quam euidenter cognoscamus esse stultam, & imprudentem physicè, ita ut fieri nequeat ab homine sanæ mentis, tamen possumus facere electiones peccaminosas, cognoscendo euidenter illas esse moraliter stultas, & imprudentes; ergo à pari.

28. Dices: homo sanæ mentis non potest dicere: simpliciter, & absolutè probabilius est, religionem christianam esse veram, sed ego existimo illam esse falsam; ergo dum cognoscimus euidenter probabilius,

& credibilius esse, nostram religionem, esse veram, non possumus iudicare illam esse falsam.

29. Respondeo, distinguo antecedens: nisi pro falsitate religionis habeat credibilitatem physicam diuersæ rationis, transeat: si habeat credibilitatem physicam, diuersæ rationis, nego. Homo sanæ mentis, dum transgreditur præceptum ieiunandi E.G. dicit: *simpliciter, & absolutè eligibilis est ieiunare*; sed ego volo eligere oppositum minus eligibile; ergo à pari. Ratio est, quia sicut eligibiles sunt diuersæ rationis, sic credibilitates; ergo sicut voluntas, licet honestum sit simpliciter, & absolutè eligibilis iucundo, tamen quia eligibilitas iucundi est diuersæ rationis ab eligibilitate honesti, minorem eligibilitatem iucundi potest præferre maiori eligibilitati honesti; sic licet credibilitas nostræ religionis sit maior credibilitate purè physicà de falsitate nostræ religionis, tamen quia sunt credibilitates diuersæ rationis, siquidem ista est credibilitas naturalis, & sentui accômodatior, potest intellectus ex imperio voluntatis præferre credibilitatem naturalem purè physicam, & minorem, credibilitati supernaturali multò maiori.

30. Confirmatur: nam sæpè credibilia secundum sensum, & imaginationem, præferimus credibilioribus secundum rationem; ergo credibilia per rationes purè naturales possumus præferre credilibus secundum rationes supernaturales, quæ euiscamuster cognoscamus esse credibilia simpliciter;

simpliciter; & tunc iudicamus secundum sapientiam, & prudentiam carnis, de qua dicit Apostolus ad Rom. 8. *Prudentia carnis mors est: sapientia carnis inimica est Deo.*

Q V A E S T I O XXXI.

Vtrum fides diuina sit ita certa, ut per illam non possimus credere aliquid falsum?

1. **V**idetur, quod fide diuina possimus credere aliquid falsum: primò quia fide diuina possumus credere omnia à Deo reuelabilia; sed Deus de potentia absoluta potest reuelare aliquid falsum, ut docent Ocamus in 2. quæst. 2. artic. 8. & alij, quos refert Cardinalis de Lugo disp. 4. sect. 2. ergo &c.

2. Secundò fidelis omnia illa, quæ euidenter cognoscit esse prudenter credibilia, & credenda, potest, ac debet credere fide diuina; sed fidelis potest euidenter cognoscere esse credibilia, & credenda quædam falsa; ergo &c. Probatur minor: nam cum Parochus simul cum articulis veris proponit rustico aliquid falsum, puta Spiritum Sanctum fuisse incarnatum, rusticus cognoscit euidenter se obligari ad credendum etiam illud falsum.

3. Tertiò si dicatur, quod tunc articulus falsus creditur actu fidei humanæ, & acquisitæ, non autem infusæ, contra est,

P 5.

nam

nam per actum charitatis infusæ possumus dare eleemosynam non solum pauperi vero, sed etiam pauperi ficto, quem prudenter existimemus esse pauperem; ergo per actum fidei infusæ possumus credere non solum articulum verum, sed etiam falsum, quem prudenter existimemus esse verum, & à Deo reuelatum.

4. Quartò Iudæi antè Incarnationem poterant fide diuina credere Messiam, nondum venisse, sed venturum; sed poterant in eodem, vel simili actu fidei perseverare post incarnationem factam quidem, sed adhuc occultam; in eo autem casu talis actus fidei fuisset falsus; ergo &c.

5. Respondeo cum omnibus Theologis, fidem diuinam esse ità certam, vt non possimus fide diuina credere vllum falsum.

6. Probatur primò: nam cognitio fallibilis, & falsa non potest esse certa; sed fides diuina est certa; ergo &c. Probatur minor ex Scriptura, & Patribus. 1. ad Timotheum 1. Scio cui credidi, & certus sum: Actorum 26. secundum certissimam sectam nostræ religionis: Basilus in moralibus regula 80. cap. 21. Fides est certissima animi expletio de diuinorum veritate verborum: Chrysostomus homil. 21. in cap. 11. ad Hebræos: Fides dici non potest, nisi circa ea, quæ non videntur, certitudinem quis ampliùs habeat, quam circa ea, quæ videntur: Bernardus epist. 190. Fides est opinio, sed in veritate certa subsistit: Tridentinum sect. 6. cap. 9. cum nullus
scire

scire valeat certitudine fidei, cui non potest subesse falsum. Propter hæc, & alia testimonia, & præcipuè propter vltimum Tridentini existimo de fide, quod fides sit certa certitudine infallibilitatis ità, vt non non possit illi subesse falsum, hoc est ità, vt fide diuina non possimus credere aliquid falsum.

7. Probatur secundò: nam actus indifferens ad credenda vera, & falsa, non debet esse determinatus ad credendum certo, & sine formidine falsitatis, immò prudenter debet formidare de falsitate eorum, quæ credit; sed fides diuina est habitus determinatus ad credendum sine vlla formidine falsitatis; ergo &c.

8. Probatur tertiò: nam sicut actus virtutis moralis non potest esse malus, & inhonestus, sic actus virtutis intellectualis non potest esse falsus, ideòque Aristoteles 6. Ethicorum cap. 3. cum dixisset virtutem intellectualem esse habitum, quo affirmando, aut negando verum anima dicit, asserit existimationem, & opinionem non esse virtutes; nam existimatione, & opinione fieri potest, vt mentiamur: sed fides est virtus intellectualis, & quidem supernaturalis, & infusa, vt docent omnes, & vt dictum est quaestione quarta; ergo &c.

9. Probatur quartò: nam, vt patet ex authoritatibus Scripturæ, & Patrum allatis quaest. 12. Fides est, per quam ità credimus Deo, vt Spiritus Sanctus per internam illuminationem doceat nos supernaturaliter ea, quæ credimus; ergo sicut re-

pugnat, vt Spiritus Sanctus doceat nos falsa, sic repugnat, vt fide diuina credamus aliquid falsum. Fides ergo est certissima certitudine infallibilitatis fundata in infallibilitate luminis, & motiui, seu obiecti formalis mouentis ad assensum, siquidem non potest quicquam credere, nisi Spiritu Sancto interius id docente, & reuelante, ac per internam illuminationem mouente ad assensum.

10. Ad 1. Quidam asserunt Priscillianistas, de quibus agit Augustinus libro contra Mendacium, cap. 2. & libro de Hæresibus, Hæresi 70. docuisse Deum non solum posse mentiri, sed etiam pluries esse mentitum: ac eundem errorem Armenis tribuit Vido Carmelita libro de Hæresibus, Hæresi 30. licet Alphonsus de Castro libro de Hæresibus, verbo *Deus*, Hæresi 3. putet Armenos ab hoc errore fuisse immunes. Sed cuiuscunque fuerit hæc opinio, primò est hæretica, cum manifestè repugnet Scripturæ. Nam numerorum 23. dicitur: *Non est Deus quasi homo, vt mentiatur*: Ad Hæbr. 6. *Impossibile est mentiri Deum*: Ad Rom. 3. *est autem Deus verax: omnis autem homo mendax*. Secundò est blasphema; nam vnusquisque si illi dicatur, *mentiris*, vel *mentitus fuisti*, existimat sibi infligi contumeliam; ergo qui dicit Deum mentitum fuisse, est contumeliosus, & blasphemus in Deum. Tertiò repugnat lumini naturæ. Euidens enim est Deum habere omnes perfectiones simpliciter simplices, & similiter est euidens summam

Vera

veracitatem, per quam quis non possit mentiri, neque falsum dicere, esse perfectionem simpliciter simplicem. Quartò sequeretur Deum non esse dignum summa fide. Nam non debetur summa fides ei, qui potest mentiri, & falsum dicere.

11. Ocamus in 2. quaest. 2. artic. 8. & alij, quos refert Cardinalis de Lugo, disp. 4. sect. 2. docuerunt Deum nunquam esse mentitum, aut falsum dixisse, nec de potentia ordinaria posse mentiri, posse tamen mentiri, & falsum dicere de potentia absoluta. Gabriel in 3. distinct. 12. quaest. vnica insinuat Deum posse falsum dicere scienter, sed non posse mentiri, quia mentiri est falsum dicere loquutione inordinata; repugnat autem Deo, qui est prima regula, locutio inordinata.

12. Hæc opinio communiter reiicitur à Theologis, & censetur, vel hæretica, vel erronea. Valent siquidem contra illam argumenta allata, & sequitur fidem nostram non posse esse certam. Eatenus enim certò credimus Deo, quatenus existimamus, Deum non posse mentiri, nec falsum dicere; ergo si potest mentiri, vel falsum dicere, non possumus certò credere. Neque dicas, quòd certò credimus Deo, quia reuelauit se de facto nunquam esse mentitum, nec mentiturum, aut dicturum falsum. Nam si Deus potest de potentia absoluta mentiri, vel falsum dicere, possumus dubitare, vtrum mentitus fuerit, dum reuelauit se nunquam fuisse mentitum, aut mentiturum.

Dices :

13. Dices: Authores contrariæ sententiæ existimabant Deum posse dicere falsum, & tamen cum essent catholici, credebant certò nostram religionem esse veram; ergo ad certitudinem fidei non requiritur, vt existimemus Deum non posse mentiri, nec falsum dicere.

14. Respondeo, distingo consequens: ad certitudinem fidei, non requiritur, vt practicè, & sub aliquo conceptu existimemus Deum non posse mentiri, nego: speculatiuè, & sub alio conceptu æquiuoco, transeat. Authores relati, dum credebant, practicè existimabant Deum esse dignum summa fide; sed Deum esse dignum summa fide includit, Deum non posse mentiri; ergò practicè existimabant Deum non posse mentiri, licet speculatiuè dicerent, Deum posse mentiri, hoc est posse ponere aliquod signum rei falsæ, quod non sufficit ad dicendum falsum, & ad mentiendum, ideòque patiebantur aliquam æquiocationem in conceptu mendacijs, & falsæ locutionis.

15. Ad 2. nego minorem. Fidelis debet quidem conari ad credendum fide diuina ea, quæ euidenter cognoscit esse prudenter credibilia, & credenda, sed quæ non sunt vera, & diuinitus reuelata non potest credere fide diuina, sed solum fide humana, & acquisita, quæ non resoluatur ultimò in diuinam reuelationem, sed in motiua humana; fide autem diuina potest credere solum ea, quæ sunt vera, & quæ à Deo docetur interius. Hinc sequitur actum

actum fidei diuinæ, & infusæ semper differre ex obiecto formali ab actu fidei non diuinæ. Ratio est, quia actus fidei diuinæ resolvitur ultimò in diuinam reuelationem, tanquam in obiectum formale: actus verò, qui non sit fidei diuinæ, non resolvitur ultimò in diuinam reuelationem, tanquam in obiectum formale.

16. Ad 3. concedo antecedens, & nego consequentiam. Disparitas est, quia ad virtutem voluntatis requiritur, & sufficit, ut actus eius sit honestus; sed actus, quo volumus dare, & de facto damus elemosynam pauperi ficto, quem prudenter existimamus esse pauperem verum, est actus honestus; ergo potest esse elicited à charitate, quæ est virtus voluntatis. Proportionaliter ad actum fidei, quæ est virtus intellectus, requiritur, ut sit verus; sed actus, quo credimus articulum falsum, quem prudenter existimamus esse verum, est falsus; ergo non potest esse actus fidei infusæ, quæ est virtus intellectus. Hinc sequitur, quod in casu posito, licet actus, quo credimus articulum falsum, non sit actus fidei infusæ, tamen actus, quo volumus credere talem articulum, est actus piæ affectionis infusæ, quæ est virtus voluntatis.

17. Ad 4. distingo maiorem. Ante Incarnationem Iudæus poterat credere Messiam non venisse tempore, quo reuelatum fuerat non venisse, sed venturum; post, concedo: alio tempore, nego: distingo eodem pacto minorem; & nego conse-

consequentiam. Iudæi ante Incarnationem poterant credere Christum non venisse tempore, quo reuelatum erat non venisse; si autem in eo, vel simili actu perseverassent post Incarnationem, talis actus semper fuisset verus, quia semper fuisset verum Christum non venisse pro eo tempore.

QVÆSTIO XXXII.

Vtrum ad credendum Fide Diuina requiratur, vt credenda proponantur tali credibilitate, vt æquali proponi non possit vllum falsum?

1. **V**idetur non requiri: primò quia æquali credibilitate à Parochis Lutheranis E. G. pueris, & rusticis proponuntur falsa dogmata lutheranismi, ac à Parochis Catholicis proponantur pueris, & rusticis vera dogmata catholica; sed hæc credibilitas est sufficiens ad hoc, vt pueri, & rustici catholici credant fide diuina dogmata catholica; ergo ad credendum fide diuina non requiritur, vt credenda proponantur tanta credibilitate, vt æquali non possit proponi vllum falsum.

2. Secundò cum Parochus proponit rustico duo dogmata, alterum verum, puta Incarnationem Verbi, alterum falsum, puta incarnationem Spiritus Sancti, æquali credibi-

dibilitate est prudenter ab illo rustico credibile, & credendum dogma falsum, ac verum; sed dogma verum potest credi fide diuina; ergo &c.

3. Respondeo cum Suario disput. 3. sect. 13. num. 9. contra Cardinalem de Lugo disp. 4. sect. 5. num. 83. & sequentibus: ad credendum fide diuina, & super omnia, requiritur, vt credenda proponantur tanta credibilitate, vt æquali credibilitate non possit proponi vllum falsum.

4. Probatur primò: nam vt assentiamur alicui obiecto certitudine scientiæ, requiritur, vt illud proponatur nobis tanta credibilitate, vt æquali non possit proponi falsum, ideòque Mathematicus non potest certitudine scientiæ assentiri propositioni veræ, quæ proponatur credibilitate non non maiori, quam per paralogismum proponi possit propositio falsa; ergo vt obiectum credamus certitudine fidei, requiritur, vt proponatur tanta credibilitate, vt æquali non possit proponi falsum.

5. Probatur secundò: nam credibilitas habens prædicatum, quod si innotesceret, deberet inducere prudentem dubitationem, non sufficit ad certitudinem fidei diuinæ; sed credibilitas tanta, vt æquali possit subesse falsum, habet prædicatum, quod si innotesceret, deberet inducere prudentem formidinem, & dubitationem; ergo non sufficit ad certitudinem fidei diuinæ. Probatur minor: nam qui cognoscit aliquam propositionem esse prudenter credibilem, & credendam, sed simul aduertit æquali

æquali credibilitate posse sibi proponi dogmata falsa, eo ipso debet prudenter dubitare, ne etiam de facto proponatur dogma falsum; eo pacto, quo Mathematicus existimans se aliquam propositionem demonstrasse, sed aduertens, quod potest æqualiter existimare se demonstrasse, cum paralogizat, debet prudenter dubitare, ne etiam de facto paralogizet.

6. Dices, quod eo ipso, quod aliquis aduertit credibilitatem esse tantam, ut æquali possit subesse falsum, minuitur credibilitas; ergo non est mirum, quod non sufficiat ad certitudinem fidei, licet cum hoc non aduertitur, credibilitas sit maior, ac proindè sufficiens ad certitudinem fidei.

7. Sed contra: nam ex hoc sequitur talem credibilitatem sufficere ad certitudinem fidei solum per accidens, & ex ignorantia, vel inaduertentia alicuius prædicati, quod illi de facto conuenit, nimirum ex ignorantia, vel inaduertentia, quod æquali credibilitati potest subesse falsum; hoc autem est absurdum: nam credibilitas sufficiens ad fidem non fundatur in ignorantia, vel inaduertentia prædicati, quod illi de facto conueniat.

8. Probatur tertio: nam ut religio nostra sit credenda fide diuina à tota Ecclesia, debet habere tantam credibilitatem, ut æquali non possit subesse falsum, adeoque si falsa religio posset habere æqualem credibilitatem, ac habeat de facto religio christiana, & catholica, religio christiana, & catholica non esset credenda fide diuina;
ergo

ergo ad hoc, vt nostra religio sit alicui credenda fide diuina, debet illi proponi tanta credibilitate, vt æquali non possit subesse falsum. Probatur consequentia. Nam ideò fides totius Ecclesiæ fundari debet in credibilitate tanta, vt æquali non possit subesse falsum, quia fides totius Ecclesiæ debet esse certissima, & exclusiua omnis formidinis; sed etiam fides vniuscuiusque debet esse certissima, & exclusiua omnis formidinis; ergo &c.

9. Confirmatur: nam cum Deus immediatè reuelat aliquid alicui ab illo credendum fide diuina, debet reuelare credibilitate tanta, vt æquali non possit subesse falsum, adeòque vt Daemon transfigurans se in Angelum lucis non possit causare credibilitatem æqualem; ergo etiam cum Deus per Parochos, & alios ministros Ecclesiæ reuelat aliquid alicui vt credendum fide diuina, reuelat tanta credibilitate, vt æquali non possit subesse falsum.

10. Dicendum secundò: credibilitas tanta, vt æquali possit subesse falsum, sufficit ad credendum fide, quæ sit inferior diuina, & includat aliquam formidinem, saltem virtualem, per quam credens sit paratus recedere à tali actu credendi, si maiori credibilitate proponatur oppositum.

11. Probatur: nam cum Parocho proponente incarnationem Verbi, & Spiritus Sancti, rusticus credit incarnationem Spiritus Sancti, credit ita, vt sit paratus discredere incarnationem Spiritus Sancti, si Parochus ipse, vel alius fide dignus paulò

paulò post doceat Spiritum Sanctum non esse incarnatum; ergo etiam incarnationem Verbi credit ita, vt sit paratus illam discredere; sed cum credimus fide diuina, credimus ita, vt simus parati nunquam discredere, etiamsi ipse proponens, vel quilibet homo, aut Angelus proponat oppositum, iuxta illud Apostoli ad Galat. 1. *Licet nos ipsi, aut Angelus de Cœlo euangelizet vobis præterquam quod euangelizauimus vobis, anathema sit; ergo &c.*

12. Debet aduerti, quod ad credendum fide diuina, requiritur quidem, vt credenda proponantur tanta credibilitate, vt æquali non possit subesse falsum, sed non requiritur, vt hoc ipsum cognoscatur euidenter; immò ad obscuritatem fidei requiritur, vt non cognoscatur euidenter. Qui enim cognoscit euidenter credenda, proponi tanta credibilitate, vt æquali non possit subesse falsum, cognoscit euidenter credenda non esse falsa, sed vera.

13. Ad 1. nego minorem, ac dico, quod pueri, & rustici catholicorum, cum dogmata catholica proponuntur illis credibilitate non maiori, quam pueris, & rusticis hæreticorum proponantur dogmata hæretica, possunt quidem, ac debent illa credere fide aliqua inferiore, sed nondum possunt, nec debent credere fide diuina, per quam sint parati nunquam illa discredere, etiamsi Angelus de Cœlo euangelizaret aliter, quam euangelizatum est.

14. Dices primò: pueris, & rusticis catholicorum penè nunquam dogmata catho-

catholica proponuntur tanta credibilitate, ut æquali non possit proponi falsum; ergo pueri, & rustici catholici penè nunquam perueniunt ad credendum fide diuina, quod est absurdum.

15. Respondeo, negando antecedens. Apud catholicos ex narrationibus parentum, & domesticorum, ex instructionibus Parochorum, & Magistrorum, ex concionibus, ex sacris imaginibus, ex ceremonijs Ecclesiæ, ex votiuis tabellis, & ex pluribus alijs diuulgata est fama constantissima, quod nostra religio fuerit promissa, & prænunciata per innumera vaticinia, propagata, & confirmata per innumera miracula; quod sit sanctissima, in eaque fuerint semper viri sanctissimi; quod propagata fuerit continua successione à Christo vsque ad nos; & quod omnibus alijs Sectis conueniunt prorsus opposita; sed hæc fama est supernaturalis, & æqualis fama non est, nec potest esse in vlla alia secta; immò in sectis hæreticorum est fama nouitatis, negationis miraculorum, cum hæretici irrideant miracula: quod earum Authores fuerint viri scelesti &c. ergo apud catholicos etiam simplices, & rustici facilè possunt ex hac fama obtinere tantam credibilitatem de veritate religionis catholicæ, ut æqualis non possit obtineri in vlla secta falsa; obtenta autem ea credibilitate, possunt credere fide diuina, accedente præsertim interna illuminatione Spiritus Sancti. Ratio, quare fama æqualis illi, quæ datur pro religione catholica,

dari

dari non possit pro vlla secta falsa, est, quia fama proportionatur fundamentis, ex quibus causatur; ergo, sicut fundamenta pro fide catholica sunt tanta, vt aqualia dari non possint pro vlla secta falsa, sic fama pro religione catholica est tantà, vt aqualis dari non possit pro vlla secta falsa. De hac autem fama, in qua fundatur potentia credendi fide diuina, loquitur Apostolus ad Rom. 13. dicens: *Et quidem in omnem terram exiuit sonus eorum, Et in fines orbis terræ verba eorum.* Quia hac fama est supernaturalis, credibilitas fundatur in signis supernatur alibus. Si verò ad aliquam regionem non peruenerit fama supernaturalis sufficiens ad fundandam credibilitatem fidei diuinæ, Deus vt in ea regione religio nostra reddatur credibilis fide diuina, debet facere noua miracula, vel supplere per internas, & extraordinarias illuminationes.

16. Dices secundo: per allatam doctrinam explicatur quidem, quo pacto simplices, & rustici possint fide diuina credere nostram religionem esse veram, & sic implicitè credere omnia eius dogmata, sed non explicatur, quo pacto possint fide diuina credere dogmata particularia; ergo &c.

17. Respondeo, negando antecedens. Posito, quod simplices, & rustici fide diuina credant nostram religionem esse veram, possunt fide diuina credere explicitè, & in particulari omnia dogmata, de quibus audiunt fama constanti, quod sint dogmata

mata nostræ religionis ; sed facile possunt fama constanti audire dogmata, quæ continentur in signo crucis , in symbolo Apostolorum , nec non de existentia Christi in Eucharistia &c. esse dogmata nostræ religionis ; ergo facile possunt illa credere etiam explicitè fide diuina . Quia tamen non satis percipiunt sensum plurium dogmatum , illa credunt in eo sensu , in quo creduntur ab Ecclesia. Dogmata, quæ proponuntur à Parochis, vel à Magistris ita, ut adhuc qui instruntur , ex fama constanti non sciant illa credi ab Ecclesia catholica, possunt , ac debent credere fide inferiori, & quasi conditionata , si creduntur ab Ecclesia, ita ut sint parati discredere , si fama constanti inueniant , illa non credi ab Ecclesia . Addo , quod cum nostra religio , eiusque dogmata proponuntur per talem famam, ut æquali non possit subesse falsum, Deus de lege ordinaria dat internam illuminationem necessariam ad credendum fide diuina; cum non proponuntur tali fama, ut æquali non possit subesse falsum , Deus de lege ordinaria non dat talem internam illuminationem; potest tamen illam dare extraordinariè , & tunc licet credibilitas externa sit tanta , ut æquali possit subesse falsum , credibilitas interna per extraordinariam illuminationem Spiritus Sancti est tanta , ut æquali non possit subesse falsum , ideoque est sufficiens ad credendum fide diuina .

18. Ad 2. nego minorem. Ex dictis ut rusticus fide diuina credat incarnationem Verbi,

Verbi, debet illi ex fama, cui non possit subesse falsum, innotescere incarnationem Verbi credi ab Ecclesia; sed in casu posito Incarnatio Verbi non proponitur ut credita ab Ecclesia ex fama, cui non possit subesse falsum, sed proponitur ex solo testimonio Parochi, cui de facto subest falsum, cum Parochus simul testetur ab Ecclesia credi etiam incarnationem Spiritus Sancti; ergo rusticus in eo casu incarnationem Verbi non credit fide diuina, sed fide inferiori. Confirmatur: nam si rusticus aduerteret in eo casu æquali credibilitate sibi proponi verum, ac falsum, procul dubio neque verum, neque falsum posset credere fide diuina; ergo etiam si hoc non aduertat, neque articulum verum, neque falsum potest credere fide diuina, sed solum fide inferiori. Si tamen articulus verus de Incarnatione Verbi E. G. rustico iam innotuerit ex fama, & à Parocho proponatur cum articulo falso de Incarnatione Spiritus Sancti, articulus verus est credibilior falso, & poterit credi fide diuina.

19. Quæritur, utrum per fidem possimus discernere articulos veros à falsis.

20. Respondeo quæstionem habere posse plures sensus. Primus sensus est, utrum cum credimus, discernamus articulum, quem credimus, non esse falsum. Dicendum, quod sicut certo, sed ineuidenter credimus, sic certo sed ineuidenter discernimus articulum creditum esse verum, & non esse falsum.

21. Secundus sensus est, utrum cum cre-

cre-

credimus fide diuina, discernamus nos credere fide diuina, dicendum, quod certo, sed obscure discernimus nos credere fide diuina ex obiecto, hoc est nos credere obiectum à Deo reuelatum, & credendum fide diuina: at non discernimus certo, sed solum probabiliter, nos credere fide diuina ex parte actus, hoc est nos exercere actum supernaturalē fidei theologicæ. Ratio est, quia sicut cum diligimus Deum super omnia dilectione sufficiente ad iustificandum, non sumus certi certitudine fidei, quod diligimus Deum fide theologica sufficiente ad iustificationem: alioqui essemus certi de nostra iustificatione: sic cum credimus, nō sumus certi certitudine fidei, quod credimus fide theologica ex parte actus, sed de hoc habemus solam probabilitatem.

22. Tertius sensus est, vtrum qui credit duos articulos, alterum verum, puta Incarnationem Verbi, alterum falsum, puta incarnationem Spiritus Sancti, discernat articulum verum à falso.

23. Respondeo primò, quod si vtrumque credit, procul dubio non discernit alterum esse verum, alterum falsum, alioquin crederet articulum falsum, & simul discerneret illum esse falsum, quod implicat. Addo, quod si articulum verum, puta incarnationem Verbi, credit fide diuina, discernit se maiori credibilitate credere incarnationem Verbi, quam incarnationem Spiritus Sancti, & in hoc sensu discernit credibilitatem articuli veri à credibilitate articuli falsi. Si vero etiam

Lib.V.

Q

arti-

articulum verum credat fide non diuina , cum credat vtrumque æquali credibilitate , non discernit credibilitatem articuli veri à credibilitate articuli falsi . In eodem sensu qui credit articulum verum fide diuina , potest discernere , quod maiori credibilitate credit , quam cum credidit articulos falsos . E. G. Hæreticus conuersus ad fidem potest discernere se maiori credibilitate , & firmitate credere religionem catholicam , quam ante crediderit dogmata hæretica .

24. Quæri potest secundò , in quo sensu dicatur fides esse necessaria ad merendum , ità vt sine actu fidei non possimus habere vllum actum meritorium præmij supernaturalis .

25. Respondeo quod hæc intelligenda sunt de fide latissimè sumpta , in quantum nomine fidei significatur omnis cogitatio supernaturalis procedens ex illuminatione Spiritus Sancti . Nam sine aliqua supernaturali cogitatione non possumus exercere vllum actum meritorium de congruo , vel de condigno vllius præmij supernaturalis . Cæterum antequam credamus fide diuina , & super omnia , possumus exercere actum , quo volumus credere , qui actus est supernaturalis , & meritorius de congruo præmij supernaturalis : possumus etiam antequam credamus fide diuina , ex illuminatione Spiritus Sancti velle audire Prædicatorem fidei , & illi credere fide humana , quæ disponamur ad credendum fide diuina , & possumus etiam elicere alios actus pios
dispo-

disponentes ad fidem diuinam .

26. Addo in adultis non baptizatis ad iustificationem etiam obtinendam per sacramentum baptismi, necessarium esse, ut prius credant fide diuina : siquidem sine actu fidei diuinæ non possunt alicere actus contritionis perfectæ, nec imperfectæ sufficientis ad iustificandum in sacramento .

QVÆSTIO XXXIII.

Verum assensus fidei sit certior quolibet assensu naturali ?

1. PRIMò videtur vera sententia, quæ tribuitur Heruzo, & in quam inclinat Cardinalis de Lugo disp. 6. sect. 3. num. 28. docens assensum fidei certitudine infallibilitatis, & indefectibilitatis à verò non esse certiozem assensibus naturalibus, quibus iudicamus totum esse maius sua parte : non posse idem esse, & non esse &c. Certitudo enim infallibilitatis consistit in hoc, ut actus sit necessariò verus, & implicet contradictionem, quod sit falsus ; sed æquè est necessariò verus, & æquè implicat contradictionem, ut sit falsus actus naturalis, quo iudico omne totum esse maius sua parte, ac actus fidei, quo credo, Deum esse trinum, & vnum ; ergo &c. Probatur minor : nam quæ sunt metaphysicè necessaria, ita ut per nullam potentiam possint aliter se habere, sunt æqualiter

Q 2

ne-

necessaria , & quæ sunt metaphysicè impossibilia sunt æqualiter impossibilia . Huius ratio est, quia necessitas, & impossibilitas metaphysica est summa , ac proinde non suscipit magis, & minùs .

2. Secūdo videtur actus fidei certitudine adhesionis , & indubitabilitatis esse minùs certus, quàm actus naturales euidentés, puta quibus iudicamus, omne totum esse maius parte &c. Nam firmitus adhæremus obiectis, quibus non possumus non adhærere, & de quibus non possumus dubitare, quàm obiectis, quibus possumus non adhærere, & de quibus possumus dubitare; sed obiectis euidentibus adhæremus ità, vt non possimus illis non adhærere, & vt de illis dubitare nequeamus; obiectis creditis adhæremus ità, vt possimus illis non adhærere, & vt de illis possimus dubitare; ergo &c.

3. Respondeo actum fidei diuinæ certitudine infallibilitatis, & indefectibilitatis à verò esse certiorē quolibet assensu naturali. Probatur: nam certitudo infallibilitatis est perfectio actus, per quam illi repugnat falsitas; ergo actus quo plus habet de tali perfectione, eò est certior certitudine infallibilitatis: & quia cognitio diuina habet infinitam perfectionem veritatis exclusiuam falsitatis, ideò cognitio diuina est infinitè certa certitudine infallibilitatis, & est infinitè certior qualibet cognitione creata; sed actus fidei plus habet de perfectione exclusiua falsitatis, quàm vllus actus naturalis; ergo &c.

Pro-

Probatur assumptum: nam actus creatus, quo magis participat infallibilem veritatem Dei, eò plus habet de perfectione exclusivæ falsitatis; sed actus fidei divinæ participat infallibilem veritatem Dei participatione supernaturali, & nititur immediatè divina veritate, ut docente, adeòq; perfectiùs participat divinam veritatem, quam quilibet actus naturalis, qui divinam veritatem participat participatione purè naturali, & non nititur immediatè divina veritate, ut docente; ergo &c.

4. Hinc sequitur actum fidei, quo perfectior est, eò certior esse certitudine infallibilitatis. Sequitur etiam visionem Beatam: certitudine infallibilitatis certior esse actu fidei. Ratio est, quia magis participat divinam veritatem, quam actus fidei, & nititur divina veritate intellecta immediatè, & intuitivè per se ipsam, cum actus fidei nitatur divina veritate intellecta abstractivè per creaturas. De certitudine infallibilitatis, qua fides est certior omnibus naturalibus disciplinis, loquitur Scriptura, dum 2. Petri 1. dicit: *habemus firmiorem propheticum sermonem*; & Lucæ 21. *Cælum, & terra transibunt: verba autem mea non transibunt.*

5. Dicendum secundo: assensus fidei divinæ etiam certitudine adhesionis, & indubitabilitatis est certior quolibet assensu naturali.

6. Probatur primò ex Patribus. Basilius in Psalmum 115. *Fides supra ratio-*

Q 3

nales

nales methodos animam ad assensum tra-
hens : Chrysostomus homilia 12. in epist.
ad Hebreos : Fides dici non potest , nisi
cum circa ea , quæ non videntur , amplius ,
quam circa ea , quæ videntur , certitudinem
quis habuerit : Riccardus de Sancto Victo-
re lib. 1. de Trinit. cap. 2. Quotquot vera-
citer fideles sumus , nihil certius tenemus ,
quam quod fide credimus ; sed hæc testi-
mônia non loquuntur de sola certitudine
infallibilitatis , sed etiam de certitudine
adhesionis , siquidem Patres hortando nos
ad firmissimè credendum certitudine ad-
hætionis , addunt non mereri nomen fidei ,
nisi certius credamus quæ à Deo sunt re-
uelata , quam quælibet alia ; ergo &c.

7. Probarur secundò : nam proportio-
 naliter per fidem debemus intellectualiter
 adherere diuinæ veritati reuelanti , ac per
 charitatem debeamus affectiuè adherere
 diuinæ bonitati ; sed per charitatem debe-
 mus affectiuè adherere diuinæ bonitati ,
 amando Deum , plusquam amemus vllum
 bonum creatum ; ergo per fidem debemus
 intellectualiter adherere diuinæ veritati
 reuelanti , credendo Deo magis , quam vlli
 alteri motiuo creato . Ratio vtriusque est ,
 quia sicut diuina bonitas etiam obscurè , &
 per fidem cognita meretur , vt illam ame-
 mus super omnia bona creata ; sic diuina
 veritas reuelans etiam obscurè cognita
 meretur , vt illi credamus , plusquam om-
 nibus alijs motiuis .

8. Infertur , in quo sensu per fidem
 diuinam credamus super omnia : Dicen-
 dum ,

dum, quo credimus super omnia, in quantum credimus Deo reuelanti maiori certitudine adhaesionis, quam cuilibet alteri motiui naturali. Sicut igitur licet per charitatem amemus Deum super omnia, tamen qui habet maiorem charitatem, magis amat, & Beati magis amant, quam viatores; sic licet per fidem Deo credamus super omnia, tamen qui habet maiorem fidem, magis, & certius credit; & Beati per visionem magis, & certius adherent diuinæ veritati, quam viatores per fidem; & ex Beatis qui magis videt Deum, magis adhæret diuinæ veritati, quam qui minus videt. Hæc certitudo fidei explicatur per illam conditionalem ex suppositione impossibili: *si per impossibile necessitaretur vel ad negandum Deum esse trinum, & unum, vel ad negandum quatuor, & tria facere septem, potius negarem hoc, quam illud.*

9. Dices: possibile est imprudenter negare Deum esse trinum, & unum: impossibile est negare quatuor, & tria facere septem; ergo posito actu conditionali dicimus, quod faceremus potius impossibile, quam possibile, quod est absurdum.

10. Respondeo, quod pro eo casu impossibili, possibile esset negare quatuor, & tria facere septem, licet hoc obiectum esset euidens; ergo possumus facere actum, quo pro eo casu potius vellemus negare quatuor, & tria facere septem, quam Deum esse trinum, & unum. Habemus autem etiam apud Patres exempla actuum

Q 4

sub

sub conditione impossibili, ut cum Augustinus lib. 7. Confessionum cap. 10. dicit : *Facilius dubitarem vivere me , quam non esse veritatem, eam audiui in corde* . Immò certitudinem fidei per conditionalem sub conditione impossibili explicat Apostolus ad Galat. 1. dicens : *licet nos, aut Angelus de Cælo euangelizet vobis , præterquam quod euangelizauimus vobis , anathema sit* . Est enim conditio impossibilis, quod Angelus de Cælo , adeoque beatus , & impeccabilis , euangelizet nobis contraria fidei . Videri potest P. Cornelius in **Commen-** **tario** huius loci .

11. Quæritur , utrùm assensus intellectualis fidei habeat secum identificatam certitudinem exclusiuam dubitationis ?

12. Respondeo aliquos docuisse assensum intellectualem fidei, cum sit obscurus, esse ex se coniungibilem cum dubitatione, sed per imperium voluntatis captuari intellectum , ne cum actu fidei obscuro coniungat dubitationem, quam coniungeret , nisi daretur hoc imperium voluntatis.

13. Dicendum , quod assensus intellectualis fidei diuinæ habet secum identificatam certitudinem exclusiuam dubitationis . Probatur : nam certitudo exclusiua dubitationis est perfectio intellectus ; ergo non debemus actui fidei diuinæ negare istam perfectionem , & tribuere imperfectionem oppositam. Intellectus igitur captiuatur à voluntate per hoc , quod obiecto obscuro , cui naturaliter assentiretur actu incerto , & coniungibili cum dubitatione ,
super-

supernaturaliter ex imperio voluntatis, & ex auxilio gratiæ assentitur actu certo, & exclusiuo dubitationis. Hinc inferitur actum fidei certitudine etiam indubitabilitatis esse simpliciter certiozem quolibet actu naturali. Ratio est, quia certitudo exclusiuæ dubitationis in actu fidei est supernaturalis, ac proinde est simpliciter maior omni certitudine naturali.

14. Dices: intellectus obiectis obscuris non potest assentiri certius, quam euidentibus; ergo &c.

15. Respondeo, distinguo antecedens: intellectus ex viribus naturæ non potest assentiri certius obiectis obscuris, quam obiectis euidentibus, concedo: ex viribus supernaturalibus gratiæ, & ex motiuo infinito diuinæ veritatis reuelantis, nego. Intellectus ex viribus supernaturalibus gratiæ, & ex motiuo infinito diuinæ veritatis reuelantis, potest per imperium voluntatis certius assentiri obiectis obscuris, quam ex viribus naturæ assentiatur obiectis euidentibus.

16. Opponunt: S. Thomas in quæstionibus disputatis quæst. 14. de veritate, artic. 1. in corpore dicit: *Intellectus cre-
dentiſ est captiuatus, quia tenetur terminis
alienis, & non proprijs. Inde etiam est,
quod in credente potest insurgere motus
de contrario huius, quod firmissimè tenet,
quamuis non intelligente, vel sciente; ergo
&c.*

17. Respondeo, quod intellectus tunc tenetur terminis proprijs, ne dubitet, cum

Q 5

prop-

propter apprehensionem terminorum, & propter apparentiam obiecti, independentem ab imperio voluntatis determinatur ad assentiendum sine vlla dubitatione; & quia cum per scientiam, vel habitum intellectus, seu principiorum cognoscimus aliquod obiectum euidenter, propter apparentiam obiecti independentem ab imperio voluntatis determinamur ad assentiendum sine dubitatione; ideò tunc intellectus tenetur terminis proprijs, ne dubitet. E conuerso tunc intellectus dicitur teneri terminis alienis, ne dubitet, cum præscindendo ab imperio voluntatis, non assentiretur obiecto sine dubitatione, sed assentitur sine dubitatione ex imperio voluntatis; sed per fidem obiectis inevidentibus assentimur sine dubitatione ex imperio voluntatis; ergo cum credimus, intellectus ne dubitet, tenetur terminis alienis, non autem proprijs, adeòque captiuatur. Idcirco in credente potest insurgere dubitatio, seu motus contrarius huius, quod firmissimè credit, non quidem in sensu composito cum hoc, quod firmissimè credat, sed in sensu diuiso ab hoc, quod firmissimè credat, cum potentia diuidendi; siquidem credens, posita apparentia, habet potentiam proximam non firmissimè credendi, sed credendi cum dubitatione. At in sciente, & intelligente rem euidenter, neque in sensu diuiso ab hoc, quod firmissimè assentiat, potest insurgere motus dubitationis cum potentia diuidendi; siquidem posita apparentia euidenti, non habet po-

ten-

tentiam proximam non assentiendi sumissimè, & sine dubitatione.

18. Ad 1. nego minorem. Ad probationem, nego maiorem. Ex duabus necessitatibus metaphysicis intrinsecis essentijs rerum, vna potest esse maior alia: E. G. necessitas metaphysica, vt actus diuinus non sit falsus, est infinitiès maior necessitate metaphysica, vt actus creatus non sit falsus, quæ necessitas est intrinseca ipsi actui creato. Ratio est, quia cum talis necessitas sit ipsa essentia rei, sicut vna essentia est maior altera, sic vna necessitas est maior altera. Proportionaliter quia impossibilitas metaphysica, vt actus falsificetur, est ipsa essentia actus, cum essentia est maior, etiam impossibilitas metaphysica est maior. Necessitas tamen, & impossibilitas metaphysica radicalis, & extrinseca rebus creatis, cum sit ipsa essentia diuina, vt dixi quæst. 47. Logica, semper est æqualis, immò vna, & eadem.

19. Ad 2. distinguo maiorem; firmitus adheremus obiectis, de quibus non possumus dubitare, quàm obiectis, de quibus possumus dubitare, si cætera sint paria, concedo: si cætera non sint paria, nego. Intellectus, si cætera sint paria, nequit firmitus assentiri obiectis, de quibus physicè dubitare potest, quàm obiectis, de quibus physicè dubitare non potest: secus si cætera non sint paria. In casu nostro cætera non sunt paria. Nam intellectus obiectis reuelatis, de quibus propter ineuidentiam physicè potest dubitare, assentitur ex mo-

tiuo diuinæ veritatis, & per lumen supernaturale fidei, ac pervires supernaturales: obiectis autem naturalibus evidentibus assentitur ex motiuis inferioribus, per lumen purè naturale, & per vires naturales. Addo cum S. Thoma 2. 2. quæst. 4. art. 8. in corpore Fidem simpliciter, & secundum se esse certiozem actibus naturalibus evidentibus: actus autem naturales evidentes esse certiores secundum quid, & quoad nos. Fides est certior simpliciter, & secundum se, quia nititur motiui diuinæ veritatis, quod secundum se est infinitè perfectius, ac certius quolibet motiui creato scientiæ naturalis. Scientia est certior secundum quid quoad nos, quia nititur motiui nobis notiori, & melius à nobis penetrato. Ex hac autem maiori penetratione oritur, vt motiui scientiæ necessitet ad assensum sine dubitatione, motiui fidei non necessitet.

QVÆSTIO XXXIV.

*Vtrum qui discredat unum articulum
sufficienter propositum possit eodem
tempore fide diuina credere
aliu[m] ?*

1. **V**idetur posse, primò quia Hæretici discredunt articulum Eucharistiæ E. G. & tamen firmissimè credunt fide diuina articulos Trinitatis, & Incarnationis; ergo &c.

Se-

2. Secundò ita se habet fides ad credendum omnes articulos, sicut se habet obedientia ad obseruanda omnia præcepta: sed cum quis transgreditur vnum præceptum, potest ex motiuo obedientiæ obseruare aliud præceptum, E. G. dum transgreditur præceptum ieiunij, potest ex motiuo obedientiæ per actum supernaturalem obseruare præceptum audiendi sacrum; ergo dum discredet vnum articulum, potest per actum fidei supernaturalis, & infusæ credere alium.

3. Tertiò licet charitas sit virtus theologica, tamen cum per peccatum veniale transgredimur aliquod præceptum leuiter obligans, possumus per actum charitatis ex motiuo diuinæ bonitatis velle obseruare omnia præcepta grauiter obligantia; ergo licet fides sit virtus theologice, tamen cum discredimus vnum articulum, possumus credere alios.

4. Quartò eatenus non possemus fide diuina credere vnum articulum, discredendo aliud, quatenus non possemus credere Deum reuelasse vnum articulum, & simul discredere Deum reuelasse alium; sed possumus; ergo &c. Probatur minor: nam possumus credere quod est magis credibile, & simul discredere quod est minus credibile; sed magis credibile est Deum reuelasse quosdam articulos, quam alios: E. G. credibilius est Deum reuelasse Spiritum Sanctum esse Deum, quam Spiritum Sanctum procedere à filio; ergo &c.

5. Respondeo cum S. Thomaz. 2. 2. q. 5. art. 3.

art. 3. quem sequuntur Theologi communiter, eum, qui per actum hæresis discredet vnum articulum sufficienter propositum, non posse eodem tempore fide diuina credere vllum alium articulum.

6. Probatur: nam virtutes Theologicae sunt, per quas intellectus, & voluntas adherent Deo vt vltimo fini, & primæ regulæ; sed fides est virtus theologica intellectus; ergo intellectus per actum fidei adheret primæ veritati reuelanti vt vltimo fini, & primæ regulæ; sed per actum, quo adheremus alicui motiui vt vltimo fini, & primæ regulæ, præferimus illud motiuum omnibus motiuis contrarijs, eo verò ipso, quod illud non præferimus omnibus motiuis contrarijs, non adheremus illi vt vltimo fini, & vt primæ regulæ; ergo per actum fidei theologica ita adheremus primæ veritati reuelanti, vt illam præferamus omnibus motiuis contrarijs, ideòque S. Thomas 2. 2. quest. 5. art. 4. ad 2. dicit: *de ratione fidei est, vt veritas prima omnibus præferatur*; sed qui negat aliquem articulum, qui sufficienter proponitur vt reuelatus à prima veritate, eo ipso motiuum, ex quo illum articulum negat, præponit primæ veritati reuelanti, adeòque primam veritatem non præponit, sed postponit ali mouuo; ergo qui per actum fidei theologicae adheret primæ veritati reuelanti, tanquam vltimo fini, & primæ regulæ, & credit aliquem articulum, non potest eodem tempore discredere vllum alium articulum: alioquin simul præpone-

ter

ret primam veritatem reuelantem omnibus motiuis contrarijs, & eandem primam veritatem postponeret alicui motiuo contrario; quod implicat.

7. Ad 1. nego antecedens, ac dico, quod Hæretici, dum discredunt vnum articulum sufficienter propositum, nullum credunt fide theologica, qua ità adhæreant primæ veritati reuelanti, vt illam præferant omnibus motiuis contrarijs, cum potius aliqua motiua contraria præferant primæ veritati reuelanti.

8. Ad 2. nego maiorem. Fides est virtus theologica, obedientia est virtus moralis; sed de ratione virtutis theologicæ est, vt adhæreat suo obiecto formali, tanquam vltimo fini, & primæ regulæ, adeoque vt illud præferat omnibus motiuis contrarijs: at non est de ratione virtutis moralis, vt adhæreat suo obiecto formali, tanquam vltimo fini, & vt illud præferat omnibus motiuis contrarijs; ergo non eodem modo fides se habet ad credendos omnes articulos propter diuinam veritatem reuelantem, ac obedientia ad obseruanda omnia præcepta propter honestatem obseruandi præcepta, sed fides credit propter diuinam veritatem, cui adhæret, vt vltimo fini, præponendo illam omnibus motiuis contrarijs, obedientia obseruat præcepta propter honestatem obediendi, cui non adhæret, vt vltimo fini, adeoque quam non semper præfert omnibus motiuis contrarijs. Ex proportionali ratione potest aliquis eodem tempore esse temperans cir-

ca cibum E. G. & esse intemperans circa potum; idemque dic de alijs virtutibus moralibus. At quia per actum charitatis obseruamus præcepta ex motiui diuinæ bonitatis, cui adhæremus tanquàm vltimo fini, præponendo illam omnibus motiuis contrarijs, dùm transgredimur vnum præceptum grauitè obligans, non possumus vllum aliud præceptum obseruare per actum charitatis.

9. Ad 3. concedo antecedens, & nego consequentiam. Ad hoc, vt per actum charitatis bonitatem diuinam præferamus omnibus alijs bonis, sufficit, vt propter vllum aliud bonum velimus facere aliquid contrarium charitati; sed peccatum veniale non est contrarium charitati, sed solum est præter charitatem, cum non priuet nos diuinam amicitiam, neque illam immi-
nuat, sed solum non possit ordinari ad finem charitatis, vt dictum est lib. 4. quæst. 6. de vitijs, & peccatis; ergo cum Deum diligimus super omnia, ac diuinam bonitatem præferimus omnibus, possumus per peccatum veniale transgredi aliquod præceptum leuiter obligans. E conuerso actus, quo negamus aliquem articulum sufficienter propositum, est contrarius fidei, ac prælationi, qua diuinam veritatem præferimus omnibus motiuis oppositis; ergo cum credimus, non possumus negare vllum articulum sufficienter propositum.

10. Ad 4. distinguo maiorem: eatenus non possumus credere vnum articulum, discredendo alium, quatenus non possumus

utcumque credere Deum reuelasse vnum articulum, discredendo alium, nego: quatenus Deum reuelasse vnum articulum non possumus credere actu, quo diuinam veritatem reuelantem præferamus omnibus motiuis contrarijs, negando alium, concedo: distingo eodem pacto minorem; & nego consequentiam. Ex dictis vt credamus fide diuina, requiritur, vt præponamus diuinam veritatem reuelantem omnibus motiuis contrarijs; sed dum credimus Deum reuelasse vnum articulum actu, quo diuinam veritatem præferamus omnibus motiuis contrarijs, non possumus discredere Deum reuelasse vllum articulum sufficienter propositum; ergo &c.

II. Infertur per fidem nos Deo credere super omnia, in quantum diuinam veritatem reuelantem præferimus omnibus alijs motiuis. Ad actum tamen fidei non requiritur, vt credamus actu habente summam intensiorem, cum quolibet actu fidei dari possit actus intensior, adeoque non detur vllus actus fidei habens summam intensiorem.

Q V A E S T I O XXXV.

Vtrum conclusiones Theologicae possint credi per actum fidei?

I. **V**idetur, quod omnis actus theologicus, quo nimirum inferimus aliquam conclusionem ex duabus præmissis,

sis, utraque de fide, vel ex altera præmissa de fide, altera naturaliter evidenti, sit actus fidei: primò quia omnis actus certus, & inevidens est actus fidei; sed omnis actus theologicus est certus, cum nitatur duabus præmissis certis, & est inevidens, cum nitatur altera saltem præmissa inevidenti, ac de fide, conclusio autem sequatur debiliorem partem; ergo &c.

2. Secundò omnis actus, quo ita assentimur alicui obiecto, ut non possimus illud negare, nisi per actum hæresis, est actus fidei; sed conclusionibus theologicis assentimur ità, ut non possimus illas negare, nisi per actum hæresis; ergo &c.

3. Respondeo plures esse quæstiones. Prima est, utrùm assensus, quo assentimur conclusionibus theologicis ex hoc motivo, quia inferuntur ex duabus præmissis de fide, vel altera de fide, altera evidenti, sit assensus fidei divinæ.

4. Respondeo negativè. Ratio est, quia ad actum fidei divinæ requiritur, ut sit assensus, quo assentiamur alicui veritati à Deo revelatæ ex hoc motivo, quia est à Deo revelata, sistendo ultimo in divina veritate revelante; sed per actum, quo assentimur alicui conclusioni ex hoc motivo, quia inferitur ex duabus, vel ex altera præmissa revelata, non assentimur huic conclusioni, quia est à Deo revelata, sed solum quia est connexa cum utraque, vel altera

altera præmissa reuelata; ergo non est actus fidei, sed solum est assensus theologicus.

5. Dices: ad actum fidei sufficit, ut ultimò resoluator in solam authoritatem Dei reuelantis; sed actus, quo assentimur conclusioni propter duas præmissas reuelatas, ultimò resoluitur in solam authoritatem Dei reuelantis; ergo est actus fidei.

6. Respondeo, distinguo maiorem: ad actum fidei sufficit, ut ultimò resoluator in solam authoritatem Dei reuelantis id, quod credimus, concedo: reuelantis solas præmissas, propter quas credimus, nego: distinguo eodem pacto minorem; & nego consequentiam. Ad actum fidei requiritur, ut resoluator in authoritatem Dei reuelantis id, quod credimus, & non sufficit, ut resoluator in authoritatem Dei reuelantis præmissas, propter quas credimus. Ratio est, quia per fidem non possumus credere ut obiectum materiale nisi veritates à Deo reuelatas, ut dictum est supra.

7. Potest secundò quæri, utrum Deus eo ipso, quod reuelat duas præmissas, ex quibus inferitur aliqua conclusio, reuelet etiam implicite conclusionem.

8. Respondeo affirmatiuè. Ratio est, quia cum Magister docet præmissas ea intentione, ut discipuli possint aduertere se in præmissis docere etiam implicite conclusiones, docet etiam implicite conclusiones,

fiones, ideòque discipuli hoc aduercentes, propter authoritatem Magistri possunt credere non solum præmissas, sed etiam conclusiones; sed Deus docet, & reuelat omnia contenta in sacra Scriptura ea intentione, vt Ecclesia, ac Fideles possint aduertere Deum in præmissis reuelare etiam implicitè conclusiones, quæ ex præmissis inferuntur; ergo docet, & reuelat implicitè omnes conclusiones.

9. Potest tertio quæri, vtrum eo ipso, quòd Deus reuelat aliquam propositionem, ex qua coniuncta cum alia propositione evidenti possit inferri aliqua conclusio, reuelet implicitè talem conclusionem?

10. Respondeo affirmatiuè. Ratio est, quia cum Magister docet aliquam propositionem ea intentione, vt discipuli, quibus est evidens alia propositio, possint aduertere Magistrum implicitè docere propositionem, quæ inferitur ex illis duabus propositionibus, docet etiam implicitè talem conclusionem: E.G. cum Magister dicit: *quando Luna eclipsatur est opposita Soli*, ea intentione, vt discipuli videntes Lunam eclipsari, possint aduertere Magistrum implicitè docuisse Lunam esse oppositam Soli, docet etiam implicitè Lunam esse oppositam Soli; sed Deus docet, & reuelat omnia contenta in sacra Scriptura ea intentione, vt Ecclesia, & Fideles, quibus aliæ propositiones sunt evidentes, possint aduertere Deum implicitè reuelasse etiam illa, quæ inferuntur ex propositionibus reuelatis

uelatis coniunctis cum alijs propositionibus eidentibus; ergo &c.

11. Infertur primò Ecclesiam posse definire à Deo fuisse reuelatas, ac firma fide credendas quascunque conclusiones theologicas, tùm quæ inferuntur ex duabus præmissis de fide, tùm quæ inferuntur ex altera præmissa de fide, altera eidenti: E.G. quia ex his duabus præmissis vtraque de fide: *Peccator non potest conuerti, nisi præueniatur gratia interna: Magdalena cum esset peccatrix, fuit conuersa*, infertur; ergo *Magdalena fuit præuenta gratia interna*: potest Ecclesia definire fuisse à Deo reuelatum, ac firma fide credendum Magdalenam fuisse præuentam gratia interna. Rursus quia ex hac propositione naturaliter eidenti: *Qui habet naturam humanam potest etiam exercere, & in debitis circumstantiis exercet operationes humanas, præsertim voluntatis*, & ex hac alia propositione de fide contra Eutychem definita, *Christus fuit homo, & habuit non solum naturam diuinam, sed etiam humanam perfectam*, sequitur, ergo *Christus potuit exercere, & de facto exercuit, & exercet operationes humanas præsertim voluntatis*: ideò sexta Synodus contra Monotelitas definiuit in Christo dari operationem, & voluntatem non solum diuinam, sed etiam humanam.

12. Infertur secundò fideles conclusionibus Theologicis posse assentiri tùm per actum purè Theologicum, tùm per actum fidei diuinæ. Assentiuntur per actum purè Theologicum, cum assentiuntur, non quia

quia fuerunt à Deo reuelatæ , (sæpè enim hoc non sufficienter proponitur) , sed solum , quia inferuntur ex vtraque , vel ex altera præmissa reuelata . Assentiuntur per actum fidei diuinæ , cum cognoscunt euidenter prudenter credi posse , ac debere illas fuisse implicitè reuelatas , ideòque assentiuntur ex hoc motiui , quia fuerunt implicitè reuelatæ .

13. Infertur tertio , quod cum est de fide aliqua propositio vniuersalis , sunt etiam de fide omnes propositiones singulares , vel particulares euidenter contentæ in illa vniuersali : E. G. quia est de fide hæc vniuersalis : *Omnes homines , excepto Christo , concepti sunt in peccato originali , de quo de fide est oppositum , & excepta Beata Virgine , de qua neutrum est de fide : & est euidenter , quod ego sum homo , Petrus est homo &c. est de fide , quod ego , Petrus &c. concepti sumus in peccato originali . Confirmatur : nam cum illa vniuersalis omnis homo conceptus est in peccato originali , resoluitur in hanc , Hic homo est conceptus in peccato originali : ille homo est conceptus in peccato originali , Deus reuelans illam vniuersalem , reuelauit implicitè omnes istas singulares .*

14. Infertur quarto , quod cum est de fide , alicui conuenire aliquod prædicatum , de fide est , conuenire illi omnia , quæ euidenter identificantur cum tali prædicato , vel distinguuntur quidem ab eo prædicato , sed ità , vt cum illo sint euidenter , ac necessariò connexa . E. G. quia de fide est
Chri-

Christum esse hominem, cum homine autem euidenter identificatur constare ex corpore, & ex anima rationali, de fide est Christum constare ex corpore, & ex anima rationali. Rursus quia intellectus, & voluntas humana, licet realiter distinguantur ab homine iuxta sententiam satis communem, tamen sunt passionēs, & proprietates necessariò consequentes ex essentia hominis, eo ipso, quod est de fide, Christum esse hominem, & habere naturam humanam, de fide est etiam Christum habere intellectum, & voluntatem humanam.

15. Infertur quintò de fide esse Innocentium XI. esse Summum Pontificem. Ratio est, quia de fide est Ecclesiam Catholicam habere potestatem, & obligationem eligendi sibi Summum Pontificem, & eum, quem Ecclesia Catholica concorditer recipit ut Summum Pontificem, esse Summum Pontificem; sed euidentius est Ecclesiam Catholicam concorditer recipere Innocentium XI. ut Summum Pontificem; ergo est de fide Innocentium XI. esse Summum Pontificem; cum id inferatur ex duplici pramissa, altera de fide, altera euidenti. Ex opposita ratione cum tempore Schismatis non est euidentius ullum ex prætensis Pontificibus fuisse legitimè electum, ac recipi concorditer ab Ecclesia Catholica, non est de fide ullum esse Summum Pontificem. Addo, quod si Schisma fiat, postquam incepit esse de fide aliquem esse Summum Pontificem,
cò

edò quod fuerit concorditer receptus ab Ecclesia Catholica vt Summus Pontifex , tunc de fide est , eum , qui post fuit intrusus , non esse Summum Pontificem , adeòque eius sectatores non solum esse schismaticos , sed etiam hæreticos .

16. Infertur sextò non esse de fide sub hac numero Hostia manere Christum . . Ratio est , quia licet sit de fide sub Hostia legitimè consecrata esse Christum , tamen non est de fide , neque est euidentis hanc Hostiam esse legitimè consecratam , & cum debita intentione . Rursus non est de fide me esse Sacerdotem . Licet enim sit de fide hominem legitimè ordinatum esse Sacerdotem , tamen non est de fide , neque est euidentis me fuisse legitimè ordinatum .

17. Infertur septimò de fide esse , eos , qui sunt Canonizati , esse Sanctos , & in æternum fruituros Beatitudine . Ratio est , quia vt suppono cum Theologis communiter , Summus Pontifex , & Ecclesia possunt definire , vt certà fide tenendum id , quod infertur ex duabus præmissis , altera de fide , altera moraliter euidenti : sed S. Caetanum E. G. S. Franciscum Borgiam &c. frui æterna beatitudine infertur ex duabus præmissis , altera de fide , altera moraliter euidenti ; ergo &c. Probatur minor : nam est de fide , quod qui in obseruantia legis , & mandatorum perseuerauerit vsque in finem , saluus erit , & fruatur æterna Beatitudine ; sed ex Processibus factis in Canonizatione est moraliter euidentis

dens dictos Sanctos perseverasse vsque in finem in obseruantia mandatorum, & exercuisse virtutes morales in gradu hæroico, ac miraculis post mortem claruisse: ex his autem duabus præmissis infertur illos esse sanctos, & fruituros æterna beatitudine; ergo summus Põtifex potuit definire certa fide tenendum illos esse sanctos. An sit de fide eos, qui solum fuerunt Beatificati, sint in Cælo, minus est exploratum apud Authores. Conueniunt id ità esse certum, vt sine temeritate negari non possit. At multi negant id esse de fide. Ratio est, quia vt aliquid sit de fide, debet esse definitum; sed summus Pontifex sententiam definitiuam pronunciat tantum in Canonizatione, cuius forma est: *decernimus, ac definimus talem esse Sanctum, ac Sanctorum Catalogo adscribendum*: in Beatificatione autem non pronunciat sententiã definitiuam, sed solum concedit titulum Beati, & cultum quemdam non vniuersalem in tota Ecclesia, sed limitatum ad certa loca, certasque personas; ac deinde antequam procedat ad Canonizationem, facit nouas diligentias, quasi res adhuc non sit omninò explorata; cum autem aliquid iam est certum certitudine fidei, est omninò exploratum, ac non debet fieri vltior inquisitio; ergo &c.

18. Infertur octauò, quanam sit differentia inter propositionem hæreticam, erroneam, & temerariam. Propositio hæretica est, qua contradicitur propositioni definitæ. Propositio erronea est, qua con-

Lib.V.

R

tra-

tradicitur propositioni adhuc non definitæ , quæ tamen infertur per discursum , theologicum ex duabus propositionibus definitis , vel ex altera definita , altera euidenti. Propositio temeraria est, quæ in materia theologica est contra communem sensum Patrum , & Theologorum.

19. Ad 1. nego maiorem , ac dico , quod præter actus fidei certos, & ineuidentes dantur etiam conclusiones theologicæ, quæ sunt ineuidentes , ac certæ , non quidem certitudine fidei , sed certitudine inferiori.

20. Ad 2. distingo maiorem : omnis actus , quo ita assentimur obiecto , vt non possimus illud negare , nisi per hæresim , consistentem formaliter in negatione talis obiecti, est actus fidei, concedo: consistentem in negatione alterius obiecti , nego : distingo eodem pacto minorem : & nego consequentiam . Conclusio legitimè illata non potest negari, nisi negando alteram , saltem præmissarum ; ergo cum conclusio infertur ex duabus præmissis de fide , non potest negari , nisi negando vnā ex præmissis de fide, adeoque non potest negari , nisi per hæresim, non consistentem formaliter in negatione conclusionis , sed in negatione vnius præmissæ de fide . Similiter conclusio , quæ infertur ex duabus præmissis, altera de fide, altera euidenti, negari non potest , negando præmissam euidētem , cum propositio euidens negari nequeat ; ergo non potest negari , nisi per hæresim consistentem formaliter in negatione

tione præmissæ de fide. Cum tamen conclusio theologica proponitur sufficienter ut implicite reuelata, tunc non potest negari, nisi per hæresim consistentem formaliter in negatione illius.

QVÆSTIO XXXVI.

Vtrum fides supernaturalis tum habitualis, tum actualis sit omnibus ad iustificationem, & salutem necessaria necessitate mediij?

1. **P**rimo videtur fides non esse parua-
lis ad iustificationem, & salutem
necessaria necessitate mediij. Paruuli enim
per Baptismum iustificantur, & si morian-
tur ante vsum rationis, saluantur; sed iusti-
ficantur, & saluantur sine actu fidei, cuius
sunt incapaces, & sine habitu fidei, qui
non acquiritur, nisi cum quis per actum
se disponit ad habitum; ergo &c.

2. Secundo videtur fides actualis, hoc
est actus fidei nec esse cuilibet adulto ad
salutem necessaria necessitate mediij. Nam
potest infans baptizatus fieri captius ab
infidelibus, & postquam peruenerit ad
vsum rationis, mori, antequam sufficienter
instruatur in fide, & antequam peccet mor-
taliter; sed in hoc casu morietur in statu
gratiæ baptismalis, & saluabitur, absque
eo quod elicuerit actum fidei; ergo &c.

R .2

Ter-

3. Tertiò videtur actus fidei nec etiam adultis non baptizatis esse necessarius necessitate mediij ad obtinendam iustificationem, & salutem. Apostolus enim ad Rom. 1. loquens de Philosophis gentilibus, qui ex creaturis cognitione naturali cognouerunt Deum, dicit: *Cum cognouissent Deum, non sicut Deum glorificauerunt, aut gratias egerunt*; ergo supponit, quod dependenter à cognitione naturali Dei, potuerunt Deum sicut Deum glorificare, illique gratias agere; sed si potuerunt Deum vt Deum glorificare, potuerunt iustificari, & saluari: nam idem Apostolus ibidem cap. 2. dicit: *gloria, & honor, & pax omni operanti bonum*: & cum dixisset: *gentes, quæ legem non habent, naturaliter quæ legis sunt faciunt*, subiungit: *Factores legis iustificabuntur*; ergo Philosophi potuerunt iustificari, ac proinde saluari sine fide, ex sola cognitione naturali Dei.

4. Quarto omnes adulti possunt obtinere media necessaria ad salutem; sed multi adulti, quibus nunquam est prædicatum Euangelium, non possunt credere, iuxta illud Apostoli ad Rom. 10. *Quomodo credent sine prædicante?* ergo multi adulti possunt obtinere iustificationem, & salutem sine actu fidei per aliquod aliud medium, puta per cognitionem Dei ex creaturis &c.

5. Quinto fides actualis adultis non est magis ad salutem necessaria, quam baptismus; sed baptismus est adultis ita necessarius ad salutem, vt non sit necessarius

rius

rius determinatè in re, sed solum indeterminate in re, vel in voto; ergo etiam fides actualis non est adultis necessaria determinatè in re, sed indeterminate vel in re, vel in voto.

6. Respondeo claritatis gratia plures posse distinguere quæstiones. Quaritur ergo primo, vtrum fides habitualis sit ita necessaria necessitate medij ad iustificationem, & salutem, vt nullus neque paruulus, neque adultus potuerit vlllo tempore iustificari, & saluari sine habitu fidei?

7. Respondeo, quod in præsentī prouidentia nullus neque Angelus, neque homo, neque paruulus, neque adultus in statu viæ potuit esse iustus iustitiā supernaturali, & potuit saluari, consequendo supernaturalem beatitudinem, sine habitu fidei, Christo dumtaxat excepto, cuius humanitas ab initio fuit sancta per vnionem hypostaticam, & gratiam habituales sine habitu fidei, cuius loco habuit habitus luminis gloriæ, ac scientiæ infuse, vt docent Theologi in materia de Incarnatione. Ratio est, quia ex dictis lib. 5. de Gratia quæst. 29. num. 34. & sequentibus nemo potest esse supernaturaliter iustus, nisi per iustitiam inhærentem; sed ex dictis ibidem num. 48. habitus fidei, vel est pars iustitiæ inhærentis viatorum, vel est primum fundamentum, & inchoamentum iustitiæ inhærentis consistentis in gratia sanctificante, quæ in puris viatoribus non datur sine habitu fidei; ergo in præsentī prouidentia nullus neque Angelus, neque purus homo

R 3

potuit

potuit in via esse supernaturaliter iustus sine fide; sed nemo potest saluari, obtinendo beatitudinem supernaturalem, nisi tempore viæ fuerit supernaturaliter iustus; ergo in præsentî prouidentia, excepto Christo, nemo potest, aut potuit saluari, obtinendo supernaturalem beatitudinem, nisi tempore viæ habuerit habitum fidei, ac proinde habitus fidei omni tempore fuit omnimodo necessarius ad supernaturalem beatitudinem, & iustitiam obtinendam. Ideò Apostolus ad Rom. 2. dicit: *iustus ex fide uiuit*, & ad Heb. 11. *sine fide impossibile est placere Deo*, quia sine fide saltem habituali nemo potest viuere vita gratiæ, ac per gratiam placere Deo.

8. Quaritur secundo, vtrum omnibus etiam paruulis ad iustificationem, & salutem necessarius sit aliquis actus fidei?

Respondetur certum esse primo paruulis ad iustificationem, & salutem non esse necessarium actum fidei elicited ab ipsis. Ratio est, quia dum baptizantur, iustificantur sine vlllo actu fidei ab ipsis elicito, cuius sunt incapaces, & si moriantur ante vsum rationis, saluantur.

9. Certum est secundo nec esse illis necessarium actum fidei elicited à ministro baptizante, vel à parentibus. Ratio est, quia filij parentum infidelium possunt validè baptizari etiam ab infideli habente intentionem faciendi quod facit Ecclesia; sed in eo casu iustificantur, & si moriantur ante vsum rationis, saluantur sine vlllo actu fidei elicito à parentibus, vel à ministro bapti-

baptizante; ergo. Nihilominus dici potest, dum baptizantur iustificari, & si moriantur ante vsum rationis saluari in fide actuali Ecclesiæ, cuius sacramentum receperunt. In hoc sensu Augustinus lib. 10. de Gen. ad Literam cap. 14. dicit. *Antequam infans per ætatem possit secundum spiritum vivere, necessarium habet mediatoris Sacramentum, ut quod per eius fidem nondum potest, per eorum, qui eum diligunt, fiat; & Serm. 14. de verbis Apostoli: Absit, ut ego dicam non credentes infantes. Nam credit in altero, qui peccavit in altero: & cap. 19. docet infantes credere fide parentum, ac eodem loquendi utitur Bernardus Epist. 77. Nomine autem parentum intelligi potest etiam Ecclesia, quæ est mater spiritualiter illos generans per baptismum.*

10. Quaritur tertio, vtrum adultis, qui ante vsum rationis iustificati sunt per baptismum, ad salutem necessarius sit necessitate mediæ aliquis actus fidei?

11. Respondeo cum Suar. Disp. 12. de Fide Sect. 2. numer. 10. & Card. de Lugo Disp. 12. de Fide Sect. 1. num. 3. non esse necessarium necessitate mediæ, sed solæ necessitate præcepti. Ratio est, quia illud est necessarium necessitate mediæ, in cuius omissione etiam si aliquis per accidens excusetur à peccato, nihilominus non potest consequi finem; sed adulti iustificati per baptismum susceptum ante vsum rationis, si ita omittant actum fidei, ut per accidens excusentur à peccato, possunt consequi finem salutis æternæ; ergo &c. Probat, &

392 *De fide neccffaria ad salutem.*
explicatur minor. Potest enim contingere, vt infans baptizatus in infantia fiat captiuus ab infidelibus, & ducatur ad regiones barbaras, ibique educetur, & perueniens ad vsum rationis, nihil audiat de Religione Christiana, ac de fide, ac proinde non possit elicere actū fidei, iuxta illud Apostoli ad Rom. 10. *Quomodo credent sine prædicante?* Potest etiam contingere, vt hic aliquandiu viuat iuxta lumen naturale, ac præueniatur morte, antequam peccet mortaliter; sed in hoc casu, qui communiter admittitur vt possibilis, morietur in statu gratiæ, & saluabitur sine vllō actū fidei; ergo &c.

12. Quæritur quarto, vtrum adultis, qui non fuerunt per baptismum iustificati ante vsum rationis, actus fidei supernaturalis sit ad salutem necessarius necessitate mediij.

13. Respondeo duas esse sententias. Prima docet adultos, qui peruenerunt ad vsum rationis, posse in aliquo casu iustificari, & saluari sine actū supernaturali fidei, per cognitionem naturalem Dei, vel boni honesti, si per voluntatem faciunt quod in se est ad vitandum malum, & faciendum bonum. Refert hanc opinionem S. Thomas in Comm. cap. 2, Epist. ad Rom. Eamdem secutus est Vega lib. 6. in Trid. cap. 20. & 21. & Sotus lib. 2. de Natura, & Gratia cap. 11. qui tamen eam retractauit in posteriori editione, & in 4. Dist. 1. quæst. 2. art. 3. Ex Patribus videtur hoc de Gentibus ante Christi aduentum sensisse Clemens

mens Alexandrinus lib.6. Stromatum, Iustinus in Apolog. 2. pro Christianis, & Chrysost. Hom. 37. in Matth. vt refert Suar. de Fide Disp.12. Sect.2.num.1.

14. Contra hanc opinionem dicendum cum communi sententia Theologorum, actum fidei supernaturalis omni adulto, postquam peruenit ad vsum rationis, fuisse semper ita necessarium necessitate mediæ ad iustificationem, & salutem, vt nullus sine illo potuerit, aut possit iustificari, & saluari. Docuerunt hanc sententiam S. Thomas 2.2. quæst.2. art.3. ad 1. quæst.10. art. 1. ad 4. & ad Heb. 11. Caietanus in Comm. eorum locorum, & ad Rom.2. ac alij expositores S. Thomæ communiter, Canus Relect. de Sacram. in Genere p. 2. quæst.2. Conc.1. Medina lib.4. de Recta in Deum fide, cap. 7. Benedictus Pereira ad Rom.1. disp. 17. & cap.2. Disp. 8. Valentia 2.2. Disp.1. quæst.2. Puncto 2. Turcremata, lib. 1. in summa de Ecclesia cap. 22. & 21. Gaspar Casalius lib. 1. de Quadripartita Iustitia, cap. 51. quos refert, & sequitur Suarius Disp.12. de Fide Sect.2. num. 5. & Card. de Lugo Disp.12. Sect.1. num.3.

15. Probatur conclusio; nam hæc est differentia inter adultos ratione vtentes, & paruulos ante vsum rationis, quod paruuli possunt iustificari, & saluari per sacramentum baptismi, absque eo quod proprijs actibus se liberè disponant ad iustificationem; adulti autem ratione, & libero arbitrio vtentes non possunt iustificari, &

saluari, absque eo quod liberè se disponant ad iustificationem; sed dispositio maximè necessaria ad iustificationem est actus fidei; ergo &c. Probatur minor, primo ex Scriptura, quæ ubique ad iustificationem adulti requirit, vt credat. Christus Marci ultimo cum dixisset: *Euntes in mundum uniuersum predicate Euangelium omni creature: subdit qui crediderit, & baptizatus fuerit, saluus erit: qui verò non crediderit, condemnabitur;* ergo ad hoc, vt adultus etiam per baptismum, acquirat iustificationem, & salutem, requiritur, vt credat. Apostolus ad Rom. 1. de Euangelio dicit, quod est *virtus in salutem omni credenti;* ergo vt adultus per Euangelium iustificetur, & saluetur, debet credere. Subdit Apostolus *Iustitia enim Dei in eo reuelatur ex fide in fidem, sicut Scriptum est, Iustus ex fide uiuit;* ergo vt iustitia Dei in adultis manifestetur, & vt uiuant vita iustitiæ, requiritur fides. Ad Rom. 10. *Finis enim legis Christus ad iustitiam omni credenti;* ergo vt per Christum iustificentur, requiritur fides. Et paulo post: *Omnis, qui inuocauerit nomen Domini, saluus erit. Quomodo ergo inuocabunt, in quem non crediderunt?* ergo vt adultus consequatur iustificationem, & salutem, requiritur, vt inuocet nomen Domini, & ad hoc, vt inuocet, requiritur, vt credat. Ad Gal. 2. *Scientes autem, quod non iustificatur homo ex operibus legis, nisi per fidem Iesu Christi: & nos in Christo Iesu credimus, vt iustificemur ex fide Christi;* ergo expressè docet adultum non posse iusti-

iustificari , nisi per fidem actualem , ideoque subdit , *Et nos credimus* , fide scilicet actuali. Ad Heb. 11. *sine fide impossibile est placere Deo . Credere enim oportet accedentem ad Deum , quia est , Et quia requirentibus se remunerator est:ergo expresse docet, quod sine fide impossibile est placere Deo, & loquitur de fide actuali in adultis, ut patet ex sequentibus , Accedentem enim ad Deum , ut nimirum iustificetur , oportet credere , quia est , ac proindè docet dispositionem necessariam ad hoc , ut adultus accedens ad Deum iustificetur , & iustificatus placeat Deo , esse fidem , qua actu credat Deum esse , & remuneratorem esse. Sap. 9. *Per sapientiam enim sanati sunt , quicumque tibi placuerunt: vbi nomine sapientiæ fidem omnes intelligunt , ut docet Lorinus in eum locum .**

16. Probatur secundò ex Tridentino eadem minor , quod nimirum in adultis dispositio necessaria ad salutem , & iustificationem sit actus fidei. Tridentinum Sess. 6. capit. 5. ponit titulum *de necessitate preparationis iustificationis in adultis , Et unde sit ?* Et cap. 6. explicans talem preparationem , seu dispositionem , quam vocauerat necessariam , dicit: *Disponuntur autem ad ipsam iustitiam, dum excitati diuina gratia, Et adiuti, fidem ex auditu concipientes, liberè mouentur in Deum, credentes vera esse, quæ diuinitus reuelata, Et promissa sunt : Et infra: de hac dispositione scriptum est: accedentem ad Deum oportet credere , quia est , Et quod requirentibus se remunerator est : Et*

cap. 7. de hac ipsa fide dicit: *sine qua nulli unquam contigit iustificatio*; ergo Tridentinum expressè docet actum fidei ita adultis esse dispositionem necessariam ad iustificationem, ut sine illa nulli unquam contingerit iustificatio, ac proinde in adultis actum fidei esse dispositionem ad iustitiam, & salutem necessariam necessitate medij. Et cap. 8. docet, quod ideò per fidem dicimur iustificari, quia *fides est humane salutis initium, fundamentum, & radix omnis iustificationis, sine qua impossibile est placere Deo, & ad filiorum eius consortium pervenire.*

17. Probatur tertio eadem minor ex Patribus. Augustinus lib. de Serm. Domini in monte cap. 9. dicit: *Vli vera fides non est, nec potest vera esse iustitia*: Serm. 38. de Tempore: *Sine fide nemo ad filiorum Dei consortium potest pervenire, quia sine ipsa neque in hoc seculo quisquam iustificationis consequitur gratiam, neque in futuro vitam possidebit eternam.* In Psalmum 31. in Præfat. docet non solum in singulis hominibus, sed etiam in singulis operibus fidem esse fundamentum pietatis, ita ut sine illa esse non possit. Epist. 157. docet nullam cuiuscumque ætatis, ac sexus Personam sine fide potuisse iustificari. Similia docet lib. 2. de Peccat. meritis, & Remiss. cap. 9. de Corrept. & Grat. cap. 7. & alibi; idemque docet Bernardus Epist. 77. Fulgentius lib. de Fide ad Petrum initio dicit, *Sine fide nulla potest prodesse, immo nec esse conversio*; & ibidem *sine hac fide ne-*

mo ad filiorum numerum potest peruenire : Leo Serm. 4. de Natiuit. dicit : nihil posse esse sanctum sine fide , idque probat ex Apostolo dicente Iustus ex fide uiuit : sine fide impossibile est placere Deo .

18. Probatur quarto conclusio ratione. Nam Deus nullum adultum ratione , & libero arbitrio utentem iustificat iustitia supernaturali , & adoptat , nisi liberè consentiat , & se disponat suæ iustificationi , & adoptioni ; sed homo non congruè disponitur ad iustificationem supernaturalem , nisi per actus liberos , honestos , & supernaturales ; ergo Deus nullum adultum , & libero arbitrio utentem iustificat , nisi se ad iustificationem disponat per actus liberos , honestos , & supernaturales voluntatis ; sed ut homo exerceat actus liberos , honestos , & supernaturales voluntatis , debet ad illos dirigi per cognitionem intellectualem eiusdem ordinis , hoc est supernaturalem ; ergo Deus neminem iustificat , nisi ex cognitione supernaturali exerceat actus voluntatis supernaturales ; sed cognitio supernaturalis propria viatoris est cognitio fidei , qua credit Deo loquenti ; ergo Deus neminem iustificat , nisi fide supernaturali credat Deo loquenti . Ideò ut declarat Tridentinum Sess. 6. cap. 5. *ipsius iustificationis exordium in adultis à Dei per Christum Iesum præueniente gratia sumendum est , hoc est ab eius vocatione , qua nullis eorum præcedentibus meritis , vocantur : hac autem vocatione mouentur primò ad credendum Deo loquenti , & promittenti iusti-*

398 *De fide necessaria ad salutem.*
iustificationem, & salutem.

19. Concluditur contra opinionem Vegæ, & aliorum relatorum num. 12. ad ultos ratione, & libero arbitrio vtentes in nullo casu posse iustificari, & saluari sine fide supernaturali, per cognitionem naturalem Dei, vel boni honesti, & faciendo per voluntatem quod in se est ad vitandum malum, & faciendum bonum. Et quidem sententiam illam Vegæ acerbiori censura notare solent Theologi. Nam Suarius Disp. 12. de Fide Sect. 2. num. 5. dicit esse erroneam: Canus, cuius censuram approbat Granado, Tract. 10. Disp. 3. num. 10. dicit esse erroneam, & fortasse hæreticam &c. Contra eam porro sententiam dictum videtur ab Augustino lib. de Natura, & Gratia cap. 2. *Si natura humana sibi posset sufficere ad implendum legem, perficiendamque iustitiam, de premio debet esse secunda, etiam si fides aliquo tempore eam latuit sanguinis Christi &c.* Quod si potuit, aut potest, hoc ego dico, quod de lege dicit Apostolus ad Galatas 2. ergo Christus gratis mortuus est. Si enim hoc ille dixit de lege, quam accepit gens una Iudæorum, quanto iustus dicitur de lege nature, quam accepit uniuersum genus humanum, si per naturam iustitia; ergo Christus gratis mortuus est; si autem non gratis Christus mortuus est; ergo omnis humana natura iustificari, & redimi ab ira Dei iustissima, hoc est vindicta, nullo modo potest, nisi per fidem, & Sacramentum Sanguinis Christi.

20. Addo, quod quia primi parentes, Adam nimirum, & Heua creati sunt in statu

statu perfecto, & adulti, in primo instanti se disposuerunt per fidem, & actus supernaturales voluntatis ad gratiam, & iustitiam supernaturalem, vt docet S. Thomas 1. p. quæst. 95. art. 1. ad 5. quem sequitur Suarez lib. 3. de Opere 6. dierum cap. 19. contra Sotum, qui lib. 1. de Natura, & Grat. cap. 5. docet Adamum in primo instanti accepisse gratiam, & iustitiam sine proprio actu voluntatis, quo se ad illam disposuerit. Idem proportionaliter dicendum de Angelis. Ideò actus fidei etiam Angelis, & primis parentibus ante peccatum fuit necessitate medijs necessarius ad supernaturalem gratiam, iustitiam, & beatitudinem obtinendam.

21. Quæritur quinto, vtrum adultis, qui ante vsum rationis non sunt iustificati per baptismum, ad iustificationem necessarius sit necessitate medijs actus fidei strictæ, quo credatur Deo reuelanti, vel sufficiat aliquis actus fidei latius sumptæ?

22. Respondeo, quod posset aliquis improbabiter existimare, ad iustificationem sufficere adultis fidem quamdam supernaturalem latam, quæ non nitatur diuina reuelatione, sed testimonio creaturarum, vel alio simili motiuo. Explicatur. Deus, quia eleuauit hominem ad finem supernaturalem, præsto est ex parte sua, vt quoties proponitur nobis obiectum aliquod potens terminare voluntatem honestam, eleuet per auxilia supernaturalia gratiæ nostras potentias, vt simul cum actibus intellectus, & voluntatis naturalibus eliciat

ciamus circa illud obiectum actus supernaturales, & proportionatos fini supernaturali. Ideò quando Philosophi gentiles ex cognitione creaturarum veniebant in cognitionem naturalem Dei, Deus per auxilia gratiæ eleuabat eorum intellectum, ad eliciendam aliam cognitionem supernaturalem Dei per creaturas, ex vi cuius possent per actum voluntatis supernaturalem Deum colere, & super omnia diligere, & sic iustificari. Proportionaliter cum, circa aliam quamcumque materiam eliciebant actus honestos naturales, eleuabantur per auxilia gratiæ ad elicendos simul circa eandem materiam actus supernaturales, per quos saltem remotè disponebantur ad iustificationem, & salutem. Hæc cognitio supernaturalis Dei ex creaturis potest vocari fides lata, proportionaliter ac creaturæ dicuntur nobis loqui quadam locutione lata, iuxta illud Psalm. 18. *Cæli enarrant gloriam Dei, & opera manuum eius annuntiat firmamentum.* Hinc posset explicari, quo pacto Deus omnibus, etiam ad quos nunquam peruenit prædicatio Euangelij, prouiderit media sufficientia ad iustificationem, & salutem. Possunt enim ex hac fide lata, sed supernaturali Dei per creaturas, Deum supernaturaliter super omnia diligere, & sic iustificari, & saluari. Proponit hanc sententiam Ripalda Tom. 1. de Ente supernaturali, Disp. 20. Sect. 21. 22. & 23. & Disp. 63. per totam, ac multa pro ea adducit. Addit tamen se hæc tantum disputandi gratia asserre, nihil definiendo,

ne

ne contradicat communi sensui Theologorum, qui ad iustificationem requirunt fidem strictam fundatam in propria, ac stricta reuelatione Dei. Card. autem de Lugo Disp. 12. de Fide, Sect. 1. 2. & 3. latè hanc sententiam impugnat, & soluit quæ pro ea attulerat Ripalda, ac nouissimè Innocent. XI. Decreto nuper edito damnavit hanc propositionem, quæ est 23. *Fides latè dicta ex testimonio Creaturarum, simili- que motiuo, ad iustificationem sufficit.*

23. Dicendum cum communi sententia: ad iustificationem, & salutem adultorum non sufficit actus fidei latè dictæ ex testimonio creaturarum, vel ex alio simili motiuo, sed requiritur fides stricta, & propria ex diuina reuelatione.

24. Probatur primo ex Apostolo ad Rom. 10. ubi loquens de necessitate fidei ad salutem dicit: *Omnis enim, quicumque inuocauerit nomen Domini, saluus erit. Quomodo ergo inuocabunt, in quem non crediderunt? aut quomodo credent ei, quem non audierunt? Quomodo autem audient sine prædicante? Quomodo verò prædicabunt, nisi mittantur?* Et concludit; ergo fides ex auditu: *Auditus autem per verbum Christi; ergo ex Apostolo ad salutem necessaria est fides, qua credamus propter verbum Dei propositum à prædicatoribus legitimè missis; sed hæc est propria, & stricta fides, fundata in propria, & stricta reuelatione, ac non in solo testimonio creaturarum; ergo &c.* De hac igitur fide stricta intelligenda sunt loca Apostoli, quibus dicit: *sine fide im-*

impossibile est placere Deo: accedentem ad Deum oportet credere.

25. Probatur secundò ex Tridentino Sess. 6. ubi loquens de necessitate prapparationis ad iustificationem in adulto dicit: *Disponuntur autem ad ipsam iustitiam, dum excitati diuina gratia, & adiuti fidem ex auditu concipientes, liberè mouentur in Deū, credentes vera esse, quæ diuinitus reuelata, & promissa sunt; ergo ex Tridentino fides ad iustificationem necessaria est fides, quæ liberè credimus vera esse, quæ diuinitus reuelata, & promissa sunt; sed hæc est fides stricta, ac fundata in reuelatione propria diuinarum promissionum; ergo &c.* Videtur autem Tridentinum hanc doctrinam, desumpsisse ex Paulo ad Heb. 11. ubi fidē definit dicens: *Est autem fides sperandarum substantia rerum, argumentum non apparen- tium.* Nam fides est substantia, seu subsistentia rerum sperandarum, in quantum per illam firmissimè credimus vera esse, quæ diuinitus reuelata, & promissa sunt, & sic est firmum fundamentum illa sperandi.

26. Probatur tertio conclusio ratione. Nam Deus adultum non iustificat, ac non recipit ad suam amicitiam, nisi prius illum amicabiliter inuitauerit ad suam amicitiam; sed inuitatio amicabilis fit propria locutione; ergo Deus neminem iustificat, nisi prius illum locutione propria inuitauerit ad iustificationem, & amicitiam; sed Deus ab eo, quem amicabiliter inuitat ad iustificationem, & amicitiam exigit, ut vocationi, qua vocatur, correspondens, se
dis-

disponat ad iustitiam, & amicitiam; prima autem dispositio est, vt Deo amicabiliter loquenti, & vocanti, credat; ergo Deus neminem iustificat, & recipit in suam amicitiam, nisi Deo loquenti, & inuitanti credat, adeoque ad iustificationem adulti requiritur actus fidei strictæ, qua credat Deo loquenti, vocanti, & promittenti. Confirmatur: nam iustificatio impij fit per modum contractus reconciliatiui; sed contractus fiunt per mutuam locutionem, & consensum; ergo iustificatio impij fit per mutuam locutionem, & consensum, quo Deus offert impio reconciliationem, iustificationem, & amicitiam, impius autem, credit Deo offerenti, & per actus voluntatis consentit suæ iustificationi, & reconciliationi cum Deo.

27. Addo ex dictis quæst. 32. num. 24. & 25. quod ante actus fidei perfectæ, ac strictæ, quibus adulti super omnia credunt Deo loquenti, & inuitanti ad iustificationem, possunt, ac debent præcedere actus supernaturales fidei imperfectæ, & inchoatæ, disponentes ad actum fidei perfectæ. Consistunt autem actus fidei inchoatæ in cognitionibus supernaturalibus procedentibus ex interna illuminatione Spiritus Sancti. Probatur: nam antequam adultus credat fide perfectæ, potest, ac debet saltem regulariter ex illuminatione, & inspiratione Spiritus Sancti audire predicatorem fidei, deliberare de fide amplectenda, orare Deum vt se magis, & magis illuminet; sed tales actus sunt supernaturales, & orti
ex

404 *De fide necessaria ad salutem.*
ex fide imperfecta, & inchoata, ac disponunt ad actum fidei perfectæ; ergo &c.

25. Ad 1. Paruulis ad salutem necessaria est necessitate mediæ fides habitualis, ut explicatum est num. 8. Licet autem aliqui, quos refert Innocentius III. cap. *Maiores, de Baptismo* negarint paruulis in baptismo infundi habitus fidei, spei, & charitatis, tamen post Tridentinum certum est hos habitus infundi etiam paruulis, ac proinde illos non posse iustificari sine fide habituali, ut dictum est lib. 5. de Gratia q. 23.

29. Ad 2. ex dictis num. 9. & 10. actus fidei est necessarius necessitate mediæ solis adultis, qui ante usum rationis non sunt iustificati per baptismum, vel post baptismum peccarunt mortaliter.

36. Ad 3. concedo, quod iuxta doctrinam Apostoli, Philosophi Gentiles ex cognitione naturali Dei potuerunt Deum glorificare, & illi gratias agere per actus naturales moraliter bonos, & honestos, ac per illos mereri aliquod præmium naturale retribuendum in hac vita: sed nego, quod per tales actus honestos naturales potuerunt iustificari, vel se disponere ad iustificationem, vel illam de congruo mereri. Propositio illa, quam Paulus subiungit, *Gloria, & honor, & pax omni operanti bonum*, significat solum, quod Deus unicuique dabit præmium, quod per sua bona opera meritis fuerit. Et quia vitam æternam merentur soli iusti per sua opera supernaturalia elicita in statu gratiæ, ideo Deus solis iustis retribuet vitam æternam;
illis

illis autem, qui non iustificati faciunt solum aliqua opera moraliter honesta, solum retribuet præmium aliquod temporale. Idem Apostolus, dum dicit: *factores legis iustificabuntur*, loquitur de illis, qui ex fide, & viribus gratiæ observant totam legem, ac præcipuè primum eius præceptum diligendi Deum super omnia, qui profecto iustificabuntur, non autem de ijs, qui observant aliquod solum præceptum, cuius observantia sit insufficiens ad iustificationem, & si sit per actum merè naturalem, neque potest de congruo ad iustificationem disponere.

31. Ad 4. concedo maiorem, & distinguo minorem: multi adulti, quibus nunquam prædicatum est Euangelium, non possunt obtinere gratiam ad credendum, si ex viribus gratiæ faciant quod in se est, nego: & possunt obtinere gratiam ad credendum, si ex viribus gratiæ faciant quod in se est, concedo; & nego consequentiam. Deus, qui ut dicitur Ioannis 1. *illuminat omnem hominem vententem in hunc mundum*, omnes adultos identidem illuminat aliqua illuminatione supernaturali, qua loquitur ad cor ipsorum, ex vi cuius possunt per actus supernaturales deliberare de ijs, quæ spectant ad salutem, & si per tales actus ex viribus gratiæ faciant quod in se est, invenient Prædicatorem fidei, vel Angelus de Cœlo mittetur ad illos, & sic poterunt iustificari, & saluari. In hoc autem sensu verum est exioma: *Faciens quod in se est ex viribus gratiæ, Deus non denegat gra-*

gratiam, vltiorum nimirum vsque ad iustificationem, & salutem.

32. Ad 5. nego maiorem, ac dico fidem esse adultis magis necessariam, quam baptismū, ac proindē baptismum esse necessariū indeterminatē, vel in re, vel in voto, fidem esse necessariam determinatē in re. S. Bernardus Epist. 77. colligit hanc maiore necessitatē fidei, quam baptismi, ex modo loquendi Christi Marci vltimo. Cum enim dixisset: *Qui crediderit, & baptizatus fuerit, saluus erit*, subdit: *Qui verò non crediderit, condemnabitur*, ac non dicit: *Qui baptizatus non fuerit, condemnabitur*. Ratio est, quia qui re ipsa baptizatus non fuerit, potest iustificari, & saluari per actum supernaturalem perfectæ charitatis includentem votum baptismi. At qui non crediderit, non potest iustificari, & saluari, cum non possit elicere actum supernaturalem perfectæ charitatis, qui procul dubio non potest elici sine actu fidei; ergo actus fidei est necessarius re ipsa ad iustificationem, & salutem.

QVÆSTIO XXXVII.

Vtrum fides Dei vt remuneratoris sit adultis ad iustificationem, & salutem necessaria necessitate mediij?

1. **P**rimo ad iustificationem adulti videtur non esse necessarium necessitate

tate mediij, vt credat Deum esse . Ex dictis enim quæst. 28. ea, de quibus aliunde habemus euidentiam, non possunt simul credi propter testimonium Dei; sed multi habent euidentiam de diuina existentia; ergo &c.

2. Secundo videtur ad iustificationem adulti non esse necessarium necessitate mediij, vt credat Deum esse remuneratorem. Vt enim adultus iustificetur, sufficit, vt ex fide eliciat actum charitatis supernaturalem, quo Deum diligat super omnia; sed vt eliciat actum charitatis sufficit, vt credat Deum esse infinitè bonum, & amabilem, etiamsi nihil cogitet de remuneratione; ergo &c.

3. Tertiò videtur saltem non esse necessarium necessitate mediij, vt adultus credat Deum esse remuneratorem remuneratione supernaturali. Nam si credat Deum esse remuneratorem, abstrahendo ab hoc, quod talis remuneratio sit naturalis, vel supernaturalis, potest sperare talem remunerationem, & sic moueri ad amandum Deum amore charitatis super omnia, & iustificari. A fortiori videtur non esse necessarium necessitate mediij ad hoc, vt adultus iustificetur in Baptismo, vt credat explicitè Deum esse remuneratorem remuneratione supernaturali:

4. Quarto videtur, quod licet post Christum fuerit ad iustificationem, & salutem necessaria necessitate mediij fides explicita Dei, vt remuneratoris remuneratione supernaturali, tamen ante Christum
fuerit

fuerit sufficiens fides explicita Dei, vt remuneratoris remuneratione naturali. Ideò enim post Christum est necessaria fides explicita remunerationis supernaturalis, quia Christus promisit regnum Cœlorum, & remunerationem supernaturalem; sed ante aduentum Christi Deus in lege naturæ promiserat solum remunerationem naturalem, hoc est temporalem felicitatem; ergo &c.

5. Respondeo plures esse quæstiones. Primò quæritur, vtrum adultis ad iustificationem necessaria necessitate mediij sit fides, qua explicitè credant Deum esse?

5. Respondeo Caietanum in Comm. cap. 11. ad Hebræos propter fundamentum allatum in prima ratione dubitandi, docere fidem de diuina existentia non esse necessariam ijs, qui de diuina existentia habent euidentiā, sed esse necessariam regulariter, quia pauci perueniunt ad talem euidentiā. At Canus lib. 12. de Locis Theologicis merito hanc sententiam reprehendit, ideoque dicendum cum S. Thoma 2.2. quæst. 2. art. 4. Suario Disp. 12. Sect. 3. num. 4. Card. de Lugo disp. 12. Sect. 5. num. 123. ac Theologis communiter, hanc fidem esse prorsus necessariam.

Probatur ex Paulo, qui ad Hebræos 11. sine vlla exceptione dicit: *accedentem ad Deum oportet credere, quia est*; ergo &c. Confirmatur ratione. Nam ex dictis quæstione superiori ad iustificationem adulti necessaria est fides, qua credamus Deo propter summam eius veracitatem; sed
non

non possumus credere Deo propter summam eius veracitatem, absque eo quod eodem actu credamus Deum esse; ergo &c. Ad rationem dubitandi, respondetur facile ex dictis quæst. 27. quod etiam qui habent euidenciam de diuina existentia, possunt, ac debent illam credere in complexo obscuro, quale est E. G. quod est Deus reuelans mytheria &c.

6. Queritur secundo, quænam prædicata debeant de Deo credi per fidem, qua credimus Deum esse?

Respondeo credi debere Deum esse, qui sit primum principium, ac supremus Dominus Vniuersi; qui sit summè verax in loquendo, summè fidelis in suis promissionibus implendis, ac summè bonus, ac proindè cui loquenti sit summè credendum, in quo promittente sit summè sperandum, & qui sit summè amandus, & colendus, & cui sit summè obediendum. Quia verò summa veracitas includit summam sapientiam, per quam Deus non potest decipi, & perfectionem voluntatis, per quam non potest mentiendo decipere; summa fidelitas includit summam potentiam, per quam Deus potest implere quæ promittit, & perfectionem voluntatis, per quam non potest non stare promissis, ideo hæc omnia debemus de Deo explicitè credere; idemque proportionaliter dic de alijs prædicatis, quæ in his includuntur. Probatur: nam per fidem debemus credere de Deo illa prædicata, quæ sint motiuum summè credendi, sperandi, amandi, colendi, obe-

diendi diuinis præceptis ; sed motium , radicale summè obediendi Deo , ac summè illum colendi est , quia Deus est primum principium , ac primus Dominus Vniuersi ; motium summè amandi est , quia Deus est summè bonus ; motium summè credendi est , quia Deus est summè verax ; motium summè sperandi in Deo est , quia Deus est summè fidelis ; ergo &c. Quia verò hæc omnia prædicata sunt de Deo naturaliter nota , & euidentia , ideò de Deo per fidem credi debent plura prædicata naturaliter nota , & euidentia , ita tamen , vt credantur in complexo obscuro , vt dictū est paulo ante citata quæstione 27.

7. Quæritur tertio , vtrum ad iustificationem adulti requiratur , vt credat explicitè Deum esse remuneratorem ?

Respondeo affirmatiuè cum Theologis communiter . Probatur primò ex verbis Apostoli ad Heb. 11. *Accedentem ad Deum oportet credere , quia est , & inquiringibus se , remunerator est.* Probatur secundò ratione . Nam per fidem debemus credere de Deo illa prædicata , quæ sunt motium illum timendi , & in eo sperandi , constituendo in ipso spem nostræ beatitudinis ; sed motium Deum timendi , ac in eo sperandi est , quia Deus est remunerator tribuens vnicuique iuxta merita ; ergo &c. Hinc sequitur , quod quia prædicatum remuneratoris includit , quod Deus habeat prouidentiam præsertim moralem rerum humanarum , ad iustificationem adulti necesse est , vt credat Deum habere prouidentiam præsertim
mora-

moralem rerum humanarum, ac proinde vt credat Deo conuenire omnes perfectiones, quæ sunt de cenceptu prouidentia.

8. Quæritur quarto, vtrum ad iustificationem adulti requiratur, vt credat explicitè Deum esse remuneratorem remuneratione supernaturali?

9. Respondeo Hurtadū de Fide Disp. 43. Sect. 7. probabile existimare, sufficere fidē, qua credatur Deum esse remuneratorem præscindendo à supernaturalitate remunerationis. Pro hac sententia affert Molinam 1. p. q. 1. art. 1. disp. 1. Victoriā, & alios, quos tacito nomine refert Turrianus Disp. 26. num. 4. Eamdem sententiam videtur amplecti Ripalda Tomo. 1. de Ente supernat. Disp. 63. num. 24.

10. At cōmuniter Theologi affirmant ad iustificationem adulti necessarium esse necessitate medijs, vt explicitè credat Deum esse remuneratorem remuneratione supernaturali. Ita sentiunt Suar. de Fide Disp. 12. Sect. 3. num. 8. Granado Controu. 1. de Fide Tract. 10. Disp. 2. Sect. 2. nu. 2. Michael Medina lib. 4. de recta in Deum fide, cap. 8. Caietanus, Bannez, Valentia, Aragonius, Lorca, & Turrianus apud Hurtadum Disp. 43. Sect. 1. ac Card. de Lugo Disp. 12. Sect. 5. num. 127. & sequentibus.

11. Dicendū cum hac communi sententia Theologorum, ad iustificationem adulti necessarium esse necessitate medijs, vt credat explicitè Deum esse remuneratorem remuneratione supernaturali.

12. Probatur primo ratione. Nā ex dictis

quest. 35. num. 28. Deus nullum adultum iustificat, nisi se liberè ex viribus gratiæ disposuerit ad iustificationem; sed nemo se congruè disponit ad iustificationem, per quam fiat aptus ad consequendum finem supernaturalem, nisi intendat, & speret finem supernaturalem; non potest autem actibus supernaturalibus intendere, ac sperare finem supernaturalem, nisi per fidem credat Deo promittenti finem, ac remunerationem supernaturalem; ergo &c.

13. Probatur secūdo ex Apostolo, qui ad Heb. 11. cum dixisset: *Accedentem ad Deum oportet credere, quia Deus est, & inquirentibus se remunerator est*, paulo post explicans, qualis sit hæc fides, qua antiqui iusti sunt saluati, dicit: *Iuxta fidem defuncti sunt omnes isti, non acceptis repromissionibus, sed à longe eas aspicientes, & salutantes, & confitentes, quia peregrini, & hospites sunt super terram. Qui enim hæc dicunt, significant se patriam inquirere. Et siquidem ipsius meminissent, de qua exierunt, habebant utique tempus reuertendi; hanc autem meliorem appetunt, hoc est Cœlestem. Ideo non confunditur Deus vocari Deus eorum. Parauit enim illis Ciuitatem; ergo ex Apostolo antiqui iusti iustificati sunt, & saluati ex fide promissionum de vita æterna, & de Patria Cœlesti, ac proinde de remuneratione supernaturali, de qua 1. ad Corint 2. dicit: *Oculus non vidit, nec auris audiuit, nec in cor hominis ascendit, quæ præparauit Deus ijs, qui diligunt illum; nobis autem reuelauit per Spiritum suum.**

Pro-

4. Probatur tertio ex Tridentino, quod
 ss. 6. cap. 6. explicans fidem adultis ne-
 cessariam, dicit illam esse, qua *liberè mo-
 ventur in Deum, credentes vera esse, quæ di-
 vinitus revelata, & promissa sunt, & in pri-
 oribus iustificari impium per gratiam eius*; sed
 iustificatio, qua impius dispositus iustifi-
 tur per gratiam, spectat ad remuneratio-
 nem supernaturalem; ergo ex Tridentino
 iustificationem adulti, requiritur fides,
 qua Deus creditur remunerator remune-
 ratione supernaturali.

15. Quæritur quinto, utrum ad iustifica-
 tionem adulti requiratur fides, qua expli-
 citè credatur Deum esse remuneratorem,
 remuneratione supernaturali reduplicati-
 vè, vel sufficiat fides, qua credatur Deum
 esse remuneratorem remuneratione super-
 naturali specificati-
 vè.

16. Respondeo cum Card. de Lugo Disp.
 12. Sect. 5. num. 130. sufficere, ut explicitè
 credatur Deum esse remuneratorem re-
 muneratione supernaturali specificati-
 vè, hoc est tantæ perfectionis, ut re ipsa sit
 supernaturalis, etiamsi non cogitetur ex-
 plicitè de prædicato supernaturalis. Pro-
 batur: nam si quis credat Deum esse remu-
 neratorem iustorum, dando illis vitam
 æternam, & beatitudinem consistentem in
 visione Dei, etiamsi non cognoscat expli-
 citè talem remunerationem esse super-
 naturalem, procul dubio potest ex hac fide
 iustificari; ergo &c.

17. Hinc sequitur ad iustificationem non
 sufficere, ut de Deo credamus prædicata

414 *De fide Dei remuneratoris.*

naturaliter nota, sed requiri, vt credamus aliquod prædicatum naturaliter non notum, sed innotescens solum ex reuelatione, quale prædicatum est, quod Deus sit remunerator remuneratione supernaturali vitæ æternæ, ac remissionis peccatorum.

18. Quæritur sexto, quānā debeant credi per fidem, qua credimus, Deum esse remuneratorem remuneratione supernaturali.

19. Respondeo, quod debent credi omnia illa, quæ includuntur in fide Dei remuneratoris remuneratione supernaturali. Et quia in hac fide includitur, quod Deus impium ad diuinam misericordiam confugientem iustificat per gratiam suam, ideò vt docet Tridentinum Sess. 6. cap. 6. debet in primis credi *iustificari impium per gratiam ipsius Dei*. Quia rursus in fide remuneratoris includitur Deum vnicuique retribuere iuxta merita, iustis quidem vitam æternam, & supernaturalem beatitudinem, impijs autem æternam miseriam, & priuationem beatitudinis, ideò hoc etiam debet credi necessitate medijs. Demum quia in his includitur immortalitas animæ rationalis, ideò debet credi immortalitas animæ rationalis, abstrahendo ab hoc, vtrum anima rationalis sit immortalis naturaliter, vel supernaturaliter, Deo illā in æternum conseruante supernaturaliter.

20. Quæritur septimò, vtrū hæc fides Dei remuneratoris supernaturalis fuerit necessaria etiam ante Christum in statu legis naturæ, & Mosaicæ.

Ref.

21. Respondeo affirmatiuè. Nā rationes & auctoritates allatæ probant illam fuisse semper necessariam. Confirmatur: nam Paulus ad Heb. 11. dicens: *sine fide impossibile est placere Deo: accedentem autem Deum oportet credere, quia est, & quia inquirentibus se remunerator est: Iuxta fidem defuncti sunt omnes isti, non acceptis promissionibus &c.* loquitur expressè de iustis ante Christum in lege naturæ, & Mosaica, nimirum de Abel, Henoch, Abraham, Ioseph, Moyse, Samuele, Daud, & Prophetis.

22. Ad 1. respondeo existentiam Dei etiā dum de illa habemus euidentiam credi posse in complexo obscuro, vt explicatum est num. 5.

23. Ad 2. concedo maiorē, & nego minorem. Ad iustificationem adulti requiritur, vt per actus voluntatis moueatur in Deum, vt vltimum finem supernaturalem; sed Deus cognoscitur vt vltimus finis supernaturalis per fidem, qua credimus illū esse remuneratorem remuneratione supernaturali; ergo &c. Verum quo pacto Deus non possit amari amore supernaturali charitatis, nisi ex fide Dei remuneratoris supernaturalis, explicabitur infra in Tract. de Charitate, Quæstione 47.

24. Ad 3. nego maiorem. Si quis credat Deum esse remuneratorem, abstrahendo ab hoc, quod sit remunerator remuneratione naturali, vel supernaturali, non cognoscit Deum vt vltimum finem supernaturalem, adeoque non potest per actus voluntatis moueri in Deum vt vltimum fi-

416 *De fide Dei remuneratoris .*

nem supernaturalem , prout requiritur ad iustificationem.

25. Ad 4. Deus etiam in lege naturæ, & Mosaica , licet non adeo explicitè , sicut in lege gratiæ, promiserat vitam æternam, & remunerationem supernaturalem , vt patet ex testimonio Pauli ad Hebr. 11. relato num. 13. Ideo etiam in lege naturæ, & Mosaica ad iustificationem adulti erat necessarium necessitate mediij , vt crederet Deum esse remuneratorem remuneratione supernaturali .

QVÆSTIO XXXVIII.

Vtrum omnibus adultis, in quolibet statu fuerit necessaria necessitate mediij ad salutem, & iustificationem fides implicita, vel explicita Christi, & Mysteriorum Trinitatis ?

1. **V**idetur semper ad iustificationem, & salutem adulti suffecisse, & adhuc sufficere fides explicita Dei vt remuneratoris supernaturalis , ac non fuisse, nec esse necessaria necessitate mediij fides explicita Christi, & Trinitatis, nisi prout continetur explicitè in fide Dei, vt remuneratoris supernaturalis : primo quia Apostolus ad Heb. 12. dicit : *Accedentem ad Deum oportet credere, quia Deus est, & inquirentibus se remunerator est*; sed Apostolus

tolus eo loco enumerat omnia necessario credenda ad iustificationem, & salutem, alioquin tradidisset doctrinam valde diminutam; ergo illa sufficiunt, & nihil aliud credendum est necessario necessitate mediæ ad iustificationem, & salutem.

2. Secundo ad iustificationem, & salutem adulti non est necessaria necessitate mediæ alia fides, quam quæ sufficienter dirigit ad intendendum ultimum finem supernaturalem, eumque à Deo firmissimè sperandum, & ad Deum super omnia amandum amore amicabili, cum voluntate efficaci obseruandi omnia diuina præcepta; sed fides explicata Dei vt remuneratoris supernaturalis sufficienter dirigit ad hæc, iuxta dicta quæst. 37. num. 6. ergo &c.

3. Tertio si dicatur fidem Dei vt remuneratoris supernaturalis sufficere ante aduentum Christi, nō sufficere post aduentum Christi, & post prædicationem Euangelij, contra est: nam argumenta allata probant fidem Dei remuneratoris sufficere etiam post aduentum Christi. Nam Paulus post aduentum Christi, & Christianis loquens, dixit: *Accedentem ad Deum oportet credere, quia est, & inquirentibus remunerator est*: & etiam post Christum fides Dei vt remuneratoris supernaturalis sufficienter dirigit ad intendendum finem supernaturalem, & Deum super omnia amandum amore amicabili, & sufficienti ad iustificationem.

4. Quarto ideo ante aduentum Christi

S i

aliqui

aliqui poterant saluari, & iustificari per solam fidem Dei vt remuneratoris, quia aliquibus poterat proponi sola reuelatio Dei vt remuneratoris supernaturalis, absque eo quod proponeretur reuelatio Mediatoris venturi, ac proinde poterant credere in Deum vt remuneratorem supernaturalem, eumque super omnia diligere, & sic iustificari, & saluari; sed etiam post Christum potest alicui ab initio proponi sola reuelatio Dei vt remuneratoris supernaturalis, absque eo quod proponatur Christus, qui iam venit, & passus est pro nobis, & ille potest credere in Deum vt remuneratorem supernaturalem, eumque super omnia diligere, & sic iustificari; ergo &c.

5. Respondeo, quod vt docet S. Thomas 2.2. quæst. 2. art. 7. ad 3. ex eoque communiter Theologi, qui credit explicitè Deum esse iustificatorem, Saluatorem, & remuneratorem supernaturalem hominum secundum modos sibi placitos, & secundum quod aliquibus cognoscentibus spiritus reuelasset, credit implicitè Mediatorem, hoc est Christum, siquidem Christus est præcipuum medium, per quod Deus homines iustificat, & saluat; credit etiam implicitè Trinitatem, siquidem Deus est Trinus, & vnus, & Christus mediator est secunda Persona Trinitatis, ac per gratiam Spiritus Sancti iustificat, & sanctificat homines; sed vt dictum est quæst. 37. semper fuit adultis necessaria necessitate mediæ fides Dei vt iustificatoris, & remunera

neratoris per media sibi placita, & aliquibus reuelata; ergo semper! fuit omnibus necessaria necessitate medijs fides implicita Christi, & Mysterij Trinitatis. Quæritur, utrum ultra hanc fidem implicitam Christi, & Trinitatis, ante Christum in lege naturæ, & Mosaica, & post Christum in statu legis Euangelicæ, fuerit, & sit necessaria necessitate medijs alia fides magis explicita Christi, & Trinitatis, & quænam sit talis fides explicita?

6. Plures sunt sententiæ, ac reduci possunt ad quinque, duas extremas, & tres medias. Prima sententia extrema docet nunquam post peccatum Adæ ad iustificationem, & salutem adulatorum suffecisse fidem implicitam Christi contentam in fide Dei ut remuneratoris supernaturalis, sed semper fuisse necessariam necessitate medijs fidem explicitam Christi sub conceptu mediatoris. Ante Christum ergo in lege naturæ, & Mosaica debebat credi Deum esse iustificatorem, & saluatorem per mediatorem mittendum; post Christum credi debet Deum esse iustificatorem, & saluatorem per mediatorem iam missum, qui mediator est Christus. Docuerunt hanc sententiam Corduba in Quæstionario lib. 2. quæst. 5. ad 3. Coninch. de Fide Disp. 14. Dub. 9. num. 147. Suarius autem Disp. 12. de Fide, Sect. 4. num. 17. putat illam esse probabilem, ac num. 14. dicit, quod videtur certè fuisse Augustini, præsertim Ep. 109. & lib. 18. de Ciuit. cap. 47. lib. 1. contra duas Epist. Pelagianorum, cap. 21.

& lib. 3. cap. 4. & lib. 15. contra Faustum cap. 24. & sequentibus.

7. Secunda sententia extremè contraria docet semper etiam post Christum ad iustificationem adulti, & salutem suffecisse, & sufficere fidem implicitam Christi, ut contentam in fide Dei ut remuneratoris supernaturalis, ac fidem magis explicitam non esse necessariam necessitate medijs, sed necessitate solius præcepti. Docuerunt hanc sententiam Michael de Medina lib. 4. de Recta in Deum fide, cap. 10. Vega lib. 6. in Trident. cap. 22. Iauellus 2. p. Christianæ Philosophiæ, Tract. 1. cap. 1. Zumel 1. 2. quæst. 89. art. 6. Disp. 4. & alij, quos sequuntur Suar. Disp. 12. Sect. 4. num. 10. Turrianus Disp. 27. Dub. 4. Hurtadus Disp. 12. Sect. 4. num. 91. & alij.

8. Tertia sententia media docet in lege naturæ suffecisse fidem implicitam Christi contentam in fide explicita Dei ut remuneratoris supernaturalis; in lege Mosaica Iudæis adultis ad iustificationem, & salutem fuisse necessariam necessitate medijs fidem explicitam Christi sub conceptu mediatoris à Deo mittendi; ac multo magis in lege gratiæ post Christum esse necessariam necessitate medijs fidem Christi, qui iam venerit, ac sit Deus, & homo, ac passus sit pro peccatis nostris. Docuerunt hanc sententiam Aragonius de Fide qu. 2. art. 5. concl. 14. & 5. Granado Controu. 1. Tract. 10. Disp. 2. Sect. 2. & alij. Videtur autem hæc sententia esse S Thomæ 2. 2. qu. 2; art. 7, ad 3, ubi loquens de Gentilibus dicit;

dicit : Si qui tamen saluati fuerunt , quibus reuelatio non fuit facta , non fuerunt saluati absque fide mediatoris , quia etsi non habuerunt fidem explicitam , habuerunt tamen fidem implicitam in diuina prouidentia , credentes Deum esse liberatorem hominum secundum modos sibi placitos , & secundum quod aliquibus veritatem cognoscentibus spiritus reuelesset , secundum illud Iob. 35. Qui docet nos super iumenta terre : Et Comm. in cap. 11. Epist. ad Heb. explicans illa verba Accedentem ad Deum oportet credere , expressè videtur hanc sententiam tradere .

9. Quarta sententia similiter media docet ante Christum non solum Gentilibus , sed etiam Iudæis adultis ad iustificationem , & salutem suffecisse fidem implicitam Christi inclusam in fide implicita Dei vt remuneratoris supernaturalis ; post Christum in lege gratiæ necessariam esse necessitate mediij fidem explicitam Christi . Docet hanc sententiam Valentia de Fide , q. 2. Puncto 4. Sanchez lib. 3. in Decal. cap. 2. & alij.

10. Quinta demum sententia media docet etiam post Christum ad iustificationem adulti sufficere fidem implicitam Christi inclusam in fide Dei vt remuneratoris supernaturalis , verum ad gloriæ , & salutis consecutionem esse necessariam necessitate mediij fidem explicitam Christi . Docent hanc sententiam Canus Relect. de Sacram. Part. 2. Concl. 3. Ioannes de Bononia Tract. de Prædest. in Resp. ad Obiectiones , Ledesma , Bannez , Aragonius , & alij.

alij, quos refert Suar. Disp. 12. de Fide, Sect. 4. num. 88.

11. Dicendum primo : probabilius est post peccatum Adæ fidem explicitam, Christi saltem sub conceptu mediatoris fuisse pro quolibet statu omnibus adultis ita necessariam necessitate medij ad iustificationem, & salutem, ut nemo sine illa ponerit iustificari, ac saluari.

12. Probatur primo ex Scriptura. Ad Rom. 3. *Iustitia Dei per fidem Iesu Christi in omnes, & super omnes, qui credunt in eum. Non enim est distinctio. Omnes enim peccaverunt, & egent gloria Dei; ergo Apostolus docet, quod quia omnes peccaverunt, in Adam nimirum, omnes indigent gloria Dei, & iustitia Dei per fidem Iesu Christi, & quod non est distinctio; sed etiam qui fuerunt ante Christum in Adam peccaverunt; ergo omnes etiam qui fuerunt ante Christum, egerunt iustitia Dei per fidem Iesu Christi, & concludit: ut sit ipse iustus & iustificans eum, qui ex fide est Iesu Christi.*

13. Posset responderi ad fidem Christi sufficere, ut sit fides causata ex meritis, & gratia Christi, non requiri, ut sit fides Christi ut obiecti, vel non requiri ut sit fides explicita Christi ut obiecti, sed sufficere, ut sit fides implicita Christi contenta in fide explicita Dei ut remuneratoris supernaturalis.

14. Sed contra, nam Apostolus dicit iustitiam Dei dari per fidem Iesu Christi omnibus, qui credunt in eum, idest Christum, ut patet ex contextu, & explicat S. Tho-

Thomas in Commentario ; ergo loquitur de fide, quæ sit Christi vt obiecti; sed non loquitur de fide solum implicita, contenta in fide explicita Dei vt remuneratoris supernaturalis ; ergo &c. Probatur assumptum: nam si loqueretur de hac fide solum implicita, eodem pacto fuisset requisita ad iustificationem fides Christi, ac fides aliorum mediorum à Deo ordinatorum ad iustificationem, qualia media sunt Sacramenta, prædicatio Apostolorum &c. sed est absurdum, & contra communem sensum, quod non aliter fuerit ad iustificationem requisita fides Christi, ac fides aliorum mediorum ; ergo &c. Probatur maior: nam fides Christi requirebatur vt inclusa in fide Dei vt iustificatoris, & remuneratoris per media ab ipso ordinata; sed non solum Christus est medium à Deo ordinatum ad iustificationem, sed etiam Sacramenta, prædicatio Apostolorum &c. sunt media ad eundem finem à Deo ordinata; ergo &c. Breuiter: dum Scriptura, & Patres dicunt, semper ad iustificationem adultorum fuisse necessariam fidem Christi, significant illam non solum fuisse necessariam illo modo generali, quo fuit necessaria fides aliorum mediorum à Deo ordinatorum ad nostram iustificationem; ergo fuit necessaria fides explicita Christi, saltem sub conceptu Mediatoris à Deo mittendi. Confirmatur: nam Actorum 4. Petrus loquens de Christo dicit: *non est in liio aliquo salus. Neque enim aliud nomen est sub Cælo datum hominibus, in quo oportet*

teat nos saluos fieri; ergo oportet nos saluos fieri in nomine Christi, credendo nimirum in Christum sub aliquo nomine, & conceptu, non communi, sed proprio ipsius; sed si suffecisset fides implicita, Christi inclusa in conceptu Dei vt remuneratoris per media à Deo disposita, suffecisset fides Christi sub conceptu, & nomine medij ad nostram salutem, qui conceptus, & quod nomen est commune, omnibus alijs medijs à Deo ordinatis ad nostram iustificationem, & salutem; ergo nunquam suffecit fides Christi sub eo conceptu, & nomine generali, sed fuit necessaria fides Christi, sub conceptu, & nomine Mediatoris proprio ipsius Christi.

15. Probatur secundo ex Patribus. Ignatius Epist. ad Philippenses dicit: *Omnes Sancti saluandi sunt per Christum, in ipso sperantes, atque ipsum spectantes*; sed valdè improprie Sancti, qui fuerunt ante Christum, dicuntur sperasse in Christo, & ipsum spectasse, si non crediderunt, & sperarunt in ipso, saltem sub conceptu mediatoris; ergo &c.

16. Hieronymus in cap. 2. Epist. ad Gal. explicans illa verba: *Ex operibus legis non iustificabitur omnis caro*, dicit: *Quos admonere debemus, eos hic dici iustitiam non consecutos, qui tantum ex operibus iustificari se posse credunt, sanctos autem, qui antiquitus fuerunt, ex fide Christi iustificatos. Siquidem Abraham vixit diem Christi, & letatus est, Io. 8. & Moyses maiores diuitias aestimabat thesauris Aegyptiarum improp-*
rium

rium Christi. Appiciebat enim in remunerationem. ad Heb. 11. Et in Comm. cap. 3. ad Ephesios explicans illa verba, in quo habemus fiduciam, & accessum in confidentia per fidem eius, dicit: cuius fiducia, atque accessus, & origo fides in Christo est: In Comm. cap. 21. Matthæi explicans illa verba: Turbæ, quæ precedebant, & sequebantur, clamabant, dicentes Hosanna &c. dicit: utrumque ostendit populum, & qui ante Euangelium, & qui post Euangelium Domino crediderunt, consona Iesum confessionis voce laudare, & secundum superioris Parabole exemplum diuersarum horarum operarios unum fidei accipere premium; ergo Hieronymus docet omnes etiam ante Christum iustificatos, & saluatos ex fide Christi, procul dubio speciali, non autem illa generali, qua credebantur omnia media ad salutem.

17. Augustinus hoc idem clarè docet pluribus locis. Epist. 157. non multo post initium dicit: Cuius hominis, eiusdemque Dei saluberrima fide, etiam illi iusti salui facti sunt, qui priusquam veniret in Carne, crediderunt in carne venturum. Eadem enim est fides nostra, & illorum, quoniam hoc illi crediderunt futurum, quod nos credimus factum; unde dicit Apostolus: habentes eundem Spiritum fidei &c. ergo expressè dicit antiquos credidisse futurum, quod nos credimus factum; ergo iustificati sunt in fide Christi sub conceptu mediatoris venturi: & paulo post dicit: Si ergo & illi, idest Patres, portare iugum legis veteris non valentes, per

per gratiam Domini nostri Iesu Christi , se saluos fieri crediderunt, manifestum est, quod hac gratia etiam antiquos iustos viuere fecit ex fide . Et Paulo post concludit : Proinde cum omnes iusti, hoc est veraces Dei cultores siue ante Incarnationem, siue post Incarnationem Christi, nec vixerint, nec viuant, nisi ex fide Incarnationis Christi , in quo est gratiae plenitudo , profecto quod scriptum est Act. 4. non esse aliud nomen sub caelo, in quo oportet saluos fieri nos , ex illo tempore valet ad saluandum genus humanum , in quo in Adam vitiatum est genus humanum ; ergo docet vniuersim iustos etiam ante Christum non vixisse vita gratiae, nisi ex fide Incarnationis &c. Epist. 89. ante medium : *Vt sciamus etiam antiquos iustos, quicumque esse potuerunt, non nisi per eandem fidem liberatos, per quam liberamur & nos, scilicet Incarnationis, quae illis praeiudicabatur, sicut a nobis facta annuntiatur : ideo idem Apostolus, Christum hominem dicit , cum sit & Deus, ne quis existimet antiquos iustos per Deum tantummodo Christum , idest per Verbum, quod erat in principio , non etiam per fidem Incarnationis eius, quae & homo Christus dicitur, fuisse liberatos. E paulo post: Hec ergo fides etiam antiquorum iustorum fuit . Vnde & Apostolus dicit: habentes eundem spiritum fidei . &c. Non diceret eundem spiritum fidei , nisi admonens etiam antiquos iustos habuisse ipsum spiritum fidei, hoc est Incarnationis Christi , sed quia illis futura praeiudicabatur, quae iam facta a nobis enuntiatur &c. Lib. de Natura, & Gratia cap. 2, dicit :
Si*

Si natura humana sibi posset sufficere ad implendam, perficiendamque iustitiam, de premio debet esse secura, etiam si fides aliquo tempore eam latuit Sanguinis Christi &c. Quod si potuit, aut potest, hoc ego dico, quod de lege dixit Apostolus ad Gal. 2. ergo Christus gratis mortuus est &c. Si autem non gratis Christus mortuus est; ergo omnis humana natura iustificari, & redimi ab ira Dei iustissima, hoc est vindicta, nullo modo potest, nisi per fidem, & sacramentum Sanguinis Christi. Lib. 8. de Ciuit. cap. 47. loquens de Iob, qui cum esset ex populo gentili, fuit iustus, & placuit Deo, dicit. Diuinitus autem prouisum fuisse non dubito, ut ex hoc uno sciremus, etiam per alias gentes esse potuisse, qui secundum Deum vixerunt, eique placuerunt, pertinentes ad spiritualem Hierusalem: Quod nemini concessum fuisse credendum est, nisi cui diuinitus reuelatus est unus mediator Dei, & hominum homo Christus Iesus, qui venturus in carne sic antiquis prænunciabatur, quemadmodum nobis venisse nunciatus est, ut una eademque fides per ipsum omnes in Dei Ciuitatem, in domum Dei, in templum Dei prædestinatos perducatur ad Deum. Lib. 2. de Peccato Originali cap. 24. dicit: Sine fide ergo Incarnationis, ac mortis, ac resurrectionis Christi, nec antiquos iustos, ut iusti essent a peccatis potuisse mundari, & Dei gratia iustificari, veritas Christiana non dubitat, siue in ijs iustis, quos sacra Scriptura commemorat, siue in ijs iustis, quos illa quidem non commemorat, sed tamen fuisse credendi sunt, uel ante diluuium, uel inde usque ad

ad datam legem, vel ipsius legis tempore, non solum in filijs Israel sicut fuerunt Prophetæ, sed etiam extra eundem populum, sicut fuit Iob; ergo Augustinus non solum docet neminem in vlllo statu iustificatum sine fide explicita Christi, sed dicit, quod de hoc tamquam de certissimo dogmate veritas Christiana non dubitat. Possent afferri alia testimonia Augustini, sed hæc abundè sufficiunt.

18. *Quæres, vtrum huic doctrinæ Patrum, ac præsertim Augustini contradicat S. Thomas 2.2. quæst. 2. art. 7. ad 3. vbi loquens de Gentilibus ante Christum, postquam ostendit Iob, Sybillas, & plures alios habuisse reuelationem de Christo, concludit: Si qui tamen saluati fuerunt, quibus reuelatio non fuit facta, non fuerunt saluati absque fide mediatoris, quia & si non habuerunt fidem explicitam, habuerunt fidem implicitam, in diuina prouidentia credentes, Deum esse liberatorem hominum, secundum modos sibi placitos, & secundum quod aliquibus veritatem cognescantibus spiritus reuelasset, secundum illud Iob 35. Qui docet hominem scientiam.*

19. *Respondeo S. Thomam loco citato cautè loqui, & solum asserere, quod si qui saluati sunt absque fide explicita Christi sub conceptu mediatoris, non sunt saluati sine fide explicita Creatoris: at non concedit absolutè vllum adultum saluatum esse sine fide explicita Christi, saltem sub conceptu mediatoris; ergo S. Thomas eo loco non contradicit Augustino*

no, & alijs Patribus absolutè negantibus quemquam saluatū esse, aut in hac providentia salvari potuisse, sine fide explicita mediatoris. Etiam si igitur S. Thomas alibi, ac præsertim in Comm. cap. 11. Epist. ad Hebræos insinuet aliquos absolutè salvatos fuisse sine fide explicita Christi sub conceptu mediatoris, dicendum, quod id limitat loco citato Summæ, in quo Quæstionem hanc examinat magis ex professo.

20. Posito, quod post peccatum Adami nullus adultus fuerit iustificatus, & salvatus sine fide explicita Christi saltem sub conceptu mediatoris, quæri potest primo, vtrum fides explicita Christi saltem sub conceptu mediatoris fuerit ad iustificationem adultorum necessaria, quasi ex natura rei, & ex obiecto, an solum concomitanter, & ex ordinatione extrinseca Dei?

21. Respondeo fuisse necessariam solum concomitanter, & ex ordinatione extrinseca Dei, non autem quasi ex natura rei, & ex obiecto. Probatur. Nam, natura rei, & ex obiecto solum requiritur fides sufficienter dirigens ad intendendum ultimum finem supernaturalem, eius consecutionem à Deo sperandam, & amandum Deum super omnia amabilem; sed fides explicita Dei ut remuneratoris supernaturalis sufficienter dicitur ad hæc, ut explicatum est quæst. 37. 1.6. ergo ex natura rei, & ex obiecto non est necessaria, & sufficiens fides explicita Dei ut remuneratoris supernatura-

lis, ac proindè fides explicita Christi [saltem sub conceptu mediatoris] fuit necessaria solum concomitanter, & ex ordinatione extrinseca Dei. Quia verò Apostolus ad Heb. 11. voluit solum assignare ea, quorum fides explicita est adultis necessaria, ad iustificationem ex natura rei, & quasi ex obiecto, solum assignavit fidem Dei vt remuneratoris, ac non fecit mentionem, fidei explicitæ mediatoris, quam tamen alibi locis citatis satis clarè insinuat esse necessariam, intellige concomitanter, vt dictum est.

22. Sed explicandum est, quo pacto fides Mediatoris licet non fuerit ad iustificationem adultorum necessaria ex obiecto, & ex natura rei, fuerit necessaria concomitanter, & ex ordinatione diuina.

23. Granado 2. 2. Controu. 1. de Fide Tracta. 10. Disp. 2. Sect. 3. num. 2. vt explicet, quo pacto post Christum, & post prædicationem Euangelij nemo possit iustificari sine fide explicita Christi, docet ad Prouidentiam Dei spectare, vt qui credit in Deum supernaturalem remuneratorem, & est facturus actus voluntatis supernaturales sufficienter disponentes ad iustificationem, habeat etiam explicitam notitiam Christi, ac Deum non concurrere ad actus voluntatis sufficienter disponentes ad iustificationem, nisi simul efficiendo, vt ille explicitè credat in Christum. Proportionaliter posset dici ante Christum, ad diuinam prouidentiam spectasse, vt omnes adulti, qui ex fide Dei remuneratoris erant

erant Deum amaturi super omnia, & sic se sufficienter disposituri ad iustificationem, haberent notitiam, & fidem implicitam Christi sub conceptu mediatoris.

24. Facilius & melius dici potest, Deum post lapsum Adami reuelasse simul, & indiuisibiliter se esse iustificatorem, & remuneratorem per mediatorem, & ita res disposuisse, vt nemini proponatur sufficienter ad credendum super omnia fide diuina reuelatio de Deo vt iustificatore, & remuneratore, quin proponatur sufficienter reuelatio de Deo vt iustificatore, & remuneratore per mediatorem; sed cum duo articuli simul proponuntur sufficienter, non potest fide diuina credi vnus, quin explicitè credatur alius, vt dictum est quaest. 33. ergo nemo potuit vnquam, aut potest fide diuina credere in Deum vt iustificatorem, & remuneratorem supernaturalem, quin simul credat in Deum vt iustificatorem, & remuneratorem per mediatorem; ergo sicut ad iustificationem adulti necessaria est ex obiecto, & ex natura rei fides super omnia Dei vt remuneratoris supernaturalis, sic concomitantur est, & semper fuit necessaria fides Christi, saltem sub conceptu mediatoris.

25. Explicatur. Adam post peccatum non potuit iustificari, & saluari, nisi credendo super omnia in Deum, vt iustificatorem, & saluatorem per gratiam suam, & ex hac fide sperando iustificationem à Deo, & se conuertendo ad Deum per actum perfectæ charitatis; sed non potuit cre-

credere in Deū vt iustificatorem, & saluatorem, nisi Deus illi reuelasset se esse paratum ad illum iustificandum per gratiam, si conuerteretur ad Deum, credendo, sperando, & amando; ergo procul dubio Adamo post lapsum facta fuit hęc reuelatio; sed Adamo vtpotē capiti, & Principi generis humani fuit reuelatus Deus, non solum vt iustificator, & saluator, sed etiam vt iustificator, & saluator per mediatorem venturum; ergo Adam non potuit credere in Deum vt iustificatorem, & saluatorem, quin crederet simul in mediatorem venturum, adeoque non potuit iustificari sine fide explicita Christi, saltem sub conceptu mediatoris: sed Adam dum filios, & Nepotes instruebat in fide sibi reuelata, instruebat illos in fide Dei vt iustificatoris, & saluatoris per mediatorem mittendum; ergo etiam illi non poterant fide diuina credere vnum sine altero, adeoque si erant adulti, non poterant iustificari sine fide Christi, saltem sub conceptu mediatoris venturi. In familia igitur Adami orta est prima Ecclesia hominum credentium in Deum iustificatorem, saluatorem, & remuneratorem per mediatorem venturum, quæ sicut fuit Ecclesia credentium in Christum, potest dici fuisse Ecclesia Christiana: & sicut familia Adami propagata deinde est in plures familias, & gentes, ita Ecclesia cum fide in Deum vt iustificatorem, saluatorem, & remuneratorem per mediatorem venturum, propagata est in plures familias, & gentes, diuina
pro-

providentia ita disponente, ut nemini sufficienter per signa credibilitatis, & internam illuminationem proponeretur Deus ut iustificator, saluator, & remunerator supernaturalis, quin proponeretur ut iustificator &c. per mediatorem venturum.

26. Confirmatur; & magis explicatur. Nam de facto post prædicationem Evangelij sola religio Christiana habet sufficientem credibilitatem ad fidem super omnia; sed religio Christiana ex prima nominis significatione est religio credens in Deum ut iustificatorem, saluatorem, & remuneratorem per Christum; ergo de facto post prædicationem Evangelij nemini proponitur vera religio ut sufficienter credibilis, quin proponatur Christus, ac proinde nemo potest credere super omnia, prout requiritur ad iustificationem adulti, quin credat in Christum. Antè Christum Parvulis Iudæorum, cum perveniebant ad usum rationis, religio Iudæorum proponebatur ut sufficienter credibilis; sed religio Iudæorum ex primo conceptu, & explicatione nominis erat religio expectantium Messiam, ac proinde credentium in Deum ut remuneratorem per Messiam venturum; ergo etiam Iudæi cum perveniebant ad usum rationis, non poterant credere super omnia in Deum ut remuneratorem, quin simul crederent in Christum, hoc est in Messiam venturum. Ex populis Gentilium nullus adultus poterat iustificari, nisi ex fide stricta Dei ut remuneratoris supernaturalis, fundata non in

Lib. III.

T

solo

solo testimonio creaturarum, sed in diuinā reuelatione, vt dictum est quæst. 36. nu. 23. Vel ergo hæc reuelatio fiebat ipsis immediatè ministerio Angelorum &c. & existimandum est, quod indiuisibiliter illis reuelarentur Deus vt iustificator, & remunerator supernaturalis per Mediatorem venturum; vel fiebat mediatè per hominem, & hic debebat proponere signa credibilitatis, quæ habebat aliqua Ecclesia, vel familia fidelis, puta Ecclesia Iudæorum, familia Abrahamæ, familia Iob, &c. sed in istis Ecclesijs, vel familijs fidelibus dabantur indiuisibiliter signa credibilitatis pro reuelatione Dei vt remuneratoris per Mediatorem venturum; ergo &c. Proportionaliter ante diluuium Adam propagauit familiam, & Ecclesiam credentium in Deum vt iustificatorem, & remuneratorem per mediatorem venturum, quæ Ecclesia habebat signa credibilitatis indiuisibiliter pro hoc toto, adeoque nemini proponebatur vt sufficienter credibile vnum sine altero, ac proinde nemo poterat credere super omnia vnum sine altero. Confirmatur rursus. Nam quotquot ex populo Gentili scimus habuisse fidem, scimus habuisse fidem mediatoris, & Redemptoris. Nam Iob. cap. 19. professus est fidem Christi, dicens: *Scio enim quod Redemptor meus uiuit &c. & in carne mea uidebo Deū Saluatorem meum &c.* quibus verbis uideatur profiteri fidem redemptoris, tanquam vulgatam apud fideles illius temporis. Sibyllæ etiam multa scripserunt de Christo.

Oppo-

27. Opponi potest primò: Apost. ad Gal. 3. dicit: *Antequam veniret fides, sub lege custodiebamur, conclusi in eam fidem, quæ reuelanda erat*; ergo Apostolus docet, quod ante fidem explicitam Christi, quæ reuelata fuit post prædicationem Euangelij, tempore legis naturæ, ac legis Mosaicæ dabatur solum fides implicita Christi.

28. Respondeo fidem antiquorum de Christo procul dubio fuisse implicitam, si comparetur cum fide nostra, vt magis explicatur paulo post.

29. Opponi potest secundo: Tridentinum Sess. 6. cap. 2. dicit Christum ante legem, & legis tempore multis Sanctis Patribus fuisse declaratum, & promissum; ergo significat non fuisse declaratum, & promissum omnibus hominibus.

30. Respondeo Tridentinum loqui de declaratione, & promissione immediata, at non negare, quod per illos, quibus Christus fuit immediatè reuelatus, & promissus, fuerit etiam mediatè promissus & declaratus alijs, saltèm sub conceptu mediatoris.

31. Opponi potest tertio: Iustinus Apol. 2. pro Christianis, Clemens Alexandrinus lib. 6. Stromatum, Chrysostomus Hom. 37. in Matth. docent Gentiles ante Christum potuisse saluari sine fide explicita Christi; ergo &c.

32. Respondeo Patres illos à Suario Disp. 12. de Fide Sect. 2. num. 1. referri pro sententia Vegæ, & aliorum docentium, Gentiles ante Christum potuisse iustificari

per cognitionem naturalem Dei, quæ sententia procul dubio est reiicienda ex dictis quæst. 36. num. 2. & seqq. Possunt etiam afferri pro sententia asserente aliquando suffecisse fidem latè dictam ex testimonio creaturarum, quæ sententia reiecta est eadem quæst. num. 21. Addo Chrysostomum posse ita explicari, vt neget solum fuisse necessariam fidem explicitam Christi, sub conceptu filij Dei incarnati, non autem sub conceptu Mediatoris.

33. Opponi possunt quarto Hugo de 5. Victore lib. 1. de Sacr. Part. 10. cap. 6. ubi negat ante Christum fuisse necessariam fidem explicitam Christi, & Bernardus Epist. 77. Hugoni consentiens.

34. Respondeo Hugonem, & Bernardū eo loco impugnare quemdam, qui assererat (verba Bernardi sunt) *Omnes antiquos iustos, quotquot videlicet Christi aduentum præcesserunt, tantam omnino habuisse præscientiam futurorum, quantam nos, qui post sumus, præætorum scientiam, ita vt nullus vel simplicium iustorum aliquid prorsus ignoraret ex omnibus, quæ nobis Euāgelica pandit Historia, V. G. Verbum Incarnatum, partum virginalem, doctrinam Saluatoris, miracula, crucem, mortem, sepulturam, descensum ad inferos, resurrectionem, & ad Cælos ascensionem &c.* Reiecta hac sententia, Bernardus concludit, explicans, quænam illi deberent explicitè credere, ac dicit: *Ita ergo multi ante Saluatoris aduentum Deum omnipotentem tenentes, & diligentes sua salutis gratuitum promissum, credentes in promissione*

sione fidelem, sperantes certissimum redemptorem, in hac fide, & saluatione saluati sunt licet quando, & quo ordine salus repromissum fieret, ignorarent; ergo Bernardus docet omnes antiquos credidisse, & sperasse certissimum Redemptorem, ac proinde credidisse in Christum sub conceptu Redemptoris, seu Mediatoris. Idem docet Hugo loco citato; ergo Bernardus, & Hugo stant pro nostra sententia.

35. Opponi potest quinto ex Suario Disp. 12. Sect. 3. num. 15. Medium omnibus necessarium debuit publicè omnibus prædicari, & promulgari; sed tempore legis naturæ, & Mosaicæ Christus etiam sub conceptu mediatoris non fuit publicè prædicatus, & promulgatus omnibus præsertim gentilibus; ergo non est verosimile fidem Christi sub conceptu Mediatoris fuisse medium omnibus, & singulis adultis necessarium ad salutem.

36. Respondeo, quod eodem argumento probari posset fidem explicitam Dei, ut reuelantis se esse iustificatorem, & remuneratorem supernaturalem, non fuisse omnibus, & singulis adultis necessariam ad iustificationem, & salutem, siquidem hæc reuelatio non fuerat publicè prædicata, & promulgata omnibus præsertim gentilibus. Sicut ergo Suarius dicit hanc reuelationem ex quadam traditione fuisse sufficienter promulgatam, sic nos dicimus reuelationem Dei ut iustificatoris, & remuneratoris per Mediatorem fuisse sufficienter promulgatam, ita ut omnes adulti, di-

438 *De necessitate fidei Christi.*

uina gratia excitati, possent inquirere, & ad talis reuelationis sufficientem notitia mperuenire, & credere, ac iustificari.

37. *Urget Suarius. Fides explicita Christi vt Mediatoris supponit notitiam explicitam peccati originalis; ergo etiam fides explicita peccati originalis fuisset medium necessarium ad salutem.*

38. *Respondeo nego antecedens. Nam fides, qua creditur Deum esse iustificatorem, & remuneratorem supernaturalem, per Mediatorem, non supponit fidem explicitam peccati originalis, sed solum supponit fidem de hoc, quod nemo possit consequi promissam iustificationē à peccatis, & remunerationem, nisi per Mediatorem.*

39. *Quæri potest secundo, vtrum fides Christi ab initio fuerit minus explicita, deinde fuerit magis explicita, tum in maioribus, tum in minoribus, ita vt in lege naturæ fuerit minus explicita, quam in lege Mosaica, & in lege Mosaica fuerit minus explicita, quam post Christum in lege Evangelica.*

40. *Respondeo affirmatiuè, vt docent Patres, & Theologi, ac præsertim Hugo de S. Victore lib. 1. de Sacr. Part. 10. cap. 6. Bernardus Epist. 77. ac S. Thomas 2. 2. qu. 2. art. 7. & alij communiter.*

41. *Primo ergo, vt docet S. Thomas 1. p. qu. 64. art. 1. ac plures alij, quos refert, & sequitur Suarius lib. 15. de Angelis c. 16. Angeli dum fuerunt in statu viæ, habuerunt reuelationem, & fidem Incarnationis, ac Christi, licet ignorarint Verbum incar-*
nan-

nandum occasione peccati. Immo, vt docet Suarius lib. 7. de Angelis cap. 13. aliique apud ipsum, Lucifer, & Angeli mali peccarunt occasione reuelationis ipsis factæ de Incarnatione Verbi.

42. Secundo vt docet S. Thomas 2. 2. quæst. 2. art. 7. in corp. *Adam ante statum peccati habuit explicitam fidem de Christi Incarnatione, secundum quod ordinabatur ad consummationem gloriæ, non autem secundum quod ordinabatur ad liberationem a peccato per passionem, & resurrectionem, quia homo non fuit præsciens peccati futuri. Videtur autem Incarnationis Christi præsciens fuisse per hoc, quod dixit: Propter hoc relinquet homo Patrem, & Matrem, & adhærebit uxori suæ, vt habetur Gen. 2. & hoc Apost. ad Eph. 5. dicit Sacramentum magnum esse in Christo, & Ecclesia, quod quidem Sacramentum non est credibile primum hominem ignorasse. Addo, quod quia vt dictum est quæst. 36. num. 20. primi parentes ante lapsum disposuerunt se ad gratiam sanctificantem per fidem, & adus supernaturales, rationabiliter censeretur illos se disposuisse per fidem Christi.*

43. Tertiò vt eodem art. 7. docet S. Thomas, post peccatum fuit explicitè creditum, ab Adam nimirum, & maioribus, mysterium Incarnationis Christi, non solum quantum ad Incarnationem, sed etiam quantum ad passionem, & resurrectionem, quibus humanum a peccato genus, & morte liberatur. Alioquin enim non præfigurassent Christi passionem quibusdam sacrificijs, & ante legem,

fuerunt. Desumpit hanc doctrinam S. Thomas ex Patribus, & præsertim ex Gregorio, qui Hom. 16. in Ezech. dicit: *secundum incrementa temporum creuit scientia Sanctorum Patrum, & quanto viciniore aduentui Saluatoris fuerunt, tanto Sacramenta salutis plenius perceperunt.* Hugo de S. Victore lib. 1. de Sacramentis p. 10. cap. 6. hoc magis explicans dicit. *Ante legem Deus creator credebatur, & ab eo salus, & redemptio expectabatur, per quem verò, & quomodo eadem salus implenda, ac perficienda foret, exceptis paucis, quibus hoc scire singulariter in munere datum erat, à cæteris etiam fidelibus ignorabatur. Sub lege autem Persona Redemptoris mittenda prædicabatur. Quæ autem ipsa Persona hæc foret, homo, an Angelus, an Deus, nondum manifestabatur: soli hoc cognouerunt, qui per spiritum singulariter ad hoc illuminati fuerunt. Sub gratia autem manifestè omnibus iam, & prædicatur, & creditur modus redemptionis, & qualitas Personæ assumptæ. Semper tamen in Ecclesia Dei fidem, & cognitionem fuisse credimus Incarnationis, & passionis Christi, quia ab initio nunquam defuerunt, qui hoc cognouerunt. Alij saluabantur, quia horum perfectiori fide simplici iungebantur, & eos bene operando, sequebantur. Dum dicit, quod etiam ante legem expectabatur redemptio, significat, quod expectabatur redemptor, adeoque Christus sub conceptu redemptoris.*

45. Quæritur tertio, vtrum in lege gratiæ post promulgatum Euangelium, adultis ad iustificationem sit necessaria

T 1

fides

fides explicita Christi, non solum sub conceptu mediatoris, sed sub conceptu filij Dei, qui factus sit homo, & pro nobis crucifixus, & mortuus sit, ac deinde resurrexerit?

46. Respondeo esse necessariam, non quidem ex natura rei, & ex obiecto, sed concomitanter, & ex ordinatione extrinseca Dei, proportionaliter ad dicta nu. 16. Probatur: nam ex dictis num. 31. post prædicationem Evangelij sola Religio Christiana habet sufficientem credibilitatem; sed Religio Christiana ex ipsa nominis significatione est religio credens in Deum ut iustificatorem, & remuneratorem per Christum filium Dei, pro nobis in nostra carne crucifixum, & qui deinde resurrexit; ergo nemini proponitur sufficienter revelatio Dei ut remuneratoris supernaturalis, quin proponatur Christus filius Dei pro nobis crucifixus, & qui resurrexit; ergo nullus adultus potest credere super omnia in Deum ut remuneratorem, quin credat in Christum filium Dei crucifixum, & qui resurrexit.

47. Confirmatur ex Scriptura, & Patribus. Ioan. 10. Christus de se ipso dicit: *Ego sum ostium. Per me si quis introierit, salvabitur*; ergo nullus adultus potest consequi salutem, nisi ingressus fuerit per Christum; sed ut explicat Gregorius lib. 7. Epist. 47. *Ipse per Christum ingreditur, qui de eodem creatore, & redemptore humani generis vera sentit, & prædicata custodit*; ergo ad iustificationem, & salutem adulti requiritur,

tur,

ritur, ut de Christo vera sentiat, nimirum quod sit filius Dei pro nobis crucifixus, qui & resurrexit. Ioan. 3. Christus dicit: *Sicut Moyses exaltauit serpentem in deserto, ita exaltari oportet filium hominis, ut omnis, qui credit in ipsum, non pereat, sed habeat vitam æternam*; ergo ut quis non pereat, debet credere in Christum exaltatum in Cruce, hoc est crucifixum. Io. 6. *Qui credit in me, habet vitam æternam*. Io. 10. *Hæc est vita æterna, ut cognoscant te solum verum Deum, & quem misisti, Iesum Christum*. Licet autem hic locus à S. Thoma 1. p. qu. 12. art. 4. & 1. 2. qu. 3. art. 4. & lib. contra Gentes cap. 61. intelligatur in sensu formali, ita ut significet vitam æternam, seu beatitudinem consistere formaliter in cognitione intuitiua Dei, tamen Cyrillus Alexandrinus, Augustinus, & alij, quos refert, & sequitur Cornelius in Comm. eius loci, intelligunt illum in sensu causali, ita ut sensus sit: *hæc est causa vite æternæ, hæc est via ad vitam æternam, ut per fidem cognoscant homines, & credant te esse solum verum Deum, & Iesum Christum missum ad eorum salutem*. Ideò Cyrillus Alexandrinus lib. 11. in Ioan. cap. 16. hunc locum, explicans, dicit: *Radicem atque originem fidei, & vera pietatis virtutem esse affirmat*. Hinc Cornelius infert, *Ad salutem, & vitam æternam requiri cognitionem, idest fidem tum Incarnationis Iesu Christi, tum Trinitatis. Nam Pater non potest plenè cognosci sine filio, & Spiritu Sancto*. Marci ultimo Christus dixit: *Euntes in mundum uniuersum,*

sum, prædicare Euangelium omni Creaturæ . Qui crediderit , & baptizatus fuerit , saluus erit, qui verò non crediderit, condemnabitur: Sed prædicare Euangelium est prædicare filium Dei pro nobis Incarnatum, crucifixum, ac mortuum fuisse , ac deinde resurrexisse; ergo qui hæc non crediderit , non poterit iustificari , & saluari , ac proinde condemnabitur . Act. 16. cum Custos carceris interrogasset Paulum ; Quid me oportet facere, ut saluus fiam? Paulus respondit : Crede in Dominum Iesum , & saluus eris ; ergo significavit ad iustificationem , & salutem esse necessariam fidem Christi . Hieronymus Comm. cap. 1. Epist. ad Ephes. explicans illa verba: Prædestinās nos in adoptionem filiorum per Iesum Christum, dicit : Nec non etiam hoc inferendum , quod cum prædestinet nos , seu præfiniat Deus in adoptionem filiorum per Iesum Christum, tamen non ante filij esse possumus , nisi filij eius Iesu Christi fidem , & intelligentiam recipiamus. August. lib. de Prædest. Sanctorum cap. 7. loquens de Cornelio , de quo Act. 10. dicitur , eius acceptas fuisse eleemosinas , & orationes , antequam credidisset, dicit : Nec tamen sine aliqua fide donabat , & orabat . Nam quomodo inuocabat, in quem non crediderat ? sed si posset sine fide Christi esse saluus , non ad eum edificandum mitteretur Architectus Apostolus Petrus ; ergo Cornelius non potuit iustificari , & saluari sine fide Christi . Alludit Augustinus ad illud Pauli 1. ad Cor. 3. Ut sapiens Architectus fundamentum posui &c. Fundamentum enim

enim aliud nemo potest ponere præter id, quod positum est, quod est Christus Iesus, quia nimirum fundamentum necessarium ad totum ædificium spirituale iustificationis adulti est fides Christi. Ideò Gregorius lib. 7. Epist. 47. his verbis relatis, dicit: Quisquis ergo cum dilectione Dei, & proximi, fidei, quæ in Christo est, firmitatem tenet, eundem Iesum Christum Dei, & hominis filium apud se posuit fundamentum. Augustinus etiam lib. de Spiritu, & Littera, cap. 29. dicit: Fide igitur Iesu Christi impetramus salutem, & quantum in nobis inchoatur in re per iustificationem nimirum, & quantum perficienda expectatur in spe, videlicet per beatitudinem. Demum Tridentinum Sess. 6. cap. 6. agens de dispositione adultis necessaria ad iustificationem dicit. Disponuntur autem ad ipsam iustitiam, dum excitati à diuina gratia, & adiuti, fidem ex auditu concipientes, liberè mouentur in Deum, credentes verà esse, quæ diuinitus reuelata, & promissa sunt, atque illud in primis, à Deo iustificari impium per gratiam eius, per redemptionem, quæ est in Christo Iesu; ergo Tridentinum docet dispositionem adultis necessariam ad iustificationem esse fidem, qua in primis credatur à Deo iustificari impium per redemptionem, quæ est in Christo Iesu.

48. Quæri potest quarto, vtrum post promulgatum Euangelium ad iustificationem adulti sit necessarium necessitate mediij, vt credat explicitè Mysterium Trinitatis?

Ref.

49. Respondeo fidem explicitam Trinitatis, prout continetur in signo Crucis, & in forma baptismi, esse necessariam necessitate medijs, non quidem ex natura rei, & ex obiecto, sed concomitanter, & ex ordinatione diuina, proportionaliter ad dicta num. 38. Probatur ratione allata à S. Thoma 2. 2. qu. 2. art. 8. in corp. Nam ex dictis post promulgationem Euangelij ad iustificationem, & salutem necessaria est fides explicita Christi; sed fides Christi includit, quod filius Dei carnem assumpserit, & per gratiam Spiritus Sancti mundum renouarit, & quod de Spiritu Sancto conceptus fuerit; ergo includit fidem Patris, Filij, & Spiritus Sancti, ac proinde nemini proponitur sufficienter fides Dei ut iustificatoris, & remuneratoris supernaturalis, quin illi proponatur fides Christi, & nemini sufficienter proponitur fides Christi, quin proponatur fides Patris, Filij, Spiritus Sancti, ac Trinitatis, cuius inuocatione adulti iustificentur in baptismo suscepto re, vel voto.

50. Opponitur. Act. 10. de Cornelio Centurione, natione Gentili, narratur, quod antequam crederet in Christum, erat religiosus, ac faciens elemosinas multas plebi, ac deprecans Deum semper, & quod Angelus apparens, dixit illi, *Orationes tue, & elemosine tue ascenderunt in memoriam in conspectu Dei*; sed hæc significant, quod Cornelius iam erat iustus; ergo Cornelius iustificatus fuit, antequam crederet explicitè

plicitè in Christum, ac proinde etiam post Christi aduentum fides explicita Christi non est omnibus necessaria necessitate medijs ad salutem.

51: Respondeo de Cornelio duas esse sententias Patrum, & Theologorum. Prima docet Cornelium ex fide quadam inchoata, & imperfecta in Deum remuneratorem fuisse iustum, & religiosum iustitia quadam imperfecta, & dispositiua, sed nondum adeptum iustificationem, & remissionem peccati, quam solum adeptus est deinde, postquam ex prædicatione Petri credidit fide perfecta, & super omnia in Christum. Hanc sententiam docuerunt Chrysostomus tom. 3. agens de Fide, & Lege naturæ ac dicens: *Et vis plane videre, quod opera sine fide non viuificantur? Testimonium bonum habuit Cornelius de Eleemosina, & precibus, & Christum ignorabat; & quia magnus ille iustitiæ, & veritatis Iudex personarum respectum nesciens vidit bona quidem opera, sed mortua, quia fidem non habebat, misit diuinum Angelum. Gregorius Hom. 9. in Ezechielem dicens: Vnum sine altero nihil prodesse valet, quia nec fides sine operibus, nec opera sine fide, nisi fortasse pro fide percipienda; Sicut Cornelius pro bonis operibus meruit audiri, antequam fidelis existeret. Augustinus lib. de Prædest. SS. cap. 7. dicens: Solet dici, idè credere meruit, quia vir bonus erat, antequam crederet: quod de Cornelio dici potest, cuius accepta sunt eleemosinae, & exaudita orationes, antequam credidisset in Christum, Nec tamen sine aliqua fide donabat,*

bat, & orabat. Nam quomodo inuocabat, in quem non crediderat? Sed si posset sine fide Christi esse saluus, non ad eum edificandum mitteretur architectus Apostolus Petrus; ergo Patres citati dicunt Cornelium, antequam ad eum mitteretur Apostolus Petrus, fuisse iustum solum imperfectè, & dispositiuè, & Augustinus docet ex fide imperfecta habuisse iustitiam illam imperfectam, & dispositiuam, ac fidem Christi fuisse illi necessariam ad salutem, ideoque ad illum missum Apostolum Petrum. Videri potest Vasquez 1. 2. Disp. 192. cap. 1. ubi hanc sententiam sequitur. Iuxta hanc opinionem retorquetur argumentum, & confirmatur nostra sententia. Nam Cornelius licet aliqua fide crederet in Deum ut remuneratorem, & ex hac fide esset religiosus, ac timens Deum, & faceret multa opera bona, non potuit iustificari sine fide Christi, & ideo missus fuit ad eum Petrus, à quo instrueretur in fide Christi; ergo fides explicita Christi est ad iustificationem, & salutem necessaria.

52. Secunda sententia, quam Cornelius in Comm. cap. 10. Actuum tribuit Bedæ, Dionysio, Lorino, Magistro in 3. dist. 25. ac ibidem Alberto, S. Bonau. & S. Thomæ, tum ibi, tum 3. p. quæst. 69. art. 4. ad 1. & alijs, & quam probabiliorem existimant ipse Cornelius, & Card. de Lugo Disp. 12. de Fide, Sect. 4. num. 90: docet Cornelium verè fuisse iustificatum, antequam crederet explicitè in Christum. Iuxta hanc sententiam dici potest Corne-
lium

lium iustificatum fuisse, antequam sufficienter promulgaretur Euangelium; sed ante sufficientem promulgationem Euangelij sufficiebat fides Dei vt remuneratoris per mediatorem promissum; ac Cornelius, cum maneret in Iudæa, potuit à Iudæis instrui in hac fide, & per ipsam, iustificari; ergo non sequitur, quod post promulgationem sufficientem Euangelij, non sit necessaria fides explicità Christi. Quia tamen iam incipiebat fides explicita Christi esse necessaria ex præcepto, ideò ad Cornelium missus fuit Petrus, vt per fidem explicitam Christi, & per baptismum, magis iustificaretur, & acciperet maiorem gratiam.

53. Ad 1. Apostolus ad Heb. 11. dicens: *Accedentem ad Deum oportet credere, quia Deus est, & quia inquirentibus se remunerator est*, enumerat solum ea, quorum fides est ad iustificationem, & salutem adultorum necessaria ex natura rei, & ex obiecto; sed ad iustificationem, & salutem adultorum est necessaria ex natura rei, & ex obiecto sola fides Dei vt remuneratoris supernaturalis, vt dictum est num. 16. Fides Christi est necessaria solam concomitanter, & ex diuina ordinatione; ergo &c. Eodem pacto respondeo ad 2. & 3. argumentum, quæ probant quidem solum fidem Dei vt remuneratoris supernaturalis esse necessariam ex natura rei, & ex obiecto, quod fatemur, non probant fidem Christi non esse necessariam concomitanter, & ex diuina ordinatione.

Ad

54. Ad 4. ante aduentum Christi nemo poterat iustificari sine fide Christi sub conceptu mediatoris, ex quia diuina ordinatio. ne nemini poterat sufficienter proponi ad credendum super omnia reuelatio Dei vt remuneratoris supernaturalis, quin simul proponeretur sufficienter reuelatio Dei vt remuneratoris per mediatorem, vt explicatum est num. 24. sed post Euangelium, promulgatum nemini potest proponi sufficienter reuelatio Dei vt remuneratoris supernaturalis, quin sufficienter proponatur Deus vt remunerator per Christum vt passum, & mortuum pro peccatis nostris, vt dictum est num. 46. ergo &c.

QVÆSTIO XXXIX.

Utrum, & quorum articulorum fides sit necessaria necessitate præcepti?

1. **V**idetur non dari præceptum obligans ad exercendum actum internum fidei. Primo quia tale præceptum, vel esset Ecclesiasticum, vel diuinum; & si diuinum, vel esset naturale, vel supernaturale; sed non potest esse Ecclesiasticum, nam Ecclesia non potest præcipere actus merè internos: non potest esse diuinum naturale, nam præceptum naturale non potest obligare ad actus supernaturales, qualis est actus fidei; nec potest esse diuinum

num supernaturale; nam præceptum alicuius actus debet præcognosci, antequam illum actum exerceamus; sed præceptum supernaturale credendi non posset cognosci, nisi per actum fidei, ac proinde non posset præcognosci, antequam credamus; ergo &c.

2. Secundo non potest explicari, quando nam hoc præceptum obliget; ergo non datur.

3. Tertio Præceptum credendi deberet esse proprium virtutis fidei; sed non potest esse proprium virtutis fidei; ergo &c. Probatur minor: nam præceptum spectat ad illam virtutem, quæ ex amore sui obiecti formalis potest, ac debet velle observare præceptum; sed fides cum sit virtus intellectualis, non potest ex suo obiecto formali velle observare præceptum credendi; ergo &c.

4. Quarto non potest explicari, quænam deberent ex præcepto explicitè credi in lege naturæ, Mosaica, vel Evangelicæ; quenam debeant credi explicitè à maioribus, vel minoribus; ergo &c.

5. Respondeo plures esse quæstiones insinuat in rationibus dubitandi.

6. Quæritur igitur primo, vtrum detur præceptum, & obligatio exercendi actum internum credendi?

Respondeo affirmatiuè cum omnibus Patribus, & Theologis. Probatur ex Scriptura. 1. Io. 3. *Hoc est mandatum eius, ut credamus in nomine filij eius.* Matth. ultimo *Qui non crediderit, condemnabitur.* Ad Heb.

Heb. 10. *Iustus ex fide vivit. Quod si subtraxerit se, non placebit anima mea.* Ex his patet non solum dari præceptum credendi, sed esse præceptum graue, & rigorosum, ac obligans sub poena damnationis æternæ. Confirmatur ex Patribus. Irenæus lib. 3. contra Hæreses cap. 21. *Ignorantes eum, qui ex virgine est, priuantur munere eius, quod est vita æterna.* Cyrillus Hierosolymitanus Catech. 5. loquens de fidei symbolo, dicit: *Cave, ne ob inscitiam pereas.* Idem docet Gregorius lib. 1. Reg. cap. 16. & lib. 7. Epist. 47. Augustinus & alij. Ratio autem est, quia omnes obligantur ad ponenda media necessaria ad salutem; sed ex dictis quæst. 36. fides est medium necessarium ad salutem; ergo &c. Videri potest Suarius Disput. 13. Sect. 1. num. 1. & 2.

7. Quæritur secundo, vtrum præceptum credendi sit diuinum, vel potius sit merè Ecclesiasticum.

Respondeo procul dubio non esse merè Ecclesiasticum, sed diuinum. Probatur primo: nam Ecclesia non potest per se obligare ad actus merè internos, vt docent communiter Theologi; sed præceptum credendi per se obligat etiam ad actus merè internos; ergo &c. Secundo Ecclesia per sua præcepta non potest obligare, nisi subditos, eos nimirum, qui per ianuam baptismi ingredientes in Ecclesiam, facti sunt subditi Ecclesiæ, iuxta illud. Apostoli 1. ad Cor. 5. *Quid enim mihi de ijs, qui foris sunt, iudicare? &c. Nam eos, qui foris sunt, Deus iudicabit; sed præceptum credendi obligat omnes,*

omnes, etiã antequam per baptismum facti sint subditi Ecclesiæ, iuxta illud Matth. ult. *Qui crediderit, & baptizatus fuerit, saluus erit, qui verò non crediderit, condemnabitur*; ergo &c. Tertiò præceptum, quod intelligitur dari antecederet, & independenter ab omni ordinatione Ecclesiastica, & humana, procul dubio est diuinum; sed præceptum credendi intelligitur dari antecederet, & independenter ab omni ordinatione Ecclesiastica, & humana, sicut fides intelligitur esse medium necessarium ad salutem, & iustificationem antecederet, & independenter ab omni ordinatione Ecclesiastica, & humana; ergo &c.

8: Quæritur tertiò, vtrum præceptum credendi fide supernaturali sit naturale, vel supernaturale?

Respondeo præceptum naturale posse sumi dupliciter. Primò præceptum naturale dicitur, quod sequitur ex constitutione naturæ præcisè secundum se considerata. In hoc sensu præceptum credendi fide supernaturali, procul dubio non est naturale. Nam procul dubio ex præcisa constitutione naturæ absque eleuatione ad finem supernaturalem non sequitur hominem, aut Angelum obligari ad credendum fide supernaturali vel ad exercendum vllum actum supernaturalem. Secundo præceptum naturale dici potest, quod sequitur connaturaliter ex constitutione ordinis supernaturalis. In hoc sensu præceptum credendi est naturale ordini supernaturali. Nam ex constitutione ordinis supernaturalis,

oritur sufficienter obligatio non ponendi excessus &c. sed ex honestate speciali credendi super omnia Deo reuelanti, oritur sufficienter obligatio credendi super omnia: ex inhonestate speciali discredendi, vel non credendi, oritur obligatio ad non discredendum, & ad non omittendum actum fidei; ergo &c.

Addo, quod cum actus fidei est necessarius ad obseruanda præcepta aliarum virtutum, etiam præceptis aliarum virtutum obligamur ad credendum: E. G. cum ex præcepto charitatis obligamur ad Deum super omnia diligendum, quia non possumus diligere, nisi credamus, ex præcepto charitatis obligamur ad credendum.

II. Quæritur quinto, quando nam obliget præceptum credendi?

Respondeo cū communi sententia Theologorum, quos refert, & sequitur Card. de Lugo disp. 13. Sect. 1. num. 21. quod tenemur credere statim, ac fides sufficienter proponitur. Ratio est, quia cum quis dicit aliquid alteri, postulat sibi credi, & si sit dignissimus fide, fit illi iniuria, si non creditur, vel differatur fides; sed cum fides nobis sufficienter proponitur, Deus nobis loquitur; ergo postulat sibi credi, & fit Deo iniuria, si non credamus, vel fidem differamus. Hinc sequitur, quod cum aliqui articuli de nouo nobis sufficienter proponuntur, statim debemus illos credere ex eadem ratione, quia nimirum Deus de nouo nobis dicit illos articulos. Cum verò deinde occurrunt articuli vt antea iam cre-

crediti, non semper requiritur, ut formaliter renouemus actum fidei, sed sufficit, ut per quamdam fidem virtualem ratam habeamus fidem præteritam, quæ fides virtualis cadit sub experientiam, & difficilè explicatur, cum sit valde implicita; actus autem valdè impliciti difficilè explicentur.

12. Potest opponi: sequeretur, quod statim ac alicui proponitur Deus ut summè amabilis, teneretur ad Deum summè amandum, & ad eliciendum actum charitatis perfectæ.

Respondeo aliquos concedere sequelã, alios negare, & decisionem quæstionis spectare ad Tractatũ de Charitate. In sententia negante sequelam disparitas afferri potest ex eo, quod cum aliquis fide dignissimus alloquitur sufficienter alterum, statim postulat sibi credi, & existimat sibi fieri grauem iniuriam, si fides sibi negetur, vel suspendatur. At cum quis amore dignissimus inuitat aliquem ad se summè diligendum, nõ existimat sibi fieri iniuriam, si non statim summè diligatur, sed ille paulatim se disponat ad actum perfectæ charitatis, & amoris.

13. Addo præceptum credendi obligare etiam, quoties actus fidei est necessarius ad obseruanda alia præcepta, ad resistendum grauibz tentationibus &c.

14. Quæritur sexto, quænam homines communiter tenerentur explicitè credere in lege naturæ, antequam daretur præceptum circumcisionis, ac lex Mosæica?

Ref-

Respondeo, quod primò tenebantur explicitè credere omnia, quorum fides erat tunc necessaria necessitate medijs, quæ explicata sunt quæst. 37. & 38. inter quæ diximus includi fidem Christi sub conceptu mediatoris. Coetera spectantia ad mysteria Trinitatis, & Incarnationis communiter minores non tenebantur explicitè credere, quia illis non erant sufficienter proposita: aliqui maiores, quibus sufficienter proponebantur, tenebantur illa explicitè credere. Secundò tenebantur credere ea, quæ spectant ad præcepta moralia, & sine quibus vita non potest rectè institui, qualia sunt quæ continentur in decalogo, & ad curandum, ut de his instruerentur. Ad alia præter hæc explicitè credenda, vel scienda videtur, quod iure diuino communiter pro illo statu non obligarentur.

13. Quæritur septimo, quænam post datum præceptum circumcisionis, & legem Mosaicam tenerentur credere Iudæi.

Respondeo, quod post datum Abrahamæ præceptum circumcisionis, qui erant ex familia Abrahamæ, tenebantur credere quæ fuerant specialiter reuelata, & præcepta, tanquam propria familiæ Abrahamæ: & quia specialiter fuerat reuelatum illi familiæ, ex Abraham per Isaac, & Iacobum oriturum mediatorum, in quo benedicerentur omnes gentes, ideò tenebantur hoc credere. Quia rursus illi familiæ datum fuerat præceptum circumcisionis, tenebantur credere præceptum circumcisionis. Post datam legem Mosaicam Iudæi communiter

Lib. V.

V

tene-

tenebantur credere præcepta communia, puta præceptum Sabbati, festiuitatum communium &c. Et quia multa erant præcepta communia, quæ includebant notitiam plurium spectantium ad Moysen, & Patres, 'ad captiuitatem Ægyptiacam &c. ideò tenebantur hæc credere, & ad expectandum Messiam ex ipsis oriturum &c. Ideò maiores tenebantur hæc scire, & tradere minoribus: minores tenebatur curare, vt de his instruerentur à maioribus.

16. Quæritur septimò, quænam Christiani in lege gratiæ post prædicatum Euangelium teneantur explicitè credere?

Respondeo, quod aliqua tenentur credere propter cognitionem, aliqua propter operationem. Primò ergo debemus agere de ijs, quæ tenemur credere propter cognitionem; deinde de ijs, quæ tenemur credere propter operationem.

17. Fuit antiqua opinio docens simplices fideles non obligari ad aliquem articulum particularem explicitè credendum, sed sufficere, vt credant generaliter omnia, quæ credit Ecclesia. Pro hac opinione citantur aliqui Canonistæ, nimirum Innocentius, Ostiensis, Panormitanus in cap. 1. De summa Trinitate, & Fide Catholica. Citantur etiam Summa Rosella, Verbo *Fides*, Guillelmus Parisiensis in Tractatu de Fide, & Altiſiodorensis Lib. 3. Summæ Tract. 3. cap. 1. quæst. 5.

18. Reijcitur hæc sententia: nam ex dictis quæst. 39. num. 6. Fideles saltem tenentur credere explicitè omnia, quorum
fides

fides est ad salutem necessaria necessitate
medij; sed fides explicita plurium articu-
lorum est ad salutem necessaria necessitate
medij, vt dictum est quæst. 38. ergo procul
dubio fideles tenentur ad explicitè cre-
denda saltem illa omnia.

19. Dicendum igitur cum communi
sententia Theologorum, quos refert, &
sequitur Suarius Disp. 13. de Fide, Sect. 4.
nu. 5. Sanch. lib. 2. in Decalog. cap. 3. Card.
de Lugo Disp. 13. de Fide, Sect. 4. num. 63.
& alij, omnes fideles communiter obligari
ad explicitè credendos, & sciendos quoad
substantiam iuxta suam capacitatem omnes
articulos, qui continentur in symbolo fidei.
Nomine autem syboli fidei hic intelligen-
dus symbolum Apostolorum.

20. Probatur primò auctoritate Con-
ciliorum, & Patrum, & ex perpetuo vsu
Ecclesiæ. Ecclesia enim notitiam symboli
exigit ab omnibus, & singulis adultis, &
antequam baptizentur, & post baptismum,
vt constat ex Concilijs Agathensi, Bra-
charenfi 2. & Cabilonensi relatis cap. 20.
& seqq. de Consecratione, & ex Rabano
relato ibi, in cap. *Ante baptismum*, & ex
Catechismo Pij V. vbi in principio dici-
tur omnes scire, & credere debere ea, quæ
Apostoli certis articulis comprehende-
runt, & ex cap. *Deus qui* de Pœnitent. &
Remiss. S. etiam Augustinus Serm. 181. de
Tempore, & S. Leo Serm. 6. de Passione,
dicunt Apostolos composuisse symbolum,
vt fideles haberent certam fidei suæ regu-
lam, quam scire, & credere deberent. Can.

etiam 7. Trullano dicitur eum, qui non scit memoriter, & firmiter credit symbolum, non esse Catholicum tenendum. Ideò nullus adultus, qui symbolum ignorat, admittitur ad baptismum, ac baptizatus, si symbolum ignoret, non absoluitur in Sacramento Pœnitentiæ.

21. Probatur secundò conclusio, discurrendo per singulos articulos symboli. Primò ex dictis quæst. 37. num. 6. necessitate medijs debemus credere in vnum Deum, qui sit omnipotens, ac primum principium, & supremus Dominus Vniuersi; sed hoc est credere in Deum omnipotentem, Creatorem Cœli, & Terræ; ergo debemus credere in Deum omnipotentem, Creatorem Cœli, & Terræ; sed ex dictis quæst. 38. debemus credere necessitate medijs mysteria Trinitatis, & Incarnationis: Mysterium autem Trinitatis, includit, quod Deus sit Pater; ergo debemus credere in totum primum articulum, hoc est in Deum Patrem omnipotentem, Creatorem Cœli, & terræ. Quæritur, vtrum omnes teneantur explicite credere Deum, non ab æterno, sed in tempore creasse Mundum, hoc est Cœlum, & terram. Affirmat Bannez, sed sine sufficienti fundamento. Negat Suarius Disp. 13. Sect. 4. num. 6. addens tamen vtile esse fideles de hac veritate instruere, ne per ignorantiam in errorem labantur.

22. Secundò eo ipso, quod ex dictis quæst. 38. omnes debent credere mysterium Trinitatis, & Incarnationis, debent cre-

credere in Iesum Christum filium Dei vnicum conceptum ex Spiritu Sancto. Vt autem omnes forment dignam existimationem de filio Dei, & eius matre, fuit expediens, vt teneantur credere Filium Dei conceptum, & natum ex Maria Virgine, per operationem Spiritus Sancti. Addit Suarius, quod quia in symbolo Christus dicitur natus ex Maria Virgine, debet explicitè credi Virginem mansisse Virginem in partu: & quia Maria absolutè vocatur Virgo, debet credi illam fuisse Virginem etiam post partum, ac tota vita. Nomen enim Virginis non tribuitur absolutè, nisi ijs, quæ fuerunt Virgines vsque ad mortem.

23. Tertiò omnes debent credere mysteria passionis, crucifixionis, mortis, ac sepulturæ Christi, cum de his mysterijs celebrentur præcipuæ festiuitates in Ecclesia, & cum sint præcipua nostræ fidei. Ideo Apostolus 1. ad Cor. 2. dicebat: *Prædicamus Christum, & hunc crucifixum: & cap. 15. Tradidi vobis in primis, quoniam Christus mortuus est.* Circumstantia illa, quod Christus passus sit sub Pontio Pilato, videtur admodum accidentalis, adeoque non dari vniuersalis obligatio illam explicitè sciendi, & credendi.

24. Quæritur, vtrum omnes, & singuli fideles obligentur explicitè scire articulum de descensu Christi ad inferos? Affirmat Medina in 3. p. quæst. 52. artic. 8. Melius negat Suarius Tom. 2. in 3. p. Disp. 43. Sect. 3. primò quia hic articulus non est

positus in symbolo Niceno, & Constanti-
nopolitano. Secundò quia aliqui antiqui
Patres exponentes symbolum, illum omit-
tunt, vt August. lib. de Fide, & Symbolo,
& lib. de Symbolo ad Catechumenos, Iren.
lib. 1. cap. 2. Tertull. lib. de Velandis Vir-
ginibus, in principio, & lib. de Præscript.
cap. 13. & lib. contra Praxeam in principio,
& Origenes lib. Periarch. Ideò aliqui sus-
picantur hunc articulum non fuisse ab
Apostolis positum in symbolo, sed deinde
additum. Quia tamen alij Patres antiqui
agentes de symbolo eam particulam refe-
runt, & exponunt, vt Chrysost. Hom. 2. de
Symbolo, Cyrillus Hierosolym. Catech. 4.
Ruffinus in expositione Symboli, dicen-
dum illam particulam ab Apostolis posi-
tam in symbolo.

25. Quarto omnes tenentur explicitè
scire, ac credere mysteria Resurrectionis, &
Ascensionis Christi, cum de ipsis præci-
pue festiuitates in Ecclesia celebrentur.
Ideò de mysterio resurrectionis Apostolus
ad Rom. 10. dicit: *Si confitearis in ore tuo
Dominum Iesum, & in corde tuo credideris,
quod Deus illum suscitauit à mortuis, saluus
eris.* Circumstantia, quod Christus resur-
rexerit tertia die, videtur admodum acci-
dentalis, ac proinde non dari obligatio
vniuersalis illam sciendi. Quod additur
mysterio ascensionis, nimirum quod Chri-
stus sedet ad dexteram Patris, Suarez disp.
13. sect. 4. dicit esse obscurius, quam vt
ab omnibus possit clarè intelligi, adeoque
sufficere simplicibus, vt sciant, & credant
Chri

Christum vt Deum habere gloriam æqualem Patri , vt hominem obtinere altissimum gradum gloriæ . Tenentur omnes scire , & credere Christum venturum ad iudicandum viuos , & mortuos. Nam sicut Iudæi expectant primum aduentum , sic nos debemus expectare secundum aduentum Christi . Ideò Petrus Act. 10. dicit : *Præcepit nobis prædicare populo, & testificari, quia ipse est, qui constitutus est à Deo Iudex viuorum, & mortuorum.*

26. Quarto omnes tenentur credere in Spiritum Sanctum, eiusque diuinitatem, cum hoc contineatur in mysterio Trinitatis . Non autem omnes tenentur explicitè scire Spiritum Sanctum procedere à Patre, & Filio , cum non contineatur in symbolo Apostolorum . Existimo etiam omnes teneri ad sciendum, & explicitè credendum Spiritum Sanctum missum ad nos sanctificandos , cum de hoc mysterio celebretur festum Pentecostes.

27. Quintò aliqui apud Medinam dubitant, vtrum omnes , & singuli teneantur scire , & credere articulum de Sancta Ecclesia Catholica. Dicendum tamen cum Theologis communiter in 4. & 2.2. qu. 2. Vasquez 1.2. Disp. 121. cap. 2. num. 6. Henriquez lib. 6. de Poenit. cap. 28. num. 2. Sanchez lib. 2. Decalog. cap. 3. num. 8. quos refert, & sequitur Suarez disp. 13. sect. 4. num. 10. quod omnes tenentur id scire , & credere . Ratio est, quia extra Ecclesiam non est salus , & omnes tenentur credere Ecclesiæ, vt regulæ proximæ , & in fide

Ecclesiæ implicitè credere omnes alios articulos. Existimo etiam, quod omnes tenentur credere, quod in Ecclesia, quæ est congregatio fidelium sub vno capite, dantur sancti, & communio bonorum operum, & sub hoc conceptu datur communio Sanctorum.

28. Sextò omnes tenentur explicitè credere articulos de peccatorum remissione, ac de vita æterna, cum contineantur in fide Dei iustificatoris, & remuneratoris supernaturalis, vt dictum est qu. 37. Tenentur etiam explicitè scire, & credere articulum de resurrectione Carnis, cum sit valdè præcipuus.

29. Quæritur octauo, quanam omnes fideles teneantur credere propter operationem?

Respondeo, quod primo tenentur scire, & credere præcepta Decalogi, siquidem sine illorum cognitione non possunt rectè suam vitam instituere. Secundo tenentur scire, & credere tria sacramenta omnibus necessaria, baptismum nimirum, penitentiam, & Eucharistiam. Quia verò in præcepto baptismi includitur fides de peccato originali, probabile est, quod tenentur credere peccatum originale. Quia in præcepto sumendi Eucharistiam includitur fides de præsentia corporis Christi in Eucharistia, tenentur scire, & credere præsentiam realem corporis Christi in Eucharistia. Notitia aliorum Sacramentorum non videtur omnibus ita necessaria, nisi cum debent illa sumere. Videri potest
Suar.

Suár. disp. 13. sect. 4. & Cardinalis de Lugo disp. 13. sect. 4.

30. Quæritur, quid dicendum sit de sententia cuiusdam eruditi recentioris, qui docet in adultis ad iustificationem esse necessariam necessitate mediæ fidem explicitam totius symboli, ita ut sine hac fide non possit adultus iustificari etiam in baptismo, sed baptismus sit validus quidem, sed informis.

Respondeo, ac primò existimo esse consuetudinem antiquissimam Ecclesiæ, ut extra casum necessitatis nemo baptizetur, absque eo quod prius instructus fuerit de toto symbolo, & profiteatur fidem singulorum articulorum. Ideò Tertullianus lib. de Spectaculis dicit: *Aquam ingressi, Christianam fidem in legis sue verba profiteamur, recitando nimirum symbolum; ac Cyprianus Epist. 70. ad Numidiæ Synodum testatur baptizatos interrogari consuevisse etiam an crederent Ecclesiam, vitam æternam, & remissionem peccatorum, per hæc verba: Credis in vitam æternam, & remissionem peccatorum per Sanctam Ecclesiam?* Idemque repetit Epist. 76. ad Magnum. Augustinus etiam lib. de Gestis Pelagij cap. 2. de Symbolo dicit: *Hæc verba, quæ pauca numero, magna sunt pondere, ex more omnium Ecclesiarum traduntur baptizandis. Ideò Zacharias Papa Epist. 11. reprehendit quosdam Episcopos, qui hanc consuetudinem non observabunt, dicens: sed nec ipsa verba solemnia, symboli nimirum, quæ debet unusquisque Catechumenus, si talis*

ætatis sit , ut iam intellectum habeat , sensu cordis sui percipere, & intelligere, nec docent, nec querunt ab eis, qui baptizari debent .

31. Secundò existimo hanc consuetudinem esse obligatoriam , adeoque per se grauitè peccare eos , qui extra casum necessitatis baptizant Catechumenos , antequam didicerint symbolum , ac professi fuerint fidem singulorum articulorum: per se etiam grauitè peccare Catechumenos , qui extra casum necessitatis, baptizantur , antequam symbolum didicerint, & omniū articulorum fidem habuerint . Addo adultos, antequam baptizentur, per se debere etiam addiscere ea, quæ spectant ad mores, & præcepta, vt ex professo docet Augustinus lib. de Fide, & Operibus, cap. 6. & 7.

32. Existimo tertio adultos, qui extra casum necessitatis baptizantur, antequam didicerint symbolum , ac singulos articulos crediderint , per se , & seclusa ignorantia, suscipere baptismum validum , sed informem . Ratio est , quia per se , & seclusa ignorantia , sic suscipiendo baptismum , grauitè peccant , ac proindè ponunt obicem effectui baptismi .

33. Existimo quarto adultos posse iustificari, antequam instructi fuerint de toto symbolo , ac singulos articulos explicitè crediderint. Probat, & explicatur. Nam Catechumenus paulatim instruitur. Potest ergo contingere , vt cum fuerit instructus de Deo Trino , & Vno vt supernaturali iustificatore, & remuneratore per Christum, ac de Misterijs Trinitatis , Incarnationis ,

Pas-

Passionis, mortis, & resurrectionis Christi, antequam instruatur de alijs articulis fidei, diuina gratia excitatus, credat super omnia hæc mysteria, speret à Deo remissionem peccatorum, & vitam æternam, ac Deum super omnia diligat, cum voto etiam explicito baptismi; sed tunc iustificabitur; ergo potest aliquis iustificari, antequam credat explicitè totum symbolum. Neque enim dici potest, quod sicut datur præceptum differendi baptismum, vsque dum Catechumenus sit instructus de toto symbolo, sic datur præceptum differendi actum perfectæ charitatis, & contritionis, vsque dum quis sit instructus de toto symbolo.

34 Existimo quintò posse contingere, vt adultus recipiat baptismum validum, & formatum, etiam si non fuerit instructus de toto symbolo, & non crediderit explicitè omnes articulos. Potest enim contingere, vt ignoret hanc obligationem, & postquam credidit in Deum Trinum, & Vnum, iustificatorem, & remuneratorem per Christum Filium Dei, & hominem, qui pro nobis passus, & mortuus est, & resurrexit, faciat actum imperfectæ contritionis, & baptizetur; sed in hoc casu recipiet baptismum cum effectu iustificationis; ergo &c. Addo Catechumenum, qui credidit hos articulos, ac fecit actum attritionis, si incidat in periculum mortis, ac sensibus destituatur, itaut sit incapax vltioris instructionis, debere baptizari, & baptizari cum effectu.

35. Ex his concludo fidem explicitam omnium articulorum symboli non esse re ipsa ad iustificationem adulti uecessariam necessitate mediij. Nam illud solum re ipsa est necessarium necessitate mediij, sine quo nemo potest in vlllo casu iustificari ; sed in casibus explicatis potest homo iustificari sine fide explicita omnium articulorum symboli ; ergo &c. Potest tamen concedi talem fidem explicitam esse necessariam in voto .: Nam nemo potest iustificari sine proposito efficaci obseruandi omnia præcepta ; sed inter alia præcepta datur præceptum credendi explicitè omnes articulos symboli ; ergo &c.

36. Opponit primò recentior ille perpetuam Ecclesiæ consuetudinem non baptizandi eos , qui non fuerint instructi de toto symbolo .

Respondeo hoc probare solum necessitatem præcepti non autem mediij .

37. Vrget : Ecclesia censuit informem baptismum eorum, qui ante non didicerint symbolum .

Respondeo regulariter esse informem , quia qui sic baptizantur, peccant contra præceptum, & sic ponunt obicem effectui Sacramenti . Addo esse consuetudinem , baptizandi eos, qui petierunt baptismum , & antequam instruantur de toto symbolo, sensibus destituuntur ; ergo Ecclesia censet talem baptismum posse esse etiam formatum , ac proinde fidem explicitam omnium articulorum fidei non esse ad iustificationem necessariam necessitate mediij , sed solius præcepti.

Vr-

38. Urget rursus: Augustinus lib. de Fide, & Operibus cap. 6. cum quibusdam dicentibus: *Prius baptizetur, deinde doceatur, quid ad bonam vitam, moresque pertineat*: respondet: *Fit hoc, ubi quemquam fortè aies urget extremus, ut ad verba paucissima, quibus tamen omnia continentur, credat, ut si ex hac vita migraverit, liberatus excat à reatu omnium peccatorum*; sed verba illa paucissima, quibus totum continetur, sunt totum symbolum; ergo etiam in casu necessitatis non debet baptizari, nisi interrogatus fuerit de toto symbolo.

Respondeo, quod si potest, etiam in articulo mortis debet observari præceptum: at si non potest, quia antequam interrogetur de toto symbolo, Catechumenus sensibus destituitur, ex Ecclesiæ consuetudine procul dubio est baptizandus; ergo Ecclesia censet baptismum illum posse esse formatum.

39. Opponit rursus S. Augustinum, qui Epist. 67. narrat quemdam medicum nomine Dioscorum, qui symbolum non tenuerat, aut fortassè tenere recusauerat, & se non potuisse excusauerat, fuisse cecitate, & paralyti omnium membrorum à Deo percussum.

Respondeo hoc probare solum Medicum illum peccasse contra præceptum discendi symbolum, ac proinde posuisse obicem effectui baptismi, & à Deo fuisse punitum.

40. Opponit secundo Cyrillum Hierosolymitanum, qui in Præfatione suarum

Ca.

Catecheseon, loquens ad Catechumenos de necessitate discendi symbolū ante susceptionem baptismi, dicit: *Si vel unum ex his non perceperis, etiamsi primorum, & secundorum memineris, edificator quidem bene ædificat, tu verò fluxum, ac debile habebis ædificium; sed nomine ædificij fluxi, ac debilis intelligit baptismum informem; ergo &c.*

Respondeo, quod Cyrillus proponit Catechumenis obligationem ante baptismum credendi explicitè omnes articulos symboli, & dicit, quod si instruens Catechumenum, singulos articulos proponat, satisfacit debito, & sic bene ædificat, ac Catechumenus si ex sua culpa, & negligentia, non singulos articulos percipiat, & explicitè credat, peccat, & ponit obicem Sacramento, ac proinde recipit baptismum informem, & sine effectu. Hoc autem non probat fidem explicitam omnium articulorum esse necessariam ad iustificationem, & effectum baptismi necessitate mediij, ut explicatum est num. 34.

41. Opponit 3. Sophronium, qui in Prato Spirituali dicit: *Interrogatus est aliquando S. Athanasius, postquam Alexandria Episcopus constitutus fuit, an posset quispiam sine fide baptizari, secundum ritum, & prædicationem Christianorum: Quid de illo sentiendum sit? Aut quomodo suscipiat illum, Deus? Et respondit dicens: audiui aliquando à senioribus nostris, quod B. Petro Episcopo, & Martyri, cum facta esset mortalitas, & plerique ad baptismum mortis timore confugerent,*

rent, apparuerit Angelus humana specie, dicens. *Quandiu huc mittitis marsupia ista, signata quidem, inania autem, & nihil intus habentia?* Sed illi erant Marsupia signata, quia receperant baptismum validè, adeoque signati erant caractere; sed erant marsupia vacua, quia non receperant gratiam, quæ est effectus baptismi; ergo baptismus conlatus non habenti fidem explicitam omnium articulorum fidei est validus, & informis.

42. Respondeo ex hoc loco probari quidem baptismum collatum sine fide esse informem, sed nullo modo probari baptismum collatum sine fide explicita omnium articulorum symboli esse informem. Multi ergo ex illis erant marsupia vacua, quia baptizati fuerant sine fide, & dispositione necessaria ad effectum baptismi, quæcumque sit talis fides.

43. Ad 1. num. 7. dictum est præceptum credendi non esse merè Ecclesiasticum, sed diuinum, & explicatum est, in quo sensu sit supernaturale, & aliquo pacto naturale ordini supernaturali.

44. Ad 2. num. 11. explicatum est, quando nam obliget præceptum credendi.

45. Ad 3. num. 9. dictum est dari speciale præceptum credendi spectans ad specialem virtutem fidei. Dum opponitur: præceptum spectat ad eam virtutem, quæ ex amore sui obiecti formalis potest, ac debet velle obseruare præceptum, distinguo: spectat solum ad illam virtutem, nego; spectat ad illam virtutem, ita vt fundamen-

mentaliter possit spectare ad aliam virtutem, concedo ; & nego consequentiam . Præceptum dupliciter potest spectare ad aliquam virtutem : primo ex eo , quod illa virtus ex amore sui obiecti formalis debeat velle obseruare præceptum ; & in hoc sensu præceptum credendi spectat ad virtutem piæ affectionis, quæ habet pro obiecto formali honestatem credendi Deo super omnia , & ex amore talis honestatis , potest , ac debet velle Deo super omnia credere. Secundo ex eo, quod fundetur in honestate actus talis virtutis ; & in hoc sensu præceptum credendi spectat ad fidem , quia in honestate actus credendi Deo super omnia fundatur obligatio , & præceptum credendi , vt explicatum est num. 9.

47. Ad 4. num. 13. & sequentibus explicatum est , quænam deberent ex præcepto explicitè credi a maioribus, in lege naturæ, Mosaica, & Euangelica.

TRACTATVS QVARTVS

De Spe .

CVM egerimus de fide, sequitur, vt breuiter agamus de Spe ; & quia Spes proportionaliter correspondet fidei , ea, quæ spectant ad spem , breuiter explicabimus, proportionaliter ad ea, quæ diximus de fide. Primò ergo agemus de spe in genere, ac de eius obiecto materiali , & formali :
Se-

Secundo descendemus ad agendum de spe Theologica, ac de eius obiecto materiali, & formali, & de quibusdam alijs ad ipsam spectantibus, vt videri potest in indice initio proposito.

Q V A E S T I O X X X X .

Vtrum obiectum materiale spei sit bonum, futurum, arduum, possibile acquiri ?

1. **P**rimò videtur ad obiectum materiale spei non requiri, vt proponatur tamquam futurum. Potest enim aliquis sperare se esse in statu gratiæ, licet status gratiæ proponatur vt præsens.

2. Secundò videtur neque requiri, vt proponatur tamquam arduum. Possumus enim sperare pluuiam, vel serenitatem; sed hæc obiecta non proponuntur vt ardua; ergo &c.

3. Tertiò videtur neque requiri, vt proponatur tamquam possibile acquiri. Aegrotus enim licet probabiliter existimet se laborare morbo incurabili, tamen si incurabilitas morbi non sit euidens, potest sperare curationem, & ponere media.

4. Respondeo ex S. Thoma 2.2. quæst. 27. art. 1. ad obiectum materiale spei requiri quatuor conditiones. Prima est, vt sit bonum. Non enim speramus, nisi bona, sicut non timemus, nisi mala. Per hanc con-

conditionem spes conuenit cum omnibus actibus prosecutionis, ac differt ab omnibus actibus fugæ, præsertim à timore, cuius obiectum materiale est malum.

5. Secunda conditio est, vt bonum, non proponatur tamquam præsens, & possessum, sed tamquam futurum, & possidendum. Non enim speramus bona, quæ iam possidemus. Per hanc conditionem spes conuenit cum desiderio, & differt à gaudio, quod est de bono iam possessio.

6. Tertia conditio est, vt bonum proponatur tamquam arduum. Non enim propriè speramus quæ ita sunt in nostra potestate, vt sine vlla difficultate possimus illa adipisci, cum volumus. Per hanc conditionem spes differt à desiderio, quod tendit ad bonum futurum secundum se, abstrahendo ab arduitate.

7. Quarta conditio est, vt bonum arduum proponatur tamquam possibile acquiri. Bonum enim, quod proponitur euidenter vt impossibile acquiri, non speratur, sed desperatur, ac proindè non est obiectum spei, sed desperationis.

8. Infertur primò spem esse actum non potentia cognoscitiua, sed appetitiua, vt docet S. Thomas 1.2. quæst. 27. art. 2. Probatur: nam sicut ex apprehensione boni oritur in appetitu actus amoris; ex apprehensione boni vt præsentis oritur actus gaudij; ex apprehensione boni vt absentis oritur actus desiderij; ex apprehensione mali vt ad vitandum difficilis, oritur actus timoris; sic ex apprehensione boni

vt

vt absentis , ardui , ac possibilis acquiri , oritur in appetitu actus spei ; ergo sicut amor simplex , gaudium , desiderium , & timor sunt actus appetitus , non autem potentia cognoscitiua , sic spes est actus appetitus , non autem potentia cognoscitiua . Qui verò dicunt spem esse actum potentia cognoscitiua , possent etiam dicere timorem , desiderium , & gaudium esse actus potentia cognoscitiua .

9. Ratio à priori est , quia per actus cognoscendi formamus in nobis similitudinem obiecti , ideoque dicimur trahere ad nos obiectum ; per actus autem appetitus mouemur , & inclinamur ad obiectum ; sed actus spei non consistit in assimilatione , sed in quodam motu , & in quadam inclinatione ad bonum speratum , vt omnes experimur ; ergo &c. Quia tamen spes supponit cognitionem , qua bonum proponitur vt futurum , arduum , & possibile acquiri , ideo aliqui sumpserunt occasionem dicendi spem esse actum potentia cognoscitiua , & ideo etiam aliquando Scriptores profani spem vocant existimationem boni futuri , sicut timorem vocant existimationem mali imminētis , vtentes locutione figurata , qua ponunt causam pro effectu .

10. Infertur secundò contra Caluinum , & quosdam alios Hæreticos , spem Theologicam distingui à fide . Conclusio est de fide ex Apostolo 1. ad Cor. 13. dicente . *Nunc autem manent tria hæc , fides , spes , charitas .* Ratio est , quia fides est actus intellectus , spes est actus appetitus . Hinc etiam

etiam reiicitur sententia quorundam, qui licet fateantur spem distingui à fide, tamen dicunt etiam spem esse actum intellectus.

Opponūt primò Hæretici: spes in Scripturis vocatur fiducia, quæ dicitur à fide; ergo non distinguitur à fide.

11. Respondeo spem dici fiduciam, non quia sit actus fidei, sed quia fundatur in actu fidei.

12. Opponunt secundò: ad Rom. 4. dicitur: *Credidit Abraham Deo, & reputatum est illi ad iustitiam, quia in spem contra spem credidit*; ergo pro eodem sumitur fides, & spes.

13 Respondeo, negando consequentiam. Apostolus enim dicens Abraham credidisse in spem contra spem, significat Abraham credidisse ita, ut etiam sperauerit, licet motiua naturalia impellerent ad desperandum.

14. Infertur tertio spem esse actum irascibilis, non autem concupiscibilis. Ratio est, quia ut ex S. Thoma 1.º p. quæst. 81. art. 1. docent Scholastici communiter, concupiscibilis est potentia, per quam prosequimur bonum, & fugimus malum secundum se: Irascibilis est potentia, per quam prosequimur bonum, & fugimus malum ut arduum, pugnando aduersus contraria impeditiua boni, & illatiua mali; sed per spem tendimus in bonum, ut arduum; ergo &c. Actus igitur, seu passiones concupiscibilis, communiter ponuntur sex: Amor, & odium: desiderium: & fuga: gaudium, & tristitia. Actus irascibilis ponuntur

tur quinque, spes, & desperatio: timor, & audacia: ac demum ira.

15. Infertur quarto duplicem esse spem: alia est actus appetitus sensitiui, per quam speramus bona sensibilia; alia est actus appetitus rationalis, hoc est voluntatis, per quam speramus bona purè intelligibilia. Quia verò spe Theologica speramus beatitudinem supernaturalem, quæ est bonum purè intelligibile, spes Theologica est actus voluntatis, siue appetitus rationalis, non autem appetitus sensitiui.

16. Ad 1. Dum dicimus sperare nos esse in gratiâ, loquimur improprie, ac significamus nos probabile existimare, quod simus in statu gratiæ, & de hac probabilitate gaudere cum quadam tristitia de ineuitentia.

17. Ad 2. nego minorem: Ad obiectum arduum sufficit, quod ita excedat nostram facultatem, ut habeamus motiua desperandi; sed pluuia, & serenitas ita excedunt nostram facultatem, ut habeamus motiua desperandi de ipsis; ergo sunt obiecta ardua.

18. Ad 3. Ad spem aliquam leuem, & incertam sufficit, ut obiectum proponatur tamquam possibile saltem negatiuè, hoc est tamquam non euidenter impossibile; & quia ægrotus, dum probabiliter existimat morbum esse incurabilem, existimat simul curationem non esse euidenter impossibilem, ideo potest aliqua spe leui, & incerta sperare curationem morbi, & ponere media.

QVAE-

QV AESTIO XXXXI.

*Vtrum obiectum formale spei sit bonitas,
vel potius possibilitas rei
sperata?*

1. **V**idetur obiectum formale spei non esse possibilitas, sed bonitas rei sperata: primo quia motium, siue obiectum formale sperandi debet esse aliquid, quod per spem ametur ut finis, & gratia sui, non autem ut medium, & gratia alterius, eo pacto, quo motium credendi debet esse aliquid, quod per fidem credatur ratione sui, & ut principium, non autem ratione alterius, & ut conclusio; sed possibilitas rei sperata per spem non amatur gratia sui, sed gratia bonitatis rei sperata; ergo &c.

2. Secundo motium sperandi magis speratur: nam propter quod vnum quodque tale, & illud magis; sed possibilitas rei sperata non speratur: E.G. qui sperat sanitatem, sperat quidem bonitatem, non autem possibilitatem sanitatis; ergo &c.

3. Respondeo, quod quia spes non datur sine amore, & desiderio rei speratae, possumus quærere, quodnam sit obiectum formale mouens ad amorem, & desiderium boni, quod speramus; & quodnam sit obiectum formale mouens ad sperandum tale bonum,

Di-

4. Dicendum : obiectum formale mouens ad amandam , & desiderandam rem speratam non est eius possibilitas , sed bonitas : obiectum formale mouens ad illam sperandam , non est bonitas , sed possibilitas.

5. Probatur primo : nam motiuum , siue obiectum formale amoris , ac desiderij est illud , quod assignamus , cum interrogamur , quid nos moueat ad aliquid amandum , & desiderandum : motiuum autem spei est illud , quod assignamus , dum interrogamur , quid nos moueat ad aliquid sperandum ; sed interrogati , quid nos moueat ad amandam , & desiderandam sanitatem E.G. respondemus , quod nos mouet bonitas sanitatis : interrogati , quid nos moueat ad sperandum nos consecuturos sanitatem desideratam , respondemus , quod nos mouet possibilitas , & probabilitas consequendi sanitatem , & quod ideo speramus nos consecuturos sanitatem , quia possibile , & probabile est nos illam consecuturos ; ergo &c.

6. Probatur secundo : nam cum aliquid , E.G. sanitas desideratur simul , & speratur , motiuum desiderandi est illud , quo crescente , crescit desiderium , motiuum sperandi est illud , quo crescente , crescit spes ; sed crescente apprehensione de bonitate sanitatis , & imminuta apprehensione de possibilitate , & probabilitate consequendi sanitatem , crescit in aegroto desiderium , & imminuitur spes consequendi sanitatem : crescente autem apprehensione
de

possibilitate, & probabilitate consequendi sanitatem, crescit spes; ergo &c.

7. Confirmatur : nam quæ apprehendimus ut bona maxima, sed difficilimè consequibilia, desideramus magis, quam speramus; quæ apprehendimus ut bona minora, sed facilius consequibilia, speramus magis, quam desideramus; ergo motium desiderandi est bonitas rei desideratæ; motium sperandi est possibilitas rei speratæ.

8. Probatur tertio : nam cum desperamus nos consecuturos bonum desideratum, motium desperandi est impossibilitas, vel difficultas illud consequendi : E. G. cum a grotus desperat sanitatem, quam vehementissimè desiderat, motium desperandi est, quia sanitatem existimat impossibilem, aut difficillimam acquiri; ergo cum speramus nos consecuturos bonum, quod speramus, motium sperandi est possibilitas rei speratæ : nam sicut spes, & desperatio sunt actus contrarij, sic motium sperandi debet esse contrarium motui desperandi : impossibilitati autem contraria est possibilitas.

9. Confirmatur : nam sicut motium desperandi est id, quod à sperando repellit, sic motium sperandi est id, quod ad sperandum attrahit; sed sicut impossibilitas consequendi bonum desideratum retrahit ab illo sperando, sic possibilitas attrahit ad illud sperandum; ergo sicut impossibilitas est motium desperandi, sic possibilitas est motium sperandi.

10. Infertur, quod quia sicut spes non
datur

datur sine desiderio, & amore boni futuri, sic timor non datur sine odio, & fuga mali futuri, motium siue obiectum formale odio habendi, & fugiendi malum futurum, est eius malitia, motium autem timendi, est difficultas vitandi malum futurum.

11. Quia diximus spem non dari sine desiderio rei sperata, quæritur primò, quid addat spes supra desiderium?

12. Respondeo cum S. Thoma 1. 2. qu. 25. art. 1. in corp. quod addit quemdam, conatum, & quamdam eleuationem animi ad consecutionem boni ardui, propter possibilitatem illud consequendi: timor è conuerso supra fugam, & abominationem, addit quamdam depressionem animi, propter difficultatem vitandi malum imminens: desperatio supra desiderium boni addit quamdam depressionem animi, & quamdam remissionem conatus, propter impossibilitatem, vel difficultatem consequendi bonum desideratum. Hæc eleuatio, vel depressio animi consistit in quodam modo tenendi, quem experimur, nec indiget vltiori explicatione. Addo, quod licet spes non detur sine quodam gaudio de possibilitate, & probabilitate boni sperati, tamen formaliter non consistit in tali gaudio, sed in conatu, & eleuatione animi.

13. Quæritur secundo, vtrum spes supponat solum, vel etiam realiter identificentur secum desiderium boni sperati?

14. Respondeo, quod identificantur. Ratio est, quia sicut eodem actu, quo obiectum desideramus, illud amamus, adeoque

desiderium includit rationem communem amoris , & addit rationem specialem desiderij; sic eodem actu, quo obiectum speramus, illud etiam amamus, ac desideramus, ideoque spes supra rationes communes amoris, ac desiderij, addit rationem specialem spei, quæ consistit in conatu, & eleuatione animi , vt explicatum est . Desiderium igitur potest sumi dupliciter : primò genericè , in quantum est amor boni vt absentis , & non possessi , & sic includitur in spe, tamquam genus in specie : secundò specificè , in quantum est amor boni vt absentis , & non possessi , sed est amor sine conatu, & eleuatione animi , & sic contradistinguitur à spe .

15. Ad 1. distinguo maiorem: motium sperandi, in quantum spes ex sua ratione generica est amor , & desiderium , debet esse aliquid, quod ametur gratia sui , concedo ; in quantum spes ex sua ratione differentiali est spes , nego : concedo minorem; & distinguo consequens ; ergo possibilitas non est motium sperandi, in quantum spes ex sua ratione generica est amor, & desiderium, concedo; in quantum ex sua ratione differentiali est spes , nego consequentiam. Spes, in quantum ex sua ratione generica est amor, ac desiderium, non habet pro motiuo , & obiecto formali possibilitatem rei speratæ, cum talis possibilitas non ametur gratia sui , sed habet pro motiuo bonitatem rei speratæ , quæ bonitas amatur gratia sui . At spes, in quantum ex sua ratione differentiali est spes, habet pro
obiecto

obiectio formali possibilitatem rei speratæ: siquidem speramus nos consecuturos bonum, quia est possibile, fundando spem in ipsa possibilitate. Explicatur exemplo fidei. Fides enim in quantum ex sua ratione generica est intelligentia diuinæ veritatis reuelantis, non habet pro obiecto formali diuinam veritatem, sed creaturas, siquidem diuina veritas à nobis viatoribus intelligitur, non per se ipsam, sed per creaturas, iuxta illud Apostoli ad Rom. i. *Inuisibilia Dei per ea quæ facta sunt, inuisibilia lecta conspiciuntur*: at fides, in quantum ex sua ratione differentiali est assensus mysterijs reuelatis, habet pro obiecto formali diuinam veritatem reuelantem, cui per fidem immediatè assentimur.

16. Ad 2. distinguo maiorem: motium sperandi magis speratur *ut quo*, & proportionaliter, concedo; ut quod, nego: distinguo eodem pacto minorem; & nego consequentiam. Principium illud, *propter quod unumquodque tale, & illud magis*, intelligitur de ijs, quibus conuenit eadem denominatio, non autem de ijs, quibus non conuenit eadem denominatio. E. G. quia denominatio amati conuenit tum fini, tum medio, medio autem conuenit propter finem, magis conuenit fini, ideoque finis magis amatur, quam medium. E conuerso licet medium eligatur propter finem, quia finis propriè non eligitur, sed intenditur, non sequitur, quod finis magis eligatur, quam medium; sed motiuo sperandi propriè non conuenit denominatio sperati;

motiuum enim sperandi est præsens, speratur autem solum futurum; ergo motiuo sperandi neque conuenit denominatio magis sperati, sed conuenit alia denominatio proportionalis, nimirum quod speretur *ut quo*, & quod sit id, in quo speratur, & in quo spes fundatur, ac nititur.

QVÆSTIO XXXII.

Vtrum obiectum formale Spei Theologicæ sit fidelitas, & omnipotentia Dei promittentis?

1. **V**idetur non esse, primò quia charitas amat Deum, quia est infinitè bonus, & perfectus, ac proinde etiam quia est omnipotens, & fidelis; ergo si spes sperat in Deo, quia est omnipotens, & fidelis, motiuum sperandi est idem cum motiuo amandi, & obiectum formale spei confunditur cum obiecto formali charitatis.

2. Secundo si dicatur omnipotentiam, & fidelitatem esse motiuum amandi, in quantum sunt perfectiones Dei, & esse motiuum sperandi, in quantum sunt effectiue nostræ beatitudinis, & aliorum bonorum, quæ speramus à Deo, ac proinde sub diuersa ratione esse motiuum sperandi, & amandi; contra est, nam ex hoc sequitur motiuum sperandi non esse omnipotentiam, & fidelitatem Dei, sed nostram beatitu-

titudinem. Probatur sequela: nam qui per amorem concupiscentiæ amat diuinam, omnipotentiam, & fidelitatem vt effectiuam propriæ beatitudinis, habet pro obiecto formali, & motiuo amandi non omnipotentiam, & fidelitatem, sed propriam, beatitudinem; ergo qui sperat in diuina, omnipotentia, & fidelitate vt effectiua propriæ beatitudinis, habet pro obiecto formali sperandi, non diuinam omnipotentiam, & fidelitatem, sed propriam beatitudinem.

3. Respondeo, quod qui dicunt obiectum formale spei in genere esse bonitatem finalem rei speratæ, consequenter dicunt obiectum formale spei theologicæ esse bonitatem finalem amabilem rei, quam speramus spe theologica; sed spe theologica speramus beatitudinem supernaturalem consistentem in hoc, vt Deus possideatur per visionem, & amorem; ergo iuxta hanc opinionem obiectum formale spei theologicæ est Deus possidendus per visionem, & amorem: & quia Deus vt possidendus per visionem, & amorem, est Deus vt bonus nobis, ideò obiectum formale spei theologicæ est Deus vt bonus nobis, & vt amatus amore concupiscentiæ habente pro fine *cui* nos ipsos; obiectum autem formale charitatis est Deus vt bonus sibi, & vt amatus amore amicitia, habente pro fine *cui* ipsum Deum. Docet hanc sententiam Suarius Disp. 1. de Spect. 3. num. 4. quem sequuntur plures Recentiores, in eamque conatur trahere S.

Thomam, Caietanum, Scotum, Almainum, & quosdam alios antiquos.

4. E conuerso qui dicunt obiectum formale spei in genere non esse bonitatem finalem, sed possibilitatem, & probabilitatem rei speratæ, consequenter dicunt obiectum formale spei theologicæ non esse beatitudinem supernaturalem, sed possibilitatem, & probabilitatem illam consequendi, siue id, per quod existimamus nos posse consequi, ac de facto consecuturos beatitudinem supernaturalem; sed existimamus nos posse consequi, & de facto consecuturos beatitudinem supernaturalem, non per vires naturæ, sed per omnipotentiam, & fidelitatem Dei, qui promissit nobis æternam beatitudinem, & auxilia ad illam consequendam, si per nos non steterit; ergo obiectum formale spei theologicæ est omnipotentia, & fidelitas Dei promittentis nobis æternam beatitudinē, & auxilia ad illam consequendam, si per nos non steterit. Docet hanc sententiam expressè S. Thomas Quæst. Vnic. de Spe, quæ est septima de spiritualibus creaturis, eamque secutus est Vasquez, ac plures Recentiores, licet discrepent in modo assignandi obiectum formale spei Theologicæ. Aliqui enim dicunt obiectum formale spei theologicæ esse Deum vt auxiliantem ad consequendam beatitudinem: alij omnipotentiam solam: alij omnipotentiam simul, & fidelitatem Dei promittentis: alij asserunt etiam promissionem creatam Dei esse obiectum formale partiale spei: alij dicunt

dicunt solam omnipotentiam, & fidelitatem increatam esse adæquatum obiectum formale spei theologicæ, promissionem esse meram conditionem, & applicationem obiecti formalis.

5. Consequenter ad ea, quæ diximus de obiecto formali, & materiali fidei, & spei in genere, dicendum primo: obiectum formale mouens ad amandam, & desiderandam beatitudinem supernaturalem, & alia bona promissa, est ipsa bonitas beatitudinis, seu bonitas Dei, in quantum est bonus nobis, & à nobis possidendus: at obiectum formale mouens ad sperandum, nos consecuturos beatitudinem, & alia bona promissa, est omnipotentia, & fidelitas Dei promittentis. Probatur primò ex dictis paulo ante.

6. Probatur secundò: nam cum ægrotus amat, & desiderat sanitatem, obiectum formale mouens ad sanitatem amandam, & desiderandam est ipsa bonitas sanitatis: cum autem sperat se consecuturum sanitatem, quia Medicus insignis promisit se illum sanaturum, motiuum formale mouens ad sperandam sanitatem est, quia medicus, qui promisit se curaturum, est ita excellens, ut possit facere quod promisit, & est ita fidelis, ut sit factururus quod promisit; ergo cum amamus, & desideramus beatitudinem supernaturalem, obiectum formale mouens ad illam amandam, & desiderandam, est bonitas beatitudinis: at cum speramus nos consecuturos beatitudinem, obiectum formale mouens ad sperandum

est, quia Deus, qui promisit beatitudinem, est ita omnipotens, vt possit facere quod promisit, est ita fidelis, vt sit, facturus quod promisit.

7. Probatur tertio: nam obiectum formale, & materiale spei debet assignari proportionaliter, ac obiectum materiale, & formale fidei; sed obiectum materiale fidei sunt veritates reuelatæ, obiectum formale est prima veritas reuelans; ergo obiectum materiale spei sunt bona promissa, obiectum formale est prima fidelitas promittens. Sicut autem prima veritas reuelans includit duas perfectiones, alteram physicam, per quam Deus non potest falli, alteram moralem, per quam non potest fallere, & mentiri; sic prima fidelitas includit duas perfectiones, alteram physicam omnipotentia, per quam Deus potest facere quod promisit, alteram moralem fidelitatis, per quam vult facere quod promisit, siquidem non potest nolle implere promissa. Rursus sicut prima veritas reuelans est obiectum formale fidei, in quantum fides est assensus, non autem in quantum est simplex intelligentia, sic prima fidelitas est obiectum formale spei, in quantum est spes, non autem in quantum ex sua ratione generica est amor, ac desiderium rei speratæ.

8. Dicendum secundo: obiectum formale primum spei est prima, & increata fidelitas promittens, promissio creata non est pura conditio, sed est obiectum formale secundarium spei.

9. Probatur: ex dictis enim quæst. 14:
prima,

prima, & increata veritas est obiectum primarium fidei; reuelatio autem non est pura conditio, & applicatio, sed est obiectum formale secundarium; sed obiectum formale spei assignandum est proportionaliter, ac obiectum formale fidei; ergo prima, & increata fidelitas promittens est obiectum formale primarium spei, promissio autem non est pura conditio, sed obiectum formale secundarium.

10. Confirmatur: nam sicut ideò firmissimè credimus Deum esse Trinum & Vnū, quia Deus, qui est prima veritas, reuelauit se esse Trinum, & vnum, sic ideò firmissimè speramus nos consecuturos beatitudinem supernaturalem, quia Deus, qui est prima, & omnipotens fidelitas, promisit nobis beatitudinem supernaturalem, & auxilia ad illam consequendam, si per nos non steterit; ergo sicut obiectum formale fidei non est sola prima veritas, sed etiam reuelatio; sic obiectum formale spei non est sola prima fidelitas, sed etiam promissio. Quia verò firmissimè speramus in diuina fidelitate propter se, firmissimè speramus in diuina promissione propter ordinem, quem habet ad diuinam fidelitatem, ideò diuina fidelitas est obiectum formale primarium spei, diuina promissio est obiectum formale solum secundarium.

11. Dices: licet ad hoc, vt ignis calefaciat, requiratur propinquitas, tamē solus ignis est causa calefactionis, propinquitas est mera conditio, & applicatio; ergo licet ad hoc, vt prima veritas, & prima fide-

tas moueant ad credendum, & sperandum, requiratur reuelatio, & promissio, tamen sola prima veritas, & prima fidelitas sunt obiectum formale mouens ad credendum, & sperandum, reuelatio, & promissio sunt mera applicatio.

12. Respondeo, concedo antecedens, & nego consequentiam. Disparitas est, quia calefactio non assimilatur propinquitati, sed soli igni, & calori, per quem agit; sed quod requiritur ad affectum, ita ut illum non assimilet sibi, requiritur ut mera conditio; ergo &c. E conuerso reuelatio, & promissio ita requiruntur ad actum fidei, & spei, ut actus fidei, & spei assimilentur reuelationi, & promissioni in prædicatis supernaturalitatis, certitudinis, infallibilitatis &c; sed quod requiritur ita, ut sibi assimilet effectum, requiritur non ut pura conditio, sed etiam ut causa, eo pacto, quod quia ignis ita calefacit per calorem, ut calidum assimiletur calefacienti in calore, calor requiritur ut causa calefactionis; ergo &c.

13. Dices secundo: prima veritas est omnino completa in ordine ad mouendum ad actum fidei; ergo potest esse adæquatum motiuum actus fidei.

14. Respondeo primo, negando consequentiam. Licet enim prima veritas sit omnino completa, tamen non potest esse adæquatum motiuum actus fidei, non quia primæ veritati desit aliquod complementum, sed quia actus fidei includit essentialem dependentiam, non solū à prima veritate

tate tanquam à maiori syllogismi, sed etiam à diuina reuelatione, tanquam à minore syllogismi. Explicatur. Licet Omnipotentia diuina sit completissima in ordine ad omnes effectus, tamen non potest se sola sine concursu causæ secundæ vitalis producere actum vitalem, non ex defectu complementi in diuina Omnipotentia, sed quia actus vitalis essentialiter dependet non à sola diuina Omnipotentia, sed etiam à causa secunda vitali; ergo proportionaliter dicendum in casu nostro.

15. Respondeo secundo, distinguo antecedens: prima veritas est completa, physicè in ordine ad actum fidei, concedo: est completa logicè, & in ratione antecedentis, ex quo syllogisticè inferatur conclusio fidei, nego antecedens; & nego consequentiam. Vt prima veritas possit esse obiectum formale adæquatum alicuius conclusionis, non sufficit, vt sit completa physicè, sed debet esse completa logicè in ratione antecedentis, ex quo vt infallibiliter connexo inferatur conclusio; sed antecedens, ex quo syllogisticè inferuntur conclusiones fidei, non est sola prima veritas, quæ est maior illius antecedentis, sed etiam reuelatio, quæ debet subiungi vt minor; ergo &c.

16. Ad 1. concedo antecedens, & distinguo consequens; ergo motium sperandi est idem realiter cum motiuo amandi, concedo; est idem formaliter, nego; & nego consequentiam. Certum est, quod obiectum formale trium virtutum theolo-

gicarū, cum sit aliqua perfectio Dei, omnes autem perfectiones diuinæ realiter identificentur, est realiter idem; ergo obiectum formale primum unius virtutis theologicæ formaliter solum distinguitur ab obiecto formali primario alterius. Sed explicandum, quo pacto formaliter differant?

17. Dicendum, quod obiectum formale charitatis sunt omnes diuinæ perfectiones, in quantum constituunt Deum infinitè bonum, & perfectum in se ipso: & quia diuina veritas, & fidelitas sunt perfectiones constituentes Deum infinitè bonum, & perfectum in se ipso; ideo obiectum formale charitatis includit etiam diuinam veritatem, & fidelitatem, in quantum constituunt Deum infinitè bonum, & perfectum in se ipso, ac proinde per charitatem amatur Deus, quia est infinitè verax, & fidelis in se ipso. Obiectum formale fidei, formaliter loquendo, est sola perfectio diuinæ veritatis, non in quantum constituit Deum infinitè bonum, & perfectum in se (hoc enim materialiter se habet ad credendum,) sed in quantum constituit Deum infallibiliter connexum cum veritate eorum, quæ dicit. Obiectum formale spei, formaliter loquendo, est sola perfectio fidelitatis omnipotentis, non in quantum constituit Deum infinitè bonum, & perfectum in se, sed in quantum constituit Deum infallibiliter connexum cum nostra beatitudine, & cum alijs bonis promissis, si per nos non steterit.

Ad

18. Ad 2. nego sequelam. Ad probationem, concedo antecedens, & nego consequentiam. Disparitas est, quia ex dictis qu. superiori 41. motium amandi, & desiderandi beatitudinem est id, quod assignamus, interrogati, quid nos moueat ad beatitudinem amandam, & desiderandam; sed de hoc interrogati respondemus, quod nos mouet ipsa bonitas beatitudinis; ergo motium amandi, ac desiderandi beatitudinem, est ipsa bonitas beatitudinis. Proportionaliter motium sperandi beatitudinem est id, quod assignamus, interrogati, quid nos moueat ad sperandum, nos consecuturos beatitudinē desideratā; sed de hoc interrogati, respondemus, quod nos mouet fidelitas, & omnipotentia promittentis, & quod ideo firmissimè speramus nos consecuturos beatitudinem, si per nos non steterit, quia Deus, qui est omnipotens, & summè fidelis, promisit nobis beatitudinem, si per nos non steterit; ergo &c:

QVÆSTIO XXXXIII.

*Vtrum Spes sit virtus Theologica firmissimè, & super omnia sperans Deum
ut obiectum materiale
primarium?*

1. **B**reuitatis gratia cæteras quæstiones de Spe per illationes expediemus.
Inc

2. Infertur igitur primò, fidem, & spem proportionaliter esse virtutes theologicas . Sicut igitur fides est virtus theologica , in quantum ex sua ratione differentiali est assensus , quia habet pro obiecto formali primario primam veritatem incretam ; eadem fides , in quantum ex sua ratione generica est simplex intelligentia , non est virtus theologica , quia cum intelligat Deum per creaturas , habet pro obiecto formali intelligendi ipsas creaturas ; sic spes , in quantum ex sua ratione differentiali est spes , est virtus theologica , quia habet pro obiecto formali primario primam , & omnipotentem fidelitatem incretam ; in quantum autem ex ratione generica est amor , ac desiderium , non est virtus theologica , quia habet pro fine cui , adeoque pro obiecto formali primario nos ipsos , quibus volumus beatitudinem .

3. Infertur secundo habitum amandi Deum ut nobis bonum , & ut nostram beatitudinem , nisi sit habitus amandi amore spei , non esse virtutem Theologicam ; si autem sit habitus amandi amore spei , esse virtutem theologicam , in quantum est habitus sperandi , non in quantum est habitus amandi . Ideò non datur alia virtus theologica voluntatis , præter spem , & charitatem , quæ amat Deum ut bonum ipsi Deo , adeoque habet pro fine cui , & obiecto formali primario ipsum Deum .

4. Infertur tertio , quod sicut obiectum materiale primarium fidei est Deus ut cognoscibilis per auctoritatem Dei revelantis

tis

tis, vt dictum est quæst. 14. sic obiectum materiale primum spei est Deus vt sperabilis propter summam, & omnipotentem fidelitatem Dei promittentis, iuxta illud Dei ad Abraham Geneseos 15. *Ego protector tuus sum, & merces tua magna nimis*, quibus verbis dicens: *ego protector tuus sum* expressit obiectum formale, & motiuum sperandi: dicens, *& merces tua magna nimis*, expressit obiectum materiale primum sperandum. Ratio est, quia virtutes theologicæ dantur nobis, vt per earum actus coniungamur Deo tamquam ultimo fini supernaturali coniunctione proportionata statui viæ, ac vitæ præsentis; sed intellectus pro statu viæ, ac vitæ præsentis coniungitur Deo vt ultimo fini supernaturali per hoc, quod ex motiuo Dei reuelantis firmissimè credat Deum; & diuinæ voluntas coniungitur Deo per hoc, quod ex motiuo diuinæ fidelitatis promittentis firmissimè speret se consecuturam Deum possessione beatifica, & ex motiuo diuinæ bonitatis amet super omnia Deum vt bonum ipsi Deo; ergo &c. Sicut autem per charitatem diligimus Deum propter se, proximum propter Deum, sic per spem speramus Deum propter se, hoc est vt ultimum finem, *qui*, alia, puta auxilia gratiæ, speramus, in quantum conducunt ad Deum vt ultimum finem *qui*, hoc est nostram beatitudinem obiectiuam. Quia verò spes theologica data est, vt Deum speremus nobis, non autem vt Deum speremus alijs, ideo vt docet S. Thomas 2. 2. qu. 17. art. 3.

Spe

Spe theologica non possumus Deum sperare alijs, nisi referentes hoc ipsum ad Deum ut possidendum à nobis.

5. Infertur quartò, quod sicut fides, sic spes theologica est proportionaliter firmissima, & super omnia. Sicut enim quia Deus est prima veritas, debemus firmissimè, & super omnia credere sine vlla formidine intellectuâli mysteria reuelata, præferendo motium diuinæ auctoritatis omnibus motiuis, quæ possunt in contrarium occurrere; sic quia Deus est prima, & omnipotens fidelitas, debemus firmissimè, & sine vlla formidine voluntatis sperare nos consecuturos æternam beatitudinē, & alia bona promissa, si per nos nō ite-
 terit, præferendo motium diuinæ fidelitatis omnibus alijs motiuis, quæ possint in contrarium occurrere. Quod spes debeat excludere omnem formidinem & timorem voluntatis, indicauit Deus Genesios 13. dicens Abrahæ: *noli timere Abraham; ego protector tuus sum, & merces tua magna nimis.* Quod debeat præferre motium diuinæ fidelitatis omnibus motiuis in contrarium, insinuat Apostolus ad Rom. 8. dicens: *Certus sum enim, quia neque mors, neque vita, neque Angeli &c. neque Creatura alia poterit nos separare à charitate Dei.* Est tamen differentia inter certitudinem intellectualem, qua credimus esse vera mysteria fidei, & certitudinem voluntatis, qua speramus nos consecuturos æternam beatitudinem, & alia bona promissa. Nam quia absolutè Deus reuelauit mysteria, sumus absolutè certi de veritate
 Dyte.

myſteriorum; at quia Deus promiſit nobis æternam beatitudinem, non abſolutè, ſed ſi per nos nō ſteterit, certo ſperamus nos cōſecuturos beatitudinē, non abſolutè, ſed ſi per nos non ſteterit. Ideò fides, qua credimus E. G. Deum eſſe Trinum, & Vnum, eſt ſine omni formidine intellectuali: at licet ſperemus ſine vlla formidine voluntatis nos conſecuturos beatitudinem, ſi per nos non ſteterit, tamen formidamus, ne per nos ſtet, & ſic abſolutè formidamus, ne conſequamur beatitudinem. Si tamen Deus alicui reuelaffet abſolutè ſuam prædeſtinationem, & abſolutè promiſiſſet beatitudinem, ille deberet abſque vlla formidine voluntatis abſolutè ſperare beatitudinem.

6. Infertur quintò, obiectum materialæ primarium ſpei theologicæ eſſe bonū maximum, maximè arduum, & maximè poſſibile, ac futurum. Ratio, quare ſit bonum maximum, eſt quia obiectum materiale primarium ſpei eſt Deus vt poſſidendus per viſionem beatificam; ſed Deus vt poſſidendus per viſionem beatificam eſt bonum maximū, iuxta illud Geneſeos 15: *Ego merces tua magna nimis*; ergo &c. Ratio, quare ſit bonum maximè arduum, eſt, quia maximè arduum eſt, quod maximè excedit vires noſtras, & totius naturæ, & ad quod conſequendum debemus ponere operationes maximè excedentes vires noſtras, & totius naturæ; ſed beatitudo ſupernaturalis conſiſtens in viſione Dei maximè excedit vires noſtras, ac totius naturæ, & ſolum eſt poſſibilis per omnipotentem.

tentiam Dei; ad consequendam etiam beatitudinem, debemus obseruare præcepta supernaturalia, quæ non possumus obseruare per vires naturæ, sed solum per auxilia gratiæ; ergo &c. Addo actum spei non solum ex obiecto, sed propter ipsum modum sperandi, esse maximè arduum. Licet enim non sit euidentius nos posse consequi, & consecuturos æternam beatitudinem, si per nos non steterit, tamen maiori firmitate, & sine vlla formidine voluntatis debemus sperare nos consecuturos beatitudinem, si per nos non steterit, quam speremus nos consecuturos bona, de quibus est euidentius, quod possumus illa consequi. Est autem difficillimum firmissimè, & sine vlla formidine voluntatis sperare bonum, de quo non est euidentius, quod sit possibile. Ratio, quare obiectum primarium spei sit maximè possibile, & futurum, est quia quod est possibile, & futurum possibilitate, & futuritione fundata in omnipotentia, & fidelitate Dei promittentis, est possibile infinita quadam possibilitate, & est futurum infinita quadam infallibilitate.



QV A E S T I O XXXIV.

Vtrum posita fide diuinarum promissionum, possimus non sperare, & etiam desperare beatitudinem?

1. **I**Nfertur sextò, quod quia difficile est firmissime, & sine vlla formidine voluntatis sperare bonum possibile solum ineuidenter; posita autem fide firmissima diuinarum promissionum, adhuc est ineuidens nos posse consequi, ac de facto consecuturos beatitudinem, si per nos non steterit; ideò etiam posita fide diuinarum promissionum, difficile est super omnia, & & sine vlla formidine voluntatis sperare nos consecuturos beatitudinem, si per nos non steterit.

2. Ex hac difficultate sequitur primò, quod retenta fide diuinarum promissionum, possumus non sperare etiam cum vrget præceptum sperandi, & sic possumus peccare peccato omissionis contra præceptum affirmatiuum sperandi. Sequitur secundò, quod possumus positiuè diffidere, & formidine voluntatis formidare de consecutione beatitudinis, si per nos non steterit, & sic peccare peccato commissionis contra præceptum negatiuum non diffidendi, ac non formidandi de consecutione beatitudinis, si per nos non steterit.

Qua-

3. Quæritur, vtrum retenta fide firmissima diuinarum promissionum, possimus positivè desperare nos consecuturos æternam beatitudinem.

4. Certum est, quod possumus desperare, amissa fide diuinarum promissionum: E. G. potest aliquis discredendo Deum, promississe æternam beatitudinem, si per nos non steterit, desperare se consecuturum æternam beatitudinem. Solum igitur dubitatur, vtrum possumus desperare, retenta fide firmissima diuinarum promissionum?

5. In hac quæstione existimo primò, quod retenta fide diuinarum promissionum, possumus nolle obseruare præcepta, ac proindè nolle implere conditiones, sub quibus promissa est beatitudo, & sic absolutè desperare nos consecuturos beatitudinem.

6. Existimo secundò actum absolutè desperandi beatitudinem modo explicato esse prohibitum grauitè per præcepta desperandi, ac proindè volendi facere quæ ad nos spectant. Hinc sequitur, quod qui sic desperaret beatitudinem, grauitè peccaret contra tale præceptum, & consequenter amitteret habitum infusum spei.

7. Existimo tertio, quod retenta fide diuinarum promissionum, potest quis existimare Deum de facto non daturum sibi auxilia efficacia ad implendas conditiones, et sic ex quadam diffidentia de diuina Misericordia desperare se consecuturum absolutè beatitudinem. Et quia etiam hæc diffi-

diffidentia, ac desperatio est grauiter prohibita præcepto sperandi, grauiter peccaret contra præceptum sperandi, & amitteret habitum infusum spei.

8. Existimo quartò, quod quia non est de fide Deum daturum nobis auxilia, re ipsa efficacia ad implendas condiciones, ille, qui temerè existimaret Deum non daturum sibi auxilia efficacia, licet peccaret contra spem, non peccaret contra fidem peccato infidelitatis, ac proindè non amitteret habitum fidei.

9. Existimo quintò, quod licet teneamur sperare Deum daturum nobis auxilia efficacia, & sic nos consecuturos beatitudinem absolutè, tamen cum Deus non promiserit nobis auxilia efficacia, & cum sine firmitudine debeamus solum sperare, quæ Deus promisit, debemus quidem sperare, sed non sine formidine, Deum daturum nobis auxilia efficacia: imò debemus formidare, ne Deus, qui est supremus Dominus, iusto suo iudicio neget nobis auxilia efficacia ad salutem, & permittat nostram damnationem. Ideò cum timore, & tremore debemus obseruare diuina præcepta, iuxtà illud Apostoli ad Philip. 2. *cum metu, & tremore salutem vestram operamini. Deus enim est, qui operatur in vobis, & velle, & perficere pro bona voluntate.*

QVÆSTIO XXXV.

*Vtrum spes detur in Beatis, in anima-
bus Purgatorijs, & in
damnatis ?*

I. **I**Nfertur septimò in Beatis non dari
spem. Ratio est, quia obiectum ma-
teriale spei est bonum arduum, vt dictum
est quæst. 36. sed Beati, qui possident infi-
nitum bonum, nullum bonum possunt appre-
hendere vt arduum; ergo &c. Probatur
minor: nam de ratione boni ardui est, vt
debeat desiderari cum quodam conatu, &
cum quadam eleuatione animi, & vt eius
absentia, ac dilatio afferat sollicitudinē, &
tristitiam, iuxta illud Prouerbiorū 13. *Spes,
quæ differtur, affligit animam;* sed Beati, qui
possident infinitum bonum, cætera bona
apprehendunt tamquam ita parua, vt eo-
rum absentia, & dilatio nullam debeat af-
ferre sollicitudinem, & tristitiam, & vt
non debeant illa desiderare cum conatu, &
eleuatione animi; ergo &c. Hinc sequitur
Beatos resurrectionem, & gloriam corpo-
rum propriè non sperare, sed solum quie-
tissimè expectare sine vlllo conatu, & sine
vlla tristitia. Sequitur rursus, quod quia
Christus à primo instanti Incarnationis
fuit beatus, non habuit actum, neque ha-
bitum spei, ideòque cum Christo tribuitur
spes, tribuitur spes impropria, in quan-
tum

tum significat simplicem expectationem boni futuri .

2. Infertur octauo ex opposita ratione in animabus Purgatorij dari spem . Ratio est , quia animæ Purgatorij apprehendunt beatitudinem vt bonum arduum ; quod debent desiderare cum quodam conatu, & eleuatione animi, & cuius absentia, & priuatio debet afferre sollicitudinem, & tristitiam.

3. Addo primo , quod si animæ Purgatorij credunt fide certâ, sed obscurâ se consecuturos beatitudinem , actus spei est illis arduus, non solum ex obiecto , sed propter modum sperandi . Difficile enim ipsis est sperare prout oportet, quod non euidenter cognoscunt se consecuturos.

4. Addo secundo , quod si eadem animæ fide non solum certa, sed etiam euidenti in attestante credunt se consecuturos beatitudinem, sicut debent hoc credere certitudine intellectuâli superante euidentiam , sic debent sperare se consecuturos beatitudinem firmitate voluntatis superante euidentiam; sed talis modus sperandi est arduus arduitate propria spei theologicæ ; ergo &c.

5. Infertur nono , in damnatis non posse dari spem , non solum beatitudinis , sed nec vllius boni . Ratio est , quia de conceptu obiecti sperabilis est, vt non apprehendatur adeo paruum , vt eius consecutio non possit moraliter leuare , & minuere tristitiam, & miseriam; sed damnati cognoscunt se non posse consequi vllum bonum.

bonum, nisi ita paruum, ut non possit moraliter leuare, & minuere tristitiam, & miseriam; ergo non possunt sperare vllum bonum, sed solum possunt desiderare, & expectare. E. G. Dives sepultus in Inferno Luc. 16. desiderauit quidem, & petijt guttam aquæ, sed illam propriè non sperauit, siquidè guttam aquæ apprehendebat tamquam bonum adeo paruum, ut non posset moraliter minuere dolorem.

Q V A E S T I O XXXVI.

Vtrum is, cui reualata fuisset reprobatio, posset sperare, & is, cui reuelata fuisset prædestinatio, posset desperare beatitudinem.

1. **I**Nfertur decimo, quid dicendum sit in quæstione satis difficili, in qua queritur, vtrum is, cui reuelata fuisset absolute reprobatio, & damnatio reuelatione sufficienter proposita, & obligante ad credendum, posset sperare beatitudinem.

2. Dicendum, quod posset non credere tali reuelationi, & sic posset imprudenter sperare beatitudinem spe humana, non autem spe theologica: si verò crederet, non posset in sensu composito sperare, sed deberet desperare beatitudinem.

3. Probatur prima pars: nam ad sperandam beatitudinem spe humana, sufficit,
ut

ut aliquis opinetur se posse consequi beatitudinem, illamque de facto consecuturum; sed non credendo reuelationi de sua reprobatione, posset opinari, se posse consequi beatitudinem, & de facto illam consecuturum; ergo &c.

4. Probatur secunda pars: nam spes Theologica debet esse prudens, & debet fundari in fide, qua certo credamus nos, si per nos non steterit, posse consequi, & consecuturos beatitudinem in sensu composito cum ijs, quæ sunt reuelata; sed is, cui reuelata esset reprobatio, & damnatio, non posset fide diuina hoc credere, sed potius deberet credere se in sensu composito cum reuelatis, nimirum cum reprobatione, non posse consequi beatitudinem; ergo.

5. Probatur tertia pars: nam qui certus est de sua damnatione, non potest in sensu composito cum hac certitudine sperare beatitudinem, sed debet omnino de beatitudine desperare.

6. Ex eo, quod is, cui reuelata fuisset obscurè damnatio, posset imprudenter sperare beatitudinem, sequitur, quod remaneret viator saltem imperfectè. Ad hoc enim sufficit, ut possit saltem imprudenter spe humana sperare suum vltimum finem: non remaneret tamen viator perfectè, ita ut posset prudenter sperare suum vltimum finem.

7. Opponi potest primo: posset aliquis in priori signo naturæ ex fide, qua credit diuinas promissiones, spe theologica sperare beatitudinē, & in posteriori signo na-

juræ accipere reuelationem de sua reprobatione ; ergo in eodem instanti temporis, in quo alicui reuelatur damnatio, & reprobatio, potest is spe theologica sperare beatitudinem.

8. Respondeo , negando antecedens , ac dico, quod actus spei theologicæ de consecutione beatitudinis non potest coniungi cum reuelatione reprobationis , ac damnationis in eodem instanti temporis, etiam pro diuersis signis talis instantis . Ratio est, quia opposita se mutuo excludunt ab eodem subiecto pro eodem instanti temporis, & pro quolibet signo eiusdem instantis: E. G. quia affirmatio, & negatio, amor, & odium efficax eiusdem obiecti, sunt actus oppositi, mutuo se excludunt ab eodem subiecto pro eodem instanti temporis, & pro quocumque signo talis instantis , ac proinde implicat, vt aliquis in eodem instanti, in signo priori affirmet, in posteriori neget idem obiectum ; sed spes theologica salutis, & reuelatio absoluta damnationis opponuntur , siquidem spes theologica salutis supponit speranti non fuisse reuelatam damnationem in eodem instanti temporis ; ergo &c.

9. Ex eadem doctrina solui potest etiam argumentum , quo aliqui probare conantur, posse spem dari in Beato, ex eo, quod posset aliquis in priori signo sperare beatitudinem, in posteriori signo eiusdem instantis beatitudinem consequi. Dicendum enim, quod spes supponit bonum non possideri in eodem instanti, in quo speratur; ergo

ergo non potest in eodem instanti coniungi cum possessione boni sperati.

10. Opponi potest secundo : is, cui reuelatum sit peccatum aliquod committendum , vt de facto reuelatum fuit S. Petro peccatum negationis , posset sperare se peccatum illud vitaturum, vt de facto sperauit S. Petrus se non negaturum; ergo is, cui releuata esset damnatio, posset sperare, se vitaturum damnationem .

11. Respondeo, nego antecedens, si loquamur de spe theologica , & prudenti , ideoque S. Petrus imprudenter sperauit se non negaturum , & de hac sua sp. reprehensus fuit à Christo.

12. Dices : si S. Petrus non potuit prudenter sperare se non negaturum, neque potuit prudenter habere propositum affectiue efficax non negandi .

13. Respondeo, nego antecedens . Propositum enim non peccandi semper est prudens, & honestum, ac propositum peccandi semper, est imprudens , & inhonestum. At spes non peccandi est indifferens ad hoc, vt sit prudens, vel imprudens. Supposita enim certitudine de eo , quod quis peccabit, est imprudens , siquidem imprudenter sperat quis se facturum id , quod certo scit, aut credit se non facturum. Ideò præceptum sperandi salutem obligat solum ad sperandum , cum non sumus certi de opposito : at præceptum non peccandi obligat semper .

14. Dices: sicut imprudenter , & frustra sperat quis se facturum id, quod certo cre-

dit se non facturum, sic imprudenter vult facere id, quod certò credit se non facturum.

15. Respondeo, negando paritatem. Spes enim includit gaudium de re sperata, iuxta illud Apostoli, *spe gaudentes*; non possumus autem gaudere de bono, quod nullo pacto possidemus; quando verò sumus certi bonum nos non habituros, nullo pacto id possidemus; ergo non possumus illud sperare, ac de eo per spem gaudere. At voluntas boni non includit gaudium, sed potest esse voluntas puri desiderij: desiderium autem coniungi potest cum omni moda carentia boni, ac proinde possumus voluntate puri desiderij ex se efficacis vel- le etiam prudenter bonum, quod non speramus.

16. Dices: non est efficax propositum, quod non potest habere suum effectum; sed in eo, qui certo scit, aut credit, se peccaturum, propositum non peccandi non potest habere suum effectum; ergo &c.

17. Respondeo, distinguo maiorem: non est efficax affectuè propositum, quod non potest habere suum effectum, si duret, concedo: quod non potest habere suum effectum, quia de facto non est duraturum, nego. Vt propositum non peccandi sit efficax affectuè, sufficit, ut si duret, non possit coniungi cum peccato: at non requiritur, ut sit duraturum. E. G. cum quis habet propositum non peccandi etiam venialiter, propositum illud, si tale sit, ut durans non possit coniungi cum peccato veniali,

niali, est efficax affectiuè, quamuis non sit duraturum, & simus certi, quod non est duraturum. Ex hac autem instantia propositi non peccandi venialiter, confirmatur solutio allata. Nam possumus habere propositum affectiuè efficax non amplius peccandi venialiter, licet non speremus nos venialiter non peccaturos; ergo possumus velle efficaciter voluntate desiderij coniuncta cum tristitia id, quod non speramus. Propositio illa: non possumus prudenter velle id, quod non speramus, distinguenda est: non possumus prudenter velle efficaciter voluntate desiderij coniuncta cum tristitia, nego; voluntate desiderij coniuncta cum gaudio, concedo. Explicatum autè est, in quo sensu voluntas illa dicatur efficax. Debet aduerti primò, quod reuelatio damnationis potest esse vel absoluta, vel conditionata saltem implicitè. Si sit conditionata saltem implicitè, ita vt sensus sit, *Damnaberis, nisi pœnitentiam egeris*, procul dubio potest coniungi cum spectheologica. Solum igitur dum est omninò absoluta, coniungi non potest cum spectheologica.

18. Secundò debet aduerti, quod credens se peccaturum, potest voluntate efficaci desiderij velle non peccare in sensu composito ipsius desiderij, ac voluntatis cum reuelatione, hoc est potest cum ista reuelatione coniungere voluntatem non peccandi: at non potest prudenter velle non peccare in sensu composito peccati cum reuelatione, hoc est non potest velle

coniungere cum reuelatione peccati negationem peccati. Hæc enim coniunctio est prorsus impossibilis, ac proinde non est volibilis prudenter.

19. Tertiò debet aduerti, quod is, cui reuelata esset damnatio, posset vitare multa peccata ex fine vitandi maiorem damnationem, & propter alios fines, quorum desiderium includitur in desiderio ultimi finis, quod desiderium retineretur, sicut retinetur etiam à damnatis.

20. Quæritur, vtrum possit aliquis fide diuina, & supernaturali credere absolutè se esse reprobum, & damnandum.

21. Respondeo probabilius esse, quod non possit. Ratio est, quia fides diuina, & supernaturalis theologicè ex Apostolo ad Rom. 1. est virtus ad salutem, & est de congruo meritoria salutis; sed virtus ad aliquid non potest esse essentialiter connexa cum priuatione illius, & meritum congruum salutis non potest esse essentialiter connexum cum priuatione salutis: nam vniuersim meritum alicuius præmij non potest essentialiter connecti cum negatione talis præmij; ergo reuelatio propriæ damnationis non est credibilis fide diuina theologicè supernaturali, sed solum fide inferiori, qualis est E. G. qua Dæmones, & Dammati credunt, se nunquam consecuturos æternam beatitudinem, & à pænis liberandos, iuxta illud Iacobi 2. *Dæmones credunt, & contremiscunt.*

22. Infertur vndecimo, quid sit dicendum ad quæstionem, in qua quæritur, vtrū
is,

is, cui sufficienter reuelata fuisset prædestinatio; cū obligatione illam credendi, posset tali reuelationi discredere, ac desperare beatitudinem.

23. Respondeo probabilius esse, quod non posset. Ratio est, quia essentia, vel saltem proprietas inseparabilis peccati mortalis est, vt mereatur priuationem æternæ beatitudinis; sed peccatum incredulitatis, quo quis discrederet reuelationi suæ prædestinationis, & quo discredendo desperaret de beatitudine, esset mortale, & tamen non mereretur priuationem æternæ beatitudinis; ergo &c. Probatur minor: nullum enim peccatū meretur poenā, qua implicat, vt puniatur; sed implicat, vt peccatum infidelitatis, quo quis discredit reuelationem suæ prædestinationis, puniatur priuatione beatitudinis, siquidem est connexum essentialiter cum reuelatione infallibili suæ prædestinationis, & beatitudinis; ergo &c.

24. Dices: si is, cui reuelata fuisset prædestinatio, non posset discredere, non crederet liberè, ac proindè non crederet meritoriè.

25. Respondeo, quod saltem crederet liberè libertate credendi actu perfectiori, vel minus perfectio, quæ libertas sufficeret ad meritum. Addo, quod reuelatio de prædestinatione posset, ac fortassè deberet dari in posteriori signo naturæ ad actum voluntatis, quo quis vellet credere omnibus sufficienter propositis, & tunc actus fidei, quo crederet reuelationi de Prædestinatione, esset liber per denominationem à tali actu voluntatis.

TRACTATUS QUINTVS

De Charitate.

1. **S**Vperest, vt agamus de charitate. Verum quia plures quæstiones tum de habitu, tum de actu charitatis examinauimus alijs locis, ac præsertim lib. 5. de Gratia, ideò indicatis quæstionibus alibi discussis, addemus pauca de actu charitatis, explicantes, quo pacto sit amor amicitiae erga Deum; quodnam sit eius obiectum materiale, & formale; & quo pacto ex amore charitatis erga Deum possimus, ac debeamus amare etiam nos ipsos, & proximos amore beneuolentiae, ac amicitiae.

2. Libro igitur 5. de Gratia, Tractatu tertio agentes de Gratia iustificante, & de habitibus illi adnexis, quæst. 20. & 21. examinauimus, vtrum charitas sit habitus supernaturalis per se infusus, vel acquisitus. Quæst. 22. vtrum charitas sit virtus theologica. Qu. 23. vtrum existentia habitus charitatis sit certa ex fide. Qu. 24. num. 4. & 9. vtrum habitus charitatis producat, vel augeatur per actus, vel à solo Deo. Qu. 53. num. 1. 14. & seqq. vtrum habitus gratiae, & charitatis augeantur non solum per actus charitatis intensiores habitu, sed etiam per remissiores, immo per quoslibet actus supernaturales cuiuscunque intensiois: & vtrum hoc augmentum

tum conferatur statim. Qu. 24. vtrum habitus infusus charitatis distinguatur ab habitibus infusis virtutum moralium . Qu. 27. vtrum habitus infusus charitatis distinguatur à Gratia sanctificante. Plura etiam examinauimus circa actum charitatis. Nam lib. 2. de Deo qu. 60. examinauimus, vtrum possit dari vera amicitia inter Deum, & hominem. Lib. 5. de Gratia q. 26. n. 2. & 14. vtrum, & quo pacto amor supernaturalis charitatis differat ex obiecto formali ab amore Dei purè naturali. Qu. 30. vtrum actus perfectæ charitatis sit forma iustificans, vel pura dispositio ad iustificationem . Eadem qu. 30. num. 23. & sequ. vtrum actus perfectæ charitatis sit essentialiter inconiungibilis cum peccato mortali, tùm actuali, tùm habituali. Qu. 42. vtrum ad hoc, vt actus supernaturales sunt meritorij de condigno vitæ æternæ, debeant esse elicit, vel imperati à charitate . Lib. 4. de Actibus Humanis qu. 4. num. 28. & seqq. vtrum actus charitatis in via sit perfectior actu fidei, & tamen actus charitatis in patria sit imperfectior visione beatifica, & habitus charitatis sit imperfectior lumine Gloriæ . Eodem lib. 4. qu. 5. num. 29. & 30. vtrum amor beatificus Patris sit eiusdem rationis, ac speciei cum amore viri.

Q V A E S T I O XXXVII.

Vtrum Charitas sit Virtus Theologica amandi Deum super omnia amoris, amicitiae, propter summam benitatem, qua Deus est summè bonus, & perfectus in se?

1. **P**rimò videtur Charitas non esse virtus. Amicitia enim ex doctrina Aristotelis 8. Ethic. cap. 1. non recensetur inter virtutes; sed charitas est amicitia hominis cum Deo; ergo &c.

2. Secundò videtur non esse virtus theologica. Ad virtutem enim theologicam requiritur, ut eius obiectum formale adæquatum non innotescat per lumen naturæ; sed obiectum formale adæquatum charitatis est, quod Deus sit infinitè bonus, & perfectus in se: hoc autem innotescit per lumen naturæ; ergo &c.

3. Tercio videtur charitas non esse virtus amandi Deum super omnia, etiam supranos ipsos. Si enim per actum charitatis amaremus Deum magis, quam nos ipsos, actus charitatis non posset coniungi cum actu spei. Probatur sequela: nam per actum spei volumus Deum nobis, adeoque amamus Deum ut finem *qui*, nos autem ut finem *cui*; sed magis amatur finis *cui*, quam finis *qui*; ergo per actum spei magis amamus nos ipsos, quam Deum; sed non possumus eodem tempore per vnum actum
amare

amare Deum magis, quam nos, per alium magis amare nos, quam Deum; ergo &c.

4. Respondeo supponere nos ex dictis Lib. 2. qu. 60. de Deo, dari posse amicitiam inter hominem, & Deum. Hoc supposito, quandoquidem charitas est habitus amandi Deum amore amicitiae, habitus autem explicantur per actus, explicandum est, qualis sit actus, quo homo perfecte diligit Deum amore amicitiae in ordine ad supernaturalem participationem vitae aeternae?

5. Primò igitur actus charitatis est amor benevolentiae erga Deum, non autem est amor solius concupiscentiae. Quia verò ad amorem benevolentiae requiritur, ut amico velimus bona propter ipsum amicum, & non solum propter nostram utilitatem, ideo per actum charitatis volumus Deo bona propter ipsum Deum, & non solum propter nostram utilitatem, ac proinde Deum amamus ut finem *cui*, & non solum ut finem *qui*, hoc est ut bonum nobis volitum.

6. Secundò amor charitatis est amor non solius benevolentiae, sed amicitiae. Et quia ex Aristotele 8. Ethic. cap. 2. amor solius benevolentiae est, quo amamus alterum, non scientes nos redamari, amor autem amicitiae est, quo amamus alterum, scientes nos redamari, ideo per amorem charitatis amamus Deum ex fide, qua certissime credimus Deum diligere diligentes se.

7. Tertiò amor charitatis ordinatur ad conuiuendum, & communicandum cum Deo in vita aeterna, & supernaturali; sed

lum Deū, nullam creaturā, neque nos ipsos possumus licitè diligere super omnia, sed nos ipsos, & quamlibet creaturam debemus diligere infra Deum. Ratio est, quia qui ita vult sibi, vel alteri bona, vt non velit voluntate omnino absoluta, sed solum in quantum non sunt contra bonum, & voluntatem Dei, non amat se ipsum, vel alterum super omnia, sed infra Deum; sed non possumus licitè nobis, vel alijs creaturis velle bona, nisi in quantum non sunt contra bonum, & voluntatem Dei, & hæc limitatio debet saltem virtualiter includi in omni amore deliberato, quo nobis, vel alijs volumus bona; ergo &c.

10. Sextò ex dictis concludi potest, quid sit perfectus amor charitatis. Dicendum, quod est amor, quo ex cognitione certa, qua præcognoscimus Deum esse summè bonum, & nos prius diligere, offerendo nobis suam amicitiam, & communicationem vitæ æternæ, illum redamamus, quia est summè bonus, volendo voluntate absoluta, & efficaci nos illi dare in amicos perpetuos in ordine ad communicationem vitæ æternæ, & facere omnia, quæ necessaria sunt, ne Deus offensus amicitiam rescindat. Breuius potest definiri: redemptio efficax Dei vt amici, in ordine ad communicationem vitæ æternæ, actiua omnium, quæ necessaria sunt, ne Deus offensus amicitiam rescindat. Amor Dei habens hæc prædicata est substantialiter perfectus, atque omni tempore fuit sufficiens ad iustificandum, & ad obtinendam re-

remissionem omnium peccatorum, licet possit accidentaliter esse perfectior, tum intensiue, quia potest esse intensior, & intensior; tum duratiue, quia potest durare magis, & magis; tum actiue, quia potest esse efficaciter actius non solum obseruantie totius legis primariæ, sed etiam secundariæ, & plurium, ac plurium spectantium ad promouenda bona extrinseca Dei, nimirum eius gloriam, salutem animarum &c. Desumpta est hæc doctrina ex S. Thoma 2.2. qu. 23. art. 1. & qu. 24. art. 12. in quibus ad perfectum amorem charitatis requiritur conditiones à nobis explicatas.

II. Infertur primò, quodnam sit obiectum formale charitatis? Dicendum, quod obiectum formale charitatis est summa bonitas, in quantum per illam Deus est infinite bonus, & perfectus in se bonitate etiam amicabili. Obiectum formale spei, quatenus spes ex sua ratione generica est amor concupiscentiæ, est eadem summa bonitas, quatenus per illam Deus est bonus nobis, & est nostra beatitudo supernaturalis. Ratio est, quia cum quæritur, quare amemus Deum amore charitatis? Respondemus, quia est infinite bonus, & perfectus in se bonitate etiam amicabili dum quæritur, quare amemus Deum amore concupiscentiæ, itaut velimus Deum possidere? Respondemus, quia est bonum beatificans eos, qui possident ipsum; ergo &c. Hinc sequitur per amorē charitatis amari Deū, ut finem *cui*, per amorem concupiscentiæ amari Deum ut finem *qui*, nos ipsos ut finem *cui*.
Infer-

12. Infertur secundò obiectum formale charitatis non innotescere per lumen naturæ, sed per lumen fidei. Ratio est, quia per amorem charitatis diligimus Deum, quia est infinitè bonus, & perfectus in se bonitate etiam amicabili, qua dignatur offerre nobis suam amicitiam in ordine ad communicationem supernaturalem vitæ æternæ; sed quod Deus habeat perfectionem amicabilitatis, qua possit facere amicitiam cum creatura, non innotescit per lumen naturæ, sed per lumen fidei; ergo &c. Licet autem in pura natura posset homo diligere Deum amore merè naturali, tamen talis amor ex obiecto formali differret ab amore supernaturali charitatis. Nam per amorem charitatis amamus Deum, quia est infinitè bonus bonitate etiam amicabili, & vt amicum; per amorem naturalem amaremus Deum, quia est infinitè bonus bonitate abstrahente ab amicabilitate, quæ amicabilitas non innotesceret per lumen naturæ.

13. Ad 1. Aristoteles non negat amicitiam esse virtutem, sed solum dicit amicitiam vel esse virtutem, vel cum virtute. Potest igitur dici amicitiam in genere esse virtutem redamandi alterum, prout recta ratio prescribit, illique præstandi amabilia. Cum ergo recta ratio, & fides præscribat Deum amandum esse super omnia, eique præstandum cultum, laudem, obseruantiam præceptorum &c, Charitas est virtus theologica amandi Deum super omnia, eique præstandi cultum &c.

Ad

14. Ad 2. Iam dictum est obiectum formale charitatis esse Deum ut infinite bonum etiam bonitate amicabile, quæ non innotescit per lumen naturæ; ergo obiectum formale charitatis non innotescit per lumen naturæ.

15. Ad 3. nego sequelam. Ad probationem, distinguo maiorem: per actum spei amamus Deum ut finem *qui*, nos autem ut finem *cui* ultimum, nego: amamus nos ut finem *cui* non ultimum amore actu, vel potentia ordinato ad Deum ut finem *cui* ultimum, concedo: distinguo eodem pacto minorem; & nego consequentiam. Si amaremus nos ipsos ut finem *cui* ultimum, Deum autem ut finem *qui*, procul dubio amaremus nos magis, quam Deum, & sic amaremus nos amore inordinato, & graviter peccaminoso, & inconiungibili cum actu charitatis. Si autem amemus Deum ut finem *qui*, nos autem ut finem *cui* non ultimum, amore, quo actu, vel potentia ordinemus nos ipsos ad Deum, ut ultimum finem *cui*, non amamus nos magis, quam Deum. Per amorem spei amamus Deum ut finem *qui*, nos autem ut finem *cui* non ultimum, amore actu, vel potentia ordinato ad Deum, tamquam ad ultimum finem *cui*, adeoque non amamus nos magis, quam Deum, neque amamus nos amore inconiungibili cum actu charitatis. Addo, quod per omnes virtutes morales amamus quidem nos ut finem *cui*, sed non ultimum, amore actu, vel potentia ordinato ad Deum ut ultimum finem *cui*, adeoque coniungibili cum actu charitatis.

QVÆ.

Q V A E S T I O XXXXVIII.

Utrum ex Charitate Theologica possimus, ac debeamus amare non solum Deum, sed etiam nos ipsos, & proximum amore benevolentiae, & amicitiae?

1. **V**Idetur, quod non : primò quia ad charitatem theologicam requiritur, ut habeat pro fine *cui* adæquato solum Deum, non autem creaturam; sed ad amorem benevolentiae, & amicitiae requiritur, ut habeat pro fine *cui* Personam dilectam; ergo per charitatem theologicam non possumus amare ullam creaturam amore benevolentiae, & amicitiae: alioquin haberemus pro fine *cui* etiam creaturam quod est contra rationem charitatis.

2. Secundo sicut proximus est diligendus propter Deum, sic est honorandus propter Deum; sed proximus non est honorandus eodem honore, ac Deus: nam Deus est honorandus honore patriæ, proximus honore civitatis, qui est inferior honore patriæ; ergo Deus, & proximus non sunt diligendi eadem dilectione, sed Deus est diligendus dilectione theologica, proximus dilectione inferiori, non theologica, sed morali.

3. Tertiò eatenus deberemus proximum diligere ex charitate theologica, quatenus pro-

proximus est aliquid Dei; sed etiam creaturæ irrationales, ac Dæmones sunt aliquid Dei; ergo etiam creaturas rationales ac ipsos Dæmones deberemus ex charitate diligere: quod est absurdum.

4. Respondeo, quod ex charitate theologica, qua Deum super omnia diligimus, possumus, & debemus diligere amore benevolentiae, & amicitiae nos ipsos, & proximum, sicut nos ipsos, ut docent omnes Theologi cum S. Thoma 2.2. qu. 21. art. 1.

Probatur: nam qui diligit aliquem, debet ex amore ipsius diligere omnes, qui sunt vnum cum illo, actu, vel ordinatione, & vnumquemque debet diligere amore ipsi proportionato: E. G. qui diligit aliquem hominem, ex amore ipsius debet diligere omnes, qui sunt moraliter vnum cum illo, puta eius uxorem, filios, fratres, seruos &c. qui sunt vnum cum illo, in quantum cum eo constituunt vnā familiam, ac magis debet diligere eos, qui magis sunt vnum cum illo, quam qui minus, puta magis debet diligere filios, quam seruos &c. Præterea non solum debet diligere omnes, qui actu sunt vnum cum illo, sed etiam qui sunt vnum ordinatione: E. G. si ille aliquos ordinauerit ad hoc, ut per adoptionem fiant eius filij, debet etiam illos diligere; sed nos per charitatem diligimus Deum super omnia; ergo ex amore Dei debemus diligere omnes, qui sunt vnū cum Deo, vel ordinantur ad hoc, ut sint vnū cum Deo; sed nos ipsi, & proximi vel sumus filij Dei adoptiui, & sic adhæremus Deo

Deo per gratiam, & charitatem, ac sumus vnum cum Deo, iuxta illud 1. ad Cor. 6. *Qui adheret, Deo vnus spiritus est*, vel ordinamur ad hoc, vt simus filij adoptiui Dei, & per adoptionem simus vnum cum Deo, vt à Patre petijt Christus Io. 17. dicens: *Vt sint vnum, sicut & nos vnum sumus. Ego in eis, & tu in me vt sint consummati in vnum*; ergo ex amore Dei debemus diligere nos ipsos, & proximos.

5. Infertur primò, quod per charitatem nos ipsos, & proximos non solum debemus diligere propter Deum, sed etiam in Deo. Ratio est, quia per charitatem debemus nos, & proximos diligere in quantum actu, vel aptitudine sumus vnum cum Deo per gratiam; sed hoc est diligere nos, & proximos in Deo; ergo &c.

6. Infertur secundò, quod diuerso modo debemus per charitatem diligere iustos ac peccatores, viatores, ac beatos. Nam iustos viatores debemus diligere, in quantum per gratiam sunt actu vnum cum Deo, ad hoc vt in gratia crescant, & ad beatitudinem perueniant, & sic semper fiant magis vnum cum Deo: peccatores debemus diligere, in quantum sunt apti ad hoc, vt per gratiam sint vnum cum Deo, vt fiant actu vnum cum Deo: iustos beatos debemus diligere, in quantum per gratiam consummatam, & beatitudinē sunt perfectē vnum cum Deo, & eos, qui sunt magis vnum debemus magis diligere.

7. Infertur tertio, quod per charitatem debemus nos ipsos, & proximos diligere amo-

amore benevolentiae, & amicitiae. Ratio est, quia ut dictum est lib. 2. de Deo qu. 60. ad amorem benevolentiae, & amicitiae sufficit, ut amicus diligatur ut finis *cui* utilitatis, licet non ametur ut ultimus finis *cui*, sed referatur ad alterum finem *cui*, non quidem utilitatis, sed solius gloriae. Ideo licet Deus amet creaturas rationales propter se ipsum, tanquam propter ultimum finem *cui* gloriae, tamen quia illas amat propter ipsas, tanquam propter finem *cui* totius utilitatis, amat creaturas rationales amore benevolentiae, & amicitiae, ac inter Deum, & hominem potest dari perfecta amicitia; sed licet per charitatem amemus nos ipsos, & proximos propter Deum, tanquam propter ultimum finem gloriae amamus nos, & proximos propter nos ipsos, tanquam propter fines *cui* totius utilitatis; ergo &c.

8. Infertur quarto, quod per charitatem possumus, ac debemus diligere etiam Angelos Sanctos amore benevolentiae, & amicitiae.

9. Infertur quinto, quod per charitatem possumus, ac debemus diligere etiam creaturas irracionales, non tamen ut fines *cui*, & amore benevolentiae, seu amicitiae, cuius sunt incapaces, sed solum ut fines qui, hoc est ut bona Dei, & creaturarum rationalium, in quantum nimirum conferunt ad diuinam gloriam, & ad utilitatem, & beatitudinem creaturarum rationalium.

10. Infertur sexto, quod per charitatem Dæmones, ac damnatos non possumus dili-

diligere amore benevolentia, & amicitia, & vt finem cui, volendo ipsis bonum beatitudinis, & vitæ æternæ, quod charitas respicit. Ratio est, quia cum certi simus Deum nolle illis dare hoc bonum, sed velle ex iustitia punire illos malo æternæ miseria, non debemus velle illis bonum beatitudinis, sed debemus velle, vt in ipsis impleatur diuina iustitia. Possumus tamen aliquo pacto *naturam Demonum ex charitate diligere, in quantum volumus illos spiritus in suis naturalibus conseruari ad gloriam Dei*, vt loquitur S. Thom. 2. 2. q. 23. art. 11. in corp.

11. Infertur septimo, quid dicendum in quæstione, in qua quæritur, vtum amor charitatis, quo diligitur solus Deus, sit eiusdæ speciei, ac quo diligitur etiam proximus. Respondco, quod est eiusdem speciei theologicæ, & moralis propter idem obiectum formale, quidquid sit, an logicè sit eiusdem, vel diuersæ speciei.

12. Infertur octauo amorem, quo aliquis amatur propter suam bonitatem intrinsecam supernaturalem, tamquam propter immediatum motinum, non esse charitatem theologicam, sed solum moralem, vt docet Suar. Disp. 1. de Charitate Sect. 3. num. 6.

13. Ad 1. Distinguo maiorem: ad Charitatem theologicam requiritur, vt habeat pro fine vltimo adæquato solum Deum, concedo; vt habeat etiam pro fine non vltimo, & solius vtilitatis, nego: distingo eodem pacto minorem: & nego consequentiam. Vide dicta num. 8.

Ad

Ad 2. Ex S. Thoma 2.2. qu. 25. art. 1. ad 2. Honor est testimonium virtutis honorati, ideoque de ratione honoris est, ut deferatur propter virtutem honorati; sed virtus Dei, & virtus creaturæ differunt non solum specie, sed genere: nam virtus Dei est increata, virtus creaturæ est creata; ergo honor, qui debetur, & datur Deo, differt non solum specie, sed genere ab honore, qui debetur, & datur creaturæ, & honor, qui debetur Deo, propter virtutem, & excellentiam increatam, est honor latriæ, honor, qui debetur, & datur creaturæ, est honor dulciæ. At amor potest alicui deberi, non solum propter bonitatem propriam, sed etiam propter bonitatem alterius, ad quem pertineat; ergo creatura rationalis potest amari propter bonitatem diuinam; sed si ametur propter bonitatem diuinam, amatur amore charitatis; ergo eodem amore charitatis potest amari creatura rationalis propter Deum, & Deus propter se ipsum.

Ad 3. Num. 10. & 11. explicatum est, quo pacto ex charitate possimus amare creaturas irrationales, non ut fines *cui*, sed ut fines *qui*, & etiam Dæmones, volendo illos in suis naturalibus conseruari ad gloriam Dei.

F I N I S.

A B C D E F G H I K L M N O P Q R S T V X Y.



72

